


জাগরী



সতীনাথ ভাদুড়ী

সমবায় পাবলিশার্স : কলিকাতা

প্রাপ্তিস্থান

বুক স্টোর, ৭২, হারিসন রোড, (কলেজ স্কয়ার ইন্ট) কলিকাতা

প্রকাশক—মহানন্দ সরকার
সমবায় পাবলিশাস
৩৩-২, শশিভূষণ দে ষ্ট্রীট, কলিকাতা

জাগরী

দ্বিতীয় মুদ্রণ—আশ্বিন, ১৩৫৩

মূল্য বাঁধাই ৪৯, সাধারণ ৩।০

মুদ্রাকর—বামিনী মোহন বোস
পপুলার প্রিন্টিং ওয়ার্কস
৪৭, মধু রায় লেন, কলিকাতা

ভূমিকা

রাজনৈতিক জাগৃতির সঙ্গে সঙ্গে বিভিন্ন রাজনৈতিক মতবাদের সংঘাত অবশ্যস্বাভাবী। এই আলোড়নের তরঙ্গবিক্ষোভ কোনো কোনো স্থলে পারিবারিক জীবনের ভিত্তিতেও আঘাত করিতেছে।—এইরূপ একটি পরিবারের কাহিনী।

গল্পটি ১৯৪২ সালের আগষ্ট-আন্দোলনের পটভূমিকায় পড়িতে হইবে। কোনো রাজনৈতিক দলের বিরুদ্ধে প্রচার করা বইখানির উদ্দেশ্য নয়।

স্থানীয় বর্ণ-বৈচিত্র্য ফুটাইয়া তুলিবার জন্য অনেক স্থলে হিন্দী শব্দ ব্যবহার করিয়াছি। পরিশিষ্টে যথাসম্ভব বাংলা তর্জমা দেওয়া রহিল। ছাপা কার্যের অনবধানতায় যদি কিছু ত্রুটি পরিলক্ষিত হয়, আশা করি পাঠকবর্গ মার্জনা করিবেন।

সতীনাথ ভাদুড়ী

সূচী

পরিচ্ছেদ	পৃষ্ঠা
কাম জেল—বিলু	১
আপার ডিভিসন ওয়ার্ড—বাবা	১৭
আওরৎ কিতা—মা	১৩৯
জেল গেট—নিবু	১৯৫

উৎসর্গ

যে সকল অখ্যাতনামা রাজনৈতিক কর্মীর
কর্মনিষ্ঠা ও স্বার্থত্যাগের বিবরণ,
জাতীয় ইতিহাসে কোনোদিনই লিখিত হইবে না,
তাঁহাদের স্মৃতির উদ্দেশে—

ফাঁসী সেল
(বিল)

ফাঁসী সেল

দুই নম্বর ওয়ার্ডের অশথ গাছটির উপরের শাখাটিতে গোধূলের ঝান আলো চিক্‌চিক্‌ করিতেছে। অনেকগুলি পাখী একবার এ ডালে একবার ও ডালে ঘাইতেছে। এক দণ্ডও বিশ্রাম নাই। কিছুক্ষণের মধ্যেই তো চতুর্দিক অন্ধকারে ঢাকিয়া যাইবে। তাহার পর সারারাত নিব্বুনের পান্না ;—তাই বোধহয় শেষ মুহূর্তের এই চঞ্চলতা, এত ডানা ঝটপটানি, এত আনন্দ উৎসব—যতটুকু আনন্দ সময়ের নিকট হইতে ছিনাইয়া লওয়া যায়। সত্যই কি পাখীগুলি এই জন্ত সন্ধ্যার সময় এত চঞ্চল হয়? এই সেলে আসিবার আগে, দুই নম্বর ওয়ার্ডে যখন ছিলাম, প্রত্যহ সন্ধ্যায় লক-আপের পূর্বে আমরাও সকলে বাহিরের খোলা হাওয়া খানিকটা খাইয়া লইতাম। সত্যই কি দরকারের জন্ত? না। হয়ত ঘরের মধ্যে বসিয়া আছি। কোন দরকার নাই বাহিরে আসিবার। তথাপি বাহিরে একবার আসা চাই-ই। বেশীর ভাগ রাজবন্দীরই তো এই মনোবৃত্তি দেখিতাম। ওয়ার্ডাররা বিরক্ত হইত, নিজেদের মধ্যে কি সব বলাবলি করিত—ভাবটা এই যে স্বরাজীরা তাহাদের ইচ্ছা করিয়া জ্বালাতন করে। কিন্তু কেহই ওয়ার্ডারদের বিরক্ত করার জন্ত এ কাজ করিত না। যতটুকু উপভোগ করিয়া লওয়া যায় তাহা কেহ ছাড়িবে কেন?

ওগুলি বোধহয় কাক—এত দূর হইতে ঠিক চেনা যায় না।...পাখীরা কিন্তু রাত্রেও ডানা ঝটফট করে।.....

সেই একবার বকড়ীকোলে মিটিং করিয়া ফিরিবার সময় কামাখ্যাখানের বটগাছটির নীচে আমাদের সারারাত থাকিতে হইয়াছিল। এখানকার মাটিতে শুইয়া থাকিলে নাকি কুষ্ঠরোগ সারিয়া যায়। দূর দূরান্তর হইতে কতলোক এই উদ্দেশ্যে এখানে আসে। অনেকগুলি কুষ্ঠরোগী আশপাশের গাছগুলির নীচে শুইয়া রহিয়াছে। ছিলাম আমি আর নিলু; আর সঙ্গে ছিল বোধহয় সহদেও। সারারাত পাখীর ডানা নাড়ার সে কি শব্দ! গাছতলায় তিনজন পাশাপাশি শুইয়া আছি। এই গাছতলায় আস্তানা লওয়ার জন্য নিলুকে যেন একটু বিরক্ত মনে হইল। আমি জিজ্ঞাসা করিলাম “এগুলো এমন ডানা ঝটপট করছে কেন বলতে পারিস?” নিলু বলিল “পিপড়ে টিপড়ে কামড়ায় বোধহয়। উহার ভাবিতে সময়ও লাগে না। সব বিষয়েই উহার স্থির মত আছে। সে মতের সহজে নড়চড়ও হয় না। চিরকাল নিলুটা ঐ রকম।... ..

সন্ধ্যার লালিমা ধূসর হইয়া আসিতেছে। অশ্রু গাছের ডগাটিতে সিঁদুরে আকাশের আভা লাগিয়াছে। গাছের পাতাগুলি আর ঠিক সবুজ বলিয়া ধরা যাইতেছে না। বাকু, গাছের পাতার সবুজটা গেল—ঐ একটু সবুজ তো এখান হইতে দেখা যাইত। এছাড়া দেখা যায় এক ফালি নীল আকাশ—লোহার গরাদের মধ্য দিয়া—লোহার তারের টোস্টারের মধ্যে এক শ্লাইস পাঁউরুটির মতো; সেলের বাসিন্দার কাছে সেই রকমই বাস্তব, - সি ক্লাস বন্দীর ডায়েটের চাইতে তৃপ্তিকর। আর দেখা যায় জেল ‘শুমটার’ (১) উপরতলা—তাহার দেওয়ালে বড় বড় অক্ষরে ইংরাজীতে লেখা—পূর্ণিমা সেন্ট্রাল জেল, বিহার। আকাশের ঐ ফালিটুকু আমার একান্ত আপন—ও যে আমার নিজস্ব জিনিষ। যতক্ষণ দেখা যায় ঐ স্বচ্ছ নীল রং দেখিয়া লইয়াছি। এমন করিয়া, আমার মতো করিয়া, আকাশের ঠিক ঐ অংশটুকুকে কি আর কেহ পাইয়াছে? আমার নীল আকাশ মুহূর্তে মুহূর্তে রূপ বদলাইতেছে। সিঁদুরে রং বেগুনী হইয়া উঠিল,—দেখিতে দেখিতে ধূসর হইয়া উঠিতেছে—আবার এখনই জমাট অন্ধকারে ডুবিয়া যাইবে।

এমন বৈচিত্রনয় রঙ্গের উৎসকে জেলর সাহেব একজন সর্কহারী বন্দীর ব্যক্তিগত সম্পত্তি করিতে কেন যে দিরাহেন, তাহা ভাবিয়া ঠিক করিতে পারি না। বোধহয় তাঁহারা জানেন না—জানিতে পারিলে হয়তো কাল হইতেই রাজমিন্দী কম্যাণ্ডের (২) কয়েদীদিগকে, আমার সম্মুখের প্রাচীর আরও উঁচু করিবার কাজ দেওয়া হইবে—হুকুম হইবে “ওর উঁচা, ওর ভী উঁচা, জরুরং পড়ে তো, আসমান তক্ ভিড়া দো” (৩)—ঐ গাছের সবুজটুকু, ও আকাশের টুকরোটা ছাড়া, এখান হইতে যাহা কিছু দেখা যায়, তাহা কেবল লোহা, ইট আর সিমেন্ট—সিমেন্ট ইট, আর লোহা। উহা চক্ষুকে প্রলুব্ধ করে না—দৃষ্টিকে প্রতিহত করে মাত্র, তাহাকে ঠিকরাইয়া ফিরাইয়া দেয়। ঐ সবুজ আর নীল ছাড়া, আর যে কোন রংই দেখি, সবই রুক্ষ ও কঠোর মনে হয়—চক্ষুকে পীড়া দেয়। মেলের চুনকান করা নানা দেওয়াল, তাহাও বড় প্রাণহীন. বড়ই পাণ্ডুর। তাহার উপর কতদিন চুনকাম করা হয় নাই কে জানে! দেওয়াল ভরিয়া নানারকম দাগ—খুঁখুর দাগই বেশী—কেনন বেন পাঁশুটে রং—বোধহয় আমার পূর্বের কোন বাসিন্দাকে সিপাহীজিরা ‘খয়নি’ খাওয়াইয়াছিল। সে কবে সব ছাড়িয়া কোন অজানা দেশে চলিয়া গিয়াছে,— কেবল রাখিয়া গিয়াছে দেওয়ালে সিপাহীজিদের প্রতি কৃতজ্ঞতার ছাপ।……

কথা বলিবার লোক নাই। সেইজন্য মেলের বাহিরের জেল-জগতের সহিত সম্বন্ধ কান দিয়া। কথা বলিতে পারি একমাত্র ওয়ার্ডারের সঙ্গে—তাহাও ভাল লাগে না। চারিদিকে দেওয়াল। যে দিকে তাকাও দৃষ্টি দেওয়ালে প্রতিহত হইয়া ফিরাইয়া আসে, কিন্তু সর্বদা উৎকর্ণ হইয়া থাকি, যদি বাহির হইতে কিছু শোনা যায়। ষোল পা লম্বা, দশ পা চওড়া ঘর। সম্মুখের দিকে মোটা লোহার গরাদের দরজা। দক্ষিণ দেওয়ালে ছাতের কাছাকাছি একটি ছোট গবাক্স। তাহারই নীচে, মেঝের সঙ্গে, একহাত চওড়া ও দেড়হাত লম্বা দুইখানি মোটা লোহার পাত দেওয়ালে বসানো। ইহাতে কতগুলি ছিদ্র আছে। ইহার প্রয়োজন কি তাহা জানি না—বোধহয় বাতাস আসিবার জন্য! কিম্বা বোধহয় এই ছিদ্রপথে বাহিরের ওয়ার্ডার শুনিতে পায় কয়েদী কি বলিতেছে। সম্মুখের

গরাদেব দরজার নিকট তো একজন ওয়ার্ডার থাকেই—সে তো কয়েদী কি করিতেছে না করিতেছে, তাহা সম্পূর্ণ পরিষ্কার ভাবেই দেখিতে পায়। তবুও কেন এই ব্যবস্থা বলিতে পারি না। ঘরের আসবাবের মধ্যে দুইটি আলকাতরা মাথানো মাটির মাগসা (স্থানীয় জেলের ভাষায় ‘টোকড়ী’) (৪) এককোণে রাখা রহিয়াছে। ঐ কোণটিতে মেঝে চুনকাম করা—বৃত্তের চতুর্থাংশের আকারে। সেলের বাহিরে গবাক্ষের দিকের দেওয়ালের পাশ দিয়া গিয়াছে একটি চওড়া পাকা রাস্তা। রাস্তাটি বৃত্তাকারে জেলের সব ওয়ার্ডগুলিকে ঘিরিয়া আছে। এই রাস্তার অপর পারে জেল হাসপাতালের প্রাচীর। এই রাস্তাটি দিয়া কত লোক যাতায়াত করে—কত কয়েদী, ওয়ার্ডার, ডাক্তার, কম্পাউণ্ডার, ঠিকদার, অফিসার, মিস্ত্রী—আরও কত লোক। দিনের বেলা বেশ জনবহুল মফঃস্বল সহরের রাস্তার মতো মনে হয়। আর এই বিরাট পূর্ণিয়া সেন্ট্রাল জেল—সহর হইতে কম কিসে? সাধারণ সময় থাকে প্রায় পঁচিশ শত কয়েদী। আর এখন—১৯৪৩ সালের মে মাসে আছে সাড়ে চার হাজার। আরও বাড়ে না কেন তাহাই আশ্চর্য। বাহিরে না থাইতে পাইয়া পথে ঘাটে মরিয়া পড়িয়া থাকিবে—তথাপি আমাদের দেশের লোক এমন কিছু করিবেনা, যাহাতে তাহাদের জেলে আসিতে হয়। একবার ‘ইনকিলাব জিন্দাবাদ’ বলিলে, বা ময়রার দোকান হইতে একমুঠা খাবার তুলিয়া লইলে যদি ছয় মাসের মতো অন্নজন ও মাথা গুজিবার স্থানের বন্দোবস্ত হইয়া যায়—তবে না থাইয়া মরিবার প্রয়োজন কি?.....সাড়ে... চার...হাজার!...কোন সহরে পাঁচ হাজার লোকের বসতি হইলেই, তাহা ম্যুনিসিপ্যালিটি বলিয়া গণ্য হইতে পারে। জেলও যেন একটি ছোটখাটো সহর। এই সহরের নাম লৌহগরাদ হইলে বেশ হয়,—ঠিক লেনিনগ্রাদের মতো শুনিতে লাগে।লোহার পাতের ছিদ্রপথে কান দিয়া বসিয়া থাকি। মাহুষের গলার স্বর এত মিষ্ট লাগে। জেলের পলিটিক্স, জেলের বাহিরে পলিটিক্স, সব এখানে বসিয়া থাকিলে জানিতে পারা যায়;—সুপারিন্টেন্ডেন্টের সহিত জেলের বাবুর বনিবনা হইতেছে না, হেড জমাদারকে জেলের বাবু ‘আপ’ বলেন, না ‘তুম’ বলেন, জাপানীদের রূগ কৌশলের কথা,

জেলে কয়েদীর সংখ্যাধিক্যের জন্ত কত কয়েদীকে ছাড়িয়া দেওয়া হইবে (জেলের ভাষায় 'ছাঁটাইয়া'), বন্দীর জেলস্টাফ দল পাকাইয়া বিহারী জেল-কর্মচারীদেরকে কোণঠাসা করিবার চেষ্টা করিতেছে—এই সব কথা—আরও কত কথা কানে ভাসিয়া আসে। রাজবন্দীদের উপর সেদিনকার লাঠিচার্জ হওয়ার পর, কয়বার হাসপাতালে স্ট্রুচার আসিল গেল, তাহার হিসাব করা গিয়াছিল এইখানে বসিয়াই। বন বন লোহার শব্দ শুনিতেই বুঝিতে পারি যে, যে কয়েদীটি যাইতেছে তাহার 'বার ফেটাসের' (স্থানীয় ভাষায় 'ডাঙাবেড়ী') সাজা হইয়াছে, বোধহয় সে কোন জেল-কর্মচারীর ছকুম অমান্ত করিয়াছিল।.....

কি মশা ! সন্ধ্যা হইলে আর কি রক্ষা আছে ! সেদিন সুপারিন্টেন্ডেন্ট আসিয়া জিজ্ঞাসা করিয়াছিলেন—কোন জিনিষপত্রের দরকার আছে কি না ; অর্থাৎ যাহা চাও সম্ভব হইলে দিব। ছোট বেনা হইতে শুনিয়া আসিতেছি যে ফাঁসীর আসামীকে এইরূপ জিজ্ঞাসা করে ; আর অধিকাংশ লোকই ভাল খাবার-টাবার খাইতে চায়। নূতন সুপারিন্টেন্ডেন্টও কি আমার নিকট হইতে ঐরূপ প্রার্থনা আশা করিয়াছিলেন নাকি ? আমার খুব লোভ হইয়াছিল, একটা মশারীর কথা বলিতে—যে কয়দিন আন্ডামে ঘুমাইয়া লওয়া যায়, কিন্তু বলিবার সময় বলিতে পারিলাম না। কেমন বেন আত্মসম্মানে আঘাত লাগিতে লাগিল। বলিলাম "ধন্যবাদ, আমি বেশ আরাধেই আছি। কোন জিনিষের দরকার নাই।" ওয়ার্ডারটা পরে আমাকে বলিয়াছিল—“উড়িয়ার কোন করদরাজ্যের দুজন 'স্বরাজী' বাবুর এই জেলে ফাঁসী হইয়াছিল—একজন ছিল আপনার এই এক নম্বর সেনে, আর একজন দুই নম্বরে—তাহারা সাহেব মারিয়াছিল, একদম জানুসে—পাঁচসালকী বাৎ—তাহারা নাকি ফাঁসীর আগের দিন অনেকগুলি করিয়া মুর্গীর আঙা ভাজিয়া খাইয়াছিল। তাহার পর রাত্রে ইনকিলাব জিন্দাবাদ আরও কি কি নারা (৫) লাগাইতে থাকে। শেষ মুহূর্ত্ত পর্যন্ত তাহারা নারা লাগায়। সে রাত্রে কোন কয়েদী ঘুমাইতে পারে নাই। আপনিও যে জিনিষ খাইতে ইচ্ছা করেন চাহিলেন না কেন ?”

ওয়ার্ডারের কথা অবিশ্বাস করি নাই। কিন্তু তাহার উপদেশ মনে ধরে নাই। এই ওয়ার্ডাররা অশিক্ষিত; সুবিধা পাইলেই চুরি করে; কয়েদীদের উপর প্রভুত্ব ফলায়। দুর্বলচিত্ত কয়েদীদের উপর অমানুষিক অত্যাচার করে। কিন্তু রাশভারী কয়েদীদের সমীহ করিয়া চলে। ইহারা সরল কথার লোক—কথার মারপ্যাচ বোঝে না—মৌজন্তুর ধার ধারে না। সুপারিন্টেন্ডেন্ট প্রভৃতি সকলেই শিষ্টাচারের খাতিরে আমার সম্মুখে ফাঁসী বা তৎসংক্রান্ত কোন বিষয়ের উল্লেখ করেন না। কিন্তু ইহারা প্রত্যেকেই দুই একটি কথা বলিবার পরই ফাঁসীর কথা উল্লেখ করে। প্রথম কয়েকদিন কথাটা শুনিলেই কেমন বুকের ভিতর ছাঁৎ করিয়া উঠিত—একটু যেন নিজেকে দুর্বল দুর্বল মনে হইত—কেমন যেন আনমনা হইয়া যাইতাম। ফাঁসীর সমস্ত দৃশ্য আমার চোখের সম্মুখে ভাসিয়া উঠিত। হয়তো আমার ফাঁসীর ছকুম বদ হইয়া যাইবে—এই বলিয়া নিজের মনকে প্রবোধ দিতে হইত। দিন কয়েকের মধ্যে ঐ সকল কথা সহিয়া গেল। আর এখন ও-কথার কিছু মনে হয় না। সেনের ঠিক পশ্চিমেই ফাঁসীর মঞ্চ। ওয়ার্ডাররাই আসিয়া খবর দেয়—আজ ফাঁসীকাঠে কালো রং দিয়াছে—আজ দড়ির সহিত আমার ওজনের একটা বালির বস্তা বাঁধিয়া দড়িটা ঠিক মজবুত কিনা তাহার পরীক্ষা করা হইতেছে;—আরও কত এই রকম খবর।

আশ্চর্য্য আমার মনের গতি! কালো রংএর কথা শুনিয়াই ভাবি, ব্লাকজাপান না আলকাতরা? ওয়ার্ডারকে জিজ্ঞাসা করি, আলকাতরা না কি? দড়িটা কিসের? শানের নাকি? নিজের মনের উপর নিজেরই বিক্রম করিতে ইচ্ছা হয়। এখনও কি দড়িটা কিসের তৈরী সেই কথাটা জানাই আমার বেশী দরকার! চিরকাল আমার মনের এই অদ্ভুত গতি আমি লক্ষ্য করিয়াছি। প্রয়োজনীয় অপেক্ষা অপ্রয়োজনীয় বিষয়েই আমার আবর্ষণ বেণী। পরীক্ষার পূর্বে সকলেই প্রশ্নগুলি তৈয়ারী করিতেছে—আর আমার তাহা তৈয়ারী না থাকিলেও হয়তো তাহার সহিত সংশ্লিষ্ট কোন তুচ্ছ কথার উপর আমার মনোযোগ ক্রমশঃ। জ্যান্মিতির প্রয়োজনীয়

থিয়রেম অপেক্ষা অপ্রেয়োজনীয় একট্রার উপর আনার অবস্থা মনোবোণ ;—কুটনোট ভূমিকা প্রভৃতি হয়তো পরীক্ষার আগের দিনও দেখিতেছি। বৎসরের প্রথম হইতেই মনে হইয়াছে—দরকারী জিনিষগুলি তো পরে পড়িতেই হইবে—এখন গুঁটা-নাটীগুলি পড়া যাক। হয়তো শেষ পর্যন্ত আসনটাই পড়া হয় নাই।

মনে পড়িতেছে কাশী বিদ্যাপীঠে পড়িবার সময়ে একটা রাত্রের কথা। রাত জাগিয়া পড়িতেছি আমি আর শব্দ দেও। এক টিপ নশ্রু লইয়া রাত ছপুরে সে “আজ”এর সম্পাদকীয় পড়িয়া আমাকে শুনাইতে লাগিল।……কাশী বিদ্যাপীঠে পড়িবার সময় সেবার যখন পুলিশ আমাকে গ্রেফতার করে—সন্দেহক্রমে রাজনৈতিক হত্যাকাণ্ডের চার্জে—তখনও স্বতঃই ফাঁসীর কথা মনে হইত। পরে পুলিশ প্রমাণা-ভাবে ছাড়িয়া দেয়। সত্যই আমি উহাতে লিপ্ত ছিলাম না। কিন্তু ফাঁসী ঘাওয়ার ভয় আমার বিলক্ষণ ছিল। বোধহয় এখন সত্যসত্যই ফাঁসীর হুকুম হইয়া গিয়াছে বলিয়া ভয় কমিয়া গিয়াছে। দূর হইতেই ভয়টা বেশী থাকে। বাহারা জেলে আসে নাই তাহারা জেলে আসাটাকেই কি কঠিন ব্যাপার মনে করে, কিন্তু আসিয়া পড়িলে তখন ভয় ভাঙিয়া যায়।……

উঃ ! মশার কামড়ে সত্যই বড় কষ্ট হয়। কেন জানি না, আমাদের গান্ধী আশ্রমের মশাগুলি ইহাদের অপেক্ষা জোরে ডাকে, আকারেও বড়, কিন্তু মনে হয় কামড়াইলে জালা কম করে। নিলু থাকিলে ঠিক মাকে ঠাট্টা করিয়া বলিত “এরা আশ্রমের মশা কিনা—অহিংস উপায়ে রক্ত খেতে শিখেছে।” না হাসি চাপিয়া মুখে বিরক্তির ভান আনিয়া বলিতেন “আচ্ছা হয়েছে আপনি এখন আসুন তো।” মাঝের এই সময়ের মুখখানি যেন স্পষ্ট দেখিতে পাইতেছি। চোখের কোণে দুইটি করিয়া বলি রেখা পড়িয়াছে।……মা’র মনে সব সময় একটা ভয় ভয় ভাব দেখিতে পাই—এই বুঝি নিলু বাবাকে ঠেস দিয়া কিছু বলিল। অথচ কিছু বলিলে সে কথাটা যাহাতে বাবার কানে না ওঠে তাহারও যথেষ্ট চেষ্টা দেখিয়াছি। নিলু চিরকাল স্পষ্টবক্তা। তাহার জন্ত কতবার কত গোলমালে পড়িয়াছে। কিন্তু অপর লোকে তাহার কথার কিছু মনে করিতে পারে বা তাহার কাছে ক্ষুব্ধ হইতে

পারে এ জিনিষটাকে চিরকাল তাচ্ছিন্য করিয়া গিয়াছে। সুন্দর জিনিষ তাহার মনে সাড়া দেয় না। নিরুর মন ও দৃষ্টিভঙ্গী স্থূল। কলম তুলিকা তাহার জন্ত নয়—সে বোঝে কাষিক পরিশ্রমের কথা, হাতুড়ী কাশ্বে সাবলের কথা, আর তার হাতে শোভা পায় ইম্পাতের ক্ষুরধার অসি—পরশুরামের কুঠারের মতো নিষ্করণ ও কর্তব্য-নিষ্ঠ। একবার নিলু বলিয়াছিল যে, তাহার কবিতা ভাল লাগে না। আমি বলিয়াছিলাম যে, এমন কবিতা লিখিয়া দিব তাহা তোমার নিশ্চয়ই ভাল লাগিবে। লিখিয়া দিয়াছিলাম ধনিক শ্রমিক প্রভৃতি দেওয়া একটা লাঠিয়ারা গোছের সনেট। নিলুর খুব ভাল লাগিয়াছিল। কবিতাটা মনে নাই—এক লাইনও না। নিলু সেটাকে বাঁধাইয়া আশ্রমের ঘরে টাঙ্গাইয়া রাখিয়াছিল—মা'র ঘরে।.....

মনে হইতেছে মা দাওয়ার বসিয়া আছেন। মাথা নাড়িতে নাড়িতে নিরুর দিকে তাকাইয়া দৃষ্টিতে জিহ্বা ঠেকাইয়া একটা শব্দ করিলেন—‘চিক্’। তারপর ছড়া কাটিলেন “স্বভাব না যায় ম’লে’। নিলু আমার দিকে চোখ দিয়া ইসারা করিল—ভাবটা এই যে “দাদা, এইবার!” হুজনে যাহা ভাবিয়াছিলাম—ঠিক যা ভাবিয়াছিলাম মা সংস্কৃত শ্লোক আওড়াইলেন—“অঙ্গার শতধৌতেন মলিনশ্চ নঃ মুঞ্চতে।” আমরা হুজনেই হাসিয়া উঠিয়াছি—মা ঠিক ‘মলিনশ্চ’ বলিয়াছেন। এইবার আমাদের হাসি শুনিয়া বুঝিতে পারিলেন যে, ভুল হইয়াছে। বলিলেন “ছাই কি মনে থাকে?” নিলু বলিল “তবে বলবার দরকার কি?”.....মার কথার এই ভুলগুলি আমাদের মুখস্থ। অবশ্য নিলুই দেখাইয়া দিয়াছে।—তাহা না হইলে আমি হয়তো খেয়ালও করিতাম না। মা বলেন ‘দয়া দাক্ষিণ্য।’ আমি একদিন মাকে বলিয়াও দিয়াছিলাম—‘দয়া-দাক্ষিণ্য’ বলিতে। মা'র দেখিয়াছি কথা বলিবার সময় এটা মনেই থাকে না। বলিয়া দিতে গেলে অপ্রস্তুত হইয়া যান বলিয়া আমি আর ভুল দেখাইয়াও দিই না। নিলু কিন্তু এ দিকটা ঠিক বোঝে না। অপরের যে কোন দুর্বলতা, চালচলনে বিজ্ঞপের ধোরাক ওর সহজেই নজরে পড়ে; কিন্তু উহার কথার ফলে অপরের মনে কিরূপ আঘাত লাগিতে পারে, এ দিকটা সে ভাবিয়াও দেখে না।.....বাবার নিকট হইতে আমরা একটু দূরে দূরেই চিরকাল থাকি। প্রয়োজনের কথা ছাড়া

অল্প কোন কথাও বড় একটা হয় না। সেইজন্য বাবার এবং আশ্রমের 'অন্ডাল' সকলের খাইবার পর, আমি আর নিলু মা'র সঙ্গে খাইতে বসি। একটু দুধ না হইলে মা'র খাওয়া হয় না। এইটাই বোধহয় মা'র একমাত্র বিলাসিতা। আশ্রমে অনেক লোকজন তো থাকে। আর সময়ে অসময়ে নূতন অতিথি আসা, ইহাও প্রায় নৈমিত্তিক ব্যাপার। এই জন্য দুধ অনেক সময়েই কমিয়া যাইত। অল্প দুধ আছে, মা হয়তো আমাকে আর নিলুকে দিলেন। আমি আর একটা বাটীতে, আমাদের বাটী হইতে অল্প অল্প করিয়া ঢালিয়া মা'র জন্য রাখিলাম। নিলু দেখিয়াছি, এইরূপ সময় নিশ্চয়ই বলিবে "মা'র দুধ না হ'লে খাওয়াই হয় না।" কথাটা এমন কিছুই নয়। কিন্তু মা'র মুখটা একটু অপ্রস্তুত হইয়া গেল,—যেন কোন গোপন দুর্বলতা ধরা পড়িয়া গিয়াছে। নিলুর এত জিনিস চোখে পড়ে, কিন্তু এটা পড়ে না।.....

মা'র অসুখ করিলে, অসুখ একটু বেশী হইয়াছে বলিলেই যেন একটু খুশী হন। সেইজন্য জানিয়া শুনিয়াও হয়তো মা'র কপালে হাত দিয়া বলিলাম—“গা-টা পুড়ে যাচ্ছে—বেশ জ্বর হয়েছে”। নি সেখানে উপস্থিত থাকিলে—হাঃ হাঃ করিয়া ঘর কাঁপাইয়া হাসিয়া উঠিবে।.....

.....সুপারিন্টেণ্ডেন্টকে আমার কোন জিনিসের দরকার নাই বলিবার পর সে দিন মনে বেশ তৃপ্তি হইয়াছিল—খালি তৃপ্তি না, গর্ব্বই। “সাহাব” তো একা আসেন না; সঙ্গে জেলর, ডাক্তার, আসিস্ট্যান্ট জেলর, জমাদার ও কয়েকজন দেহরক্ষী ওয়ার্ডার ও মেট সকলেই ছিল। হাঁ, আর বে শিখ কয়েদীটা সাহেবের খাঁকী রংএর দিরাট রাজহত্ৰী ধরিয়া তাঁহার সঙ্গে সঙ্গে দৌড়ায় তাহার কথা তো উল্লেখ করিতে ভুলিয়াই গিয়াছি। সত্যই দোর্দণ্ড প্রতাপ সুপারিন্টেণ্ডেন্ট জেল-সাম্রাজ্যের একছত্রাধিপতি।.....সেদিন তাঁহার প্রশ্নের উত্তর দিবার পর কাহারও মুখের দিকে তাকাইতে পারিলাম না। কেমন যেন সব ঘুলাইয়া গেল—অথচ ইচ্ছা হইতেছিল আমার কথার ফল উহাদের উপর কেমন হয় তাহা জানার। নিজেকে বেশ নাটকের নায়কের মতো মনে হইতেছিল।.....সেই সম্ভাষণদার মুখে ছোটবেলায় স্বদেশী যুগের গল্প শুনিলাম। আমাকে বিরক্ত করিও না—আমাকে

শান্তিতে মরিতে দাও। বন্দুকের গুলিতে আহত মরণাপন্ন শহীদের এই গল্প শুনিয়া কতবার চোখে জল আসিয়া গিয়াছে—অমর মৃতের সেই স্মৃতি আমার চোখের সম্মুখে ভাসিয়া উঠিয়াছে। আমার কথাটিকে তাহার কথার সহিত তুলনা করিলাম। ঐ গল্প শুনিয়া আমার চোখে জল আসিত—আর আমার কথাটী কী শ্রোতাদের মনে কোন সাড়া দেয় নাই! হয়তো দেয় নাই। ইহারা নিত্য এই জিনিষ দেখিতেছে। ইহারা বয়স্ক, সংসারে অভিজ্ঞ—বালকের ন্যায় ভাবপ্রবণ নহে। লোকে প্রশংসা করুক, আমার গল্প করুক, তাহাই যেন আমি চাই—ইহা আমার মনের দুর্বলতা। এক এক সময় নিজের উপর সন্দেহ হয়, হয়তো বা দেশের ভবিষ্যৎ অপেক্ষা আমার নামের ভবিষ্যৎ সম্বন্ধে আমি বেশী সজাগ। সত্যই কি তাই? একদিনের জন্ম জীবনের স্থূল উপভোগের মধ্যে নিজেকে ডুবাইয়া দিই নাই। দেশের জন্ম যাহা করা ভাল মনে করিয়াছি তাহা করিতে বিন্দুমাত্র বিচলিত হই নাই। নিজের ব্যক্তিগত সুখ দুঃখ ভবিষ্যতের কথা ভাবি নাই। তাহার পরিবর্তে যদি চাই যে দেশের লোক আমার সম্বন্ধে হুই একটা প্রশংসাসূচক কথা বলুক, তাহা হইলে কি আমার আকাঙ্ক্ষা অন্ত্যায়? জেল-ডাক্তার নিশ্চয়ই নিজের বাড়ীতে আমার কথা বলিয়াছেন। আসিস্ট্যান্ট জেলের তখনও হয়তো আপনার ডিভিজন রাজবন্দীদের ওয়ার্ডে গিয়া এই কথা গল্প করিয়া আসিয়াছে। বাবাও তো সেই ওয়ার্ডে থাকেন। তাঁহার কানেও নিশ্চয়ই কথাটী উঠিবে। বাবা নির্বিকার লোক; বাহির হইতে দেখিয়া মনের ভাব বুঝিবার উপায় নাই। একান্তে বসিয়া চরকা কাটিতেছেন।...চোখের কোণের দুফোঁটা জলে সূতা ঝাপসা হইয়া গেল।...না, বাবার নিকট হইতে অতটা ব্যাকুলতা আশা করিনা, হয়তো একটু উন্মনা হইবেন, চরকায় তন্ময়তা হয়তো কিছুক্ষণের জন্ম কমিতে পারে—সূতা হুই একবার বেশী ছিঁড়িতে পারে এই মাত্র।...নিজের মনে সন্দেহ হইতেছে, আশঙ্কা হইতেছে যে, বেরূপ আশা করিয়াছিলাম জেলস্টাফের মনে সেরূপ ভাবের উদ্বেক করিতে পারি নাই। জোর গলায় কথা বলিতে পারি নাই—চোখ নামাইয়া লইয়াছি। হয়তো উহারা ভাবিল

আমার মন সবল নয়। আমার হাবভাষা যেন সরকারের বিরুদ্ধে আমার অভিমান দেখানোর মতো লাগিল। উহারা দিনরাত জোর ডাকাত, খুনে লইয়া কাজ করে। ইহার ফলে উহাদের মনের ভাবপ্রকাশতা ও অনেকগুলি কোমলবৃত্তি শুকাইয়া আসিতেছে। রাজবন্দীদেরকে ইহারা অন্তান্ত জোর ডাকাত অপেক্ষা পৃথক বলিয়া ভাবে না। ব্যবহারের বাহা কিছু পার্থক্য তাহা কেবল গোলমালের ভয়ে, না হয় স্বার্থের খাতিরে। যে ডাক্তার বিভিন্ন খির রাজবন্দীদেরকে রোগ হইলে গালাগালি করে, ‘আমাশা হইয়াছে ঠিক দাও’ বলিলেই বলে ‘But don't expect Dahi’ অর্থাৎ দই খাইবার প্রত্যাশায় যদি চেষ্টা করিলা অসুখটি করিয়া থাকেন তাহা হইলে নিরাশ হইবেন; সেই ডাক্তারট উচ্চ-শ্রেণীর রাজবন্দীদের কাছে কি নাটীর মানুষ। এই ছোট ছোট ১৭সর পূর্বে ব্যক্তিগত মত্যাগ্রহের সময় এই জেলস্টাফকে কংগ্রেসেব নেতাদের আশেপাশে ঘুরিতে ও কাজে অকাজে খোসামদ করিতে দেখিয়াছি। তখনও যে তাহারা ভাবিত যে কংগ্রেস আবার বিহারের মস্ত্রীত্ব গ্রহণ করিতে পারে। আর আজ!....

এই জেল-কর্মচারীদেরকে কি সেদিন আমার কথা আর ব্যবহার দ্বারা প্রভাবিত করিতে পারিয়াছি? ইহা অপেক্ষা যদি নাটকীয় ভঙ্গীতে জোর গলায় বাণিতে পারিগাম—‘গরু মেরে জুত দান। তোমাদের কাছ থেকে আমি কক্ষণা চাই না’ কিম্বা ঐ ধরনের অন্য কিছু তাহা হইলে ইহারা বেশী প্রভাবিত হইত। একটু খিয়েটারী ভাব দেখাইত বটে কিন্তু বাহা চাই তাহা হইত। মনে পড়িতেছে—দুই-নয়ন ওয়ার্ডে অক্টোবর মাসে লাঠি-চার্জের পর মাথাফাটা অবস্থায় শুকদেও-এর বক্তৃতা—‘শুনাইয়া শুনাইয়া—একটানা শূরে,—খিয়েটারের মরার মিনের মতো।—‘তুমি লোগোকে শরম নহী আতা’ বলিয়া আরম্ভ এখনও স্পষ্ট কানে ভাসিয়া আসিতেছে। আমি স্কুলে একবার প্রাইজ ডিস্ট্রিবিউশনের সময় মেঘনাথ বধ আবৃত্তি করিয়াছিলাম। কালীবাবু এসিস্ট্যান্ট হেড মাস্টার শিখাইতেছিলেন ‘এই পর্যন্ত শুয়ে শুয়ে কনুয়ের উপর ভর দিয়ে বলবে, —তারপর একেবারে শুয়ে প’ড়ে টেনে টেনে আস্তে আস্তে চোখ বুজে বলবে, “কেবা এ কনক তোর ভুজিবে কনকি!”.....শুকদেও-এর

বক্তৃতা পারিপার্শ্বিক অবস্থার সহিত একেবারে খাপ খায় নাই। কিন্তু লক্ষ্য করিয়াছিলাম যে, ইহার বিসদৃশতা অল্প লোকের চোখেই ধরা পড়িয়াছিল।...

“বাবু বিজে ভৈল বা ?” (বাবু খাওয়া হইয়াছে কি ?)

চিন্তাসূত্র ছিন্ন হইয়া গেল। দেখিলাম ওয়ার্ডার সাহেব সম্মুখে। কথার স্বরে একটু ঘেন সহানুভূতির আমেজ। অনেকক্ষণ হইল বাহিরে আলো দিয়া গিয়াছে। এতক্ষণ লক্ষ্য করি নাই। আলোটা সেলের ভিতর দিলে ইহাদের কি ক্ষতি হইত বুঝিতে পারি না। কেরোসীন তেল লাগাইয়া আত্মহত্যা করা খুব আরামের জিনিষ নয়। তথাপি ইহারা সাহস পায় না। হবেও বা। উহাদের প্রত্যেক নিয়মই অনেক অভিজ্ঞতাপ্রসূত। কেবল এইরূপ একটা আপাততুচ্ছ নিয়মের জন্তই গত বৎসরের জেল মিউটিনী সফল হইতে পারে নাই। গেট ওয়ার্ডারকে মারিয়া কয়েদীর দল চাবীর গোছা হাতে পাইয়াছিল। কিন্তু বিরাট চাবীর রিং-এ ছিল প্রায় দুই শতাধিক চাবী এবং তাহার ভিতর অধিকাংশই ছিল অপ্রয়োজনীয়। জেলের নিয়ম, এইরূপ বহুসংখ্যক বাজে চাবী রিং-এ রাখিতে হইবে। জেল-বিদ্রোহিগণ, এই চাবীর গোছা হাতে পাইয়াও কোন্ চাবী তালার লাগিবে তাহা ঠিক করিতে পারে নাই। চেষ্টা করিতে করিতে পাঁচ মিনিট সময় কাটিয়া গেল। ইতিমধ্যে “পাগলী” (alarm) বাজিল—বন্দুক, সিপাহী, ফৌজ পৌঁছিয়া গেল।.....তাহার পর.....

সিপাহীজীর প্রশ্নের জবাব না দিয়া জিজ্ঞাসা করিলাম, “এখন ক’টা বেজেছে ?”

সিপাহীজী বলিল “দফা বদলীর টেন” হইয়াছে—অর্থাৎ ইহাদের স্থানে রাতে ডিউটি দিবার ওয়ার্ডারের দল আসিয়া গিয়াছে। গুমটিতে (সেন্ট্রাল টাওয়ার) এখন কোন্ ওয়ার্ডে কত কয়েদী বন্ধ হইল, আজ নূতন কয়েদীর “আমদানী” কত, কত “খরচা” অর্থাৎ ছাড়া পাইয়াছে, তাহার পর একুনে মিলিল কিনা তাহার হিসাব হইতেছে। সিপাহীজী তখনও দেখি তাহার প্রশ্নটি ভুলে নাই, আবার জিজ্ঞাসা করে “ভোজন নহী কিরেন ?”

দেখিলাম, সে লক্ষ্য করিয়াছে যে, আমি ভাত খাই নাই। বলিলাম—
“না খিদে পায় নি।”

সে বলিল যে “দহি হৈ ; খোড়া ভোজন কর লিয়া যায়।” সপ্তাহে একদিন করিয়া নিম্নশ্রেণীর রাজবন্দীরা দই খাইতে পায়—পিতলের থানার উপর পাতলা মহুরা দই—উহাতে আবার একটা পোড়াপোড়া গন্ধ ;—কংগ্রেস মিনিষ্ট্রির প্রবর্তিত নিয়ম—তৃতীয় শ্রেণীর রাজবন্দীদের নির্য উপহাসের জিনিষ। লক্ষ্য কংগ্রেসের বড়কর্তাদের প্রতি—কেন তাঁহারা সকল রাজবন্দীদিগের একটা মাত্র শ্রেণী করেন নাই? উচ্চশ্রেণী ও নিম্নশ্রেণীর রাজবন্দী রাখিবার অর্থ কি? উচ্চ শ্রেণীর দশ আনা “খোরাকী” ও নিম্নশ্রেণীর সাড়ে তিন আনা—ইহার মাঝামাঝি একটা শ্রেণী কেবল রাজনৈতিক বন্দীদের জন্য করিলে কি হইত? নিম্নশ্রেণীর রাজবন্দীদিগকে নিজের পয়সা খরচ করিবার অধিকার দিলে কি হইত? বাহির হইতে তাহাদের জন্য খাবার বা অন্ত কোন জিনিষ আসিলে, তাহা লইতে দিলে, বড় কর্তাদিগের কোন্ পাকা ধানে মই পড়িত? মাসে দুইখানি করিয়া চিঠি লিখিতে দিলে কি মহাভারত অন্তর্ভুক্ত হইয়া যাইত? নিজের পয়সায় বিড়ী সিগারেট খাইবার অধিকার দিলে তাঁহাদের কি ক্ষতি হইত? আরও কত কি অভিযোগ।

উঁচু গুমটীর উপর হইতে সুরু করিয়া জলদমন্দ স্বরে রাগিনী উঠিল “বোলোরে এক-নম্বার! বোলোরে দু’নম্বার! বোলোরে তি-ই-ই-ন্ নম্বার! বোলোরে—চা-আ-র নম্বার! বোলোরে এ-এ-এ পাঁচ নম্বার! বোলোরে-এ ছে-এ নম্বা-আ-আ-র! বোলোরে-এ-এ-এ নম্বা গোল! বোলো-রে-এ আওরং কিতা-আ-আ!”

সব ওয়ার্ডের জবাব আসিল না—বোধহয় আমার সেন্স পর্য্যন্ত সে শব্দ পৌঁছাইল না। গুমটীর উপরের সিপাহীটীও যেন সব ওয়ার্ড হইতে উত্তরের প্রত্যাশা রাখে না। তাহার কাজ ঘন্টার মতো, কলের গানের মতো একবার করিয়া চীৎকার করিয়া যাওয়া। প্রত্যেক ওয়ার্ড হইতে উত্তর আসা উচিত কতগুলি কয়েদী প্রতি ওয়ার্ডে বন্ধ হইয়াছে। ইহার টোটাল আগেই গুমটীর নীচের তলায় জেল কর্মচারীরা করিয়া রাখিয়াছে—চীৎকারটা কেবল একটা নিয়মরক্ষা মাত্র। সব ওয়ার্ডের মেট

বা 'পাহারাই (৬) এ কথা জানে। সেই জন্তু ইহার উত্তর দিয়া তাহার বৃথা পরিশ্রম করিতে রাজী নয়। ঢং ঢং করিয়া দুইটা ঘটা পড়িল। 'গিনতী মিলান' (৭) হইয়া গেল। নরটা বাজিয়া গিয়াছে। কালকের 'গিনতী মিলান' আর শুনিতে হইবে না ... গুমটীর উপরের আলোটা নিশ্চয়ই পাঁচশ কাণ্ড পাওয়ারের। ব্ল্যাক আউটের জন্তু উহার উপরে কালো ঢাকনা। কিন্তু ঠিক তাহার নীচেই বাঁশের চাটাইএর বোনা প্রকাণ্ড একটি ছাতা—ওয়ার্ডারকে রোদ্দ ও বৃষ্টি হইতে বাঁচাইবার জন্তু। ব্ল্যাক আউটের জন্তু গুমটীর কালচে রং করা হইয়াছে। কিন্তু ঐ ছাতাটির উপরে আলো পড়িয়া এত আলো চারিদিকে প্রতিকলিত হইতেছে যে, একটানা বেশীক্ষণ উহার দিকে তাকানো যায় না। ছাতাটি ব্ল্যাক আউটের সকল চেষ্টা বিফল করিয়া দিয়াছে। ... গুমটী ও তাহার উপরের ছাতাটি দেখিলেই কাণীর অহল্যাবাই ঘাটের কথা মনে পড়ে। ঘাটের সেই গম্বুজটির উপর আমাদের নিত্যকার সাক্ষা আড্ডা ছিল। ... সিন্হেশ্বর স্বপ্ন একদিন উহার উপর হইতে পানের পিচ ফেলিয়াছিল—তাহা লইয়া কি হুলস্থূল কাণ্ড! অদ্ভুত সাহস সিন্হেশ্বরের! সে দেখিয়াছি মরিতে একটুও ভয় পায় না। সে এমন তাচ্ছিল্যের সহিত কাঁদী যাওয়ার কথা বলিত যে, শুনিয়া আমার হিংসা হইত। বৃষ্টিতে পারিয়াছিলাম, সে আমাকে তাহাদের দলের সন্যস্ত করিতে চায়; কিন্তু তাহার ইচ্ছা পূর্ণ করিতে পারি নাই। অন্তরের ভিতর খোঁজ করিয়া যখন দেখি, তখন এক এক সময় মনে হয় যে, আমার সাহসের অভাবের জন্তুই বোধহয় তাহার মনোবাস্তা পূর্ণ করিতে পারি নাই— তাহাদের কার্যক্রম পছন্দ হয় নাই বলিয়া নয়। কিন্তু আজ সে ভয় কোথায় গেল? বয়োবৃদ্ধির সঙ্গে সঙ্গে শুনিয়াছি লোকের মৃত্যুভয় বাড়ে। আমার বেলায় এ নিয়মের ব্যতিক্রম হইল নাকি? সিন্হেশ্বরের সহিত এখন দেখা হইলে কত কথা হইত! অনেকদিন পরে তাহার সহিত রামগড় কংগ্রেসের সময় হঠাৎ দেখা। সে কংগ্রেস মিনিষ্ট্রীর সময় বেরিলী জেল হইতে ছাড়া পায়;—মেল ডাকাতিতে তাহার সাজা হইয়াছিল—লক্ষ্মীর কাছের সে জায়গাটির নাম মনে পড়িতেছে না,—পিপরাহা না কি নাম।.....

নূতন সিপাহী কখন আসিয়াছে বুঝিতে পারি নাই। চক্ষু ভাঙিল সে বখন জিজ্ঞাসা করিল “বাবু একটা বিড়ী খাবেন?”

আজ ওয়ার্ডাররা পর্যন্ত অন্তরঙ্গ হইতে চায়—যদি আমার কোন উপকার করিতে পারে—যদি আমাকে একটু খুশী করিতে পারে। এই সহানুভূতি স্বতঃস্ফূর্ত—কিছুমাত্র কৃত্রিমতা ইহাতে নাই। তাহার সহানুভূতির দান প্রত্যাখ্যান করাতে বোধহয় সে একটু মনঃক্ষুণ্ণ হইল। একটু কিস্ত-কিস্ত করিয়া সে তাহার ডিউটা সারিয়া লইল। একবার তালটা ঘটাং করিয়া নাড়িয়া শব্দ করিল। পরে হড়হড় করিয়া গরাদের দরজাটা নাড়াইয়া দিল। একাজ তাহার আগেই করা উচিত ছিল—আগের প্রহরী থাকিতেই। উদ্দেশ্য যে দরজা ঠিক বন্ধ কি না, আর হড়কো ঠিক পড়িয়াছে কি না তাহা দেখা। আগের ওয়ার্ডারের সঙ্গে কয়েদী বন্দোবস্ত করিয়া তাল খুলাইয়া রাখিতে পারে,—অথচ কয়েদী পলাইলে আগেকার ওয়ার্ডারের কোন দায়িত্ব নাই; কেননা সে তাহার পরের ওয়ার্ডারকে চার্জ বুঝাইয়া দিয়া গিয়াছে। এই জন্তই এত সতর্কতা, এই ব্যবস্থা। কিন্তু আগের ওয়ার্ডার চনিয়া গিয়াছে। ঘরমুখো গরু—এসময়টুকুর তরু সয় না। এক নাগাড়ে দিনে আট ঘটা ডিউটা দিয়াছে—দোষই বা কি?...

সিপাহীজী একটু মনঃক্ষুণ্ণ হইয়াছে মনে করিয়া কথা বলিলাম, জিজ্ঞাসা করিলাম, ওদিককার ‘ডিগরী’গুলোর (cell) কাজ শেষ করিয়া আসিতেছে নাকি?

বলিল “হাঁ। দশ নম্বর, নয় নম্বর, সাত নম্বর, তিন নম্বর আর এক নম্বর এই পাঁচটি ডিগরীতে ‘আসামী’ আছে। আজ দশ নম্বর থেকেই আরম্ভ করেছি। ওয়ার্ডারের সিপাহী তো কোথায় বাহিরে বসিয়া গল্প করিতেছে। আনার আর তিন নম্বর সেলের সিপাহীর উপরই ‘গিস্তীর’ ভার দিয়াছে।...”

‘কনডেমন্ড সেলস’এর পাঁচজন কয়েদী। জেলের; ভাষায় এই ওয়ার্ডারের নাম ফাঁসী সেল। ‘Condemned cells’ শুনিলেই আমার মনে হয় যেন সেলগুলি এনজিনিয়ারিং বিভাগ কর্তৃক condemned, ইহা যে condemned prisonersদের জন্ত—তাহা হইতেই যে ওয়ার্ডারের এই নাম, এ কথাটা প্রথমে মনে

আসেনা। নয় ও দশ নম্বর সেলে থাকে দুই জন বোমার কেসের আসামী—আণ্ডার-ট্রায়াল। উহাদের এ সেলে কেন রাখিয়াছে জানি না। “ফাসী সেলের” কুড়িটা সেল ব্যতীত, এ জেলে আরও চল্লিশ পঞ্চাশটা সেল আছে। তথাপি ইহাদের কেন, এখানে রাখিয়াছে বলা শক্ত। হয়তো পুলিশের আদেশ সেইরূপ। বোধ হয় পুলিশ ইহাদের নিকট হইতে স্বীকারোক্তি পাইবার আশা রাখে। সেই জন্তু অপর রাজবন্দীদিগের সহিত মেলামেশা করিতে দিতে রাজী নয়। সাত নম্বরে থাকে একজন পাগল। সে আপন মনে বাজে বকে। ওয়ার্ডার দেখিলেই আশ্রাব্য ভাষায় গালাগালি দেয়। নয় ও দশ নম্বর সেলের কয়েদী দুইজনের সেলের দরজা সারাদিন খোলা থাকে। ছপুয়ে কোন কোন দিন তাহারা আমার সেলের স্পেশাল ওয়ার্ডারকে বিড়ী, চিনি প্রভৃতি দিয়া তাহার পরিবর্তে আমার সহিত দুই একটা কথা বলিয়া লয়। সন্ধ্যা বেলা তাহাদের দরজা বন্ধ হইবার পর, তাহারা নিজের নিজের সেল হইতে পাগলটিকে চটাইতে থাকে। তাহার নাম ধরিয়া ডাকিলেই সে গালাগালি দিতে আরম্ভ করে। ওয়ার্ডাররা বলে যে লোকটা মিথ্যা পাগলামীর ভান করে। ঐরূপ তাহারা কত দেখিয়াছে। “সরকার ওত্তা বড়বক্ নহী হায” (৮) রেহাই পাওয়া অতটা সহজ নয়।...তিন নম্বরে থাকে একটা খুনী আসামী! তাহাকে খুন করিয়াছে। সে এক অতি কুৎসিত কাহিনী। তাহার পারিবারিক জীবনের কদর্য পঙ্কিলতার বিবরণ, তাহার স্ত্রী জঙ্গসাহেবের এজলাসে সর্বসমক্ষে বলিয়াছে। হাইকোর্টে আপীল হইয়াছিল তাহাতে খারিজ হইয়া গিয়াছে। লোকটা দিনরাত ‘সীতারাম, সীতারাম’ বলে আর ভজন গায়। ..

ওয়ার্ডার যে আমাকে ‘আসামী’ বলিল, কথাটা আমার পছন্দ হইল না। মনে হইতে লাগিল, ইহা অপেক্ষা ভদ্র ভাষা তাহার ব্যবহার করা উচিত ছিল। ছোটবেলার শিক্ষা, দিক্ষা, সংস্কার আমার মনে যে ছাপ রাখিয়া গিয়াছে. তাহা একেবারে মুছিয়া ফেলা শক্ত। সত্যই তো, ওয়ার্ডার তো ঠিকই বলিয়াছে। আমাকে আসামী বলিবে না তো কি বলিবে? .আজ তো আমি জেলের মধ্যে সর্বাপেক্ষা বড় আসামী। যাহার ফাসী শীঘ্রই হইবে সে-ই এক নম্বর সেলে থাকে। এক নম্বর

সেলের পরই একটা দরজা। কেবল ফাঁসী দিবার সময় এই দরজাটা খুলিয়া আসামীকে ফাঁসীর মধ্যে লইয়া বাওয়া । অন্য সময় দরজাটা বন্ধ থাকে ।... সেই চরম মুহূর্তের পূর্বে একবার দরজাটা দেখিতে ইচ্ছা করে। উহার তালিকা কি মর্চে পড়া ?...আমার সহিত মৃত্যুর ব্যবধান কেবলমাত্র এই দরজাটির। তথাপি ‘আসামী’ কথাটিতে আমার মনটা খুঁত খুঁত করিতেছে। বোমার বারুদেরও তো সিপাহীজী ‘আসামী’ বলিত, তাহা কিন্তু আমার কানে কটু বোধ হইল না। বোধ হয় ‘বোমার মামলার আসামী’ কথাগুলিতে আমার কান অভ্যস্ত। ঐ কথাগুলির সহিত দেশ-সেবকদিগের স্বদেশপ্রেমের অনেক স্মৃতি বিজড়িত আছে...অন্ততঃ আমার মনে। কিন্তু ফাঁসীর আসামী কথাটা শুনিলেই আমার সাধারণ খুনে ডাকাতির কথা মনে পড়ে। ইহাদের চিত্রই ঐ কথাগুলির সহিত আমার মনে বন্ধমূল বসিয়া গিয়াছে। মনে হয় সিপাহীজী আসামী শব্দটা ব্যবহার করিয়া আমাকে চোর ডাকাতির সহিত এক করিয়া দিল। এই জন্মই বোধহয় কথাটিতে আমার অপছন্দ ও আপত্তি। অন্তরের ভিতর বেদনার অনুভূতি জাগে—একজন ওয়ার্ডারের চক্ষেও আমি পূজ্য দেশ-সেবক নই। আমি তাহার নিকট হইতে আশা রাখি প্রশংসার—কথায় না হউক অন্ততঃ হাবভাবে, আমার ত্যাগের জন্ম। ইহাদের জন্ম আমি প্রাণ বিসর্জন দিতেছি, কোথায় ইহারা কৃতজ্ঞ থাকিবে—তা নয়, কৃতজ্ঞতার পরিবর্তে ইহারা দিতে জানে সহানুভূতি, শহীদের প্রতি সহানুভূতি নয়, যে হতভাগ্য আর কয়েক বঁটা মাত্র এই লীলাময়ী ধরণীকে উপভোগ করিতে পারিবে, তাহার প্রতি করুণা ।...

মনে পড়িল মাসিমাতে। নৈহাটা স্টেশনে মাসীমাতে পশ্চিমের গাড়ীতে তুলিয়া দিতে গিয়াছি। মাসিমার—মাথার চুল ছোট করিয়া ছাঁটা, গেরুয়া-বস্ত্র পরা, গলার তুলসীর মালা। নিজের সংসারের সহিত বিশেষ কোন সঙ্ক নাহি, মঠে বা আশ্রমে থাকেন। নবদ্বীপ হইতে বৃন্দাবন যাইতেছেন। সঙ্গে বিশ্বর লটবহর,—সোনামুগের বস্তা, ডাব, ছানাবড়ার ক্যানেশারা, মাজা তিল, গুরুভাই-বোনদের জন্ম যাইতেছে। এই জিনিষগুলি গাড়ীতে তুলিয়া দিবার জন্মই আমার

জাগরী

আসা। মাসিমা গাড়ীতে উঠিলেন। সব জিনিষ কুলীর মাথা হইতে নামাইয়া গাড়ীতে রাখিলাম। মাসিমা ছিঁজাসা করিলেন “সব জিনিষ উঠেছে তো।” আমি এক-দুই করিয়া গুনিয়া বলিলাম, হাঁ মোট বাইশটা ‘মান’ উঠিয়াছে। নিমেষে মাসিমার হাসিমুখ মেঘের মতো অন্ধকার হইয়া গেল। রাগে, দুঃখে মাসিমার চোখে জল আসিল। আমিও অপ্রস্তুতের একশেষ। বৃষ্টিতে পারিলাম নিজের অজ্ঞানতায় কোন অপরাধ করিয়া ফেলিয়াছি, পরে মাসিমাই তাহা পরিষ্কার করিয়া বলিয়া দিলেন—রেশমী কাপড় দিয়া ঢাকা, তাঁহার স্বর্গীয় গুরুদেবের তৈলচিত্রটিকে আমি মালের মধ্যে গুনিয়াছি। সেই সময় মাসিমার এই মনস্তত্ত্ব আমার নিকট অদ্ভুত মনে হইয়াছিল ;—আর আজ ‘আসামী’ কথাটা শুনিবার পর নিজের চিন্তাধারা দেখিয়া আশ্চর্য হইয়া যাইতেছি।…… ফাঁসীর আসামীকে আসামী না বলিলেই আশ্চর্য হইবার কথা।……

ফাঁসীর মঞ্চ কথাটিকেও যেন কত শহিদেব স্মৃতির সুবাস বিরিয়া আছে ; কিন্তু উহাকেই ‘ফাঁসীকাঠ’ বলা, মনে পড়িবে খুনী আসামীর কথা। আর সব চাইতে আশ্চর্য্য মানসনেত্রে দেখি, একটা মৃতদেহ জিমনাস্টিকের হরাইজ্যান্টাল বারে ঝুলিতেছে—অসাড় পা দুখানি শূন্য ঘুরপাক খাইয়া ছলিতেছে—ধীরে একবেয়ে গতিতে—উত্তর, উত্তরপূর্ব, পূর্ব, পূর্বদক্ষিণ, দক্ষিণ, দক্ষিণপশ্চিম, দক্ষিণ, পূর্বদক্ষিণ, পূর্ব, উত্তরপূর্ব উত্তর,—কোন ইংরাজী নভেলের পড়া একটা দৃশ্য।……

দশ নম্বর সেন হইতে ওয়ার্ডার ডিউটা আরম্ভ করিয়াছে বলিল। তাহার মানে আজ এগারো হইতে বিশ নম্বর সেন খালি।……যে সকল কয়েদী জেলের নিয়ম ও শৃঙ্খলা ভঙ্গ করে, তাহাদিগকে জেল-কর্তৃপক্ষ সাধারণতঃ সেনের সাজা দেন। তাহারা ঐ সেনগুলিতে থাকে। সেনে একাকী কিছুদিন বাস করিতে হইবে ইহাই শাস্তি। কয়েকদিন নির্জনবাস যে কি সাজা তাহা তো আমি বৃষ্টিতে পারি না। ওয়ার্ডের হট্টগোলের ভিতর হইতে, দিনকতক মধ্যে মধ্যে নির্জনবাস খুব খারাপ লাগিবার কথা নয়। ঐ সেনগুলির ব্যবহারও হয় খুব। আজ সব ঘর খালি কি করিয়া হইয়া গেল। একরূপ তো কখনও হয় না। বোধহয় ইচ্ছা

করিয়াই তাহাদের স্থানান্তরিত করা হইয়াছে,—হয়তো সুপারিটেণ্ডেণ্ট তাহাদের শাস্তি মাপ করিয়া দিবার নির্দেশ দিয়াছেন। তিনি বোধহয় চাহেন, আজ রাত্রে যত কম লোক 'কনডেমন্ড সেল্‌স'-এ থাকে, ততই ভাল। হয়তো আজ এখানে থাকিলে তাহাদের মনের উপর কিছু প্রতিক্রিয়া হইতে পারে। সেই জন্ত তাহাদের এই স্থান হইতে সরাইতে পারা যায়, তাহাদের সরাইয়া দেওয়া হইয়াছে। কর্তার ইচ্ছায় কর্ম। তেরো নম্বরের কুষ্ঠরোগগ্রস্ত কয়েদীটিকেও কি জেনারেল ওয়ার্ডে লইয়া যাওয়া হইয়াছে? এক এক সুপারিটেণ্ডেণ্টের এক এক রকম খেয়াল। মেজর ফিল্পটস্কে দেখিয়াছি, নারীচিত্র সম্বলিত পুস্তক তিনি কখনও জেলে 'পাস্' করিতেন না। তিনি শুনিয়াছিলাম, মানসিক ব্যাধিতে বিশেষজ্ঞ ছিলেন। তাঁহার মত ছিল যে নারীদেহের প্রতিকৃতি, বাহারা অনেকদিন ধাবৎ জেলে আছে তাহাদের মনের উপর নানারূপ প্রতিক্রিয়া আনিত্তে পারে। সেবার হাজারীবাগ জেলে এই লইয়া রামধেনাওনাবাব সহিত 'সাংসার' কি বচসা! বেচারার অত মথের 'রয়াল একাডেমীর' সেই বৎসরের ছবিগুলি বই হইতে দশ-পনরখানি পাতা কাঁচি দিয়া মথের বাদ দেওয়া অবস্থায় তিনি পাইয়াছিলেন। ছবিগুলি পাইলে তাঁহার মনের উপর কি প্রতিক্রিয়া হইত, তাহা হয়তো আমরা দেখিতে পাইতাম না;—কিন্তু না পাইয়া সাময়িক প্রতিক্রিয়া কি হইয়াছিল, তাহা আমরাও দেখিয়াছিলাম, ফিল্পটস্ সাহেবও দেখিয়াছিলেন। ফলে তাঁহার জৌদ্দিন নির্জন সেলের শাস্তি হয়।

বড়ই গরম! সেলে বায়ু চলাচলের রাস্তা নাই। বৈশাখ মাস শেষ হইয়া গেল, এখন বোধহয় সেলের বাহিরেও এইরূপই গরম। দরজার উপর মেঝেতে, গরাদ ধরিয়া বসিয়া থাকি,—নদি বাহিরের ঠাণ্ডা কিছু পাওয়া যায়। ঘরের বন্ধ গুমোট হাওয়ায় মাথা কেমন ঘেন ভার ভার মনে হয়। লক্ষ্য করিয়াছি যে, এই সময়, কিছুক্ষণ গরাদের ভিতর দিয়া মুখ নাক যতদূর বাহির করা যায় ততদূর বাহির করিয়া, বাহিরের মুক্ত বাতাস সেবন করিলে, ধীরে মাথার ভার ভার ভাবটী কাটিয়া বাইতে থাকে।... আগে মাথার কষ্ট বেশী হইত। কিছুদিন হইতে স্নান করিবার সময় ওয়ার্ডার

একটু করিয়া সরিষার তেল দেয়। কোথা হইতে একটা পুরাতন মাথনের টিনে একটু তেল জোগাড় করিয়াছে। ফাঁসীর আসামীর প্রতি এই অনুকম্পা,—প্রথমে ভাবিয়াছিলাম লইব না। কিন্তু সে যখন কোন কথা না বলিয়া হাতে ঢালিয়া দিল, তখন আপত্তি করি নাই,—বোধহয় মাথার অস্বস্তির কথা মনে করিয়া—আর, কোন কথা না বলিয়া সিপাহীজী যে তেলটুকু হাতে ঢালিয়া দিল তাহা দেখিয়া। বাক-সংঘম ইহারা জানে না। দিনে আট ঘণ্টা করিয়া ডিউট, আর রাতে দুই ঘণ্টা করিয়া। বড় একঘেষে ইহাদের জীবন। এই ডিউটীর সময়ের মধ্যে কথা বলিলে, একঘেষেমির একটু লাঘব হয়। সে একটাও কথা বলিল না, তাহার উপর মাথিবার জন্ত সরিষার তেল দিল,—এতখানি সরিষার তেলের মায়া ছাড়িয়া দিল! আশ্চর্য্য! ইহারা যে জিনিষ পায় জেল হইতে চুরি করে। কাপড়-কাচা সাবান, চালভাজা, চীনা-বাদাম, আলু, নারিকেল দড়ি, লোহার পেরেক, হারিকেন লঠনের ছিপি প্রভৃতি কোন জিনিষ ইহাদের হাত এড়াইতে পায় না। উচ্চশ্রেণীর রাজবন্দীদের, চায়ের পেয়ানা হইতে আরম্ভ করিয়া, গামছা পর্য্যন্ত সব জিনিষই চুরি যায় রাতে, যখন ওয়ার্ডাররা ব্যতীত জেলের সকল লোকই ওয়ার্ডে তালাবন্ধ অবস্থায় থাকে; চোরেরা ঘরে তালাবন্ধ, কিন্তু তথাপি চুরি বন্ধ হয় না। এহেন ওয়ার্ডারের এই উদারতা আমাকে বিহ্বল করিয়াছিল। আরও আশ্চর্য্য হইয়াছিলাম, যখন সে সেদিন, পাগল করেদীটিকে দিয়া আমার কুর্তী ও জাকিয়া কাচাইয়া দিল। স্বান করিয়া শুখনো ইজার পরিয়াছি, আর অমনি আমাকে একরকম জোর করিয়াই সেলে ঢুকাইয়া দিল। আমাকে আপত্তি করারও অবকাশ দেয় নাই। তাহার পর নিজের হাকপ্যাণ্টের বেন্ট আলাগা করিয়া পিছনের দিকে কোমরের নীচে হাত ঢুকাইয়া দিয়া একটা বিড়ী বাহির করিল। বিড়ীটা পাগলকে দিয়া, নিজের দিয়াশলাই দিয়া ধরাইয়া দিল,—বুঝিলাম তাহার কাপড় কাচার পারিশ্রমিক। কোন কথা না বলিয়া কেহ যদি কোন কাজ করিয়া দেয়, তাহা হইলে তাহাকে প্রত্যাখ্যান করা বড় শক্ত। মনে হইল সিপাহীজীটা আমার ত্যাগ ও দেশভক্তি সম্বন্ধে সচেতন—ঠিক জন্ত সিপাহীর মতো নয়। মনটা বেশ হাক্কা বোধ হইতে

নাগিল। তাহার পর হইতে আজ কয়েকদিন দিনের বেলায় দেখি সেই সিঁপাহীরই ডিউটা থাকে।.....

তেল মাখে না আমাদের পাটির চন্দ্রিমা। বলে, তেল লাগাইলে তাহার মাথা গরম হইয়া ওঠে। বেঁটে, ছোটোখাটো মানুষটা,—অতি সরল নীরব অক্লান্তকর্মী। অপরের কোন কাজে আসিতে পারিলে কৃতার্থ হইয়া যায়। দুই নম্বর ওয়ার্ডে দিনরাত চরখীর মতো এক স্থান হইতে অন্য স্থানে ঘুরিয়া বেড়াইতেছে। মাথায় একরাশ রক্ষ বাবরী চুল, চুলে তেল দেয় না। ১৯৩২ সালে মিলিকগঞ্জ কংগ্রেস আশ্রমে “জপতী উদ্ধার” সত্যাগ্রহের সময়, তাহার কানে নাকি মাইকেলের পাম্প দিয়া হাওয়া ঢুকাইয়া দেওয়া হয়। সেই হইতে সে কানে শুনিতে পায না।..... চোখের সম্মুখে দেখিতেছি—কাল সকালে চন্দ্রিমা, দুই নম্বর ওয়ার্ডে ঘরের ভিতর শোকসভার আয়োজন করিয়াছে। নীরব শোকসভা। রামভজনবাবু সভাপতি। সকলে সভাপতির সহিত এক মিনিট নীরবে দাঁড়াইল—তাহার পর ধীরে ধীরে বসিয়া পড়িল। চন্দ্রিমা দাঁড়াইয়া আছে। ইতস্ততঃবিক্ষিপ্ত রক্ষ চুলের বোঝা দুই হাত দিয়া কানের পাশে সরাইয়া দিল—সিংহের কেশরের মতো দেখাইতেছে চুলগুলিকে। করেদীর দুই হাতে হাতকড়া দিয়া দাঁড় করাইয়া দিলে সে যেরূপ ভঙ্গীতে দাঁড়ান, সেই অবস্থায় দাঁড়াইয়া আরম্ভ করিয়াছে “মেরে গোলাম ভাইয়ো! আজ.....” চতুর্দিক হইতে গুঞ্জনধ্বনি উঠিল। সবাই চন্দ্রিমাকে খামিতে বলিতেছে; এখনই হয়তো জেল-কর্তৃপক্ষের কাছে মিটিংএর খবর চলিয়া যাইবে; এখনই হয়তো লাঠি চার্জ হইবে; ‘হমহী লোগৌকে ভিতর কিৎনে সি আই ডি হৈঁ’; ‘শোকসভামে কহী ভাবণ হোতা হৈ’; ‘বয়রা হৈ; উহ কুছ নহী শুনেগা’ আরও কত প্রকারের মন্তব্য। চন্দ্রিমা কিন্তু আমার কথা বলিয়া চলিয়াছে—আমার ত্যাগের কথা—আমার দেশভক্তির কথা—তাহার সহিত আমার ব্যক্তিগত বন্ধুত্বের কথা—আপার ডিভিজন ওয়ার্ডের বর্তমান বাসিন্দা আমার বাবা ‘মাষ্টার সাহেবের’ প্রতি সমবেদনার কথা—আওরৎ কিতার কয়েদী দেবীজী, বিনুবাবুর মা, যাহাতে এ আঘাত সহ্য করিবার শক্তি পান তাহার জন্ত ইচ্ছা জ্ঞাপন—এই “রাষ্ট্রীয় পরিবার” (৯) ভারতের

মস্মুখে কি উজ্জ্বল দৃষ্টান্ত রাখিয়াছে তাহার কথা—শ্রোতাদের কর্তব্যের কথা—
আরও কথার পর কথা গাঁথিয়া চলিয়াছে। অর্ধনিমীলিত চক্ষের কোণে জল
আসিয়া গিয়াছে।……সকলে ধরিয়া চলিমাতে বসাইল। স্থির হইল মৃত আত্মার
প্রতি শ্রদ্ধাঞ্জলি নিবেদন করিবার জন্য সকলে সারা দিন উপবাস করিবে।……চন্দ্রিমার
উপবাসে চিরকাল আপত্তি। তাহার পাটির লোকেরা রাজনীতিক্ষেত্রে উপবাসের
কোন প্রয়োজনীয়তা আছে বলিয়া স্বীকার করে না। চন্দ্রিমা কয়েকজন সন্ধিক্ষেত্রে
শ্রোতাকে বুঝাইতেছে যে, ইহা পাপের প্রায়শ্চিত্ত করিবার জন্য উপবাস নয়, শত্রুর
হৃদয় পরিবর্তন করিবার জন্য নয়, “বিলুপ্তকে প্রতিষ্ঠা করা যেহেতু দেশপ্রেমীকে
নাতে হমে যত্ন করা হয়।” (১০)

তারপর দুই নম্বর ওয়ার্ডে অশথ গাছটির নীচে কংগ্রেস সোসাইটি পাটির
মেম্বারদিগের একটি মিটিং বসিয়াছে। গোরে সিং বক্তৃতা দিতেছে—‘সব জিনিস
objectively দেখিতে হইবে।……প্রতি মার্গিনিস্টের কর্তব্য —আরও কত কি।
জাতীয় সংঘর্ষে পাটির দানের জন্য তাহারা গর্বিত ; কিন্তু একজন কমরেডের মৃত্যুতে
তাহারা শোকে মুহমান নয়। কিম্বা পাটির যে ইহাতে খুব ক্ষতি হইল একরূপ ভাব
তাহারা দেখায় না।……কত লোক আসিবে বাইবে। কত প্রকারের সামাজিক
বন্ধন ও অচ্ছেদ্য পারিবারিক শৃঙ্খল বিচ্ছিন্ন করিয়া তাহারা রাজনীতিক্ষেত্রে নামিয়াছে,
—সকলে না হউক, অনেকেই। নিজের আদর্শের জন্য তাহারা কেহই প্রাণ দিতে
কুণ্ঠিত নয়। নিজের প্রাণকে তাহারা যেমন মূল্যবান মনে করে না,—অপরের
প্রাণের উপরেও তাহাদের সেইরূপই দরদ কম।—কমরেড ভোলা পিছনে বসিয়া
হাসিতেছে।……একটি আশ্চর্য্য জিনিস লক্ষ্য করিয়াছি রাজবন্দীদিগের মধ্যে। যে
রাজনৈতিক কয়েদী দেশের জন্য নিজের স্বার্থ ও নিজের ভবিষ্যৎ সকলই জলাঞ্জলি
দিয়াছে, যে স্বদেশের জন্য হাসিনুখে সর্বদা মৃত্যু বরণ করিতে প্রস্তুত, তাহাকে জেলের
মধ্যে সামান্য স্বার্থের জন্য জঘন্য নীচ মনের পরিচয় দিতে দেখিয়াছি।……কমরেড
ভোলা ফাঁসীর সাজা হইতে বাঁচিয়া গিয়াছে, কিন্তু কয়েকটি মোকদ্দমা মিলাইয়া
মোট তেত্রিশ বৎসরের শাস্তি হইয়াছে। অসম্ভব স্মৃতিবাজ, সর্বদা হাসিমুখ,—

ফাঁসীর সাজা হইলেও নিশ্চয়ই মুখের কোণের হাসিটা লাগিয়াই থাকিত,—নে কাজে যত বিপদ তাহাতে তাহার তত আনন্দ বেশী। এই বালকের মতো সরল একনিষ্ঠ স্বদেশপ্রেমীটির ভাবনার ক্ষমতা অল্প, কিন্তু হুকুম তামিল করিতে সে দ্বিধাগীন। এই কমরেডকেও দুই নম্বর ওয়ার্ডে থাকিবার সময় ডালের লক্ষ্য লইয়া কালেশ্বর প্রাসাদের সহিত মাথা ফাটাফাটি করিতে দেখিয়াছি।

রাজবন্দীদের এই সকল দুর্বলতা নিত্য জেল-কর্মচারীদের নজরে পড়ে। দেশের লোক রাজবন্দীদিগকে যে সম্ভ্রমের দৃষ্টিতে দেখে জেলের কর্মচারীরা কেমন করিয়া সে দৃষ্টিতে উহাদের দেখিবে। এই জন্তই বোধহয় দেশের লোকের প্রশংসা ব্যতীত উহাদের প্রশংসার জন্ত আমি এত লালায়িত।...জেলের একদিন সুপারিন্টেন্ডেন্টকে বুঝাইতেছিলেন যে, নয় ও দশ নম্বর সেলের কয়েদীরা খুব ভাল, “They never grouse and grumble”—ইহাই উহাদের প্রশংসার মাপকাঠি।...সুপারিন্টেন্ডেন্ট যখন সেদিন আমাকে আমার প্রয়োজনের কথা জিজ্ঞাসা করিতেছিলেন, তখন জেলরবাবু একটি পকেটবুক খুলিয়া, কাউন্টেনপেন লইয়া আমি কি চাই তাহা নোট করিতে একেবারে প্রস্তুত হইয়াছিলেন। ভদ্র-লোকটিকে খুব হতাশ করিয়াছি।.....

.....সেলের বাহিরে যেখানে কুঁজাটি আছে, ঠিক সেইখানে জেলর বাবু সেদিন দাঁড়াইয়া ছিলেন।

.....ঘরের বাহিরে দরজার সম্মুখে একটি কুঁজায় জল থাকে। এটি কিন্তু বাহিরে থাকে আমাকে আত্মহত্যার হাত হইতে বাঁচাইবার জন্ত নয়; জেলের সকল কয়েদীকেই ইহা হইতে পানীয় জল সরবরাহ করা হয়—অন্যত্র নয় নম্বর ও দশ নম্বর বাদে। যাহার তৃষ্ণা পায় সে সিপাহীজীকে ডাকে, না হয় সেলের ঘণ্টা বাজায়। সিপাহীজী নিজের ইচ্ছা ও অবকাশ মতো উঠিয়া তাহাকে জল দেয়। সাধারণতঃ যে যখন জল চায় সে তখনই জল পায় না। অনেকের কান্দি মিনতি যখন একসঙ্গে বেশ মুখর হইয়া উঠে, তখন সিপাহীজী একবার উঠিয়া কুঁজা হইতে জল গড়াইয়া দেয়। এক নম্বর সেলের বিশেষ খাতির, সেইজন্য আমার দরজার

সম্মুখে কুঁজাটা রাখা থাকে।—কুঁজার নলটা গরাদের ভিতর দিয়া টানিয়া লইয়া
 মােসে জল গড়াইয়া লইলাম। যতদূর পারি জল গরাদের বাহিরে ফেলিতে চেষ্টা
 করিয়া, মুখে চোখে জল দিয়া লইলাম। মুখ চোখ দিয়া যেন আগুন বাহির
 হইতেছিল। সেলে নালী নাই। এই দরজার নীচ দিয়াই জল বাহিরে বাইবার
 কথা। মুখ চোখ ধুইবার সময় জল বেশীর ভাগ ভিতরে পড়িল। কুলকুচা করিয়া
 বাহিরে ফেলিলাম,—দেওয়াল আর মেজের সংযোগ-স্থলের সেই ছোট গাছটির
 উপর। এই গাছটিতে কুলকুচা করিয়া আমি প্রত্যহ জল সিঞ্চন করি। প্রতিবারই
 যখন কুলকুচা করি, কতদূরে জল ফেলা যায় তাহার পরীক্ষা করি। মোটামুটি
 এ সম্বন্ধে ধারণা হইয়া গিয়াছে। দাঁড়াইয়া, বসিয়া, মুখের : ভঙ্গী বদলাইয়া,
 কতরকমে নিজের সহিত নিজে প্রতিযোগিতা করি—আগের রেকর্ড ভাঙ্গিবার চেষ্টা
 করি। দ্বিপ্রহরে যখন বাহিরের সিমেন্টের মেঝে তাতিয়া আগুন হইয়া থাকে,
 তখন কুলকুচা করিয়া তাহার উপর জল ফেলি। তাহার পর এক দুই করিয়া গুণিতে
 থাকি, কতক্ষণে জল নিশ্চিহ্ন হইয়া শুকাইয়া যায়। কি গাছ জানি না।
 তামাটে রংয়ের পাতা। পাতাগুলি নিম্নের পাতার মতো দেখিতে। লঠনটা
 কাছেই থাকায় গাছটি স্পষ্ট দেখা যাইতেছে। ছোট লতানে গোছের গাছ,
 দেওয়ালটিকে আঁকড়াইয়া ধরিয়াছে। লঠনের আলোতে ছোট ছোট হলদে
 ফুলগুলিকে দেখা যাইতেছে না। কি বাঁচিবার আকাজক্ষা গাছটির! ইট আর
 সিমেন্টের মধ্যে সংকীর্ণ ফাটল। তাহারই মধ্য দিয়া ইহা জীবনী-শক্তি আকর্ষণ
 করিয়া লইতেছে, আমার অবর্তমানেও লইতে থাকিবে। আমার কুলকুচার
 জলের প্রত্যাশা রাখে না। গাছটির দিকে তাকাইলেই মনে হইতেছে উহার ডাঁটা
 ভাঙ্গিলেই সাদা ঘন হুধের মতো রস বাহির হইবে। ক্ষেতপাপড়া, যাহাকে আমরা
 বলি ক্ষীকুই, তাহার রসও ঠিক এইরূপ দেখিতে।.....সেই জ্যাঠাইমা আমার
 কণ্ঠার নীচে একটা ফোড়ার উপর লাগাইয়া দিয়াছিলেন,—ফোড়া কাটাইবার
 জন্য। তাহার পর হইতে দুর্গাদির খেলাবরের একটা পুরাতন মাটির প্রদীপে, আমি
 আর নিলু কতদিন ক্ষীকুয়ের হুধ সংগ্রহ করিয়াছি।.....

হুর্গাদির ছোট বোন টেপী, আধ ময়লা ফ্রক পরা, মাথায় বেড়া-বিহুনী-। আমি আর নিলু তাহাকে, আশ্রমের কাছে গ্যাঞ্জেশ-দার্জিলিং রোডের উপর রবার গাছের নীচে লইয়া গিয়াছিলাম, কেমন করিয়া রবারের রস জমাইয়া রবার তৈয়ারী করিতে হয় তাহা দেখাইবার জন্ত। আমি গাছে উঠিয়া ছুরি দিয়া একটা ডালের উপরের ছাল কাটিয়া দিলাম। টপ্ টপ্ করিয়া হুধের মতো রস পড়িতেছে। নিলু টেপীকে ধরিয়া তাহার নীচে দাঁড় করাইয়া দিল। বলিল “উপরে তাকাস না, খবদার! তোর মাথার উপর ইরেজার তৈরী করে দিচ্ছি”। পরে টেপী বেচারীর কি কান্না! রবারের রস জমিয়া তাহার মাথার চুল কামড়াইয়া ধরিয়াছে। মা’র কাছে আমরা ছই ভাই সেদিন কি প্রহারই খাইয়াছিলাম! ভাগ্যিস বাবা ‘দেহাত’ গিয়াছিলেন। তাহার মাসখানেক পরেই টেপী মারা যায়। আমার আর নিলুর তাহার পর কি নানসিক হুশিচতা! কি অনুশোচনা! আশ্রমের শিশুগাছের তলায় বসিয়া, আমরা ঠিক করিয়াছিলাম, রবারের রস মাথায় দিয়াই তাহার ডিফথিরিয়া হইয়াছে। নিলু আমার আগেই খবর আনিয়াছিল, কার্তিক ডাক্তার টেপীর গলা কাটিয়া তাহার মধ্য হইতে রবারের রস বাহির করিয়াছে।.....হুর্গাদিদের বাড়ীর সব ছেলেপিলেদের মা সেদিন আমাদের আশ্রমের বাড়ীতে লইয়া আসিয়াছিলেন। টেপীর ভাই ভোঁদা, এই বৎসর উকীল হইয়াছে, তখন সে কত ছোট। মা’র কাছে শুইয়াছিল। রাত্রে বাড়ী যাওয়ার বায়না ধরিয়া কি কান্না!..... ১৯৩/১৫/৬

দরজার সম্মুখে বসিবার উপায় নাই, জলে ভিজিয়া গিয়াছে। নীল ডোরাকাটা ইজারটা দিয়া জল মুছিয়া লইলাম। ইজার ময়লা হইলেও আর ক্ষতি নাই। কাল তো আর ওটা পরিতে হইবে না। নয় বৎসর আগে ভূমিকম্পের সময় মেঝেতে এই স্থানে গর্ত হইয়া গিয়াছে। আজ পর্যন্ত সেই অবস্থাতেই রহিয়া ‘পি, ডব্লু ডি,’-র কন্ঠনিষ্ঠার সাক্ষ্য দিতেছে। এক নম্বর সেলে যে থাকে তাহার আবার এত বাছ-বিচার! ফাঁসীর মঞ্চ হইতে সর্বাপেক্ষা নিকটে এই ঘর, আর যে আসামীর ফাঁসীর দিন সর্বাপেক্ষা নিকটবর্তী। তাহারই দাবী এই ঘরের উপর।

জেলের মাড়ে চার হাজার বাসিন্দার মধ্যে এই ঘরের উপর আমারই দাবী সর্বোচ্চ।পি ডব্লু ডির লোকেরা ঠিকই ভাবিয়াছে—ভিজা মেঝের উপর বসিয়া বাতগ্রস্ত হইতে বতদিন সময়ের দরকার, এই বাসিন্দাকে ততদিন বাঁচিতে হইবে না। আর যদি বিড়ালের ভাগ্যে শিকা ছিঁড়িয়া তাহার মার্সি পিটীশন্ মঞ্জুর হইয়া যার, তাহা হইলে সামান্য রোগের কথা ধর্তব্যের মধ্যে নয়। আজিকার দিনেও কিন্তু মনে হইতেছে এই ভিজার উপর বসিয়া বসিয়া অসুখ করিতে পারে। একটা গল্প পড়িয়াছিলাম;— একজন লোক আত্মহত্যা করিতে প্রস্তুত। বিষের শিশি মুখের কাছে লইয়া গিয়াছে। হঠাৎ তাহার বন্ধু বাহির হইতে দেখিয়া, পিস্তলটা তাহার দিকে নিশানা করিয়া বলিল “ফেলে দে বলছি গেলাসটা, না হ’লে এখনি গুলি করলাম।” হাত হইতে পিস্তল পড়িয়া গেল। কে বুঝিতে পারে মনের এই গতি!

হয়তো দরজার সম্মুখের এই গর্তটী ভূমিকম্পের পর মেরামতের সময় নজরে পড়ে নাই। এঞ্জিনিয়ারের বিশেষ দোষ নাই। ইহা হঠাৎ নজরে পড়ে না। কাছাকাছি জন পড়িলে সব ঐ স্থানে গিয়া ভ্রমা হয়—তখন বুঝা যায়—ঐ স্থানে এতটা গর্ত।.....কি কাণ্ড সেবার ভূমিকম্পের সময়! ১৯৩৪ সালের ভূমিকম্পের কথা বলিতেছি।—পাটনা ক্যাম্প জেল হইতে উত্তর বিহারের সকল রাজবন্দীকে গভর্ণমেন্ট ছাড়িয়া দিল—ভূমিকম্পগীড়িত জনগণের সেবার জন্ত। নিলু ১৯৩২এর শেষের দিকেই ছাড়া পাইয়াছিল। বাবা, মা দুজনেই জেলে। নিলু জ্যাঠাইমাদের বাড়ীতে থাকিয়া পড়ে। আমরা বি, এন, ডব্লু. রেল দিয়া আসিতেছি। প্রতি স্টেশনেই ভূমিকম্পের ধবংসলীলার চিহ্ন দৃশ্যমান। পসরাহা না কোন্ স্টেশনের কাছে একদিন বসিয়া থাকিতে হইল। পুল ভাঙ্গিয়া গিয়াছে। নৌকার পার হইবার বন্দোবস্ত হইয়াছে। গভর্ণমেন্টের নিকট হইতে তিন আনা খোরাকী পাওয়া গিয়াছিল। সেই নদীর ধারের হাঠে, দইওয়ালার সহিত ‘ঠিকা’ হইল, চার পয়সায় যে বত দই খাইতে পারে। নগিন্দর সিং প্রায় চার পাঁচ সের দই খাইল,—বিনা মিষ্টিতে লালচে রংএর মাছয়া দই। সঙ্গে পয়সা নাই। কারাগোলা রোড স্টেশন হইতে পূর্ণিমা পর্যন্ত হাঁটিয়া বাইতে হইবে। গ্যাজেট-দার্জিলিং-রোডে

কি বড় বড় ফাটল। হরদার পুলটি ভাঙিয়া গিয়াছে। হরদা বাজারের নিরুট গিয়া পা আর চলে না। দুবেজী কংগ্রেস-কর্মী। তাহার দোকানে উপস্থিত হইতেই তাহার স্ত্রী দৌড়াইয়া ভিতরে চলিয়া গেল, অল্পক্ষণ পরই “পরগান” এই কথা বলিতে বলিতে বাহির হইয়া আসিল। দেখিলাম মিলের শাড়ী বদলাইয়া সবুজপাড়ের বদরের শাড়ীখানি পরিয়া আসিয়াছে। গায়ের রং এত বয়স সত্ত্বেও সুন্দর ফুটফুটে ;— ঋজু দেহ, টীরাপাখীর ঠোঁটের মতো বাকা নাকটি—সর্বোপরি চোখমুখের একটা আত্মন্যাদার ভাব বৃদ্ধার রূপকে আরও শ্রীময়ী করিয়া তুলিয়াছে।.....দুবেজীর স্ত্রী ও দুবেজী কি খাতিরটাই করিল! দুখে চিঁড়া ভিজাইয়া, সেই চিঁড়া দিয়া দই দিয়া আমরা রঙ্গ-কৌতুকের মন্যে তৃপ্তি করিয়া থাকিলাম। কৌতুকের লক্ষ্য দুবেজী। সকলেই তাহার ভোজপুরি বুলি অনুকরণ করিয়া কথা বলিবার চেষ্টা করিতেছে। দুবেজী “পৌছাইলাম” কে ‘চৌপল’ বলেন, তাহা লইয়া কি হাসি! বৃদ্ধ ও বৃদ্ধাও এই হাসিতে যোগ দিয়াছে। আগুনের ‘ঘুরের’ ধারে অনেক রাত্রি পণ্ডিত দুবেইনের সহিত গল্প হইল,—মা’র কথা,—এইবার সাদী করিতে হইবে— আরও কি কি মনে পড়িতেছে না। দুবেইন “নিমক্ সত্যগ্রহের” সময় লবণ তৈয়ারী করিয়া জেলে গিয়াছিল। কিন্তু পুলিশ কেন জানি না দুবেজীকে ধরে নাই, বোধহয় বয়স হইয়াছে বলিয়া। তাহার পর হইতে ‘দুবেইন’ নিজেকে দুবে অপেক্ষা বড় বলিয়া মনে করে—দুবেজী আনার কাছে এই সব নালিশ করিল। ভারী সরল মন, এই স্বামী স্ত্রী দুইজনের। নিজেদের সামান্য জমি জমা বাহা ছিল কংগ্রেসকে দান করিয়াছে। রাত্রিতে শুইয়া আছি। উহারা মনে করিল আমরা ঘুমাইয়া পড়িয়াছি। পাছে আমাদের নিদ্রার ব্যাঘাত হয়, আমাদের কক্ষের উপর আর একখানি করিরা কক্ষল চাপা দিয়া গেল। তাহার পর ঐ স্থান হইতে রওনা হইবার পূর্বে, স্থানীয় প্রাইমারী স্কুলের দিকে আমাদের একান্তে লইয়া গিয়া বলিল, “আমাদের একটা অনুরোধ রাখতে হবে। আমাদের ছেলেপিলে নেই। তোমাকে কতদিন থেকে, সেই যখন তুমি এতটুকু ছিলে তখন থেকে দেখছি। মাষ্টার সাহেবের ছেলে তো আমাদেরও ছেলে। আমরা গরীব মানুষ, তোমরা হ’লে

বাঙালী, বিনুবাবু। কিন্তু আমাদের একটি কাজের দায়িত্ব তোমাকে নিতেই হবে। আমাদের যে কয়েক বিধা জমি আছে, তাহার আয় আমি কংগ্রেসের কাজেই খরচ করি। এগুলো লেখাপড়া ক'রে দিয়ে যেতে চাই। আমরা ম'রে যাবার পর তুমি এগুলো মহাজ্ঞীর কাজে লাগিও। আমরা আর ক'টা দিনই বা বাঁচবো?"...তাহাদের কাছে কথা দিয়াছিলাম। ছবেইন এখনও বোধহয় সেই রঙীন-কাগজের রথের মধ্যস্থিত রামজীর 'মুর্তের' সম্মুখে বসিয়া, প্রদীপের আলোয়, তকলীতে এণ্ডির সূতা কাটিতেছে।...

.....হরদাবাজার হইতে পূর্ণিয়া ে ছিলাম পরেরদিন ছপুর বেলায়। 'গান্ধী আশ্রম' গভর্নমেন্ট "জপতো" করিয়াছে। তথাপি সেই দিকেই চলিলাম।...দূর হইতে দেখিতেছি, জেলা কংগ্রেস অফিস ঘরের পাশের সিন্ধু গাছটা পীতাম্ব-জরদ রংএর বিগোনিয়া ফুলে ভরিয়া গিয়াছে। আমি সেবার লতাটা ঐ গাছে উঠাইয়া দিয়াছিলাম। পতাকাসত্ত্বের জাতীয় পতাকা পূর্বে বহুদূর হইতে দেখা যাইত। এখন তাহা নাই। কিন্তু ভাসমান সাদা মেঘখণ্ডের পটভূমিকায়, বিগোনিয়া ফুল ভরা সিন্ধুগাছটা জাতীয় পতাকারই কাজ করিতেছে—সাদা, জাফরানী, সবুজ তিনটি রং।.....আশ্রমের বাড়ীগুলি খড়ের। আমাদের বাড়ীর বেড়া ভাঙ্গিয়া পড়িয়াছে। টিউবওয়েলের উপরের অংশটা নাই। এস. ডি. ও. সাহেবের সীল করা, দরজার তালার চিহ্নমাত্রও নাই। তক্তাপোষ ও বড় আলমারীটা ছাড়া আর কোন জিনিষই ঘরে নাই। ছোটখাট সব জিনিষই যে পারিয়াছে লইয়া গিয়াছে। রান্নাঘরের দরজার কপাট ছইটীও কে খুলিয়া লইয়া গিয়াছে। মহাজ্ঞীর ছবিখানি চুরি গিয়াছে। ন'দির তৈয়ারি করিয়া দেওয়া ফ্রেমে বাঁধানো তুলার পেন্‌গটা দেখিলাম না। সহদেওর বোন সরস্বতীর ছোট বেলার তৈরী কার্পেটের উপর বোনা "Untouchability is a sin"—সিন এর Nটা Z এর মতো করিয়া লেখা—তাহাও নাই। আমার লেখা একটি কবিতা নিম্ন পেস্টবোর্ডের উপর টাঙাইয়া দিয়াছিল—সেইটী রহিয়াছে। লেখা অস্পষ্ট হইয়া গিয়াছে। আর আমারই আঁকা রবিবাবুর ছবি, পিজবোর্ডের উপর আঁটা,

এখানিও দেখিলাম কেহ লইবার যোগ্য দ্রব্য বিবেচনা করে নাই। হয়তো ফ্রেমের বাঁধানো নয় বলিয়া ছাড়িয়া গিয়াছে। ফুলের গাছগুলি চুরি হইয়া গিয়াছে। কেবল গোলাপী আর সাদা ভিন্কা ফুলে আঙ্গিনাটি ভরিয়া গিয়াছে, বোধহয় উহার গাছ ছাগলে গরুতে খায় না। মধ্যে মধ্যে দুই একটা ভ্যারেণ্ডার গাছ মাথা উঁচু করিয়া রহিয়াছে, আভিজাত্যহীন নগণ্য ভিন্কাকে তাচ্ছিল্য করিবার জন্য। গুটী পোকাকার চাষের বাড়ী একেবারে পড়িয়া গিয়াছে। গরুর গাড়ীর চাকা দুইটা কে খুলিয়া লইয়া গিয়াছে। তেলের ঘানির ঘরটা খাড়া আছে। কিন্তু ঘরের ভিতরটা অড়র গাছের মতো দেখিতে একপ্রকার আগাছায় ভরা। ভিতরে যাইবার কোন উপায় নাই। আশ্রম লাইব্রেরীর বই একখানিও নাই! হলঘরের মধ্যে দেখিলাম রানীকৃত আবর্জনা—অনেকগুলি ছাগল ও গরু প্রত্যহ বাঁধিবার চিহ্ন তথায় বর্তমান। প্রতিবেশীরা দেখিতেছি কংগ্রেসের এই হৃদ্দিনেও ঘরটিকে ভুলে নাই।.....

মনটা উদাস হইয়া গেল। আশ্রম হইতে বাহির হইয়া জ্যাঠাইমার বাড়ীর গেটের মধ্যে ঢুকিলাম, এটা বাবার অন্তরঙ্গ বন্ধুর বাড়ী। বাড়ীর ঠিক সম্মুখে একটা তাঁবু। তাঁবুর দরজার উপর একটি সাদা ছাগল উর্দ্ধমুখ হইয়া একমনে একটা লতাপাতার এমব্রয়ডারী করা টেবলক্লথ চিবাইতেছে। ননীদির মেয়ে বুড়িয়া, আর তাহার খেলার সাথীরা, মাঠের মধ্য দিয়া যে বিরাট ফাটলটা চলিয়া গিয়াছে, তাহার মধ্যে দৃষ্টি নিবদ্ধ করিয়া উবু হইয়া শুইয়া আছে। আমাকে দেখিয়া সকলে দৌড়াইয়া আসিল। আমি জিজ্ঞাসা করিলাম “ওখানে কি করছিলি?” বলিল “ছোটমামা বলচে যে, ফাটলের মধ্য দিয়া আমেরিকা দেখা যায়।”.....বাহির হইতে চীৎকার করিতে করিতে বুড়ীয়া বাড়ী ঢুকিল—“দিদিমা দেখ? কে এসেছে।” জ্যাঠাইমা আর ন’দি হবিষ্যঘরে খাইতে বসিয়াছেন। “কোথায় ন’দি” বলিয়া ঢুকিতেই, দুইজনেই খাওয়া ছাড়িয়া বাহিরে আসিলেন। জ্যাঠাইমার ডান হাত এটো। বাঁ হাত দিয়া আমাকে কাছে টানিয়া লইলেন। নিলু দেখি ঘরের মধ্যেই ছিল। চোখ রগড়াইতে রগড়াইতে বাহিরে আসিল। “জ্যাঠাইমার

থাওয়াটা নষ্ট করলে তো—এখন জ্যাঠাইমার পাতে ব'সে ওগুনি গেলো”—বলিয়া উচ্চস্বরে হাসিয়া উঠিল। ন'দি বলিল “দেখেছ, দেখেছ, আমাদের থাওয়া তো হ'য়েই গিয়েছিল।” ন'দির চোখে মুখে কপট ক্রোধের চিহ্ন। জ্যাঠাইমা নিলুকে তাড়া দিয়া কহিলেন “তুই আবার ঐ ভাঙা ঘরে শুয়েছিনি! ঘর চাপা প'ড়ে মরবি না কি? তোকে নিয়ে আর পারি না। আর আমি তোকে এখানে রাখবো না। পাঠিয়ে দেবো মামার বাড়ীতে। কি ডাকাত! কি ডাকাত! কাল রাতেও ঐ আটফাটা ঘরে শুয়েছিল!” তারপর কত কথা, কত গল্প! নিলুর কথাই ফলিল। সেই পাতেই আমাকে থাইতে হইল। আমরা কখনও জ্যাঠাইমাদের বাড়ীকে নিজেদের বাড়ী ছাড়া ভারিতে পারি নাই। জ্যাঠাইমাদের বাড়ী চিরকাল আমাদের “ওবাড়ী”।

জ্যাঠাইমাকে মনে পড়ে—সম্মুখের দুইটা বড় বড় দাঁত মুখের বাহিরে আসিয়া পড়িয়াছে। কপালে দুই ক্রর মাঝে একটি নীল-উকীর দাগ। মাথায় কাঁচা-পাকা চুল, ছোট্ট মুখখানি। মুখে হাসি লাগিয়াই আছে। আর হাসিলেই দেখা যায় সম্মুখের নীচের পাণীর দুইটা দাঁত পড়িয়া গিয়াছে। পরনে মটকার থান। জ্যাঠাইমার চোখেমুখে কথাবার্তার এমন মাতৃস্বর ভাব, সচরাচর দেখা যায় না। রাফায়েলের মাতৃমূর্তি বড় গম্ভীর, কেমন যেন একটু আড়ষ্ট আড়ষ্ট ভাব; সর্কর শরীরে সাবলীল ছন্দ ও স্বচ্ছন্দ গতির অভাব; হাসপাতালের-নাস'দের মেট্রোনের মতো যেন কৃত্রিম গাঙ্গুর্য্যে ভরা। কিন্তু জ্যাঠাইমা যেন দেশী পটুয়ার আঁকা যশোমতীর ছবি;—চাকচিক্য নাই কিন্তু অস্তরে সাড়া দেয়। আমার ম'র যে ভাব আমার আর নিলুর প্রতি, জ্যাঠাইমার সেই ভাব পাড়ার সব ছেলে মেয়ের প্রতি। সকলেরই এখানে অব্যাহিত দ্বার, কিন্তু আমার গর্কর যে আমার স্থান তাহাদের মধ্যে সর্কোচ্ছে। নিলুবা তো যখন তখন জ্যাঠাইমাকে এই বলিয়া ক্ষ্যাপায় যে, তিনি আমার উপর পক্ষপাতিত্ব করেন, আর সকলকে না দিয়া লুকাইয়া আমার জন্য খাবার রাখিয়া দেন। আমি জেলে থাকিবার সময় জ্যাঠাইমা একবার খুব অসুখে পড়েন। সেই সময় নাকি তাঁহার সব

সম্পত্তি আমাকে দিয়া বাইার ইচ্ছা প্রকাশ করেন। তখন দেখা যায়, তাঁহার নিজের সম্পত্তির মধ্যে আছে একটা পুরাণো বানিশের ওরাডের মধ্যে ছাব্বিশটা টাকা,—আর এক কনসী পুরাণো নি—প্রতি মাসে কিছু কিছু করিয়া জমানো। নিলু বসাইয়া এই সকল গল্প করে, এবং যখন তখন জ্যাঠাইনাকে এই জন্ত উদ্বাস্ত করিয়া তোলে।...

.....সেই একবার জ্যাঠাইনার ভাইয়ের নাতনীর বিয়েতে জ্যাঠাইনাকে লইয়া গিয়াছিলান তাঁহাদের দেশে। পাবনা জেলার ছোট একটা গ্রাম; বম্বা নদীর তীরে। জ্যাঠাইনার সঙ্গে তাঁহাদের গ্রাম দেখিতে বাহির হইয়াছি। তাঁহার কবিরাজদার ভিটে; গ্রামের বাবুদের ভাঙা মন্দির; ভৈরব ভুঁইয়া—বাগার নামে শুভনো গাছে ফল ধরিত, বাবে গরুতে একঘাটে জন খাইত, তাঁহাদের প্রাচীন বসতবাড়ী; আরও কত জায়গা দেখিলাম। জ্যাঠাইনার কাছে বাল্যকাল হইতেই এই সকল স্থানের এত গল্প শুনিয়াছিলান যে, কিছুই যেন নূতন লাগিতেন ছিল না। তাহার পর জানাইদীঘির ধারের বাঁধের উপর দিয়া যাইতেছি,— জ্যাঠাইমা দেখাইলেন এইখানে নবদ্বীপ ডাক্তার সাইকেল হইতে পড়িয়া গিয়াছিল। “তখন এ জেলায় একখানি মাত্র সাইকেল ছিল। সাইকেল দেখিবার জন্ত আমরা পাড়ার সবাই এখানে এসে দাঁড়িয়েছি—বেচারী ছড়মুড় ক’রে প’ড়ে গেল দীঘির জলের ভিতর, একেবারে সাইকেল টাটকেল নিয়ে!” আমি বলিলাম, “জ্যাঠাইমা, সে যে বলেছিলে ফেরিমেণ্টের রাস্তার (আমলে কথাটা Ferry Fund) উপর।” “আরে! এই বাঁধের উপর দিয়ে এইটাই তো ফেরিমেণ্টের রাস্তা। আর ঠাণ্ড, তোকে একটা কথা বলি; বোস এখানে। তুই যে আমাকে জ্যাঠাইমা, জ্যাঠাইমা বলে ডাকিস, আমার একটুও ভাল লাগে না। মা বলতে পারিস না!” আমি কেমন যেন হতভম্ব হইয়া গেলাম। তাঁহার মুখের দিকে তাকাইয়া দেখি, আগ্রহান্বিতভাবে, জিহ্বাস্থ নেত্র, আমার দিকে চাহিয়া রহিয়াছেন, আমার উত্তরের প্রতীক্ষায়। প্রগাঢ় মেহপূর্ণ মাতৃস্বের বালকে মুখ উদ্ভাসিত। প্রশ্নটা এত অপ্রত্যাশিত যে আমার মুখে উত্তর জোগাইতে বেশ

কিছুক্ষণ সময় লাগিল। ভাবিয়া চিন্তিয়া বলিলাম, “জ্যাঠাইমাও যা মাও তাই। হুইই তো একই।” দেখিলাম আমার উত্তরে তিনি বিলক্ষণ অপ্রস্তুত হইয়াছেন। অপরাধীর সুরে বলিলেন, তোর মা আছে; তোকে এ অনুরোধ করা আমার অগ্রায় হয়েছে। তাঁহার দৃষ্টি দীঘির অপর পারে, কিন্তু কোন নির্দিষ্ট জিনিষের উপর নয়।.....

সেই দিন হইতে অপর সকলের অসাক্ষাতে জ্যাঠাইমাকে ‘মা’ বলিয়া ডাকি। সকলেই কথাটা জানে, কিন্তু তথাপি ‘জ্যাঠাইমা’ ডাকে ছোটবেলা হইতে এমন অভ্যস্ত, যে সকলের সামনে ‘মা’ বলিয়া ডাকিতে কেমন যেন সঙ্কোচ হয়। নবদ্বীপ ডাক্তারের সাইকেল হইতে পড়িয়া বাইবার স্থান দেখাইবার সময় জ্যাঠাইমার হঠাৎ আমার মা হইবার ইচ্ছা কেন হইল তাহা আজও ঠিক করিতে পারি নাই।.....

.....ইহার কিছুদিন পরের কথা। যাহা ভয় করিয়াছিলাম, ঠিক তাই। আমার জ্যাঠাইমাকে ‘মা’ বলা, মা পছন্দ করে নাই। আমি আর নিলু রান্নাবরের দাওয়ায় খাইতে বসিয়াছি। মা পরিবেষণ করিতেছেন। পরিবেষণ করিয়া মা আমাদেরই সঙ্গে খাইতে বসিবেন। আমি হঠাৎ বলিয়া ফেলিলাম, “মা, জানো, জ্যাঠাইমা তিন বাঁটা দিয়ে একরকম এমন সুন্দর বিজের ঝোল রাঁধেন?” “তা সেখানে খেলেই পার। এখানে আর খাওয়ার দরকার কি?” কি কথার কি উত্তর! মা স্বভাবতঃই মিষ্টভাষিনী। তাঁহার কথার এই আকস্মিক বক্ষার আমাকে অবাক করিয়া দিয়াছিল। নিলু হঠাৎ বলিয়া উঠিল, “আজকে মাকে বলেছি কিনা যে, তুমি জ্যাঠাইমাকে ‘মা’ বলা তাই মা চটেছে। দেখলে না ‘তুমি’ বললেন।” সত্যই মা বেশী রাগ করিলে আর আমাদের ‘তুই’ বলেন না। ...নিলুটাও আবার এমন বোকা; মা’র আড়ালে খবরটা আমাকে দিলেই পারিত। দেখিলাম মা’র হুঁচোখ দিয়া জল আসিতেছে, তাহা ঢাকিবার জন্য রান্নাবরে ঢুকিয়া পড়িলেন। আমার মনে হইতে লাগিল যে একটা গুরুতর অপরাধ করিয়া ফেলিয়াছি।.....

.....মা যে ওয়ার্ডে' আছেন তাহার নাম 'আওরংকিতা'। আজ্জ আর ঘুমাইতে পারিবেন না। মা বোধহয় মশারী ফেলিয়া যপে বসিয়াছেন। মন খারাপ হইলেই মা দেখিয়াছি যপে বসেন। নিন্সু যখন দেউলীতে গত বৎসর প্রথমে দিকে অস্থখে পড়িয়াছিল, তখনকার কথা বলিতেছি। হঠাৎ খবর আসিল নিন্সুর আপেণ্ডিসাইটিস্ অপারেশন করা হইয়াছে, আজমীর হাসপাতালে। সেদিন সারারাত মা পূজার ঘরে থাকিলেন। রাত্রি প্রায় এগারোটার সময় কেবল একবার আমার ঘরে আসিয়া, আয়নার পাশে ও তাকের উপর, শিশিগুলির পাশে কিছু খুঁজিতে লাগিলেন। আমার মনে হইল, মা হয়তো নিন্সুর অস্থখের সম্বন্ধে আমার সচিত্র কথা বলিতে চাহেন। অথচ সাহস পাইতেছেন না, পাছে আবার আমি অস্থখের গুরুত্ব বা প্রাণের আশঙ্কা সম্বন্ধে কোন কথা বলিয়া ফেলি, এতজন্য। বোধহয় জপ করিয়া মনে সম্পূর্ণ বল পান নাই। মা ভাবিলেন আমার দৃষ্টি বইএর দিকে নিবন্ধ—তঁাহাকে আমি দেখিতেছি না। দেখিলাম অতি ভক্তিতরে দেওয়ালে টাঙ্গানো, গান্ধীজির ছবিটিকে প্রণাম করিলেন। তঁাহার আননায় টাঙ্গানো গুছানো কাপড়গুলিকে আবার গুহাইতে আরম্ভ করিলেন। তখন আমি মাকে বলিলাম, "আপেণ্ডিসাইটিস্ অপারেশন অতি সাধারণ ব্যাপার। সকলেরই সেরে যায়। আজকাল বিশেষে স্থলোকে এই অপারেশন করিয়ে নেয়।" মা এমনভাবে দেখাইলেন যেন এ বিষয়ে তঁাহার কোন চিন্তা উৎসুক্য নাই। "দেউলী থেকে আজমীর কতদূরে রে?".....আবার সারারাত্রি জপেই কাটিল।.....

শুমটীর উপর হইতে একজন ওয়ার্ডার একটানা চীৎকার করিয়া চলিয়াছে— "বোলোরে নয়াগোল ; বোলোরে জুবলিন (Juvenile Ward)।" রাত্রি এখনও কিছু বেশী হয় নাই! কিন্তু ইহারই মধ্যে অধিকাংশ ওয়ার্ডের "পাহারা"ই দায়সারা ভাবে জবাব দিতে আরম্ভ করিয়াছে। ওয়ার্ডার গানের মতো স্বর ধরিয়া বলিতেছে "বোলোরে..."। "বোলোরে পঁচনস্বর" বলিতে, আমার ষোল গুনিতে

বড় সময় লাগিল, ততটা সময় লাগিল। একজন ওয়ার্ডার আমার একদিন বুঝাইয়াছিল, তাহারা যে গানের সুরে কথাগুলি বলে তাহাতে কষ্ট কম হয়, আর গলা ভাঙিয়া বাইবার সম্ভাবনা থাকে না। প্রতি ওয়ার্ডে চারটি করিয়া বড় বড় হল—দুইটি উপরে, দুইটি নীচে। জেলের ভাষায় এই হলগুলির নাম “খাটান”। পাঁচ নম্বর ওয়ার্ডের প্রথম হল হইতে জবাব আসিল—ভাঙা খনখনে গলায়, “পাঁচ নম্বর, পহ্লা খাটান—জমা একশো সম্ভাওন,—আমামী, তানা, বাগী ঠিক ছায়।” লোকটির গলা শুনিয়াই মনে হইতেছে উহার মুখজোড়া খোঁচা খোঁচা কাঁচা পাকা গোঁফ ; ভারি কর্তব্যনিষ্ঠ ; তাহার মাথায় নীল টুপি, অর্থাৎ সে ‘পাহারা।’ মাসে চার আনা করিয়া বেতন তাহার নামে সরকার বাহাজুরের তরফ হইতে জমা হয়। তাহার বদলে দুই ঘণ্টা রাত্রি জাগিয়া এই পাহারা দেওয়ার কাজ করে। সে সরকারের ‘নিমক’ খায় কাজে ফাঁকী দিবে কেন ? পাঁচ নম্বরের অল্প তিন খাটান হইতে উত্তর আসিল তাহা এত স্পষ্ট নয়। তাহারা সব কথাগুলি বলিলও না। কেবল একটা হো-ও-ও-ও.....হৈ-এর মতো শব্দটি শুনাইল ; গ্রামের চৌকীদারের নিশুতি রাতের হাঁকের মতো। গানের সুরে বলিবান চেটো নাই—কেবল দিনগত পাপক্ষয় করিবার ধরণে বলা। ইংারা নিশ্চয় সাদাটুপীধারী ‘মেট’ অর্থাৎ পাহারা অপেক্ষা পুরাতন কয়েদী। মাসিক আট আনা করিয়া বেতন পায় বটে, কিন্তু তাহারা জেলের অনেক কিছু দেখিয়াছে শুনিয়াছে। তাহারা জানে যে এই কাজ ভাল করিয়া করার উপর তাহাদের “মার্কা” (remission) নির্ভর করে না ; আর জানে কি করিয়া হেড জমাদারকে সম্বুষ্ট রাখিতে হয়। একজন মেট নেহাৎ কেউকেটা নয়। তাহার অধীনে আছে এতগুলি কয়েদী। তাহাদের শাসনে রাখিতে হইলে জেলের কর্মচারীদের প্রতি জেলের নিয়মকানূনের প্রতি একটু বেপরোয়া তাচ্ছিল্যের ভাব দেখাইতে হবে। ...

“বোলোরে নয়াগোল” (Segregation Ward)। যতক্ষণ “বোলোরে” বলিতেছিল আমি উৎকর্ণ হইয়া শুনিতেছিলাম যে পাঁচ নম্বরের পর ছয় নম্বর

বলিবে, না নয়াগোল বলিবে। তাহা হইতেই বুঝা যাইবে ওয়ার্ডার নূতন না পুরানো। ছয় নম্বরের আর একটা নাম “দামুলী কিতা”। বাহাদুরের যাবজ্জীবন কারাদণ্ডের আদেশ হইয়াছে তাহারাই এ ওয়ার্ডে থাকে। এই কয়েদীরা অল্প ওয়ার্ডের কয়েদীদিগকে ‘কদ্দুচোর’ বলিয়া ঠাট্টা করে ও তাচ্ছিল্যের দৃষ্টিতে দেখে। তাহারা নাচি লাউ চুরি করিয়া জেলে আসিয়াছে। এই দামুলীদের (Lifer) সকল ওয়ার্ডারই একটু সম্বন্ধ করিয়া চলে। আর পুরানো ওয়ার্ডারদের সহিত ইহাদের একটা বন্দোবস্ত আছে। তাহারা গুমটির উপর ডিউটীতে থাকিলে ইহারা সারারাত শান্তিতে ঘুমাইতে পায়। মেট পাহারার চীংকার ও সংখ্যাগণনা হইতে তাহারা অব্যাহতি পায়। আর সারাদিন বেচারারা জেলের ক্যান্টিনীতে কাজ করে। একটু অবিচ্ছিন্ন নিদ্রার সুযোগ না পাইলে ইহারা সারাজীবন এই হাড়ভাঙা খাটুনি খাটিলে কেমন করিয়া!.....

নূতন ওয়ার্ডার হইলে নিশ্চয়ই ‘বোলোরে ছয় নম্বর’ বলিয়া হুক দিত। দুই নম্বর ওয়ার্ড হইতে ছয় নম্বর ওয়ার্ডের দিকে তাকাইলেই যেন মনে হয়, একটা বড় জংশন রেলস্টেশনের প্যাটফর্মে দাঁড়াইয়া আছি। এ ওয়ার্ডটি একজন রাজা বাহাদুরের দান। দানের পাত্র, বিষয়বস্তু, ও উদ্দেশ্য বাহিবার প্রতিভা রাজাবাহাদুরের নিশ্চয়ই অননুসন্ধান বলিতে হইবে। বাহা হটক এই দানের দ্বারা রাজাবাহাদুরের কোন গুপ্ত আকাঙ্ক্ষা সিদ্ধ হইয়াছে কিনা জানি না, তবে যে হতভাগ্য আজীবন কারাগারে কাটাইবে, তাহারা নিশ্চয়ই তাঁহাকে আন্তরিক ধন্যবাদ দেয়। লাইকাররা সাধারণতঃ লোক ভাল। পাকাচোরের ছ্যাচড়ানী বা নীচতা তাহাদের মধ্যে নাই। জেলকেই ঘরবাড়ী করিয়া লইয়াছে। কেহা ওয়ার্ডের আঙ্গিনার সবুজে তৃণসী গাছ পুঁতিয়াছে; কেহ অল্প জায়গা পরিষ্কার করিয়া নিকাইয়া বসিবার স্থান করিয়া লইয়াছে। অনেকেই নিজের নিজের লক্ষা ও পুদিনার গাছ আছে। এই গাছগুলির উপর তাহাদের কি মায়া! স্নেহ, ভালবাসা, সন্তানবাৎসল্যের স্বাভাবিক প্রেরণা, তাহারা এই গাছগুলির উপর নিঃশেষ করিয়া ঢালিয়া দেয়।.....

.....হাজারীবাগ জেলের সেই ফিরিঙ্গী উইলিয়মস্ সাহেবের ছাড়া পাইবার দিন কি কাল! চৌদ্দ বৎসর সে জেলে কাটাইয়াছে। তাহার পোতা পেয়ারা গাছটী কত বড় হইয়াছে। তাহারই হাতের লাগানো গোলাপজাম গাছটী পাউডার পাকের মতো ফুলে ভরিয়া গিয়াছে। অশথ গাছটির নীচে সে বসিবার জন্য উঁচু বেদী তৈয়ারী করাইয়া লইয়াছিল। তাহা লইয়া সুপারিটেণ্টেণ্ট ও পি-ডব্লু-ডি এঞ্জিনিয়ারের মধ্যে কত মন-কষাকষি হইয়া গেল।—সব জিনিষের দিকে তাকায়, আর ডুকরাইয়া ডুকরাইয়া কাঁদিয়া উঠে। একজন বয়স্ক লোককে একরূপ করিয়া কাঁদিতে খুব কমই দেখিয়াছি। বাড়ী যাইবার ও আত্মীয় স্বজনকে দেখিবার আনন্দ অপেক্ষা এই সকল গাছপালা ও জেলের বন্ধুবান্ধবকে ছাড়িয়া যাওয়ার দুঃখ তাহার অনেক বেশী হইয়াছিল।.....

একই ভাবে অনেকক্ষণ বসিয়া ডান পা খানি অবশের মতো হইয়া গিয়াছে। ঘরের মধ্যে দাঁক-করেক পাষাণী করিলাম, পারের বিনধিনি সারাইবার জন্য। দরজার গরাদ ধরিয়া আড়াআড়ি ভাবে যখনই বসি, দেখি নিজের অজ্ঞাতে ডান দিকে ভর দিয়াই বসিয়াছি। আর ডান হাত দিয়া গরাদগুলি ধরিয়া রাখিয়াছি। কখনও ভুলক্রমেও বাঁ কাঁধ গরাদের সঙ্গে ঠেকাইয়া, বাঁ দিকে ভর দিয়া বসি না।

.....তখন আমরা কত ছোট! স্কুলে বাই না। বোডিং-এর কাছে হেড মাস্টারের কোয়ার্টার। বাবা স্কুলে গিয়াছেন। মা বসিয়া সুপারী কাটিতেছেন। আমার আর নিলুর মধ্যে কথা-কাটাকাটি চলিতেছে। নিলু বলিতেছে, মা'র ডান কোলটী তাহার; বাঁ কোল আমার লইতে ইচ্ছা হইলে আমি লইতে পারি। কেন জানি না, আমার বাঁ কোলটী লইতে অপমান বোধ হইতেছে। দুই জনেই মা'র ডান কোলের উপর হাত রাখিয়া, নিজের নিজের দাবী কায়ম রাখিবার চেষ্টা করিতেছি। এই হুড়াহুড়ির মধ্যে হঠাৎ নিলুর পায়ে লাগিয়া, কাটা সুপারী রাখিবার বেতের কাঠাটী উল্টাইয়া গেল। মা ঠাস্ ঠাস্ করিয়া আমার পিঠে দুই চড় বসাইয়া দিলেন—“বুড়ো ছেলে লজ্জা করে না, যত বয়স হচ্ছে তত গুণ বাড়ছে।” আমি জবাব দিলাম, “আমি সুপারী ফেলেছি নাকি?”

“ফের কথা! ছোট ভাই ডান কোল চাচ্ছে, তো ওনারও ডান কোল নিতে হবে। ডান কোল নিলুর। আর একটু হ’লেই আমার হাত জাতিতে কেটে গিয়েছিল আর কি?”

ক্রোধে, লজ্জায়, অপমানে চোখে জল আসিয়া গেল। খানিকটা দূরে গিয়া চুপ করিয়া বসিয়া রহিলাম। নিলু কিছুক্ষণ পরে উঠিয়া চলিয়া গেল,—বোধহয় দাবীদার না থাকায় তাহার ঝগড়া করিবার সাধ মিটিয়া গিয়াছিল। অনেকক্ষণ হইতে অনুভব করিতেছিলাম যে মা মধ্যে মধ্যে আড়চোখে আমি কি করিতেছি দেখিতেছেন। তাহার পর সুপারী কাটা শেষ হইলে কাঠাটী দেবাজের উপর রাখিয়া, আমার কাছে আসিয়া বলিলেন, ‘তুই এত বোকা কেন? বাঁ কোলটাই তো ভাল। দেখিস নি ঝিনুকে ক’রে ছুধ খাওয়ানোর সময়, ডান হাত দিয়ে ছুধ খাওয়ায়; বাঁ কোলে মাথা দিয়ে ছেলে শুয়ে থাকে? তুই তো ডান কোলেও শুয়েছিস। বাঁ কোলটা এগন .তোর হ’লো। ওঠ, ছাখ, সে দসিয়াছেলে আবার কোথায় গেল!’” যুক্তিটা সে সময় অকাট্য মনে হইয়াছিল।.....

ডান পারের অবশ্য ভাবটী কাটিয়া গিয়াছে। ঘরের ভিতর পায়চারী করিতেছি দেখিয়া, ওয়ার্ডার দরজার কাছে আসিল,—বেন জানিতে চায়, আমি কি ভাবিতেছি—কেন হঠাৎ রাত ছপুয়ে অন্ধকার ঘরের মধ্যে পায়চারী করিতে আরম্ভ করিলাম। বোধহয় ভাবিতেছে যে বাবুর মনের ঠিক নাই। আর আজকের দিনে তো থাকিবার কথাও নয়। গরাদের বাহির হইতে ওয়ার্ডার দেখিতেছে। মনে হইতেছে বেন চিড়িয়াখানার দর্শক খাঁচার ভিতর কোন বস্তু জন্ম দেখিতেছে।

চিড়িয়াখানার কথায় মনে পড়িল।.....কাশীতে আমার বন্ধু নীরেশের ছোট ঠাকুমা তীর্থ করিতে গিয়াছেন। কোন দূরসম্পর্কের ছোট ঠাকুমা। দ্বিতীয় পক্ষে বিবাহ হইয়াছিল এক বৃদ্ধ জমিদারের সঙ্গে। বিবাহের কিছুদিনের মধ্যেই বিধবা হন। কাশীতে সঙ্গে আসিয়াছিলেন ছোট ঠাকুমার মা আর বাবা। নাম ছোট ঠাকুমা, কিন্তু বয়স এত কম দেখিয়া অবাক হইয়া গিয়াছিলাম। তাঁহাদের লইয়া আমি আর নীরেশ প্রচুর উৎসাহের সহিত কাশীর দ্রষ্টব্য স্থানগুলি দেখাইয়াছিলাম।

বাজার চিড়িয়াখানা দেখিতে গিয়াছি। বাঘের ঘরের সম্মুখে দাঁড়াইয়া আছি। বাঘটা দুই পা আগে বাড়াইয়া দিয়া একটা বিকট শব্দ করিল। উহার মুখের ভাব হাই তোলার মতো লাগিল। নীরেশের ছোট ঠাকুমা “মাগো” বলিয়া আমাকে জড়াইয়া ধরিয়াছিলেন, বোধহয় ভয়ে। মাত্র কয়েক সেকেন্ডের ব্যাপার। সম্ভবতঃ তাঁহার না, বাবা বা নীরেশ কাহারও চোখে ব্যাপারটা পড়ে নাই। পড়িলেও অন্ততঃ বিসদৃশ ঠেকে নাই। কিন্তু এই ক্ষুদ্র মুহূর্তটিকে উপলক্ষ্য করিয়া মনে মনে কত স্বপ্নজাল বুনিয়াছি!... নীরেশের উপদেশ মতো ছোট ঠাকুমার মাকে মাসীমা বলিলাম। কাশীতে তাহাদের বাসায় নীরেশের সঙ্গে গেলাম, একেবারে রান্নাঘরে যেখানে তিনি দাঁধিতেছেন। মাসীমা অতি ভাল মানুষ, কথাবার্তা বিশেষ বলিতে পারেন না। শিক্ষিত সত্বরে ছেলের সঙ্গে কথাবার্তা বলিতে গিয়া, কি বলিতে কি বলিবেন কেবল সেই ভয়। আমি রান্নাঘরে ঢুকিতেই বলিলেন, “আমার ভাড়া ঘরে তাঁদের আনো”। কি ভাবিয়া এই কথা বলিলেন, তাহা ঠিক বুঝিতে পারিলাম না। তাহার পর খুন্সীখানি হাতে করিয়া কেমন বেন জড়াজড় হইয়া দাঁড়াইয়া রহিলেন— মুখে একটা অর্থহীন হাসির ভঙ্গী। ইহার পরের কয়েকদিন উহাদের লইয়াই— আমরা ব্যস্ত রহিলাম। ছোট ঠাকুমার বাবার জন্য চার রকমের চারটা টেবল কত দোকান ঘুরিয়া কিনিলাম; বাজারে বাহির হইলেই তাঁহার ঐরূপ কোন একটা জিনিষ কিনবার কথা মনে পড়ে। গ্রাম্য অমাজ্জিত কথাবার্তা ভদ্রলোকের। মেয়ের অভিভাবক; ভামাইয়ের অবর্তমানে সম্পত্তির দেখাশুনা তিনিই করেন। এক মাত্র কটার বৈধব্যে বিশেষ ত্রুটিত বলিয়া বোধ হয় না, বরং তাহার দারিদ্র্যময় পূর্ব-জীবনের অতৃপ্ত সখগুলি মিটাইবার সুযোগ পাওয়ার, আত্মস্তুতি বেন কিছু বাড়িয়াছে। একমাত্র ভয় করেন মেয়েকে।... কাশীতে ছোট ঠাকুমার মা’র অসুখ করিল। অসুখের সময় তাহার বাতিক হইল, আমার হাত ছাড়া আর কাহারও হাতের ঔষধ খাইবেন না। প্রত্যহ বিশ্বনাথের মন্দিরের পাণ্ডার বাড়ী হইতে ডাব লইয়া যাইতাম— রোগীর জন্য। বাড়ীতে ঢুকিতেই, ছোট ঠাকুমা বলিতেন “এই যে মল্ল্যাসী ঠাকুর এসেছেন। এতক্ষণে মার নিশ্চিন্দ।” তখন আমার মনে কেমন একটা

ক্লান্ত সাধনের সখ জাগিয়াছে। আমি তখন বাবরী চুল রাখি। গোলাদাড়া উঠিয়াছে কিন্তু কামাইতে আরম্ভ করি নাই। সেইজন্য ছোট ঠাকুর আমাকে সন্ন্যাসী ঠাকুর বলিতেন। তাঁহার কথা মনে পড়িলেই তাঁহাকে দোষ — নীলাশ্রী শাড়ী পরনে, হাতে বেকী চুড়ী, গলায় মোটা চেন হার — বোধহয় তাঁহার মা প্রাণে ধরিয়া, তাঁহার একমাত্র মেয়েকে নৈখ্যব্যাধি লইতে দেন নাই। গায়ের রং কালো এবং তাহার সহিত চিড়িতন পাড় নীলাশ্রী শাড়ী একবারে মানার নাই। নেহাৎ সাধারণ গ্রাম্য গৃহস্থবাড়ীর মেয়ে—ছোট ঠাকুর। বাবরীর মতো রূপ-গুণ তাঁহার ছিল না। কিন্তু আমাকে আকর্ষণ করিয়াছিল, তাঁহার রূপের স্বকৃতা, সম্পূর্ণ আপন করিয়া লওয়া ব্যবহার আর কথাবার্তার আনন্দিতা। তাঁহার যেদিন দেশে ফিরিয়া যাইতেছেন,—আমি নীবেশ তাঁহাদের ট্রেনে উঠাইয়া দিতে গিয়াছি : নীবেশ আর ছোট ঠাকুর বাবা পানওয়ারনার নিকট হইতে, শেষ গৃহভেদে মনে পড়া, বিছু ভাল কাশীর ডল্লা কিনিতে গিয়াছেন। আমি প্লাটফর্মে দাঁড়াইয়া—হাত দুইটা গাড়ীর জানালার উপর। জানালার সম্মুখে বসিয়া ছোট ঠাকুর আমার হাতের উপর হাত রাখিয়া। তাঁহার দুই ছোপ জলে ভরিয়া গিয়াছে। আমি তাঁহার দিকে তাকাইতে পারিতেছি না। আমাকে আস্তে আস্তে বলিলেন “সন্ন্যাসী ঠাকুর, আমাদের ওখানে একবার বেয়ো”। তাঁহাকে কথা দিয়াছিলাম। অনেক দিন পর্যন্ত ইচ্ছাও ছিল যে কথা রাখিব। ছোট ঠাকুরা চলিয়া বাইবার পর কিছুদিন সব খালি খালি বোধ হইতেছিল—কোন কিছুতেই মন বসে না—যুঁঝিয়া ফরিয়া একটা মুখ সর্বদাই চোপের সম্মুখে ভাসিয়া উঠে। চিত্তির প্রত্যাশায় পোষ্ট অফিস পর্যন্ত গিয়া হাজির হইতাম।.....

তাহার পর সেই নীলাশ্রী শাড়ী, সেই বোম্বাই বেকী চুড়ী করে স্মৃতিপট হইতে মুছিয়া গিয়াছে, ধীরে ধীরে মনের অজ্ঞাতে। চার পাঁচ বৎসর পরে মিলিটারি গোল্ডা পুড়াইয়া ফেলিবার সময় একখানি নীল রংএর কাগজে লেখা পত্র দুইভাগ পড়িয়া তাহার অস্বাভাবিক ভাব বড়ই দৃষ্টিকটু লাগিয়াছিল।—“সন্ন্যাসী ঠাকুর গিরের ভোজে ফাঁকি দিওনা আমাকে। ভোজের জন্য আমি পেট চাঁচিয়া বসিয়া আছি।”

‘পেট টাঙ্গিয়া’ কথাটি বড়ই স্মৃতির দৈন্তের পরিচায়ক। চিঠিতে এরূপ ধরণের কথা লেখা যায়—একথা ভাবিয়াই অবজ্ঞা ও তাচ্ছিল্যে মন ভরিয়া যায়।.....

খট খট খট খট ! ভারী মিলিটারী বুটের শব্দ হইতেহে শান বাঁধানো আঙ্গিনার উপর। তিনটি নূতন সিপাহী আসিল। পূর্বের ওয়ার্ডারের নিকট হইতে চার্জ বুঝিয়া লইয়া ঘরের তাল ঠিক আছে কি না দেখিল। কোনো সেলের সম্মুখে বেশীক্ষণ দাঁড়াইয়া চ্যাচামেচি করিল না। বুঝিয়াম সেলের কোনো আসামীই এখন ঘুমায় নাই। ঘুমাইয়া পড়িলে ওয়ার্ডার নিশ্চয়ই ডাকিয়া তুলিত। যখন চার্জ বদল হয়, তখন নূতন ওয়ার্ডার প্রতি সেলের আসামীকে ডাকিয়া তুলিয়া দেখে যে, সে জীবিত আছে কিনা! যদি কেহ সেলের দরজার নিকট বসিয়া থাকে, কিংবা কাশিয়া বা অল্প কোন উপায়ে সাড়া দিয়া বুঝাইয়া দেয় যে সে সুস্থ শরীরে বাঁচিয়া আছে, তাহা হইলে আর তাহাকে ডাকে না। কিন্তু ঘুমাইয়া পড়িলে আর রক্ষা নাই। সেলের আসামী— তাহার আবার একটানা দুই ঘণ্টার অধিক প্রগাঢ় নিদ্রার প্রয়োজন কি? কারণ জিজ্ঞাসা করিলে বলে যে “এহি কুল হায় বাবু।” যদি কেহ অজ্ঞান হইয়া গিয়া থাকে, বা অসুস্থ হইয়া বাকশক্তি রহিত হইয়া গিয়া থাকে, তাহা হইলে আমরা না-ডাকিলে জানিতে পারিব কি করিয়া? ‘ডাকদার’কে খবর দিব কেমন করিয়া? সত্য কথা বলিতে কি, ইহাতে সেলের কয়েদীদের বিশেষ অসুবিধা হয় না। মশা, ছারপোকা, পিপড়া, দিবারাত্র কর্মহীনতা, দুশ্চিন্তা, প্রভৃতি নানা কারণে স্বাভাবিক কর্মজীবনের গভীর নিদ্রা সেলের বাসিন্দাদিগের নাই।.....

দশ নম্বর সেল হইতে গানের সুর ভাসিয়া আসে, “শহীদো কে টোলী নিকলী।”

টোলী কথাটি শুনিলেই পাটনা ক্যাম্প জেলের ১৯৩২ সালের “সেবাদল” ট্রেনিংএর কথা মনে পড়ে। আমি আর নিলু দুই জনেই ‘সেবাদল’ ট্রেনিং লইব বলিয়া ঠিক করিলাম। প্রথম দিন “কবায়ৎ” (drill) শেষ হইলেই, নিলুব আমাকে জিজ্ঞাসা করিল “টোলী, কি?” আমি তাহাকে কাহিয়া দিলাম যে

কয়েকজন 'সিপাহী' মিলিয়া একটি 'টোলী' হয়। "সিপাহী মানে হচ্ছে 'প্রাইভেট' আর 'টোলী নায়ক' হচ্ছে এন. সি. ও." নিলু অসহিষ্ণুভাবে বলিল "ওসব তো আজকে টেণ্ডারকার ভানভাবে বুঝিয়ে দিয়েছে। কিন্তু আমি জিজ্ঞাসা করছি 'টোলী' কথাটা এরা পছন্দ করলো কেন? আর কোন কথা পেল না! টোলী, টোলী" এই বলিয়া কি হাসি! সেই দিনই বিকাল বেলায় টেণ্ডারকার যখন "কদম খোল" (Stand-at-ease) আর "সাবধান" (Attention!) এর অর্থ বুঝাইতেছিল, নিলু একেবারে ড্রিলের মধ্যে হাসিয়া ফাটয়া পড়িল। টেণ্ডারকার তো চাটয়া আগুন। সে ছবলীতে হরদিকারের ক্যাম্প ট্রেনিং লইয়াছে, বোম্বাইএ ক্যাম্প চালাইয়াছে, প্রাদেশিক কংগ্রেস কমিটির সভাপতির বিশেষ অনুরোধে সে মহারাষ্ট্র ছাড়িয়া বিহারে সেবাদানের কাজ করিতে আসিয়াছে। সেবাদান ট্রেনিং সম্বন্ধে তাহার প্রচুর অভিজ্ঞতা, কিন্তু ড্রিলের সময় একরূপ ডিসিপ্লিনের অভাব সে পূর্বে কখনও দেখে নাই। সে ভান হিন্দী বলিতে পারে না। রাগে তাহার চোখমুগ লাল হইয়া উঠিয়াছে। "তুমকো এহি লকড়ী মিলেগা" বলিয়া হাতের লাঠিটা দিয়া নিলুকে একটা গুঁতা মারিল।—নিলু তাহার হাত হইতে লাঠি কাড়িয়া লইয়াছে, আর চীৎকার করিয়া বলিতেছে "লকড়ী মিলেগা। উসব মহারাষ্ট্রমে কিজিও। ইহাঁ উসব নহী চলেগা। রাষ্ট্রভাষা বোলনে নহী আতা হয়। পুণা সহরকো পুঁড়ে বোলতা হয়। আওব হিন্দীনে বাত বোলনেকা সওথ হয়।" নিলু টেণ্ডারকারের হাত ধরিয়া ফেলিয়াছে। চারিদিক হইতে সকলে গিয়া তাহাকে ছাড়াইয়া দিল। সঙ্গে সঙ্গেই এই খবর জেলের সর্বত্র ছড়াইয়া পড়িল। ক্যাম্পজেলে তখন প্রায় সাড়ে চার হাজার রাজবন্দী থাকে। যে ওয়ার্ডে যাও, সকল স্থানেই ছোট ছোট দল এই বিষয়ই আলোচনা করিতেছে। জেলের প্রতি কোণে, আকাশে বাতাসে সজীব গুঞ্জনধ্বনি। জেলের কেন্দ্র যাহার নাম আমরা দিরাছিলাম "চওক" সেখানে বেশ কয়েকটা বড় দল ঠটনা পাকাইতেছে। ওয়ার্ডাররা শুদ্ধ রাজবন্দীদের সহিত মিলিয়া এক হইয়া গিয়াছে। তাহাদেরও জেলের পলিটিক্সে উৎসাহ কম নয়। একজন বক্তৃতা দিয়া আসল

পরিস্থিতি সকলকে বুঝাইয়া দিলেন,—বিহারের সুনামে কলঙ্ক পড়িবে ;—বাহিরের লোক টেঙুলকার। তাহার প্রতি অতিথি-সৎকার কি এমন করিয়াই করা হইল। তাহার উপর রাষ্ট্রভাষা লইয়া উপহাস! তাহার পর, নিকটস্থ শ্রোতাদের বিশ্বাসের পাত্র বিবেচনা করিয়া বেন একটা গুপ্তকথা বলিতেছেন, এই ভাব দেখাইয়া গলায় স্বর নামাইয়া বলিলেন—“বান্ধালী কিনা”। তাহার পর ঠোঁটের কোণে ঈষৎ হাসি আনিয়া তাহার দ্বারা ব্যক্ত করিতে চাহিলেন “তোমরা তো সব জানই। তোমাদের কি আর বুঝিয়ে ব’লে দিতে হবে”। লজ্জায় অপমানে আমার মাথা কাটা খাইতে লাগিল। ইহারা নিলুর মনের ভাব জানে না। তাহার ব্যবহারের একটা মনগড়া অর্থ করিয়া লইয়াছে। এই অর্থটা তাহাদের বেশ মনের মতো হইয়াছে। সন্ধ্যার পর ওয়াডে নিলুর সহিত দেখা, খাইবার সময়। সূর্যাস্তের পূর্বেই খাওয়া হইয়া যায়। সে সময় ক্ষুদ্রা হয় না বলিয়া আমরা রুটী লইয়া ওয়াডে রাখি। পরে একটু অধিক রাতে খাই। নিলু নিজেই কথা পাড়িয়া আমার সংশ্লিষ্ট ভাগিয়া দিল। বিকালের ঘটনার আমি লজ্জিত হইয়াছিলাম ; নিলু কিন্তু কিছু মাত্র অপ্রতিভ হয় নাই। সে বলিয়া চলিয়াছে—“এই সমস্ত ড্রিলের অর্ডারগুলো ইংরাজীতে রাখলে কি ক্ষতি হ’তো। কুইকমার্চ, স্ট্যাণ্ড-স্ট-ইজ বললে ভারতের স্বাধীনতা পাওয়া কি দুর্ঘট হ’য়ে যেত নাকি? হিন্দী জানেন না, আবার হিন্দী বলা চাই। মানারস্ জানে না। ছোটলোক। একে আবার খাতির কিসের?” কোন বিষয়ে অবাচিত উপদেশ আমি নিলুকে কোন দিনই দিই নাই। এখনও হয়তো আমি কোন কথা বলিতাম না, যদি ও নিজেই কথাটা না পাড়িত। অন্যান্য রাজবন্দীরা নিলুর আচরণের কি কদর্থ ক’রয়াছে, তাহা সংক্ষেপে বুঝাইয়া দিলেন। নিলু ভীষণ চটিয়া গেল—বলিতে লাগিল “এঁরা আবার স্বরাজ নেবেন!” তাহার পর অনর্গল কত কি বলিয়া খাইতে লাগিল। কিছুক্ষণ পরে দেখিলাম সব রাগ গিয়া পড়িল কোন্ অজ্ঞাত সার্থীর উপর যে তাহার গুড় চুরি করিয়া খাইয়াছে। রবিবারের দিন যে সকল রাজবন্দী “এতোয়ার” করে তাহারা ভাতের বদলে গুড় রুটী বা ছয় পয়সার ফল খাইতে পায়। নিলু

গুড় নেয়। রবিবারের দিন আমার ভাত আমরা দুইজন মিলিয়া খাই। আর এই অসুবিধাটুকু স্বীকার করিয়া, আমরা সারা সপ্তাহ একটু একটু করিয়া গুড় পাই। সেই গুড় চুরি গিয়াছে। কাজেই নিলুর মন তিক্ত হইয়া যাওয়া কিছুই আশ্চর্য নয়। কিন্তু আমার খারাপ লাগিল, নিলুর চীৎকার করিয়া, সকলকে শুনাইয়া, রাজবন্দীদের উপর কটু মন্তব্য করা,—নিশেষতঃ যখন আবহাওয়া ইহার পক্ষে অনুকূল নয়। সারা পৃথিবী নিলুর বিরুদ্ধে থাক,—নিলু কখনও নিজের পথ হইতে বিচ্যুত হইবে না। একবার সে মত স্থির করিয়া ফেলিলে, আর কেহই তাহাকে টলাইতে পারিবে না। আমি সব সময়েই ভয় করি, এই বৃষ্টি নিলু কোন একটা কাণ্ড করিয়া বসে। জেলের রাজবন্দীদের সময় কাটাটবার খোরাক চাই। যে অসীম কষ্টপ্রেরণা জেলের বাহিরে থাকিতে তাহাদের সর্কাদা চালিত করিয়া বেড়ায়, তাহারাও তৃপ্তির জন্য তাহাদের ভেলের মধ্যে নানা প্রকার কটলা, দলাদলি ও পলিটিক্সের অবতারণা করিতে হয়। কিন্তু নিতানূতন প্রোগ্রাম না পাইলে মন বসিবে কেন? এই জন্যই নিলুর ব্যাপার সেবার বেশীদূর গড়াইল না। পরের দিন সকালেই জলখাবার বিতরণের সময় কে যেন কথা উঠাইল যে প্রত্যাহ ভিজাছোলা জলখাবার দেয়; ইহার পরিবর্তে বর্দি চিঁড়া পাওয়া যায়, তাহা হইলে বড় ভাল হয়। আর কোথা যাইবে! সঙ্গে সঙ্গে ছড়া বাঁধা হইল “চেন-কা বদলে চুড়া লেঙ্গে” (১২) জেলগুরু লোক সম্মুখে এই চীৎকার করিতেছে। সঙ্গে সঙ্গে খালা ও গ্লাস বাজানো হইতেছে। কেহ শিষ দিতেছে; কেহ বা দরজার গরাদ-গুলির উপর দিয়া নিজের খালাখানি হড়হড় করিয়া টানিয়া লইয়া যাইতেছে! তাহাতে একটা বিকট শব্দ হইতেছে। অনেকে জানালার উপর উঠিয়াছে। দুইজন জানালা বাহিয়া টিনের ছাতের উপর উঠিল। হঠাৎ যেন কোন্ বাতুলের স্পর্শে সকলে একসঙ্গে উন্মাদ হইয়া উঠিয়াছে। বাহাদের অতি ধীর গতির বলিয়া জানিতাম, তাহারাও দেখি উৎসাহের আতিশয্যে নিজেকে সংযত রাখিতে পারিতেছে না। কয়েকজন পাগলের মতো ওয়ার্ডের এক প্রান্ত হইতে অপর প্রান্তে ‘কম্বল, কম্বল’ বলিয়া চীৎকার করিতে করতে দৌড়াইতেছে। তাহার কথায় অনেকে

একটা নূতন প্রোগ্রাম পাইল। রাশি রাশি কন্সল দেখিতে দেখিতে কয়েকজন বাহিরে আনিয়া ফেলিল। কন্সলগুলি টুকরা টুকরা করিয়া ছিঁড়িয়া ফেলিবার চেষ্টা হইতেছে। একজন রান্নাঘর (জেলের স্থানীয় ভাষায় 'ভাঠহা') হইতে এক টুকরা জ্বলন্ত কয়লা লইয়া আসিয়া খানকয়েক কন্সলের উপর ফেলিল। তাহা হইতে অল্প অল্প ধোঁয়া ও উৎকট গন্ধ বাহির হইতেছে। দুইজন দৌড়িয়া গিয়া, যে লোহার পাত্রটিতে ভিজা ছোলা রাখা ছিল, তাহা উল্টাটিয়া ফেলিয়া দিল। নিকটস্থ ওয়ার্ডার "পাগলী" (alarm) হুইস্‌ল বাজাইতেছে। একটানা হুইস্‌ল সে বাজাইয়া চলিয়াছে। ইহা শুনিয়া, জেলের সর্বত্র, যেখানে যে ওয়ার্ডার আছে, সকলেই বাঁশী বাজাইতেছে। ফুটবল-রেফরীদিগের সহিত ইঞ্জিন-ড্রাইভারদিগের যেন হুইস্‌লের ঐক্যতান প্রতিযোগিতা হইতেছে। অগণিত বাঁশীর তীক্ষ্ণ, তীব্র শব্দ জেলের আবহাওয়াকে একটা নূতন রূপ দিয়াছে। গুম্‌টী হইতে একটানা ষাটটা বাজিয়া চলিয়াছে—ঢং ঢং ঢং ঢং…………। জেল-গেটে আর একটা ঐরূপ ষাটটা বাজিতেছে। একেবারে বইয়ে পড়া জাহাজ-ডুবির দৃশ্য। আর এ দিকে তুমুল কোলাহল "কন্সল জ্বলতে রহে" "খারিয়া বাজতে রহে," "নৌকরশাহী নাশ হো," আরও কত কি যাহা ঠিক স্পষ্ট বুঝা যাইতেছে না। জেল-কর্মচারীরা যেখানে যে যে-অবস্থায় ছিল, সেই অবস্থাতেই হস্তদত্ত হইয়া ছুটিয়া আসিতেছে। গুম্‌টীতে একটা সাইনবোর্ড টাঙ্গাইয়া দেওয়া হইয়াছে "ওয়ার্ড নম্বর ১৭,—১৮,—১৯।" লাঠি লইয়া গেট হইতে ওয়ার্ডাররা আসিতেছে গুম্‌টার দিকে। অনেকেই উদী নাই, খালি গা, খালি পা ; হরেনবাবু জেল-ডাক্তার একটা গেঞ্জি গায়ে দিয়া আসিয়াছেন। গুম্‌টী হইতে একটা ওয়ার্ডার চোৎকার করিয়া বলিয়া চলিয়াছে—"সৎরহ, আঠারহ, উনইশ নম্বর"। আর সকলে ঐ ওয়ার্ডারগুলির দিকে দৌড়াইতেছে। হঠাৎ গুজনধ্বনি আরম্ভ হইল "মিলিটারী আরহী হৈ"। বন্দুক হাতে একদল মিলিটারী জেল-গেট দিয়া ভিতরে ঢুকিল। ইহাদের হাবভাবে ব্যস্ততা নাই। কুইকমাচ করিয়া তাহারা গুম্‌টার নিকট আসিল, পরে তিনটা ওয়ার্ডারের কমন-গেটের সম্মুখে আসিয়া দাঁড়াইল। ওয়ার্ডারের কোণে রাখা ছিল একরাশি বেল। আগের দিন ওয়ার্ডারের বেলগাছটি

কাটা হইয়াছিল। সকলে গাছের উপর চড়িয়া “গান্ধীজীকি জয়” বলিত; কংগ্রেস-পতাকা টাঙ্গাইয়া দিত। জেলের বাহিরে বহুদূর হইতে ইহা দেখা খাইত। সেইজন্য এই গাছটী কাটিয়া ফেলিবার লক্ষ্য হইয়াছিল। প্রথমেই চারজন ওয়ার্ডার আসিয়া এই বেনগুলি বিরিয়া দাঁড়াইল—বাহাতে লাঠি চার্জের সময়, কয়েদীরা ঐগুলি ওয়ার্ডারদের বিরুদ্ধে ব্যবহার না করিতে পারে। মিলিটারীগুলি ওয়ার্ডটীকে বিরিয়া ফেলিল। তাহার পর একদল ওয়ার্ডার তাহাদের সঙ্গে জনকয়েক “মেট” (convict overseer), এবং কয়েকজন জেল-কর্মচারী ওয়ার্ডের ভিতরে ঢুকিল। তাহার পরই আরম্ভ হইল লাঠি চার্জ—সরকারী ভাষায় মৃত লাঠি-চার্জ। ইহাতে দোষী নির্দোষের বিচার নাই—যাহারা নির্বিरोধী ও শান্তিপ্ৰিয় তাহারা ই অধিকাংশ ক্ষেত্রে বেশী প্রহার খায়। মারিবার সময় সিপাহীরা, মুখ দিয়া কেমন যেন একটা শব্দ করিতেছে। “উধার যাও। উধার কই একঠো ভাগা। ইস বদমাসকো মারো”। ওয়ার্ডাররা চাৎকার করিতেছে। “মেট”দের উৎসাহের অন্ত নাই। অফিসাররা যে দিকে দাঁড়াইয়া আছে, সেই দিককার কয়েদীদের কিছুতেই নিস্তার নাই,—কারণ ওয়ার্ডাররা তাহাদের কন্মর্নৈপুণ্য উপরওয়ালার নিকট দেখাইতে ব্যগ্র। কতকগুলি লোক পড়িয়া গিয়াছে; কেহ মাথার চোট লাগিবার পর বসিয়া পড়িল। দ্বারভাঙ্গার একজন নিরীহ রাজবন্দী জগ করিতেছিল। সেও নিস্তার পাইল না। উহারা আমাদের দিকে আসিতেছে। বেশ নার্ভাস্ বোধ হইতেছে;—মার খাইব জানি; প্রতিরোধ করিতে পারিব না তাহাও জানি; কিরূপ আঘাত আমার কপালে আছে তাহার কল্পনা করিতেছি; একটা লাঠি আমার মাথা লক্ষ্য করিয়া পড়িল। নিজের অজ্ঞাতসারেই কখন হুইহাত দিয়া মাথা ঢাকিয়া ছিলাম জানি না, বুঝিলাম যখন হাতে চোট লাগিল, লাঠির উপরের দিকে একটি লোহার অংটা লাগান আছে। তাহা দিয়া হাত কাটিয়া গেল। আরও দুই তিনটা লাঠি এই দিকেই আগাইয়া আসিতেছে। আমি বসিয়া পড়িয়াছি। নিলু আমাকে জড়াইয়া ধরিয়াছে। বলিতেছে “আবার মাথা ঢাকো মাথা ঢাকো।” নিলুর উপর কয়েক ঘা লাঠি পড়িল,—আমার উপর আর একটা। নিলুর মাথা দিয়া রক্ত পড়িতেছে।

ওয়ার্ডারগণ অন্তর্দিকে চনিয়া গেল। একস্থানে তাহারা বেশীক্ষণ সময় নষ্ট করিতে পারে না.....সারা ওয়ার্ডে কেমন একটা খমখমে ভাব। কেহ কেহ শুইয়া পড়িয়া আছে। যে ভাগ্যবানেরা আহত হয় নাই তাহারা কেহ আহতদের অন্য জন আনিতেছে, কেহ অচৈতন্য সার্থীর সোথে মুখে জলের বাপটা দিতেছে, কেহ-বা খবরের কাগজ বা গামছা দিয়া নিম্পন্দ বন্ধুকে বাতান দিতেছে। অপেক্ষাকৃত কম আঘাত যাহাদের লাগিয়াছে, তাহারা নিজেবাই নিজেদের প্রাথমিক চিকিৎসা করিতেছে; জেল-হাসপাতালের উপর নির্ভর করিলে হয়তো আজ আর হইয়া উঠিলে না। যাহাদের একেবারেই কোন প্রকারের আঘাত লাগে নাই.....তাহারা আহতদের জেনারেল ইন্সপেক্শনে বাহির হইয়াছে—বোর কালটেশাখোর পর বেগন লোক গ্রামের ক্ষতির পরিমাণ দেখিতে বাহির হয়।.....তাহার পর আঙ্গিনেন ঔষধপত্র লইয়া জেলের ডাক্তার ও কম্পাউণ্ডার। সঙ্গে কয়েদীরা আনিয়াছে কয়েকটি ছেঁচার— তাহারা অধিক আহত তাহাদের হাসপাতালে লইয়া বাইবার জন্ত।.....

“বোলোরে অস্বতান”। হাসপাতালের পাহারার গলার স্বর এখন হইতে পরিষ্কার শোনা যায়। সে লোকটা কিছু না বলিয়া দাজগাই স্বরে বিকট চীৎকার করিয়া উঠিল।—বোধহয় বিমাইতেছিল,—হঠাৎ চমকাইয়া উঠিয়া নিজের কর্তব্য সম্পর্কে সজাগ হইয়াছে। এই চীৎকারে বোধহয় হাসপাতালের কোন কোণের ঘুম হইতেছে না। সেবাশুশ্রূষা করার লোক নাই, তাহার উপর একপ দিনের পর দিন নিদ্রাহীন রাত্রি অতিবাহিত করা। এর আগের সুপারিন্টেণ্ডেন্ট নিয়ম করিয়াছিলেন যে, হাসপাতালের পাহারার, রাতে গুম্‌টার ডাকের উত্তর দিবার দরকার নাই। “মেডিকাল গ্রাউণ্ড্‌স”এ সুপারিন্টেণ্ডেন্ট কয়েদীদেরকে নানাপ্রকার সুখসুবিধা দিতে পারেন। এই বিরাট পেষণ-বস্ত্রের ভিতর, এই “মেডিকাল গ্রাউণ্ড্‌স”এর রক্তপথেই কিছু আলোবাতাস ভিতরে প্রবেশ করিতে পারে। সহানুভূতিশীল কর্মচারীরা ইহারই অজুহাতে কয়েদীদেরকে কিছু সুখসুবিধা দেন। নূতন সুপারিন্টেণ্ডেন্ট আসিয়া পাহারার হাঁকের পুরাতন নিয়ম আবার প্রচলিত করিয়া-

ছেন।.....দরদ ও সেবার জন্ম লালায়িত রুগ্ন কয়েদীরা কি রোগশয্যায় শুইয়া তাহাদের স্ত্রীপুত্রপরিজনদের কথা ভাবিতেছে না। রোগ হইলেই, জেলে বাড়ীর কথা বেশী করিয়া মনে হয়। সাধারণ কয়েদীরা জেলের বাহিরে থাকিবার সময় হয়তো ছই বেলা খাইতেই পাইত না। জেলে আর কিছু না হউক অন্ততঃ ছই বেলা ছই মুঠি ভাত খাইতে পাওয়া সম্বন্ধে কোন অনিশ্চয়তাই নাই। কিন্তু তাহা হইলে কি হয়,—রোগ হইলে তাহারা নিজেদের একেবারে অসহায় মনে করে। এই রুগ্ন কয়েদীরা কি শত চিন্তার মধ্যেও আজ আমার কথা একবার না ভাবিয়া থাকিতে পারিবে? মহানুভূতিতে না হউক, আতঙ্কেও তাহারা আজ আমার ফাঁসীর কথা নিশ্চয়ই ভাবিতেছে,—ঠিক আমার কথা নয়, একজন অপরিচিত ফাঁসীর আসামীর কথা যে এক নম্বর সেলে আছে।

হাসপাতালের দোতালার উপর একটা খোলা বারান্দায় টি, বি, রোগীরা থাকে। সেই স্থান হইতে ফাঁসীর নঞ্চ পরিষ্কার দেখা যায়, আর নঞ্চের চতুর্দিক উজ্জল আলোকে আলোকিত—শাস্ত্রীরা নঞ্চটিকে বিরিয়া দাঁড়াইয়া পাহারা দিতেছে,—কি জানি আবার যদি কেহ টাকা পয়সা খরচ করিয়া ওয়ার্ডারদের দিয়া, নঞ্চের কলকল্যাণ কাজের অবোগ্য করিয়া রাখিয়া দেয়। ঐ টি, বি, রোগীরা এই দোপানি উৎসব দেখিতেছে, আর হয়তো তাহাদের প্রাণ শুকাইয়া বাইতেছে। বাঁচিবার আকাঙ্ক্ষা থাকা সত্ত্বেও তাহারা তিলে তিলে মরিতেছে। তথাপি ফাঁসীর কয়েদী অপেক্ষা তাহারা নিজেদের ভাগ্যবান মনে করে। তাহাদের দীর্ঘস্থায় ও অঘাচিত করুণা মাথায় লইয়া আমাকে খাইতে হইবে। আমার ফাঁসী তো তবু জেলের ভিতর একটা সাময়িক চাকল্য ও বিনাদ আনিবে। আর ইহাদের মৃত্যুর কথা তো কেহ জানিতেও পারিবে না। নিকট-আত্মীয়ের নিকট একখানি মাভিস পোস্টকার্ড পৌছিতে,—আর হাসপাতালের মৃত্যুর সংখ্যায় একটা বৃদ্ধি দেখানো হইবে। উহাদের মৃত্যুর রাতে, নাইট ডিউটির জেল-ডাক্তার হয়তো লেপের ভিতর হইতে বাহিরই হইবে না। হাসপাতাল ওয়ার্ডের পাহারা কেবল রাতে হাঁক দিবার সময় 'জমা'র সংখ্যা হইতে হঠাৎ একটা কম সংখ্যা গণনা করিয়া চীৎকার করিতে থাকিবে।

আর নিশীথের নিস্তকতা ভঙ্গ করিয়া গুমটীর ওয়ার্ডারকে রসিকতা করিয়া খবর দিবে। “এক আসামী একদম রিহা।” (১১)

রেলগাড়ীর বাঁশীর শব্দ শুনা যাইতেছে। বারোটা কখন বাজিয়া গেল? এইবার ট্রেন ছাড়িল। স্টেশন অনেক দূরে, তবু যেন মনে হয় প্ল্যাটফর্মের কোলাহল কানে আসিতেছে।.....

যাত্রীদের হুড়াহুড়ী ; কুনী ! কুনী ! ইধার। সেই রাউতারা স্টেশনের স্টেশন-মাষ্টারের চীৎকার “ঘ্যান্টা ! ঘ্যান্টা !” সিগ্‌নালার ঘণ্টা দেয়।

রেলগাড়ীর বাঁশীর শব্দ জেলের সীমিত জগতের সহিত উন্মুক্ত উদার পৃথিবীর সংযোগের সূত্র। এত প্রাণ উদাস করা, মন উতলা করা বাঁশীর স্বর কোন বৈষ্ণব কবিও কোন দিন কল্পনা করিতে পারেন নাই। “কানের ভিতর দিয়া মরমে পশিল গো”—আজ আর ছন্দোবদ্ধ শব্দবিন্যাসমাত্র নয়। কোন্ অজ্ঞাত ইথরের কম্পন মনের অপরূপ তন্ত্রীকে তরঙ্গিত করে? চটকলের ভোরের ভেঁপু মজুরবস্তীতে সাময়িক আলোড়ন জাগায় বটে, কিন্তু রেলের বাঁশী আনে প্রতিটি কয়েদীর হৃদয়ে দ্রুততর স্পন্দন, প্রাণে জাগায় কত সুপ্ত মধুর স্মৃতি, রূপ দেয় কত কায়াহীন আকৃতি ও বাসনাকে।রেলগাড়ী চলার শব্দ শুনা যাইতেছে ;—দূরে, কতদূরে চলিয়া যাইতেছে—আধারে হুই পাশের কিছুই দেখা যায় না,—কেবল অনুভব করা যায় বিশাল সীমাহীনতা ;—কোন প্রাচীরের বাধা নাই।...

...বি, এন, ডবলু, আর, বদলাইরা বোধহয় সব গাড়ীর উপর লেখা হইয়াছে ও, টি, আর। বি, এন, ডবলু, নাম যে, কোনদিন পরিবর্তিত হইতে পারে ইহা ভাবিতেই কেমন লাগে। পৃথিবীতে দিকে দিকে কত পরিবর্তন অহরহ ঘটিতেছে, কিন্তু তাহার মধ্যেও কত জিনিষের, আমরা এক স্থির অপরিবর্তিত রূপ ব্যতীত কল্পনা করিতে পারি না। বাবার দাড়ী গোঁফ কামানো মুখের কথা আমি কখনও ভাবিতেও পারি না। ভাবিলেই হাসি আসে। দূর! তাহাও কি হয় নাকি?...

কেবল রেলগাড়ীর শব্দ নয়, বাহিরের যে কোন আওয়াজ, জেল কোয়ার্টার্সের কুকুরের ডাকটা পর্যন্ত শুনিতে অতি মিষ্ট লাগে।

সেদিন জেলের বাহিরের রাস্তা দিয়া একদল ছেলে হিপ-হিপ-হুর্রে, চীৎকার করিয়া চলিয়া গেল। বোধহয় কোন ম্যাচ খেলিয়া ফিরিতেছিল। কত পুরানো স্মৃতির সহিত ঐ ধ্বনির সম্বন্ধ ; — ছোট ছেলেমেয়ে কতদিন দেখি নাই, — হাফপ্যান্ট-পরিহিত নয়-দশ বছরের ক্যাপ্টেন নিলু একটা চীনা মাটির কাপ-সমার লইয়া, গলা ফাটাইয়া চীৎকার করিতেছে, হিপ হিপ হুর্রে! গরমে, পরিশ্রমে, চীৎকারে মুখ লোহিতাভ।

বেলা তিনটায় আর রাত্রি সাড়ে বারটার বাজে রেলগাড়ীর বাঁশী ; সকাল পাঁচটায় আর বিকাল সাড়ে ছয়টার বাজে ষ্টীমারের ভেঁপু ; — আমার ঘড়ী ; সেলের সম্মুখের ছায়া অপেক্ষাও অনেক নিশ্চিত — আমার কল্পনা-বিলাসের সাথী। যখন তখন এরোপ্লেনের শব্দ শুনি। রাত্রে তো প্রতি দুই ঘণ্টায় একখানি করিয়া যায় — বোধহয় ডাক লইয়া যায় আসাম ফ্রন্টে। কিন্তু সে শব্দ মনে কেন স্মৃতির স্রবাস জাগায় না। হয়তো মুহূর্তের কৌতূহল, — প্রত্যহ কোথায় যায়, রাত্রে পথ কেমন করিয়া ঠিক করে, কম্পাস ম্যাপ রেল লাইন গঙ্গা, — এর বেশী নয়। দিনের বেলা যেদিন অনেকগুলি এরোপ্লেন একসঙ্গে যায় — আমি সেলের মধ্য হইতে শুনি যে, নয় দশ নম্বরের বোমার বাবু দুইটা, আমাকে খবর দিবার জন্ত চীৎকার করিয়া গুণিতেছে — এক, দুই, তিন, চার। কিন্তু কি জানি কেন এরোপ্লেনের শব্দে আমার মনে কোন সাড়া জাগায় না। আমার পরিচিত জগতের মধ্যে ইহাদের স্থান নাই ; কারণ মাটির সহিত ইহাদের সম্বন্ধ গৌণ। এই জন্তই বোধহয় কাক, শালিখ, চড়ুই প্রভৃতি যে পাখীগুলি জেলের ভিতর দেখিতে পাই, সেগুলি দৃষ্টি আকর্ষণ করে মাত্র, মনকে উদ্বেলিত করিতে পারে না। এগুলি একঘেষেমীর জীবনে পরিবর্তন আনিবার কাজ করিতে পারে, কিন্তু তার বেশী নয়। বিরহী ধক্ষের মেঘদূত, বিরহিণী রাধার হংসদূত কেবল কবির কল্পনা-বিলাস ; বাস্তব মানব-চরিত্রের অভিজ্ঞতার ছাপ উহাতে নাই।

সিহাশীজী বসিয়া ঢুলিতেছে। অতি-পরিচিত বিড়ালটী ধীরে ধীরে আমার দিকে আসিতেছে। বিড়ালটী থমকাইয়া দাঁড়াইল,—বোধহয় আমি দরজার উপর বসিয়া আছি বলিয়া আসিতে সাহস পাইতেছে না। প্রত্যহ দিনে ও রাত্রে আসে থানা চাটিবার জন্ত; সপ্তাহে একদিন একটু-আধটু দই পায়, অন্তদিন কি খাইতে আসে? জেলে থাকিয়া অল্প অল্প নিরামিষও খাইতে শিখিয়াছে। আশ্রমে সহ-দেওএর যে কুকুরটী ছিল সেটীও দেখিতাম নিরামিষই পছন্দ করিত। এখন কুকুরটী কোথায় আছে? সহদেওএর দাদা বোধহয় উহাকে বাড়ী লইয়া গিয়াছে।... লণ্ঠনের আলোতে বিড়ালটীর গায়ের রং পরিষ্কার দেখা যাইতেছে। বাঘের মতো—হলদে, কালো ও ধূসর ডোরা কাটা। বেশ দেখিতে বিড়ালটী। সেদিন জেলের সাহেব যখন আসিয়াছিলেন তখনও ওটী ওখানেই বসিয়াছিল। জেলের সাহেব রসিকতা, করিলেন—“কি বিড়ালটীর সঙ্গে আলাপ জমাইয়াছেন নাকি? কি নাম দিয়াছেন?” আমি জবাব দিই ‘না, এমনিই এসেছে’, “তাহ’লে এর নাম দেন ‘তোজো’।” তাহার পর নিজের রসিকতায় নিজেই মুগ্ধ হইয়া হো-হো করিয়া হাসিয়া উঠেন। জেলের সাহেবের দাঁতগুলি মুক্তার মতো সাদা—টুথপেষ্টের বিজ্ঞাপনের দাঁতের মতো।...

আমি উঠিয়া পাশে সরিয়া দাঁড়াইলাম, বিড়ালটীকে পথ দিবার জন্ত। বিড়ালটী একবার ডাকিল,—এখনও আমাকে বিশ্বাস করিতে পারিতেছে না। ভাতের থানা হইতে একটু তরকারী উঠাইয়া লইলাম—ধোঁদলের তরকারী। বিড়াল ধোঁদল খায় নাকি? এক টুকরা ছুঁড়িয়া বিড়ালকে লক্ষ্য করিয়া মারিলাম। বিড়ালটী “মেও” করিয়া পলাইল। ধোঁদলের টুকরাটী কিন্তু গরাদে লাগিয়া গিয়াছে, দরজার বাহিরে যায় নাই।.....

.....আমি আর নিলু কমলালেবু খাইতেছি—আশ্রমে মা’র ঘরে তক্তপোষের উপর বসিয়া। দুই জনের ভিতর প্রতিযোগিতা চলিতেছে, কমলালেবুর ছিবড়া জানানার গরাদের ভিতর দিয়া বাহিরে ফেলিতে হইবে—গরাদে যেন না লাগে। কিন্তু আশ্চর্য! অধিকাংশই গরাদে লাগিয়া যাইতেছে। কয়টাই-বা গরাদের

লোহা, আর কতটুকু জায়গাই-বা উহা ঢাকিয়া আছে। কিন্তু তথাপি ছিবড়ায় অধিকাংশ উহাতেই লাগিবে।.....

ঘুরিয়া ফিরিয়া কেন নিলুর কথাই বার বার মনে পড়ে? যে জিনিষ ভুলিতে চাহিতেছি তাহারই জন্ম নয় তো? জ্ঞানতঃ যে কথা আজ কতদিন হইতে মনে মনে বলিতেছি, এ কথা কি আমার অজ্ঞাতমন কিছুতেই লইতে পারিতেছে না। সত্যই, আমি জানি যে নিলু আমার বিরুদ্ধে সাক্ষী দিয়া নিজের কর্তব্য করিয়াছে মাত্র। কোন আত্মসম্মানশীল, সত্যনিষ্ঠ, রাজনৈতিক কর্মীর ইহা ছাড়া গতাস্তুর ছিল না। কিন্তু ইহা হইল যুক্তির কথা। স্বাঃ চেতনা হয়তো ভাবে যে এ যুক্তি কোটে চলিতে পারে, বইএ ছাপার কাগজিত ইহা দেখিতে ভাল, কিন্তু অন্তত ইহার স্থান নাই। তাহা না হইলে ঘুরিয়া ফিরিয়া নিলুর কথাই মনে হইবে কেন? নিজের পাটির প্রতি একনিষ্ঠতা দেখাইবার জন্ম, সহোদর ভাইয়ের ফাঁসীর পথ সুগম করিয়া দেওয়া হৃদয়ের সততার প্রমাণ, না রুগ্ন মনের শুচিবাইয়ের পরিচয়? বোধহয় নিলুর ব্যবহার, আমার ভিতরের আসল আমি, কিছুতেই সমর্থন করিতে পারিতেছি না; তাই উপরের আমি পুরাতন স্মৃতির মধু দিয়া, সেই দহনের জ্বালা মিষ্টি করিতেছি।.....

আবার আসিয়া দরজার সম্মুখে বসি; এবার বাঁ দিকে ভর দিয়া—বাম হাত গরাদ ধরিয়া। ডান দিকে ভর দিয়া, ডান হাত দিয়া গরাদ ধরিয়া বস। যেকোন স্বাভাবিক ও স্বস্তিকর মনে হয়, বাঁদিকে ভর দিয়া বসিলে সেরূপ মনে হয় না। ঠিক নীচু জায়গাটির উপর বসিয়াছি। খুব বড় বড়ো হাতীর ঘাড়ের উপর, ঠিক মালতের পিছনে বসিয়াছি মনে হইতেছে। এমন সব উদ্ভট কল্পনা মাথায় আসে! উদ্ভট আবার কিসে হইল?

..... সেই কারহাগোলার ধনী গৃহস্থ ধনপৎ যাদবের গ্রামে গিয়াছি। পুলিশের ধারণা তাহার ডাকাতির দল আছে, তাহার উপর বি, এল, কেস চলিবে। তখন কংগ্রেস মিনিষ্ট্রীর সময়। সে আশাদের লইয়া গিয়াছে নিজের গ্রামে, মিটিং করিবার

জন্য। উদ্দেশ্য দারোগাকে ভয় দেখানো,—দারোগা যাহাতে ভাবে যে সে কংগ্রেসের লোক। খুব বটা করিয়া মিটিং হইল। খাওয়া দাওয়ার পর বলিল, চলুন শিকারের আয়োজন করিয়াছি। বাবলা ও কেয়া-গোলাপের জঙ্গলের দিকে হাতীর পিঠে চলিয়াছি। আমি ঠিক মাহুতের পিছনে; বড়ো হাতী—বাড়ের কাছটি বেশ বড় গর্ভের মতো হইয়া গিয়াছে। তাহার মধ্যে বেশ আরাম করিয়া পদ্মাসনে বসিয়াছি। জঙ্গল আরম্ভ হইল। সেখান হইতে কিছুদূর গিয়াছি। সম্মুখে একটা প্রকাণ্ড অশথ গাছ। হঠাৎ হাতীটির অশথ পাতা খাইবার খেয়াল হইল। শুঁড়টা তুলিয়া একটা ছোট শাখা ভাঙ্গিবার চেষ্টা করিল। নিমেষে কি যেন হইয়া গেল বৃষ্টিতে পারিলাম না। আমার মনে হইল যেন আমাকে জাঁতার মধ্যে ফেলিয়া চূর্ণ বিচূর্ণ করিবার চেষ্টা করা হইতেছে। যে গহ্বরের মধ্যে বসিয়া ছিলাম, হাতীটা মাথা উঁচু করার, তাহা সঙ্কুচিত হইয়া আমার নিম্নাঙ্গ চাপিয়া ধরিয়াছে। আমি যন্ত্রণায় চীৎকার করিয়া উঠিলাম। মাহুৎ বৃষ্টিতে পারিয়া হাতীর শুঁড়টা নামাইয়া দিল। আমি নামিয়া পড়িলাম—পায়ের দিকটা অবশ হইয়া গিয়াছে।……

আমার সেলের ওয়ার্ডার দেওয়ালে হেলান দিয়া ঘুমাইতেছে। পাগড়ীটা খুলিয়া পাশে রাখিয়াছে। তিন নম্বর সেলের ওয়ার্ডার বোধহয় ঘুমাইতেছে। আর বাহিরে এই ওয়ার্ডারের ওয়ার্ডারের পদশব্দ শোনা যাইতেছে। সব সেলগুলি শান্ত। সকলেই বোধহয় ঘুমাইয়া পড়িয়াছে। পাগলটাও কি আজ ঘুমাইয়া পড়িল? বোমার বাবুরা বোধহয় আলো জালিয়া পড়িতেছে। ঝিঁঝির ডাক শুনা যাইতেছে। কিন্তু আশ্রমে ঝিঁঝির ডাকের মতো ঐক্যতান অত সম্ভব নয়। শীতের রাত্রে ছোট বেলায় ঘুম ভাঙ্গিলে, ঝিঁঝির ডাক যে রহস্যের রংমহাল খুলিয়া দিত, এ ডাক সেরূপ প্রাণবন্ত নয়। নিলু বলিত, উহা একরকম পিপড়ার ডাক। কে উহার সহিত তর্ক করিবে? স্নেলের আবহাওয়ার সহিত ঝিঁঝির ডাক যেন খাপ খায় না; ক্রটীন, সংখ্যাগণনা, শৃঙ্খল, প্রাচীর, নিয়মানুবর্তিতার মধ্যে, এই বিলাসের স্থান কোথায়? কিন্তু দেওয়াল আর গরাদ দিয়া কি সব জিনিষ আটকানো যায়?……

ছড়মুড় করিয়া নূতন দলের ওয়ার্ডারগণ ঢুকিল। তাহা হইলে একটা বাজিল। নিশ্চয়ই উহারা তিনজন—একজন আমার সেলের, একজন তিন নম্বর সেলের, আর একজন এই ওয়ার্ডের। একজন আমার সেলের আজিনায় ঢুকিল। সে নিদ্রিত ওয়ার্ডারের পাগড়ীটা উঠাইয়া আস্তে আস্তে বাহিরে রাখিয়া আসিল। তাহার পর ওয়ার্ডারকে ডাকিল, “এ হায়দার, আজ কি এখানেই ঘুমাইবে নাকি?” সে ধড়মড় করিয়া লাফাইয়া উঠিয়াছে,—জেলর সাহেব আসেন নাই তো! নাঃ! কে, কিষুণ্-চন্দ? নয়া দফা আসিয়া গিয়াছে? এ ভাই, দিল্লগী করিও না। পাগড়ীটা কোথায় রাখিয়াছ বলে। নূতন সিপাহী বলে, আমি কি জানি? বা রে না! আমি তো এই আসিয়াছি। হায়দার প্রথমে বিশ্বাস করে না—পরে আন্তরে তাহার মুখ ফ্যাকাশে হইয়া যায়। সে সবে নূতন চাকরীতে পাকা হইয়াছে। চাকরীতে ঢুকিয়াই গল্প শুনিয়াছে, জেলর সাহেব রাউণ্ডে আসিয়া নিদ্রিত সিপাহী দেখিলে—তাহাকে তখন কিছু বলেন না—কেবল তাহার পাগড়ীটা সরাইয়া রাখেন, পরে তাহার জরিমানা হয়। এই তো গত সপ্তাহে হরেকিষুণ, ওয়ার্ডারের ‘তুকদীরে’ (১২) এরূপ ঘটিলে, সে ‘কাপড়া শুদামের’ ইন্চার্জ কর্ত্তব্যী বির্জবিলাসকে দেড় টাকা ঘুষ দিয়া, একটা পাগড়ী যোগাড় করিয়াছিল। জেলর সাহেব পরের দিন প্যারেডের সময় তাহার পাগড়ী দেখিয়া, এ পাগড়ী কোথায় পাইয়াছে সেই কথা জিজ্ঞাসা করেন। প্রথমে হরেকিষুণ “সাক ইনকার গিয়া”। তাহার পর জেলর সাহেবের জেরায় সব কথা বলিয়া দেয়। মাঝের থেকে সে নিজে একা গেল না; বির্জবিলাসকেও সঙ্গে সঙ্গে “লিয়ে দিয়ে সাক”। কিষুণ্চন্দ মুখভঙ্গীর সহিত একটা তুড়ি দিয়া তাহার গল্প শেষ করিল। হায়দার এতক্ষণে বুঝিতে পারিয়াছে। সে খোসামোদ করিয়া পাগড়ীটা ফিরত চায়। ঘরমুখো অপর দুইটা ওয়ার্ডারও আমার সেলের সম্মুখে আসিয়া জড় হয়। হায়দার পাগড়ী ফিরত পাইল, সকলে মিলিয়া নিষ্পত্তি করিয়া দিল,—কাল দুপুরে হায়দারের আপার ডিভিজন রাজবন্দীদের ওয়ার্ডে ডিউটা থাকিবে; সেখান হইতে এক ঘাস দুধ কাল সে কিষুণ্চন্দকে খাওয়াইবে। হাসিতে হাসিতে সকলে বাহির হইয়া যায়।

ইহাদের এই কর্মক্লাস্ত জীবনের মধ্যেও সুখ আছে,—নিশ্চিত বেতন স্ত্রী-পুত্র পরিবার।.....

.....টুর হইতে ফিরিয়াছি। সরস্বতীর সিঁথীতে সিঁদুর, হাতে শাঁখা, দোর-গোড়ায় দাঁড়াইয়া, হাসি হাসি মুখ—সলজ্জ উৎকর্ষার সহিত বলে “বোসো, একটু জিরিয়ে ঠাণ্ডা হয়ে নাও। আমি ততক্ষণ একটু চা ক’রে নিয়ে আসি।” আমি উত্তর দিই না। হাসিতে হাসিতে তাহার পিছনে পিছনে গিয়া রান্নাঘরে পিড়ী পাতিয়া বসি। ভিজা কাঠে ফুঁ দিয়া আগুন ধরাইবার চেষ্টায় আরক্তিম ও ঘর্মাক্ত মুখমণ্ডল একরাশ অসম্মত চুলে ঢাকিয়া গিয়াছে।—হইতে পারিত...

কিন্তু আমার জীবন ক্লেশসাধনের আদর্শে গড়িয়া তোলা। আর যদি আমার মনের বাসনা অন্তরূপও হইত, তাহা হইলেই কি উপায় ছিল? চিরকাল পাড়া-প্রতিবেশী সকলের গুখে শুনিয়াছি, ‘বিলুর মতো ছেলে দেখা যায় না।’ আর এই প্রশংসা বজায় রাখিবার আকাঙ্ক্ষা, নিবৃত্তির পথ হইতে আমাকে কখনই বিচ্যুত হইতে দেয় নাই। মনের কত দুর্নিবার বাসনাকে কশাঘাতে সংঘত করিয়াছি। কিন্তু আমার ভাবধারার sublimation হইয়া কি আমি কোন উচ্চতর স্তরে পৌঁছিয়াছি? না, তাহা হইলে আজ মনে এ সংশয় জাগিবে কেন? কত প্রকারের ভোগের আকাঙ্ক্ষা কেন মনের কোণে উকিঝুকি মারিবে? কিছুই করিয়া যাইতে পারিলাম না। ইতিহাসে নাম রাখিয়া যাইতে পারিলাম না। কেবল ফুটবল মাঠের টিকিট-ক্রয়ার্থীদিগের শ্রায় দেশসেবকদের অন্তহীন বিসর্পিত লাইনে নিজে গান করিয়া লইবার সুযোগ পাইয়াছিলাম মাত্র। আমার কথা আমার প্রতিবেশীরও বোধহয় আগামী সপ্তাহে ভুলিয়া যাইবে—এখনই মনে আছে কিনা কে জানে! তবে এতদিন কি করিলাম? আমি তো অতিমানব নই; অতিসাধারণ রক্তমাংসের মানুষ—মানুষের সকল দোষ ভ্রান্তি দুর্বলতা আমার মধ্যে। কীটস পঁচিশ বৎসর বাঁচিয়াছিলেন—শেলী ত্রিশ বৎসর। পিট্‌ তেইশ বৎসর বয়সে ইংলণ্ডের প্রধানমন্ত্রী ছিলেন। আর আমি তেত্রিশ বৎসর বয়সে কুকুর বিড়ালের মতো মরিব। কেহ জানিবে না, কেহ শুনিবে না, কেহ ছু-ফোঁটা তপ্ত অশ্রু ফেলিবে

না। বাহা কিছু করিবার চেষ্টা করিয়াছি তাহা একেবারে ব্যর্থ হইয়া গিয়াছে। এ নিষ্ফল প্রয়াসের কোনই মূল্য নাই। কবি যতই ছন্দ গাঁথুন যে, কিছুই পৃথিবীতে ব্যর্থ হয় না,—বে নদী মরুপথে ধারা হারান, সেও সার্থক,—এ সকল কথা সম্পূর্ণ অর্থহীন। যে কবির ব্যর্থতার অনুভব নাই ইহা তাঁহারই ভাব-বিলাস।

না, হয়তো ইহা সম্পূর্ণ নিরর্থক নয়। আমার ন্যায় দুই-চারিটা জীবনের মূল্য কি? বাহা দেখিয়াছি,—জনশক্তির প্রকৃত স্বরূপ গত আগষ্ট মাসে বাহা দেখিয়াছি—যুগ যুগ সঞ্চিত জগদল পাথরের নীচের যে সুপ্ত প্রচণ্ড শক্তির সন্ধান পাইয়াছি,— তাহা সচেতন হইলে কি যে করিতে পারে, তাহার পূর্বস্বাদ লোককে বুঝাইতে আমার দান নগণ্য নয়। রাজনৈতিক কর্মীর পথ কঠিন, বড় বন্ধুর। 'তথৎ ইরা তথতা' (সিংহাসন অথবা ফাঁসীর মঞ্চ)—আশা রাখিবে ফাঁসীর রজ্জুর, হয়তো গৌরবের রাজমুকুট পাইতেও পারো। অপার ক্লেশের জীবন। দিন দিন তিলে তিলে নিজের জীবনীশক্তি ও উৎসাহ ক্ষয় হইয়া যাইতে দেখিবে। নিজের মনের তৃপ্তি ছাড়া, আর কিছুর আশা রাখিলে নিরাশ হইতে হইবে। পুত্রীভূত তাচ্ছিল্য ও উদাসীনতার গুরুভারে জীবন দুর্লভ হইয়া উঠিবে। একপদ অগ্রসর হইতে যাও—কতশত লোকের স্বার্থে আঘাত লাগিবে—প্রত্যেকে হইয়া দাঁড়াইবে তোমার শত্রু। একজন লোকের সম্মান আকর্ষণ করিতে পারো, কিন্তু পদে পদে অনুভব করবে যে তুমি দশজন লোকের উপেক্ষা ও উপহাসের পাত্র। এ জীবন হইতে জেলে আসিতে পারা স্বস্তির নিশ্বাস ফেলিয়া বাঁচা—মৃত্যুদণ্ডে শাপে বর! কত লোক তো যুদ্ধে মরিতেছে, বিনা অপরাধে। কেন, তাহা তাহারা বোঝে না। কত লোক অনাহারে মরিতেছে, বিনা চিকিৎসার মরিতেছে। অপরাধ,—যে জন্মের উপর তাহার কোন হাত ছিল না, তাহারই অমোঘ নির্দেশে। পথে গাড়ী চাপা পড়িয়া মরার মতো, মাঠে সাপে কামড়াইয়া মরার মতো রাজনীতি ক্ষেত্রে মৃত্যুদণ্ডে একটি সামান্ত আকস্মিক দুর্ঘটনা মাত্র। তাহার বেশী কিছু নয়। দলের বাহিরে পৃথিবীর সহিত সংঘর্ষ। কত প্রতিক্রিয়াশীল শক্তির সহিত সংঘর্ষ! তাহার জন্ত তো সকল রাজনৈতিক কর্মী প্রস্তুত হইয়াই থাকে! কিন্তু ভিতরে?—ভিতরের সংঘর্ষ আরও

ভয়ানক। উপদলে উপদলে সংঘর্ষ, ব্যক্তিতে ব্যক্তিতে সংঘর্ষ, স্বার্থে স্বার্থে সংঘর্ষ, জাতিতে জাতিতে সংঘর্ষ, প্রদেশে প্রদেশে সংঘর্ষ ;—প্রাণ একেবারে অতিষ্ঠ হইয়া উঠে। এ সবই রাজনীতি খেলার নিয়মের মধ্যে,—নিষ্ঠুর নিষ্করণ নিয়ম ; দুর্বলের স্থান এখানে নাই ; সবাই আগে চলিয়াছে , পিছনের লোক পড়িল কি মরিল, তাহা ফিরিয়া দেখিবার দরকার নাই।

“বাবু খুব মশা কামড়াইতেছে নাকি ?” ওয়ার্ডার ভিজ্ঞাসা করে।

“হাঁ ; কেন ?”

“একটু মিটিকা তেল” (কেরোসিন তেল) ‘বদনমে’ (শরীরে) লাগাইয়া লউন না কেন ? সরিষার তেল তো এখন পাওয়া যাইবে না—না হইলে চেষ্টা করিয়া দেখিতাম।”

“আচ্ছা দাও।”

আর ভাবি যে সরিষার তেল না পাওয়া যাওয়াই ভাল। সেদিন সরিষার তেল লাগাইয়া শুইয়াছিলাম। ঘুম ভাঙ্গিয়া দেখি অসংখ্য পিপড়াতে সর্বশরীর ভরিয়া গিয়াছে। ছোট লাল পিপড়াগুলি বোধহয় তেল খাইতে ভালবাসে। ওয়ার্ডার লণ্ঠনের কাগজের ছিপিটা খুলিয়া, তাহারই খানিকটা ছিঁড়িয়া লইয়া লম্বা করিয়া পাকায়। আর তাহা ডুবাইয়া ডুবাইয়া আমার হাতে দুই-এক ফোঁটা করিয়া কেরোসিন তেল দেয়। আমি তাহা সর্বাস্থে বেশ করিয়া মাখি। কেমন ঠাণ্ডা ঠাণ্ডা লাগে—অভিকোলনের মতো।...ডিগবয়ে কি মশা নাই ?

..... করিয়াছিল বটে মেজর গোমেস পাটনা ক্যাম্প জেলে। কেরোসিন তেল দিয়া কি একটা ইমালসন তৈয়ারী করাইয়াছিল। অত বড় জেলে একটীও মশা ছিল না। সাহেব খামখেয়ালী হইলে কি হয়, ছিল কাজের লোক। পাগলাটে গোছের,—কালো লম্বা—বলিত আমি ইণ্ডিয়ান। একদিন গয়ার একটা রাজ-বন্দীকে বলিয়াছিল “জোয়ান তুমি ভি শালা, হম ভি শালা ; মৈ সব শালাসে মাফি মান্নতা” (১৩)। সকলকে ‘জোয়ান’ বলিত.....

.....“হেঁইয়ো জোয়ান হেঁইও।”.....বড় বড় গাছের গুঁড়ি গড়াইয়া আনিয়া রাস্তায় স্তূপীকৃত করিতেছে, কবৈয়া গ্রামের শতাধিক লোক। হাশুকৌড়কের মধ্যে ধামদাহা-পূর্ণিয়া রোডের উপর গাছের গুঁড়ির একটি বিশাল ‘ব্যারিকেড’ গড়াইয়া উঠিল। অদম্য উৎসাহ অসম্ভবকে সম্ভব করিয়া তুলিয়াছে। যে গরীব কিশাণের দল জীবনে কখনো প্রাণ খুলিয়া হাসিবার অবকাশ পায় নাই, তাহাদের আজ হইল কি ? প্রত্যেকেরই কিছু-না-কিছু বলিবার আছে। এ কয়দিনে সকলেরই কিছু কিছু গল্প জমিয়াছে। অভাব শ্রোতার। বীরগাঁও থানায় গুলী চলিয়াছে, সাতচল্লিশ জন মরিয়াছে, “ঘাগেলের” (১৪) তো অন্ত নাই। দারোগা সাহেবের স্ত্রী বলিয়াছেন যে দারোগা সাহেব যদি চাকরীতে ইস্তফা না দেন, তাহা হইলে আর তিনি উহাকে রাখিয়া দিবেন না। গ্রাম পঞ্চায়েৎ হরথু হাজাম্কে জরিমানা করিয়াছে, সে নায়েব বাবুর ‘ইজামৎ’ (১৫) করিয়াছিল—হরথু সকলের সম্মুখে ‘কসুর’ (১৬) স্বীকার করিয়াছে—সে বলে যে নায়েব বাবুকে গাঙ্গী টুপী পরিতে দেখিয়া আমি ভাবিলাম “মহাঅজ্ঞীমে” (১৭) নাম লিখাইয়াছেন—আনাকে যাহা ইচ্ছা সাজা দাও কেবল আঙ্গুলটা কাটিয়া লইও না। “টমি আওর পণ্টন সব” কুশী নদীর মধ্যখানে ষ্টিমারে রহিয়াছে—ডাঙ্গার উপর রাত্রি কাটাইবার সাহস নাই। আরও কত রকমের গল্প।.....কাঠের গুঁড়ির স্তূপ অনেক উঁচু হইয়া উঠিয়াছে—আর মিলিটারী নরী আসিতে পারিবে না। এতক্ষণ মনে পড়ে না—রহস্যর কাছে রাস্তার ধারে বড় বড় বট গাছ আছে। ‘চলো-ও ! চলো-ও !’ কুড়ল, কোদাল, দা, কাটারী যে যা পাইয়াছে হাতে লইয়াছে। কুইক মার্চ নর, বেশ দ্রুত দৌড়। পরিশ্রান্ত হইলেও থামিবার উপায় নাই।—হরেশ্বরের হাতে ছোট একটি কংগ্রেস পতাকা। সে সবে মাত্র মাস খানেক আগে কংগ্রেস সেবাদলের ট্রেনিং পাইয়াছে—জেনা-কংগ্রেস কমিটী গ্রামরক্ষাদলের জন্ত একটি ট্রেনিং ক্যাম্প খুলিয়াছিল। গ্রামে তাহার এখন কদর কত ! কিছুদিন হইতে সে গ্রামে দেখাইতেছিল তাহার নূতন-শেখা যুগ্মসুর প্যাচ, লাঠির পাঁয়তারা আর সাইকেল চড়া। সে গান আরম্ভ করিয়াছে—“নৌ-জোয়ান নিকলে...”।

হাঁফাইতে হাঁফাইতে বাল-বৃদ্ধ সকলে উহা বলিবার চেষ্টা করিতেছে। রহস্য—
 রহস্যগ্রামের লোকেরাও আসিয়া জুটিল। দুই ঘণ্টায় রহস্যর পর্ব শেষ। আবার
 “চলো-ও! চলো-ও!” কৃত্যানন্দনগর রেল ষ্টেশনের দিকে। রাস্তা বন্ধ করার
 কোন উদ্দীপনা নাই। থানা জানাইবার পর এসব কাজ নেহাৎ পানসে লাগিতেছে।
 এবার কঠেয়া রহস্যর সমবেত দল—ভূতাবিষ্ট ও নেশাগ্রস্তের মতো। আমাকে
 সাইকেল হইতে নামিতে দিবেনা। সকলে মিলিয়া সাইকেল ঠেলিয়া লইয়া যাইবে।
 অত লোকের মধ্যে কি সাইকেলে বসিয়া যাওয়া যায়? কে কাহার কথা শুনে।
 “গান্ধীজীকা জয়”। সম্মুখে কাদা। “কুছ পরোয়া নহী হৈ”। “ভারতমাতা
 কী জয়”! উহার ভিতর দিয়াই সাইকেল চলিবে। “বোম্বাইসে আয়া তাজা খবর”
 কত নূতন খবর। রহস্যর একটি ছাত্র পকেট হইতে একটি লিখো করা কাগজ
 বাহির করিয়া আবৃত্তির ভঙ্গীতে পড়ে। কাগজখানির উপরের বড় বড় অক্ষরে
 লেখা “দেশ কী পুকার” (দেশের আহ্বান)। “জিন্দা সাহেব গিরফতার হো
 গয়ে। ভিজায় লকস্মী পণ্ডিত পর গেলী চলায়ে গয়ী। মুঙ্গের জিন্দা মে স্বরাজ
 হো গয়া।” আরও অনেক চাঞ্চল্যকর ঘটনা। আজ আর সম্ভব অসম্ভব বিচার
 করিবার ক্ষমতা তাহাদের নাই। থাকিবেই বা কেমন করিয়া। গত কয়েকদিনে
 তাহার কত অসম্ভব জিনিষকেই সম্ভব হইতে দেখিয়াছে। কোন কথাই মিথ্যা
 বলিয়া ভাবিতে তাহারা ভরসা পায় না।...সদর কলেক্টরী যেদিন দখল করা হইবে
 সেদিন রহস্যকঠেয়ার সম্মিলিত “জথা” (১৮) কে নেতৃত্ব করিবে, তাহা লইয়া বেশ
 বচসা জমিয়া উঠিয়াছে;—কঠেয়ার হরেশ্বর না রহস্যর তিলকধারী সিং? হরেশ্বর
 সেবাদল ট্রেনিং পাইলে কি হয়, এখনও ভাল করিয়া “মোচ”ও উঠে নাই। কঠেয়ার
 লোকেরা বলে ও তো ‘বৃৎক’ (১৯)। আর তিলকধারী—সে তো ‘বক্তিস মে
 হো আয়া হ্যায়’—অর্থাৎ ১৯৩২ সালে জেলে গিয়াছিল। এই বুঝি আমাকে
 সালিশ মানে।.....

রহস্য গ্রামের বাহিরে, রাস্তায় দাঁড়াইয়া আছে, এক বৃদ্ধা, আর কতকগুলি
 অর্দ্ধোলঙ্গ বালকবালিকা। শুনলাম বাদর বাহরগামিয়ার মা। জাতে মুচি।

গ্রামের ভিতর থাকিবার প্রথা নাই—সেই জন্মই তাহাদের বলে বাহরগামিয়া। একটা ছেলের হাতে গাঁদাফুলের মালা। বাদরের মা আর সব ছেলোপিলেরা একসঙ্গে বলিয়া উঠে “পরণাম” বোধহয় পূর্ব হইতেই শিখানো। বৃদ্ধা সঙ্কুচিত-ভাবে আমাকে বলে “আপনাকে তো ‘খাতিরদারী’ (২০) কিছু করিতে পারিলাম না। আর করিতামই বা কি? আপনার ‘মঞ্জুরী রহট’ (মঞ্জুর করা কৃয়া) ছিল বলিয়া স্মৃথে দিন কাটিয়া যাইতেছে। দুই বৎসর হইতে কিছু কিছু বালি জমিতেছে।” বৃদ্ধা দেখিলাম খুব কথা বলিতে ভালবাসে। মনে পড়িল ‘স্বার্থকোয়েক রিনৌফ’এর কৃয়াটির কথা। কংগ্রেস ভলান্টিয়ার বিরুদ্ধি, মকস্দন সিংএর নিকট হইতে পাঁচ টাকা ঘুব লইয়া, তাহার ‘কামতে’ (২১) কৃয়াটি তৈয়ারী করাইয়া দিবার কথা দেয়। আমি ইন্সপেকশনে আসিয়া কৃয়াটি বাদর বাহর-গামিয়ার কুটারের নিকট, ধানদাছা-পূর্ণিয়া রোডের ধারে তৈয়ারী করাইয়া দিই।

বলি—“এক লোটা পানি পিলাও, মাই—একদম ঠণ্ডা।” দেখি তোমার কৃয়োর জল কেমন।

বৃদ্ধা যেন এই অপ্রত্যাশিত অনুরোধে কি করিবে ভাবিয়া উঠিতে পারিতেছে না। মুখে সন্মান অপেক্ষা ভীতির চিহ্নই অধিক পরিস্ফুট। জনতার মধ্যে তাহার গ্রামের যে সকল লোক আছে, তাহাদের মুখের দিকে প্রশ্নের ভঙ্গীতে তাকায়। এই কৃয়ার জল মাঠারবাবুর বেটা খাইবে নাকি? গ্রামের আর কেহ এ ইহার জল ব্যবহার করে না। বলে কি! সে জল আনিয়া দিবে! তাহার মাথায় আকাশ ভাঙ্গিয়া পড়িয়াছে। তিলকধারী সিং তাহাকে সাহস দিয়া বলে “লোটা মাজিয়া জল ভরিয়া আনো; বিলুবাবু বলিতেছেন।” লোটায় করিয়া জল আসে। দীর্ঘম্বগুণ্ঠনবতী বাদরের স্ত্রী—সঙ্গে দিয়াছে শালপাতার মোড়া, ধূলাভরা, বহুদিন সঞ্চিত খানিকটা গুড়। সলজ্জ বালকবালিকাদিগের মৌখিক আপত্তি ঠেলিয়া, তাহাদের হাতে একটু একটু গুড় দিই। নিজেও গুড় ও জল খাই। বাদরের মা একদৃষ্টে আমার দিকে তাকাইয়া আছে। চোখের চাহান, ঠিক খাইতে বসিবার সময় মা পাখা হাতে করিয়া বসিলে যেমন লাগে, তেমনি।

আমাকে খাওয়াইবার সময় সকলেরই মুখে চোখে, একই ভাব ফুটিয়া উঠে, মা'র, জ্যাঠাইমার, ন'দির, সহদেওএর মা'র, দুবেজীর স্ত্রীর, সরস্বতীর। ধ্বনি উঠে “বোলো গান্ধীজীকা জয়!” হরেশ্বর বলে “বাদর মা'ই, আমাকেও জল খাওয়াও।” বালতীতে করিয়া জল আসে। সকলে কাড়াকাড়ি করিয়া, বাহরগামিয়ার ছোঁয়া জল খাইতেছে। গ্রামের উপর, সমাজের চোখের উপর, এই অনাস্থি কাণ্ড করিবাব সাহস আজ ইহারা হঠাৎ পাইল কোথা হইতে? সকলের মুখে চোখে বাহাদুরী দেখানোর ভাব ফুটিয়া উঠিয়াছে। “গান্ধীজীকা জয়! জয়, মহাত্মাজীকা জয়!” অবিরাম জয়ধ্বনির মধ্যেও সকলেই তাহাদের মনের উদারতা আমাকে দেখাইতে সচেষ্ট। আর এখানে দাঁড়াইবার কি সময় আছে? “নওজোয়ান নিকলে……” বৃদ্ধার চোখের কোণ যেন একটু চিক্ চিক্ করিতেছে—কৃতজ্ঞতার আতিশয্যে। ইহাই তাহার দেওয়া, গ্রামবাসীদের উদারতার মূল্য। মহাত্মাজী তাহার “গোসাই” (গৃহদেবতা) অপেক্ষা জাগ্রত দেবতা। সেই কথাই সে ভাবিতেছে। এই রাস্তা দিয়াই তো ভূমিকম্পের পর মহাত্মাজী হাওয়াগাড়ীতে ধামদাহার দিকে গিয়াছিলেন। হাওয়াগাড়ীতে অত লোকের মধ্যে সে মহাত্মাজীকে চিনিতেও পারে নাই। কেবল মাষ্টার সাহেবকে চিনিতে পারিয়াছিল। বাদর বলে মহাত্মাজীর ‘বদন সে জিয়োতী’ (২২) বাহির হইতেছিল। সে গান্ধীজীর উদ্দেশ্যে প্রণাম করে……

জনতা চলিয়াছে। আগে চলিয়াছে, পিছনে ফিরিয়া তাকাইবে কেন? কত বাদরের মা কত স্থানে একরূপ প্রণাম করিতেছে। ইহাদের দেখিবার সময় কোথায়! ইহাদের হাতে এখন কত কাজ! মাথায় কত বড় দায়িত্ব! জয় বিনুবাবুকা জয়! এক দল বলিতেছে ‘বোম্বাইসে আই “আওয়াজ” ; আর একদল বলিয়া দিতেছে, সে ‘আওয়াজটা’ কি? উহার সহিত সুর মিলাইয়া বলিতেছে “ইনকিলাব জিন্দাবাদ!” কবেরার উচ্চ প্রাইমারী স্কুলের ‘গুরুটা’ (২৩) জয়ধ্বনি দিবার সময় নাচিতেছে—যেন নগর সংকীর্ণন হইতেছে। তাহার গলা ভাঙ্গিয়া গিয়াছে। হাঁপানী রোগী কাশিবার চেষ্টা করিবার সময় যেরূপ শব্দ হয়, জয়ধ্বনি দিবার সময় সেইরূপ একটা

শব্দ হইতেছে মাত্র, কিন্তু না আছে তাহার উৎসাহের অন্ত, না আছে তাহার নিঞ্জের ছাত্রদিগের সম্মুখে আত্মসম্মান বজায় রাখিবার প্রয়াস।.....একজন লোক ঘোড়ায় চড়িয়া কৃত্যানন্দনগরের দিক হইতে আসিতেছে। আমাদের দেখিয়া নামিয়া পড়িল। প্রণাম! সে আমাকে খবর দেয় যে আপনার ভাই সাহেবতো কৃত্যানন্দনগরে আসিয়াছেন—হরখচন্দ মাড়োয়ারীর গোলায়। কেরোসিন তেলের দাম তদারূক করিতে।—লোকটা আমাকে আর কিছু বলেনা, কিন্তু পাশের দুই এক জন লোককে ফিস্ ফিস্ করিয়া কি যেন বলিতেছে। জনতা যেন সে কথা প্রকাশ করিতে চাহেনা। বুঝিলাম নিলু—পিপ্‌লু প্রাইম কন্ট্রোল কমিটির সেক্রেটারী, আসিয়াছে কেরোসিন তেলের ষ্টক কিয়া অন্ত কিছু তদারূক করিতে। আর সে বোধহয় কৃত্যানন্দনগরের লোকদের রেললাইন উঠানো, রাস্তা বন্ধ করা, আর টেলিগ্রাফের তার কাটার বিরুদ্ধে কিছু বলিয়াছে। জনপ্রসাহ চলিয়াছে,—আমাদের আদিম পুরুষরা পেটের দায়ে, হতাশ হৃদয়ে, অনিশ্চিত লক্ষ্য লইয়া, বেক্রমে বাহির হইয়া পড়িয়াছিলেন, এ সেরূপ নয়। ইহা নূতন জগতের আশায়, উদ্ভ্রান্ত জনতার অবধারিত লক্ষ্যের দিকে চলা। কেবল Homo Sapiens বলিলে কবৈষ্যার মাষ্টারটির সম্পূর্ণ পরিচয় হয় না, আর কেবল Biological necessity (জৈব আবশ্যিকতা) বলিলে তাহার অফুরন্ত উৎসাহের পূর্ণ ব্যাখ্যা হয় না।..... রেললাইন। দূরে কৃত্যানন্দনগর গ্রামটা দেখা যাইতেছে।.....আধবটার মধ্যে প্রায় সিকি মাইল রেললাইন একবারে নিশ্চিহ্ন হইল। রেলগুলি ও কাঠের রেলওয়ে শ্লিপারগুলি, সকলে কাঁধে করিয়া, ভূটার ক্ষেতে বা রেললাইনের ধারে ধারে জলের মধ্যে ফেলিয়া দিতেছে। কৃত্যানন্দনগরের দুইজন বৃদ্ধ ভদ্রলোক আসিয়াছিলেন—এই দলকে এমন ভয়ানক কাজ হইতে বিরত করিতে। জনতা হাসি টাটকারী দিয়া, তাঁহাদিগকে বিদায় করিয়া দিল। একজন কাশের গুচ্ছ দিয়া দুইটা ছোট বালার মতো তৈয়ারী করিতেছে। কয়েকজন দৌড়াইয়া গিয়া সেই দুইজন ভদ্রলোককে ধরিল। হরিশচন্দর তাহাদের হাতে ঐ বালা দুইটা পরাইয়া দিল—বলিল “চুড়ী পহন কর ভান্সা ঘরমে থাকে বৈঠো।” আর একজন বলিয়া

উঠিল “আর ! হাঃ ! কেয়া নাজুক কনই !” অর্থাৎ, আহা ! কি নরম হাতখানি রে
 “এই আর একজোড়া চুড়ী দিলাম, তোমাদের নিলু বাবুকে পরাইয়া দিও । আর
 বলিয়া দিও, কলেক্টর সাহেবের পয়সায় এ ‘এলাকার ফুটানী ছাঁটিতে’ বেন না
 আসে, কঠেয়া রহুয়া জানে ‘খুফীয়া’র (গোয়েন্দার) সহিত কেমন ‘বর্তাব’ (ব্যবহার)
 করিতে হয় । মনে না থাকিলে উইলসন নীলকর সাহেবের কি হইয়াছিল তাহা মনে
 করাইয়া দিও ।”—জনতার সংঘের বাধ ভাঙ্গিয়া গিয়াছে । আর উহারা নিলুর
 সম্বন্ধে আমার সম্মুখে কোন মন্তব্য করিতে কুণ্ঠিত নয় ।—রেল লাইনের কাঠের
 পুনটীতে আগুন লাগিয়া উঠিয়াছে । কি করিয়া এত তাড়াতাড়ি এত মোটা
 গুঁড়িতে আগুন ধরাইল ? মা তো দেখি উনান ধরাইতেই হিম্‌সিম্‌ খাইয়া যান ।—
 রহুয়ার সেই লাল গেঞ্জীপরা ছোকরাটি পাদরী সাহেবের নকল করিতেছে । কাল
 উহারা সাহেবের বাড়ী “বেরাও’ করিয়াছিল । পাদরী সাহেব কিরূপ স্বরে
 গান্ধীজীকাজ্য বলিয়াছিলেন, তাহা শুনিয়া সকলে হাসিয়া আকুল । রেলগাড়ীর
 শব্দ হঠাৎ শোনা যায় । সত্যই তো এঞ্জিন দেখা যাইতেছে । এই আসিয়া পড়িল ।
 মিনিটারী ভরা গাড়ী ; সঙ্গে থাকেন রেলের এঞ্জিনিয়ার । পান্না ! পান্না ! যে
 যদিকে পারে—খানা ডোবার ভিতর দিয়া, আলের উপর দিয়া…… এক
 নিমেষের মধ্যে জনতা ছত্রভঙ্গ হইয়া গিয়াছে । টমিগানের কর্কশ শব্দ কানে
 আসিতেছে । কৃত্যানন্দনগরের দিকে একটা ভুট্টার ক্ষেতে আমি ঢুকিয়াছি ।
 কৃত্যানন্দনগরের মধ্যে ইচ্ছা করিয়াই যাই নাই । গ্রামবাসীদের সহায়ভূতি যখন
 নাই, তখন যাইব কেন ? সাইকেলটি তাড়াতাড়িতে লাইনের উপর ফেলিয়া
 আসিয়াছি । ভুট্টার ক্ষেত,—পাদরী সাহেবটির দাড়ী ঠিক ভুট্টার শনগুলির মতো ।
 গাছগুলি ভুট্টায় ভরিয়া আছে । ক্ষেতের সোঁদা মিষ্ট গন্ধের মধ্যে বারুদের গন্ধ
 পৌঁছায় না ।……

……সেই মোকদ্দমা চলিবার সময় সরকারী উকিল ঠাট্টা করিয়া ভুট্টা ক্ষেতের
 বিবরণ দিতে দিতে বলিতেছেন—গোরার দল ঐ ভুট্টার ক্ষেত দেখিয়া মন্তব্য
 করিয়াছিল যে ‘মকাই’ ইণ্ডিয়ান কর্ন (Indian corn) নয়, নাজী কর্ন (

(Nazicorn) ।...জঙ্গ সাহেব গান্তোধ্য ত্যাগ করিয়া হাসিতেছেন ; পেঙ্কার সাহেব হাসিতেছেন ; আমার উকিল হরেন বাবুও এই রসিকতার না হাসিয়া থাকিতে পারেন নাই ।...পেরু আর চিলির সূর্যমন্দিরে থাকিত কৃত্রিম ভুটোর গাছ । গাছের ডাঁটা ও পাতাগুলি রূপার,—ভুটোর দানাগুলি সোনার ।.....

চোখের পাতা তন্দ্রায় ভারী হইয়া আসিতেছে । একটু হাতপা টান্ করিয়া লওরা বাক । আঃ ! গা হাত পা বসিয়া বসিয়া ব্যথা হইয়া গিয়াছিল । হাই উঠিতেছে,—আজও কি ঘুম আসিবে নাকি ? কত লোকের গল্প শুনিয়া আসিতেছি—ফাঁসীর আগের দিন তাহাদের সব চুল পাকিয়া গিয়াছিল । আমার চুলও পাকিয়া যায় নাই তো । একখানি আঘনা থাকিলে হইত । কমরেড চনরবল্লী ফাঁসীর আগে পাগল হইয়া গিয়াছিল । আর আমার ঘুম আসিতেছে ! আশ্চর্য্য !.....

...আমার যদি অনেক টাকা থাকিত, তাহা হইলে আজ উইন করিয়া যাইতাম । অনেক কোটি টাকা । তাহা দিয়া মার্ক্সবাদের প্রচার কার্য্য চালিত ; ভারতের প্রতি গ্রামে গ্রামে কৃষকের বালক ও কিশোরদের সংঘের স্কার দলের সংগঠন হইতে পারিত । কিন্তু টাকা আসিবে কোথা হইতে ? যদি লটারীর টিকিট না কিনিয়া লটারীতে টাকা পাইবার সুবিধা থাকিত, তাহা হইলেই একমাত্র টাকা পাইবার আশা ছিল । আর যদি রাষ্ট্রে আমাদের হাতে আসিত তাহা হইলে কাজ করিয়া দেখাইয়া দিতে পারিতাম,—দশ বৎসরের মধ্যে দেশের কি করা যায় ।.....কংগ্রেস কম্মীরা আবার জেল হইতে বাহির হইলে, নিশ্চয়ই আমার নামে কোন প্রতিষ্ঠান গড়িয়া তুলিবে ।—“বিলু বাবুকা সড়ক”, “বিলু আশ্রম”, না, বোধহয় আমার ভাল নামই ব্যবহার করিবে ‘পূর্ণ আশ্রম’ । কিন্তু আমার ভাল নাম বে পূর্ণ তাহা তো কেহ জানেই না । সকলেই জানে ‘বিলু বাবু’কে । আর তাহারও পর কত কি হইতে পারে । হয়তো পূর্ণিয়ার নাম হইয়া যাইবে পূর্ণনগর—স্টালিনগ্রাড বা গর্কি সহরের মতো । বাজারে বালমুকুন্দ সাউর ধর্ম্মশালার মোড়ের উপর থাকিবে, আমার মর্শ্বের মূর্তি—

বকুতা দিবার ভঙ্গীতে। প্রতি বৎসর এই দিনে দলে দলে লোক জুটবে, ইহার বেদীতলে—আমার স্মৃতির উদ্দেশে শ্রদ্ধাজ্বলি নিবেদন করিতে।.....বন্ধ চোখের পাতার উপর দেখিতেছি একটি সবুজ শিখা—ময়ূরের পাখার চোখের মতো, কিন্তু চঞ্চল ও কম্পমান। শিখাটি লাল হইল.....হলদে—সবুজ.....স-বু-জ....নীল,... কালো...শিখাটি আছে কি নাই...আধার...

জ্যাঠাইমার রান্নাঘরের বারান্দায় জ্যাঠাইমা বঁটি লইয়া বসিয়াছেন আম কাটিতে, একটি বুড়ি ভরা গোলাপখাস আম ; সম্মুখে জামবাটা। আমগুলির বোটা কাটিয়া কাটিয়া জামবাটার জলে রাখিতেছেন। আমি আর সরস্বতী তাঁহার সম্মুখে পিঁড়ী পাতিয়া বসিয়াছি। জ্যাঠাইমা বলিলেন ‘এক খালায় দি তোরা দুজন খা’। আম কাটিয়া জ্যাঠাইমা খালায় দিলেন। সরস্বতী জ্যাঠাইমাকে বলিল “কাটা আম কি এর মুখে রুচবে,—ওকে আস্ত আম দেন !” জ্যাঠাইমা সরস্বতীকে ঠাট্টা করিয়া বলেন “ওমা, এরই মধ্যে এতো”। বলিয়া আমার হাতে দেন একটি গোটা আম—সোনার মতো হলদে রং, মুখের কাছটা সিঁদুরে লাল। আমি আমটির নীচের দিকে একটি ছিদ্র করিয়া লই। টিপিয়া আমটিকে নরম করিয়া লই, তাহার পর চুষিয়া চুষিয়া খাই। মা রহিয়াছেন শোবার ঘরের বারান্দায় ; হবিষ্য ঘরে আসিবার ইচ্ছা, কিন্তু আসিতে পারিতেছেন না। মধ্যে উঠানে একটি প্রকাণ্ড সাপ ; মস্তন কালো রং ; ফণা তুলিয়া স্থির হইয়া রহিয়াছে। মা চীৎকার করিতেছেন “নিলু শীগগির এটাকে মার, এখুনি মেরে ফাল্ ,” বাবা বলিলেন, না মেরোনা। হাততালি দাও, চ’লে যাবে। নিলু কি বাবার কথা শোনে ! একটি প্রকাণ্ড লাঠি লইয়া আসিয়াছে, সাপটিকে মারিবার জন্য। সাপটি পাল্লাইতেছে অন্ধকার ইঁদারার মধ্যে চুকিয়া গেল। আর সাপ নাই। সাপটি কুয়ার বালতীর দড়ি হইয়া গিয়াছে। নিলু রাগে বালতীর উপর এক লাঠীর ঘা মারিল। খন্ন্ করিয়া শব্দ হইল।.....

শব্দে ভয় ভাঙ্গিয়া গেল। বুটের শব্দ, মাথার কাছে। এ! তবে কি আমাকে লইতে আসিয়াছে ? এই দরজা খুলিয়া প্রবেশ করিল বুঝি ! সর্বশরীর

দিয়া ঘাম ঝরিতেছে। নিশ্চল ও স্পন্দনহীন হইয়া পড়িয়া আছি। না, দরজা খুলিলনা। তবে বোধহয় নূতন ওয়ার্ডার আসিল—স্বস্তির নিশ্বাস পড়ে। হাঁ, তাই বটে। কতক্ষণ ঘুমাইয়াছি? ভোরের দল নাকি? এখনও তো পাখীর ডাক শুনা যাইতেছে না। ওয়ার্ডারকে জিজ্ঞাসা করিব নাকি ক'টা বাজিল। না দরকার কি? বখন সময় হইবে তখন জানিতেই পারিব। জিজ্ঞাসা করিলেই আমাকে দুর্বলচিত্ত মনে করিবে। একজন সামান্য ওয়ার্ডারের কাছে জীবনের এই শেষ মুহূর্তে ছোট হইতে পারি না। পাগলটীও তো ভোর রাত্রি হইতে চীৎকার আরম্ভ করে। তাহা হইলে এখনও সকাল হইবার দেৱী আছে। এ জগতের সহিত আর দুই ঘণ্টার সম্বন্ধ! বাহিরে, বখন সুযোগ ছিল তখন জীবনকে উপভোগ করি নাই। দীর্ঘ তেত্রিশ বৎসর কি করিয়া কাটাইলাম, ঠিক মনে পড়ে না। নিরর্থক জীবনের অন্তহীন বিস্মৃতির স্তরে স্তরে জমিয়া আছে, এক আদর্শ স্মৃতির কক্ষাল। ইহার পরিচয় আমি ছাড়া আর কেহ জানে না। ইচ্ছা করে বাঁচিতে—ইচ্ছা করে বাকি দুই ঘণ্টায় স্বপ্ন-বিলাসের মধ্য দিয়া, জগৎকে নিঙড়াইয়া, বাহা কিছু ভোগের জিনিষ আছে একত্র করিয়া লইতে, যদি এই শেষ মুহূর্তে আমার ফাঁসী বন্ধ করিবার লক্ষ্য আসে! এমনও তো হয়। কত লোকের একরূপ ঘটয়াছে।.....জন্মাদ খড়্গা উঠাইয়াছে। অশ্বারোহী দূর হইতে নক্ষত্রবেগে আসিতেছে। বাতক বধ করিওনা, বধ করিওনা। কত কাহিনী পড়িয়াছি। পিথিয়াগ ও ড্যামন।.....

১৯৩৪ এর ভয়ঙ্কর ভূমিকম্পের মতো প্রচণ্ড ভূমিকম্প এখন যদি হয়, জেলের দেওয়াল যদি ভাঙ্গিয়া পড়িয়া যায়, তাহা হইলেও, আমার বাঁচিবার উপায় নাই। যে ফাঁসী দিবে তাহার যদি হঠাৎ অসুখ করে? তাহা হইলে অন্য লোক পাইতে দেৱী হইবে না। যদি হাইকোর্ট হইতে অথবা প্রভিন্সিয়াল এডভাইসরের নিকট হইতে, চিঠি আসিয়া থাকে, আমার ফাঁসী বন্ধ করিয়া দিতে, আর দৈবাৎ ভ্রমক্রমে তাহা যদি খোলা না হইয়া থাকে। আশ্চর্য কি? একরূপ তো কয়েক বৎসর পূর্বে পাঞ্জাবে হইয়াছিল। বড় সাহেবের পকেটেই চিঠি থাকিয়া গিয়াছিল—লোকটীর ফাঁসী হইবার পর সকলের খেয়াল হয়।.....বাঁচিবার আকাঙ্ক্ষা আমার কোথায়

নইয়া যাইতেছে? কোন অনির্দিষ্ট শক্তির অমোঘ নির্দেশে তো আমি কখনও বিশ্বাস করি নাই। সত্যই কি ইহা মৃত্যুভয়? ভয় নিশ্চয়ই। এই তো কিছুক্ষণ আগে ওয়ার্ডারের পদশব্দে মনের ভাব যাহা হইয়াছিল, তাহা ভয় ছাড়া আর কি? উৎকর্ষার চরম অনুভূতিতেই আশে নিরাশা। সেই নিরাশার প্রতিক্রিয়া চলিতেছে আমার মনের উপর।.....

মোট শনের দড়ী। ছোট বেলায় আমরা এই দড়ীকে 'লকনাইন' বলিতাম। তাহাতে একটি ফাঁস। ফাঁসের গোড়ায় একটি পিতলের গোলক (knob)। দড়ীতে আগাগোড়া বেশ করিয়া চর্কি মাখানো। নীচে অন্ধকার গর্ত—দেখিতে ঠিক কুয়ার মতো। গর্তটা কত নীচু—বোধহয় বেশী নয়। কাঠের তক্তাটা টানিয়া লইলে যখন সমস্ত শরীরটা ঝুলিয়া পড়িবে, তখন বাহাতে পা দুইখানি মাটিতে না ঠেকিয়া যাব—সেই জন্মই গর্তটার দরকার। কাজেই কুয়াটা নিশ্চয়ই অগভীর। বেশী খুঁড়িলে তো জল উঠিবে। চার পাঁচ হাতের বেশী হইবেনা। কিন্তু গর্তটা যত গভীর হইবে, আর দড়ি যত বড় হইবে, ততই শরীরটা নীচে পড়িবার সময় ঝাঁকানি বেশী খাইবে। আর ঐ ঝাঁকানিই তো আসল জিনিষ। না হইলে ঘাড়ের কাছে হাড়টা ভাঙিবে কি করিয়া? ফাঁসী মানে তো কেবল দম বন্ধ করিয়া মারা নয়। তাহা হইলে তো গলা টিপিয়া মারিয়া ফেলিলেই হইত। এত যন্ত্রপাতি সাজসরঞ্জামের কি দরকার ছিল? কম সময়ে, কম পরিশ্রমে, মৃত্যুদণ্ড দিবার জন্মই ফাঁসীর সৃষ্টি।.....পিতলের গোলকটা ঘাড়ের হাড়ের উপর সজোরে আঘাত করিল; কুট করিয়া একটু শব্দ হইল। তাহার পর? তাহার পর সব শান্ত। না, একেবারে শান্ত হইবে কি করিয়া? মানুষের বাঁচিবার এত আকাঙ্ক্ষা! সেই জীবনবিলাসী ইচ্ছাশক্তির তাড়নায়, অসহায় শিথিল দেহটা কি একটুকুও সাড়া দিবে না! আর ইচ্ছাশক্তি যদি নাই থাকে, তাহা হইলেও তো reflex action জনিত আক্ষেপ আছে। বলিদানের পর পাঠার ধড়টা ধড়ফড় করিতে দেখিয়াছি।—তাহার পর ফাঁসীর আসামীর দেহটা শূন্যে ঝুলিতেছে—অন্ধকারে এদিক ওদিক ছলিতেছে। দড়ীকে টিলা করিয়া দেওয়া হইল। মৃতদেহটার পা গর্তের মধ্যে মাটিতে

ঠেকিয়াছে। ডাক্তার পায়ে শিরা কাটবে নাকি? গল্প শুনিলাম, কে যেন বাঁচিয়া উঠিয়াছিল। সেই জন্তই এত সাবধানতা। সব বাজে কথা। ডাক্তারের ওসব কোন কাজই নাই। কেবল সরকারী নিয়মরক্ষার জন্ত ডাক্তারের উপস্থিতি ফাঁসীর সময় দরকার। কেবল তাঁহাকে বলিতে হইবে যে, হাঁ, আসামী সত্যমত্যই মরিয়াছে; আইনের ভাষায়, যতক্ষণ পর্য্যন্ত না মরে ততক্ষণ পর্য্যন্ত ফাঁস দিয়া বুলাইবার সাজা কিনা, সেই জন্ত। তারপর দিল্লীর শায়ের বাউলীর ছোট সংস্করণের ন্যায়, গর্তটীর ভিতর ধাপে ধাপে যে সিঁড়ি গিয়াছে, তাহা দিয়া নীচে নামিবে নেই লোকটা। সে নেহাৎ কেউ-কেটা নয়। এক মুহূর্তের শারীরিক পরিশ্রমে কম্বল লোক পাঁচ টাকা রোজগার করিতে পারে? তাহার উপর “রেমিশন” তো আছেই। দস্তুর মতো piece work (ঠিকা) মজুরী!.....শবদেহটি,—না আর শবদেহ নয়,—লাসটি উপরে আনিয়া ফেলা হইল। বীভৎস মুখ! চোখ দুইটি ঠিকরাইয়া বাহির হইয়া আসিতেছে। কম্বল দিয়া ঢাকিয়া দেওয়া হইল।.....কি ভীষণ যন্ত্রণা হইবে তত্তা সরাইয়া লওয়ার মুহূর্তে! অসম্ভব তীব্র যন্ত্রণা! চোখে জল আসিতেছে। হি, কতটুকু সময়ের জন্ত যন্ত্রণা! হয়তো ঐ সময় উহা অনুভব করিবার শক্তিও থাকিবে না। হয়তো অল্প সকল চিন্তায় মন এত অভিভূত থাকিবে যে, যন্ত্রণার কথা মনেও থাকিবে না। সাংঘাতিকভাবে আহত লোকও যুদ্ধক্ষেত্রে নেশাগ্রস্তের মতো নিজের কাজ করিয়া চলে। তাহার কি নিজের যন্ত্রণার কথা ভাবিবার সময় থাকে? আর যদি যন্ত্রণা অসম্ভব তীব্রও হয়, তাহা হইলেই বা কি আসে যায়? জীবনেরই যদি আশা না থাকে, তাহা হইলে এক মুহূর্তের যন্ত্রণার কথা ভাবা নিরর্থক। মরিবার পূর্ব মুহূর্তে শুনিয়াছি, সারাজীবন চলচ্চিত্রের ছবির মতো চোখের সম্মুখে ভাসিয়া উঠে। আমার বিশ্বাস হয় না।.....যে দেশে মৃত্যুদণ্ড নাই সেই দেশে যদি আনার সাজা হইত তাহা হইলে? তাহা হইলে আজীবন কারাবাসের দণ্ড হয়তো আমাকে বৈচিত্র্যময় ধরণী হইতে বিচ্ছিন্ন করিয়া রাখিত। বিশ্ব জেলের মধ্যেও তো একখণ্ড জগৎ আছে। জেলের মধ্যেও তো শীত, গ্রীষ্ম, বর্ষার পরিবর্তন অনুভব করিতে পারা যায়। আকাশ, বাতাস, চন্দ্র-সূর্য-তারা সেখানেও মাদুর্য্য বিলাইতে কার্পণ্য

করে না। কাল বৈশাখীর মাতলামী, প্রথম বৃষ্টির পর ভিজা মাটির গন্ধ, নিশীত রাতের বারিধারার মাদকতা ভরা রিমিমিমি, কত স্মৃতি ভরা শরতের সোনালী স্তবক মোড়া রৌদ্র, রহস্যভরা কুয়াসা,—জেলের প্রাচীরের ভিতরেও ইহাদের নিরক্ষুণ্ণ গতি। তাহার উপর মানুষের মুখ দেখা—হটুক তাহারা চোর ডাকাত তবু মানুষ তো। তাহাদের মধ্যে বাঁচিয়া থাকা কি একটা দড়িতে ঝুলিয়া মরা অপেক্ষা অনেক ভাল না?.....আমেরিকায় কেমন, ইলেক্ট্রিক চেয়ারে বসিলাম, আর এক মুহূর্তের মধ্যে সব শেষ হইয়া গেল। যন্ত্রণার লেশমাত্রও নাই। কিন্তু মৃত্যুর পূর্বের মানসিক যন্ত্রণা তো এখানেও যেরূপ, সেখানেও সেইরূপ—কেবল তাদের মারণ-যন্ত্রটি একটু বেশী মার্জিত। এই যা তফাৎ। কিন্তু যে দেশে বন্দুকের গুলি দিয়া মারা হয়, তলোয়ার দিয়া কাটা হয়, বা গিলোটিন করা হয়। তাহার অপেক্ষা তো আমাদের দেশের ব্যবস্থা ভাল। খাঁড়া দিয়া গলা কাটিবার কথা ভাবিলেও মন শিহরিয়া উঠে। আচ্ছা যদি ফাঁসীর আসামীকে মফিয়া ইনজেকশন দিয়া বা ক্লোরোফর্ম করিয়া তাহার পর মৃত্যুদণ্ড দেওয়া হয়, তাহাতে গভর্ণমেন্টের ক্ষতি কি? তাহাতে যে শারীরিক যন্ত্রণা ও মানসিক দুশ্চিন্তা হইতে লোকটি বাঁচিয়া যাইবে। লোকটিকে সমাজ হইতে সরাইয়া ফেলাই যদি রাষ্ট্রের লক্ষ্য হইত, তাহা হইলে অজ্ঞান করাইবার পর ফাঁসীর ব্যবস্থাই হইত। সব চাইতে ভাল পটাসিয়াম সায়ানাইড—ক্ষণিকের ভিতর সব শেষ।.....

নিজ কলেজ ল্যাবরেটরী হইতে খানিকটা লইয়া আসিরাছিল। ঐ জিনিষ লইয়া কত রকম আলোচনা, জল্পনা কল্পনা। রবারের ছোট ক্যাপসুলের মধ্যে ভরিয়া মুখে রাখা সব চাইতে ভাল, তাহাই ঠিক হইল। গ্রেপ্তার হইলেও ভয় নাই; যখন ইচ্ছা মুখের মধ্যের ক্যাপসুলটি দাঁত দিয়া একটা ছিদ্র করিয়া দাও। তখন যাহা ভাবিয়াছিলাম, যাহা ঠিক করিয়াছিলাম, তাহা যদি করিয়া রাখিতাম, তাহা হইলে আজ আর মানসিক দুশ্চিন্তার কোন কারণ ছিল না। কিন্তু তখন তো ভাবি নাই যে সত্যই আমার এ জিনিষের দরকার হইবে। যদি থাকিত তাহা হইলে ভোর রাত্রে বুটের শব্দ শুনিলাম, তখনই ক্যাপসুলটি চিবাঁইয়া ফেলিলাম। দরজা খুলিয়া উহারা

আশ্চর্য্য হইয়া বাইত। ঘাতক করেদীটী হতাশ হইত। সুপারিন্টেণ্ডেণ্ট ভাবিতেন এ আবার কি বক্সাট আসিয়া জুটল,—এখন আবার হাজার বকম ডিপার্টমেন্টের লেখাপড়ার মধ্যে পড়িতে হইল। সকলে ভাবিবে যে ভয়ে হার্টফেল করিয়া মরিয়া গিয়াছে। না, পোষ্টমর্টেম নিশ্চয়ই হইবে। তাহা হইলেই পটাসিয়াম সায়ানাইডের কথা বাহির হইয়া পড়িবে।.....

.....কিন্তু পটাসিয়াম সায়ানাইড খাওয়াও অত সহজ নয়। দেবারতো পারি নাই। সেবার যখন ডিসপেনসারীর ভূগিতেছিলাম, বিকালে প্রভাৎ কুটবন ন্যাচ দেখিতে বাইতাম। একদিন দেখিলাম জ্বিতেনদা এম-ডি-ও সাহেবকে ডাকিতেছে “come up ইসমাইল”। দুইজনে মোটরের ভিতর দাঁড়াইয়া খেলা দেখিতে লাগিল। একজন আর একজনের কাঁধে হাত রাখিয়া দাঁড়াইয়াছে।.....হঠাৎ মনটা কেন যেন হতাশার ভরিয়া গেল—নিজের দুর্বলতা, নিজের নগণ্যতা, নিজের সপ্রতিভতার অভাবের কথা, মনের মধ্যে কেবল ঘুরিয়া কিরিয়া পৌঁচা দিতে লাগিল। মনে হইতে লাগিল, জ্বিতেনদার সপ্রতিভতা কেন আমার হইল না। জ্বিতেনদার উপর ঈর্ষা হয় নাই; এম-ডি-ও সাহেবের সহিত বন্ধুত্বের জন্মও আমি লানাইত ছিলাম না; তথাপি কেন যেন মন অবসাদে ভরিয়া গেল। ক্ষণেকের মধ্যে জীবনে বীতরাগ আসিয়া গেল। কেবলই মনে হইতে লাগিল, বাচিয়া থাকিয়া কি হইবে, যে হীন অবস্থার আনাকে বাঁচিয়া থাকিতে হইবে, তাহা অপেক্ষা মরণ অনেক ভাল। সব ঠিক—সেদিন রাত্রেই পটাসিয়াম সায়ানাইড খাইব। এইরূপই জাগিয়া কত রাত পর্যন্ত জেলা কংগ্রেস অফিস ঘরের বড় ঘড়ীটির ঘণ্টা বাজা শুনিয়াছি। পরে ঠিক চরম মুহূর্তে মনে হইয়াছিল যে আজ থাক। লেডিজ আফটারনুন্ট বিস্কুট খুব খাইতে ইচ্ছা করিতেছে। কাল এই ইচ্ছা পূর্ণ করিয়া তাহার পর আত্মহত্যার কথা ভাবা যাইবে। পরের দিন মনের অবস্থা অনুরূপ হইয়া গিয়াছিল, ইহার পর যখনই ভাবিয়াছি সমস্ত ঘটনাটী হাসির গল্পের মতো মনে চইয়াছে।... কিন্তু আজ সায়ানাইড থাকিলে নিশ্চয়ই খাইতাম। ইহাতো স্বেচ্ছায় আত্মহত্যা নয়; আর এক আসন্ন বিপদ হইতে রক্ষা পাইবার উপায় মাত্র। সায়ানাইডের শিশিটী

লেবু গাছের তলায় পুঁতিয়া ফেলিয়াছিলাম । কি মনে হইয়াছিল জানিনা—শিশিটা মাটিতে পুঁতিবার পূর্বে, বাদামী রংএর একটি পুরানো মোজার মধ্যে ভরিয়া তাহার পর পুঁতিয়াছিলাম । এখনও নিশ্চয়ই সেইখানেই পোতা আছে ।

লেবু গাছটির কয়েকটা করিয়া নীচের ডাল, সর্বদাই মাটি চাপা দেওয়া থাকে,—কলম তৈয়ায়ী করিবার জন্ত । জেলার যত কংগ্রেসকর্মী কার্যোপলক্ষে জেলা অফিসে আসে, তাহাদের মধ্যে অনেকেই লইয়া যায় এই গাছের কলম ।...নিলুর প্রত্যহ খাওয়ার সময় লেবু চাই-ই চাই । ডালের মধ্যে ছুঁচার ফোঁটা লেবুর রস না দিলে তাহার ভালই লাগে না । আশ্রমে মাছ রান্না হয় না । সেই জন্ত বড় মাছ আসিলেই জ্যাঠাইমাদের বাড়ীতে আমাদের খাওয়ার ডাক আসে । ওবাড়ীতে খাইতে যাওয়ার সময়ও নিলুর কিন্তু একটি লেবু পকেটে করিয়া লইয়া যাওয়া চাই—কি জানি ওবাড়ীতে লেবু আছে কি নাই । ওবাড়ীর ছোট ছেলেটা পর্যন্ত একথা জানে ; কেহ নিলুকাকার পকেট দেখিতেছে ; কেহ দৌড়াইয়া দিদিমাকে খবর দিতে গেল যে নিলুমামার পকেটে লেবু আছে । জ্যাঠাইমা রান্নাঘর হইতে বাহিরে আসিয়া দাঁড়াইলেন ।—“কিরে ‘মাছপাতরী’ তোরা এসেছিস” ।—অনেকদিন আগের ঘটনা । জ্যাঠাইমার বাড়ীর বারান্দায় সারি সারি পিঁড়ী পাতা হইয়াছে । সম্মুখে ভাতের থালা । আমি, নিলু, জিতেন্দা, ঘ্যাণ্টা সকলে খাইতে বসিব । “আরে মাছপাতরী যে !” বলিয়া, নিলু দৌড়াইয়া গিয়া পিঁড়ীতে যেমন বসিতে যাইবে, পিঁড়ি পিছলাইয়া পড়িয়া গেল । ভাতের থালা ছিটকাইয়া দূরে চলিয়া গিয়াছে ; একেবারে তছনছ কাণ্ড ! সেই হইতে জ্যাঠাইমা নিলুকে ‘মাছপাতরী’ বলেন । কথাগুলির মধ্যে উপহাসের ইঙ্গিত যাহা ছিল, তাহা আর এখন নাই, কিন্তু কথার কাঠামোটি রহিয়া গিয়াছে । তাহারপর জ্যাঠাইমা বলেন, “দেখি বারিন্দিরের ব্যাটা ; পকেটে করে লেবু এনেছিস তো ? দে, কে... রাখি ?”

সেই নিলু, সেই একরত্তি হাফপ্যান্ট পরা ক্যাপ্টেন নিলু, সেই মাছপাতরীর নিলু—সেই দাদা বলিতে অজ্ঞান নিলু সে কিনা আমার সঙ্গে এই ব্যবহার করিল । তাহার নিকট হইতে এই ব্যবহার আমি তো কোন দিন আশা করি নাই । এত ঘৃণ্য

পরিবর্তন হইয়াছে তাহার মনের ! ছি !—একি ? আমি একি ভাবিতেছি ? পারের যে ক্ষতীর উপর আঘাত লাগিবে বলিয়া হাত দিই না, হাতে ঘাটে পথে, ভিড়ের মধ্যে যে ক্ষতীকে অতি সতর্পণে আঘাত হইতে বাঁচাইয়া আসিয়াছি,—বাড়ীতে আসিয়া টেবিলে পা তুলিয়া বসিবার সময় কি উহার উপর আঘাত লাগিল ? মনের গভীর ক্ষতীকে আর বুঝি বিস্মৃতির মলমেলও যুক্তির প্রলেপে ঢাকিয়া রাখা যায় না । না, আমিই যদি নিলুকে ঠিক না বুঝি, তাহা হইলে বাহিরের লোকে বুঝিবে কেমন করিয়া । সেকালে অনেক স্থানে, শিয়াল গ্রামে উপদ্রব করিলে, তাহাকে ধরিয়া গ্রামের মধ্যে চোমাথার উপর ফাঁসী দিবার ব্যবস্থা ছিল । লোকে কেবল নিজের ক্ষতির দিক দিয়া জিনিষটীকে ভাবিত, এবং সেই দৃষ্টিকোন দিয়াই অনিষ্টকারীর উপর প্রতিশোধ লইত । কিন্তু আমাকে তো নিলুর দৃষ্টি দিয়াই সমস্ত ঘটনাবলী দেখিতে হইবে । সেদিন যখন নিলু দেখা করিতে আসিয়াছিল, এই কক্ষলের উপরেই তো বসিয়াছিল । আমার মুখের দিকে প্রাণখোলা, স্বাধীনভাবে তাকাইতে পারিতেছিল না । তাহার চোখে মুখে ছিল অপরাধীর সঙ্কুচিত ভাব । কেন ? কোথাও গলদ নিশ্চয়ই আছে । না হইলে তাহার কুণ্ঠার কারণ কি ? বিবেকের দংশন না কেবল অনুতাপ ? নিলু আমাকে কিছু বলিতে চাহিতেছিল । কি বলিতে চাহিতেছিল তাহাও জানি । কিন্তু আমি সেকথা উঠাইবার সুবিধা দিই নাই । দিলে হয়তো আমারও সংবোধের বাধ ভাঙ্গিয়া যাইত । নিলু আসিয়াছে তাহার দাদার সহিত সাক্ষাৎ করিতে, তাহার প্রতিদ্বন্দ্বী রাজনৈতিক পার্টির স্থানীয় নেতা বিলুবাবু সহিত নয় । কি ভাগ্য যে সেদিন তাহার সম্মুখে আমার মানসিক দ্বন্দ্বের আভাস ফুটিয়া উঠে নাই ! আমার আবার একটুতেই চোখে জল আসিয়া পড়ে । তাহাই ছিল আমার ভয় । কিন্তু যাহা হউক কোন রকমে ভালয় ভালয় ইনটারভিউ কাটিয়া গিয়াছিল । সে চলিয়া যাইবার পূর্বে আমি ভাঙ্গিয়া পড়ি নাই । আর তাহার দিক হইতে আবেগের আতিশয্য দেখিয়াছিলাম । চলিয়া যাইবার সময় দুই হাত দিয়া আমার ডান হাতটা চাপিয়া ধরিয়াছিল—মুহূর্তের জন্য । মৃদু বন্দ্যমান হাতের সেট হিমশীতল স্পর্শ এখনও অনুভব করিতেছি । বলিয়াছিলাম মা'র সহিত দেখা করিতে । করিল

কিনা কে জানে। মাকে লইয়াই ভয়। মা'র একছলে তো তবু থাকিল। চোখ বুঁজিয়া মা'র মুখটা মনে করিবার চেষ্টা করি।...

মা ভাতের সহিত জলপাইয়ের আচার খাইতেছেন। সম্মুখের চুল সাদাতে কালোতে মিশানো—কালোই বেশী, সিঁথার চুল কতকগুলি উঠিয়া সিঁথীটা চওড়া হইয়া গিয়াছে, তাহার উপর চওড়া করিয়া দেওয়া সিঁদুর। তাহার পিছনে দেখা যাইতেছে খন্দরের শাড়ীর লাল পাড়। কান, গলা সম্পূর্ণ নিরাভরণ। অর্ধ নিম্নীলিত চোখের কোনে কতকগুলি বলিবেখা, একটা করিয়া মোটা, বাকিগুলি চুলের মতো সরু। নাকের নীচের দিক হইতে দুইটা চর্মরেখা, ঠোঁটের দুই কোন পর্য্যন্ত পৌঁছিয়াছে। ধবধবে রংএর উপর রেখা দুইটা বেশ গভীর দেখাইতেছে। মা ঠোঁট দুইটা ছুঁচালো করিলেন—জিবটা চুষিতেছেন, গলনলীর মৃদুকম্পন উপর হইতেই বুঝা যাইতেছে। জিবটা টাক্রায় ঠেকাইয়া টক্ করিয়া একটা শব্দ করিলেন। ঠোঁট দুইটা খুলিলে দেখা গেল, নীচের দন্তপংক্তির মধ্যে একটা দাঁত নাই। তাহার মধ্য দিয়া লালাসিক্ত জিহ্বা দেখা যাইতেছে। “তোরা ওঠনা, তোরা ওঠ।” আমরা কিছু বসিয়া থাকি।

জ্যাঠাইমারও কয়েকটা নাচের পাটির দাঁত নাই। থাকিবে কোথা হইতে? চব্বিশ ঘণ্টা দাঁতের নীচে, ঠোঁটের মধ্যে একরাশ চূনের সহিত ডলা জর্দা গোঁজা থাকে। লোকে পানের সহিতই জর্দা খায়; কিন্তু শুধু জর্দা এতখানি করিয়া নিরমিত খাইতে আর কাহাকেও দেখি নাই। জ্যাঠাইমা এখন কি করিতেছেন? আজ রাতে কি জ্যাঠাইমার ঘুম হইবে? কি শীত কি গ্রীষ্ম, চিরকাল রাত তিনটার সময় উঠিয়া, বিছানার উপর বসিয়াই মালা জপ করেন। ঘুম হইতে উঠিয়াই লণ্ঠনের শিখাটা বাড়াইয়া পাশের জানালার উপর রাখিলেন। আলো গিয়া পড়ে, দেওয়ালে টাঙ্গানো একটা রাধাকৃষ্ণের ছবির উপর। তাহার পর চশমাটা চোখে লাগাইয়া, ঐ দিকে তাকাইয়া স্থির হইয়া বসেন। ঐরূপই নাকি গুরুদেবের নির্দেশ। গোল মুখটা—মা একদিন বলিয়াছিলেন ডিবের বাটীর মুখের মতো। মুখে শুটুকয়েক বসন্তর দাগ; কপালে একটা নীল উকীর ফোটা; গলায় কণ্ঠি। জপ

করিতে করিতে মধ্যে মধ্যে পাশের জানালা দিয়া ঈদার খুতু ফেলিতেছেন। আর সেই অবকাশে, আকাশের দিকে তাকাইয়া দেখিয়া লইতেছেন, সকাল হইতে আর কত দেবী। এইবার বাইরের ইদারার বালতী ফেলিবার শব্দ হইতেছে। পাড়ার মুদী রামদেব সাও প্রত্যহ ভোর না হইতে ইদারায় জল লইতে আসে। টগাই জ্যাঠাইয়ার ঘড়ী। “বেলী, ওরে বেলী, আজ কি উঠবিনা ?” ন’দি ধড়মড় করিয়া বিছানা ছাড়িয়া উঠে।...

নিলুকে ছোটবেলায় সকালে ঠেলিয়া দিতে গেলে, প্রথমে বলিত, “ভাল হবেনা বলছি, দাদা।” বলিয়া আবার পাশ ফিরিয়া শুইত। আবার ঠেলা দিতে গেলে বলিত “ফের”। তাহার পর বলিত “আবার”। আর একবার ঠেলিলে বলিবে “তবুও”। এবার গনার জোর কিছু বেশী। তাহার পর আপন মনে বকিতে বকিতে উঠিয়া বসিত। মা বলিতেন “এই ভোরে উঠেই সাপের মন্তর ঝাড়া আরম্ভ হ’ল।” নিলুর মুখটা মনে করিবার চেষ্টা করিতেছি। কিছুতেই মনে আসিতেছে না! যখন তখন নিলুর মুখটা চোখের সম্মুখে ভাসিয়া উঠে, কিন্তু এখন মনে করিতে চাহিতেছি, শেষ মুহূর্তের একটু তৃপ্তির জন্ম। কিন্তু এখন কি আর মনে আসিবে? মনে করিতে চাহিতেছি নিলুর মুখ—আর মানসপটে কুটিয়া উঠিতেছে গণৌরী মাহতোর মুখ—ঝাড়া মাথা, খঁাদা নাক, বুলডগের মতো মুখ, এক কানের উপরিভাগে ছিদ্র করিয়া একটা সোণার আংটা পরানো.....

গা শির শির করিতেছে। ভোররাত্রের হাওয়া বেশ ঠাণ্ডা। এই এখন দুই ঘণ্টা মাত্র সেলটা ঠাণ্ডা থাকিবে। পাগলটা চীৎকার আরম্ভ করিয়াছে। তিন নম্বর আবার কখন ভজন আরম্ভ করিল, পূর্বে খেয়াল করি নাই।

অশ্বখ গাছের কাকগুলি একবার কা-কা করিয়া ডাকিয়া চূপ করিয়া গেল। বোধহয় বৃষ্টিতে পারিল যে সকাল এখনও হয় নাই, সময় গণনায় একটু ভুল হওয়ার, কিছুক্ষণ আগেই ডাকিয়া ফেলিয়াছে। কতটুকুই বা আমার নেয়াদ। এখন এক মুহূর্তের মূল্য আমার কাছে কত; সিনেমার ছবি হইলে হয়ত দেখাইত

—একটা বালুর ঘড়ী, ডমরুর মতো। উপরের বাটার বালু প্রায় শেষ হইয়া আসিয়াছে, কিন্তু টিপ্ টিপ্ করিয়া অনবরত বালুকণা নীচে পড়িতেছে। এক পলকেরও বিরাম নাই।.....কিন্তু হয়ত দেখাইত, প্রদীপের তেল শেষ হইয়া আসিল।.....হয়ত বা ঘড়ীর কাঁটা চলিতেছে।.....আমার ঘড়ীও তাহার নিজের ধরণে, সেই বাঁধা নিয়মে চলিতেছে—ঠাণ্ডা হাওয়া, পাগলের চীৎকার, তিন নম্বরের ভজন ;.....বাকি কেবল আকাশ একটু পরিষ্কার হওয়া। শুকতারাটি চিনিতে পারিতেছি। আর সর্বাশ্রয়ী রুঢ় বাস্তব—আমার ওয়ার্ডার সাহেব সেলের আঙ্গিনার চৌবাচার উপর বসিয়া ঝিমাইতেছে।.....

এখন বিনু আছে, আর কিছুক্ষণ পরেই থাকিবে না।...রক্তমাংসে গড়া, সুখদুঃখে ভরা বিনু বলিয়া কিছু নাই। আমি সরকারী স্ট্যাটিস্টিক্সের একটা সংখ্যা মাত্র। অজস্র সংখ্যার মধ্যে একটীর হ্রাস বৃদ্ধিতে কি আসে যায় ? বৈজ্ঞানিকেরা, প্যারালাক্স বা ইন্স্ট্রুমেন্টল এরর-এর (দৃষ্টি বিভ্রম, বা বস্তুজনিত ভুলের) জন্ত শতকরা কিছু সংখ্যা তো ছাড়িয়াই দেন। ব্যবসায়ে 'বাড়তি পড়তি' বলিয়াও তো একটা জিনিষ আছে। আমি হয়তো ইহারই মধ্যে পড়িব। হয়তো বা ভারত সরকারের হিসাবের সময়, আমি—পুনিয়া জেলের ১১০৯ নম্বর ফাঁসীর আসামী—ফাঁসীর শতকরা হার একটা দশমিক ভগ্নাংশের পরিমাণ বাড়াইয়া দিব। সরকারী রিপোর্টের এতটুকু ছাপার কালির খরচ ! ইহাই আমার জীবনের মূল্য—জাতীয় ইতিহাসে বিনুবাবুর দান !

গরুর গাড়ীর চাকায় বেক্রপ কাঁচার কাঁচর শব্দ হয়, সেইরূপ একটা শব্দ হইল। বোধহয় ওয়ার্ডের দরজা খোলার শব্দ। তবে কি..... ? ঠিকই তাই। যাহা ভাবিয়াছি তাহাই। সিমেন্ট বাঁধানো সেলের আঙ্গিনার উপর এক সঙ্গে অসংখ্য জুতার শব্দ হইতেছে। কত লোক আসিতেছে। শুনিয়াছিলাম একদল সৈনিকের পদধ্বনির প্রতিশব্দে একটা পুল ভাঙ্গিয়া পড়িতে পারে। সত্যই তো, কত জোরে শব্দ হয় ! ঐ পদধ্বনির সঙ্গে সঙ্গে বৃকের ভিতর টিপ্ টিপ করিতেছে। বৃকের স্পন্দনের শব্দ স্পষ্ট শুনিতে পাইতেছি। রাশনোহন

ঢাকী কোন নবমী পূজার স্বাত্রেবও, বোধহয় এরূপ শব্দের স্পন্দন তরুদায়িত্ব করিতে পারে নাই। সমগ্র শরীর কাঁপিতেছে। জোরে জোরে নিশ্বাস পড়িতেছে। চোখের সম্মুখে বেন কিসের একটা পর্দা পড়িয়া গিয়াছে। মাথার মধ্যে কেমন যেন ঠাণ্ডা আর খালি লাগিতেছে।—একবার আমার ডান হাতের আঙ্গুলটি সাইকেলের স্পোকের মধ্যে পড়িয়া কাটিয়া গিয়াছিল। রক্ত আর বন্ধ হয় না! সেই সময় রক্ত দেখিয়া মাথার মধ্যে এইরূপ বিম্ব বিম্ব করিয়া উঠিয়াছিল।—কপালে ও নাকের নীচে বিন্দু বিন্দু বাম দেখা দিয়াছে। কেন জানি না দাঁড়াইতে ইচ্ছা করিল। গরাদ ধরিয়া দাঁড়াইতে চেষ্টা করিলাম। হাত পা অসম্ভব কাঁপিতেছে, দাঁড়াইতে পারিলাম না; পায়ের দিকটা বেন পক্ষাঘাতগ্রস্ত। সেবার টাইফয়েডের পর প্রথম খাট হইতে নামিতে গিয়া এইরূপ বোধ হইয়াছিল। ওয়ার্ডার দাঁড়াইয়া নিজের পাগড়ী ঠিক করিয়া লইল। পাগড়ী চীৎকার করিতেছে। তিন নম্বর ভজন গান বন্ধ করে নাই। জুতার শব্দ নিকটে আসিতেছে—আরও—আরও। তলপেটের মধ্যটা বেন খালি হইয়া গিয়াছে, মনে হইতেছে পেটের ভিতরটা বরফের মতো ঠাণ্ডা। একবার কার্নিভাল নাগরদোলায় দোল খাইবার সময় চাকাটি যখন উপর হইতে নীচে নামিতেছিল, তখন তলপেটে এইরূপই অনুভব করিয়াছিলাম। জিভটা শুকাইয়া উথার মতো খরখরে হইয়া গিয়াছে, আর বেন গলার মধ্যে ঢুকিয়া যাইতেছে।

সরস্বতী! মা! জ্যাঠাইমা! নিলু!.....নিলু তুই একি করলি? একটা লোহার horizontal barএ, আমার অসার মৃতদেহটা ঝুলিতেছে। পা দুইটা

উত্তরপূর্ব পূর্ব, পূর্ব পূর্বদক্ষিণ দক্ষিণ।

একি? বুটের শব্দ আর আমার দিকে আগাইয়া আসিতেছে না। আমার ওয়ার্ডারটা উঁকি মারিয়া ওয়ার্ডের আঙ্গিনার দিকে দেখিতেছে। হঠাৎ তিন নম্বরের ভজন গান বন্ধ হইয়া গেল। আমার শ্রবণশক্তি ও মানসিক উদ্বেগ হঠাৎ

লুপ্ত হইল নাকি। না। গোন্ধার কথা বলিবার চেষ্টা করার মতো একটা শব্দ কানে আসিয়া পৌঁছাইল। অতি করুণ, কাতর, অসহায়, আর্তনাদ!

কে? কেন?.....

এইবার! এইবার—কেবল অগনিত জুতার শব্দ মাত্র নয়—গৌরীশৃঙ্গের হুড়া ভাঙ্গিয়া পড়িতেছে—কাল বৈশাখীর উগ্র মাতন—আবার আর্তনাদ—ঘনঘ টাচ্ছন্ন আকাশের বুকচেরা আর্তনাদ—“হঁসিয়ারীসে”—পায়ের নীচের পৃথিবী ফাটিয়া চৌচির হইয়া গেল—নীচে—নীচে—অতল অন্ধকারের মধ্যে।

—“সামনে বাতি দেখাও”—কতকগুলি বিকৃতাক্রম প্রেতের ছায়া ক্রমে ক্রমে ছোট হইয়া লণ্ঠনের আলোকে মিলাইয়া যায়। লণ্ঠনগুলি এইদিকে আগাইয়া আসিতেছে—সহস্র গ্রহ-উপগ্রহ কক্ষচ্যুত হইয়া আমার দিকে ছুটিয়া আসিতেছে। প্রতি রোমকূপে প্রত্যাশিত আতঙ্কের সাড়া—প্রতি স্নায়ুতে টাইফুনের বিস্ফোভ—এই আলোড়ন অক্ষিগোলকের মধ্য দিয়া কুটিয়া বাহির হইতে চায়।—তুমুল ব্যাত্যা-বিস্ফোভে আর বুঝি দাঁড়াইতে পারা যায় না।.....দৃঢ় মুষ্টিতে গরাদ চাপিয়া ধরিয়াছি।

আপার ডিভিসন ওয়ার্ড
(বাবা)

আপার ডিভিসন ওয়ার্ড

“রাষ্ট্রগগন্বকী দিব্বিয় জিষোতী রাষ্ট্রিয় পতাকা নমোনমো” (২৫).....
সক্কার কৌর্ভন ও গান শেষ হইল। ওয়ার্ডার দরজা বন্ধ করিতেছে, আর আপন
মনে বকিয়া চলিরাছে। শ্রোতা পার্শ্বে দণ্ডায়মান আর একজন ওয়ার্ডার।

“এক বাবু এখানে তো আর এক বাবু ওখানে। একজনকে ডাকিয়া বরে
চুকাই তো আর একজন দেখি বাহির হইয়া গিয়াছে। কেহ পাষখানার
গিয়া বসিয়াছেন ; কেহ পূজায় বসিয়াছেন ; কেহ বনিলেন তাসের এ হাতটি
শেষ হউক সিপাহী সাহেব। ফুদনবাবুর পাষচারী তো শেষই হয় না ;
দেখিতেছেন দরজা বন্ধ করিবার জন্ত দাঁড়াইয়া আছি, তবুও ভিতরে ঢুকিবার
নাম নাই। হজম করিবার জন্ত যদি এত পাষচারীর দরকার হয়, তাহা
হইলে আর একটু কম খাইলেই তো হয়। বাড়ীতে কি খাইতে তাহা জানি।
এখানে আপার ডিভিসন পাইয়াছ বলিয়া কি পেটে ‘হাওয়া পানির’ জন্তও
একটু জায়গা খালি রাখিতে নাই ?”

মেহের চন্দ্রজীই ‘রাষ্ট্রগগন্বকী’ গানটির সুর জানেন। আমরা তাঁহার সহিত
সুর মিশাই নাত্র। এখানে এই গানের নাম ‘প্রার্থনা’ (প্রার্থনা)। প্রার্থনার পূর্বে
লণ্ঠনগুলি কমাইয়া দেওয়া হয়। প্রত্যহ উনি গানটির একটা লাইন ভুলিয়া যান।
সেই সময় লণ্ঠনের শিখা একটু বাড়াইয়া দিয়া পকেট হইতে বাহির করেন, ‘আশ্রন
ভঙ্গনাবলী’ ! এতদিন হইতে গাহিতেছেন। তাঁহার ছাড়া পাইবার সময় হইয়া
আসিল, কিন্তু এখনও উহার ঐ লাইনটি মুখস্থ হইল না। অল্প অনেকের মুখস্থ
হইয়া গিয়াছে, কিন্তু সকলেই মজা দেখিতে চায় ! মেহের চন্দ্রজী বোঝেন না যে,
যখনই ঐ গানের মধ্যে ঐ লাইনটি আসে, আর উনি লণ্ঠন নইবার জন্ত হাত
বাড়ান, একটা চাপা হাসির শব্দে বরটা ভরিয়া যার। আমি সেদিন লাইনটি মনে

করাইয়া দিবার চেষ্টা করিয়াছিলাম। দেখিলাম যে উনি তাহা পছন্দ করেন না। সেইজন্য আর কিছু বলি না।.....

এ ব্যবস্থা বেশ হইয়াছে। লক-আপ এর সঙ্গে সঙ্গেই প্রার্থনা ও ভজন শেষ হয়। আগে দরজা বন্ধ হইবার পর 'প্রার্থনা' আরম্ভ হইত। কিন্তু দেখিলাম সোশ্যালিষ্ট পার্টির অনেকেই ইহা ভালবাসে না। ঐ দলের বরহম্‌দেও ও শিউ-পূজন একদিন প্রার্থনার সময় পাল্লা দিয়া বেসুরা স্বরে অল্প গান আরম্ভ করিয়াছিল। উহারা যে আমাদের গানে এতদূর বিরক্ত হয়, তাহা পূর্বে বুদ্ধিতে পারি নাই। সেইদিন হইতে বলিরা কহিয়া প্রার্থনার সময় আগাইয়া দিয়াছি, যাহাতে লক-আপ এর পূর্বেই গান শেষ হইয়া যায়। মেহেরচন্দ, সদাশিউ, ইহারা কিছুতেই রাজী হইবে না। তাহারা বলে "আমরা ছোট হইব কেন? উহারা যে রাত্রি বারটা পর্যন্ত নাকের সম্মুখে বিড়ীর ধোঁয়া ছাড়ে, লহনী কাস্তুর মার্জ্জাসের লেকচারের ঠেলার যে আমাদের ঘুমাইবার উপায় নাই,—আমরা কি কিছু বলি? আপনি, মাষ্টার সাহেব আমাদের অনুরোধ করিবেন না। উহাদের ঠাণ্ডা করিতে বেশী 'তকলিফ উঠাইবার' (২৬) দরকার হইবে না।" কত বুঝাই। "বাহা করিলে উহাদের সত্য সত্যই অসুবিধা হয়, তাহা আমরা করিব কেন। উহারা যাহা ইচ্ছা করুক, আমাদের দিক হইতে কর্তব্যের ক্রটি হইতে দিব কেন? উহারা ছেলেমানুষ। তোমাদের আদর্শ মহাত্মাজীর দেখানো পথ। তাহা কত উচ্রে। তাহা হইতে বিচ্যুত হইবে কেন।" এইরূপ কত বুঝাইবার পর মনে মনে সন্তুষ্ট না হইলেও আমার কথা মানিয়া লইয়াছে। সেইদিন হইতে দরজা বন্ধ হইবার পূর্বেই আমরা সন্ধ্যার প্রার্থনা সারিয়া লই। এখনও উহারা নেহাৎ ছেলেমানুষ। স্কুল কলেজের ছাত্র। ভলিবল খেলার সময় সেদিন দেখি কমরেড মাদোরাম কমরেড মুরলী মিশিরের বুকের উপর বসিয়া তাহার গলা চাপিয়া ধরিয়াছে। খাবার লইয়া এখনও তাহারা প্রত্যহ কিচেন ম্যানেজারের সহিত ঝগড়া করে। আজ এর সঙ্গে ওর কথা বন্ধ, কাল ওর সঙ্গে এর ঝগড়া এসব তো নিত্য লাগিয়াই আছে। ঐ সব একরত্তি ছেলে। ওদের আবার দোষগুণের বিচার করিতে বাইব আমরা।

তিনকাল গিয়া এককালে ঠেকিয়াছে—এখনও আমরা আমাদের মনের বৃত্তিগুলি সংযত করিতে পারি নাই। আর উহারা তো ছেলেমানুষ। উহাদের ক্রটি বিচ্যুতি যদি গায়ে মাখিতে হয়, তাহা হইলে আমাদের এপথে আসাই বৃথা। বিনুও তো ঐ দলের মেম্বর—ওদের প্রত্যেকটা ছেলে যে আমার কাছে বিনুর মতো।.....

আজ রাত্রিটাও অন্ততঃ যদি বিনুর কাছে থাকিতে পারিতাম। না, একদিকে না থাকায় ভানই হইয়াছে। তাহা হইলে হয়তো দুইজনেই ভাঙ্গিয়া পড়িতাম।— তবে শেষ মুহূর্ত্ত পর্যন্ত কথা তো বলিয়া লইতে পারিতাম।...হয়তো কথাই খুঁজিয়া পাইতাম না। ছেলেরা তো কোন কালেই আমার সঙ্গে, নেহাৎ কাজের কথা ব্যতীত অন্য কথা বলে না। আমার সম্মুখে আসিলেই বিনু দেখি সঙ্কুচিত হইয়া যায়,—কেমন যেন ঠড়সড় ভাব। সপ্রতিভতা উহার চিরকালই একটু কম। ও চিরবালই কুণো। কিন্তু সে দোষ তো আমার শিক্ষা দেওয়ার। উহাদের যেমন করিয়া গড়িয়া তুলিয়াছি, উহারা তেমনি গড়িয়া উঠিয়াছে। যদি শিক্ষার ক্রটির জন্মই উহার স্বভাব এমন হইবে, তাহা হইলে নিলুর স্বভাব একরূপ হইল না কেন? হইতে পারে যে বিনুকে ইংরাজী কলেজে পড়াই নাই বলিয়া, উহার মধ্যে একটি inferiority complex আছে। নিলু কলেজে পড়িয়াছে, সেই জন্মই বোধহয়, নিলুর মনের মধ্যে এ ভাব নাই। ছেলেদের বাহিরের ব্যবহারের কথা বলিতে পারি না; তবে আমার ও উহাদের মধ্যে যে ব্যবধান, তাহার জন্ম দায়ী আমি। কোন দিন উহাদের সহিত প্রাণখোলা ভাবে মিশি নাই। কোলে পিঠে করিয়া আদর করি নাই। আমার ধারণা ছিল ছেলেদের সহিত বন্ধুভাব স্থাপন করিলে, উহাদের শাসন করা শক্ত। উহাদের সহিত কম কথা বলো, উহারা ভয় ও সমীহ করিয়া চলিবে, উহাদের নাই দাও মাথায় চড়িয়া বসিবে। এ বিষয়ে আমি আর কাহারও কথা কোনদিন মানি নাই। ছিলাম ইস্কুল মাষ্টার। অভ্যাস দোষেই হউক বা অন্য যে কোন কারণেই হউক, পৃথিবীর সকলক্ষেত্রেই এই শিক্ষক-ছাত্রের সম্বন্ধ দেখিতে পাইয়াছি। সেইজন্য রাজনীতিক্ষেত্রেও বড়কে গুরু বলিয়া মনে করি, ছোটকে

শিষ্ণের দৃষ্টিতে দেখি। কমরেড কোনদিনই হইতে পারিলাম না।...জ্বিতেন যখন ছোটো ছিল, চব্বিশ ঘণ্টা যত্নদার সঙ্গে সঙ্গে থাকিত। বাবার মোটা লাঠিটা হাতে করিয়া, নাহস-নহস ছেলেটা, তাঁহার আগে আগে চলিত—হাতে বাজাবে, ভোজে সর্বত্র। তখন বাবার সঙ্গে আমাদের সাক্ষা আড্ডায় আসিয়া, আমার সহিতও দিব্যি আলাপ জমাইয়া লইয়াছিল। পরের ছেলেকে আদর করা, তাহার জন্ম লজেনজ্ আনিয়া পকেটে রাখা, নিজের ছেলেদের সহিত ব্যবহারের এই পার্থক্য বিলুর মা'র চোখেও অসঙ্গত লাগিয়াছিল। বিলুরা মা কম কথার মানুষ। তাহাকেও একদিন সে সময় মুখ ফুটিয়া বলিতে শুনিয়াছিলাম, “নিজের ছেলেদের দিকেও একটু ফিরে তাকিও!” একটু হাসিয়া সেদিন মনের অন্বস্তি দূর করিয়া দিয়াছিলাম। কিন্তু তখন হইতে যদি ছেলেদের সহিত একটু সম্পর্ক রাখিতাম, তাহা হইলে আজ তাহাদের সহিত সংস্ক হইত মেহ ভালবাসার, ভয় ও সমীহের নয়। নিলু বিলুর, আদর আবদার বা কিছু সব মায়ের সঙ্গে। একসঙ্গে খাওয়া বসা, মনের কথাটা বলা, ছোটবেলার মত এখনও সব সেই রকমই বজায় আছে। ছেলেদের নাম মনে করতে গেলে মনে আসে নিলু বিলু—আগে নিলু, তাহার পর বিলু। বিলু বয়সে বড় কিন্তু আগে বিলুর নাম মনে আসে না। কার্ত্তিক গণেশই যেন ঠিক। সব কার্য্যারম্ভেই গণেশের নাম। কিন্তু আগে গণেশ, তাহার পর কার্ত্তিক, বলা তো.—গণেশ কার্ত্তিক, নাম দুইটা যেন আর এক নিশ্বাসে উচ্চারণ করাই যায় না।.....

সদাশিউ আমার মশারী ফেলিয়া দিতে আসিয়াছে। হয়তো ভাবিতেছে আমি জপে বসিব। মশার জালায় কি মশারীর বাহিরে পূজায় বসিবার জো আছে। মশার কামড়ে মনের একাগ্রতা নষ্ট হইয়া যায়। রাত্রে শোবার সময় মশারী ব্যবহার করি না। শরীরকে যত সওয়াও তত সয়। মশার কামড় সহ করিবার মতো সহিষ্ণুতা যদি না থাকে, এতটুকু কুচ্ছ সাধন করিবার ক্ষমতা যদি না থাকে, তাহা হইলে বড় কাজ আমাদের দ্বারা কি করিয়া হইবে। বিলুর তো মশারী না থাকায় কত অসুবিধা হয়। ইমারা করিয়া তাহাকে মশারী ফেলিতে

বারণ করি। আজ সোমবার। আমার মৌন-ব্রত। মহাআজী করেন আঁত্মা শুদ্ধির জন্ম। তিনি যে কাজ করা ভাল বলিয়া মনে করেন তাহা কি আমরা না করিয়া পারি। অল্প অল্প সোমবারে সন্ধ্যার পূর্বে পূজা করিয়া, তাহার পর উপবাস ভঙ্গ করি। খাইবার পর কথা বলি। তাহা লক্ষ্য করিয়াই সদাশিউ আমার পূজার ব্যবস্থা করিতে আসিয়াছে। ভারি ভাল ছেলে সদাশিউ—সত্য সত্যই সদাশিব। কয়েক বৎসর পূর্বে “বন্ধু-স্বাবলম্বী” প্রতিভা পত্রে নাম লেখায় ও সেই হইতেই প্রত্যহ অন্ততঃ একহাজার গজ সূতা কাটে।.....

আপার ডিভিসন ওয়ার্ড। প্রকাণ্ড বড় হল দর। এখন তেত্রিশ জন বন্দী এই ঘরে থাকে, উনিশ জন নিরাপত্তা বন্দী, ও ১৫ জন রাজবন্দী—যাহাদের সাজা হইয়াছে, কিম্বা যাহাদের বিরুদ্ধে মোকদ্দমা চলিতেছে। মদ্যের দরজার পাশে আমার সিট। ঘরের মধ্য দিয়া যাতায়াতের রাস্তা, আর তাহার দুইপাশে দেওয়াল ঘেসিয়া সারি সারি চৌকি। তাহাতে নেটের মশারী টাঙ্গানো। প্রতি তক্তা-পোষের পাশে একটি টেবিল, একখানি চেয়ার ও একটা করিয়া বই-এর শেল্ফ। অধিকাংশ চৌকির পাশে মেঝের উপর কমল বিছানো। টেবিলের উপর একখানি করিয়া টেবিল ক্লথ। তাহার উপর আছে আয়না চিকনো, আরও কত কি? লোহার গরাদ, তাল চাবি, আর ওয়ার্ডারের চেহারা না দেখা গেলে ঠিকাকৈ জেল বলিয়া বুঝিবার উপায় নাই, ঠিক যেন কলেজের ছাত্রদের থাকিবার হোস্টেল। গত আগষ্ট মাসে হরিহরজী আর তাহার খুন্ খুনে বড়ো বাবাকে আণ্ডারট্রায়ালরূপে এখানে ধরিয়া আনে, তখন হরিহরের বাবা মনে করিয়াছিলেন যে পুলিশ তাঁহাকে একটি ধর্মশালায় আনিয়াছে। পরে জেলে লইয়া যাইবে। বৃদ্ধ একবার তাঁহার ছেলেকে জিজ্ঞাসাও করিয়াছিলেন যে তাঁহাকে কখন জেলে লইয়া যাওয়া হইবে। তাঁহাকে পুলিশ দিন কয়েক পরে ছাড়িয়া দেয়। ১৯২১-২২শে যখন জেলে আনি, তখনকার জেল আর এখনকার জেল আকাশ পাতাল তফাৎ। সেবার ছিলাম সাধারণ কয়েদীর শ্রেণীতে। প্রত্যেক কয়েদীকে কাজ করিতে হইত। সরকার নেলান লইয়া কত গোলমাল। কোথাও যাইতেছ—হঠাৎ ‘মেট’-এর কর্কশ স্বর কানে আসিত

“জোড়া ফাইল বান্হুকে চলো।” পাঠখানার যাইবার সময় পর্য্যন্ত ঐরূপ লাইন বাধিয়া যাইতে হইবে। সকলের হাতে একটি করিয়া লোহার পাত্র। খাওয়া-দাওয়া স্নান সব কাজই ঐ পাত্রটি দিয়াই সারিতে হইবে। কথার কথায় “ডাঙাবেড়ী” (Bar fetters), “খাড়া হাতকড়া”, “চটি পেনহাও” (Sack-cloth) প্রভৃতি সাজা। তাহার সহিত আজকের অবস্থার তুলনা হয় ? চলা-ফেরা খাওয়া-দাওয়া, থাকা সম্বন্ধে প্রত্যেকটি সামান্য অধিকার পাইবার পিছনে আছে কত ত্যাগ, কত সংবর্ষ, কত বিশ্বৃত শহীদের অজ্ঞ-বিলোপ। কিন্তু আশ্চর্য্য ইহাদের বিচার। আমাকে দিন আপনার ডিভিসন, আমার স্ত্রীকে দিন আপনার ডিভিসন, আর আমাদের ছেলে বিলুকে ডিভিসন থি।.....

চরখাটি লইয়া বসা বাক। মনের উদ্বেগ শান্ত করিতে এমন জিনিষ আর নাই। কিছুক্ষণ একাগ্র মনে চরখা কাটিলে দেখিয়াছি স্বায়ুর উত্তেজনা ধীরে ধীরে শান্ত হইয়া আসে। ডাক্তাররা হাসুক, সোস্যালিষ্টরা অবিশ্বাস করুক, আমার যে ইহার প্রত্যক্ষ অভিজ্ঞতা আছে। চরখাটি লইয়া খুলিয়া বসিলাম। সদাশিউ কি যেন বলিতে চায়। না হইলে দাঁড়াইয়া থাকিবে কেন ? চোখের ইসারায় জিজ্ঞাসা করি “কি ?” সে আমতা আমতা করিয়া বলে “আমরা কয়েকজন এখন সূত্রঘঞ্জে বসিতে চাই। আপনার তাহাতে কিছু অসুবিধা হইবে না তো ?” ইঙ্গিতে তাহাকে বলি যে “বসো”। আজকালকার ছেলেরা এত ফর্মালিটি মানিয়া চলে। আশ্চর্য্য! একসঙ্গে বসিয়া চরখা কাটিবে সেতো আনন্দের কথা। তোমাদের এরূপ স্মৃতি হইলে তো বাঁচিয়া যাই। ইহাতে আবার আমার মতামত লইবার কি আছে ? আমি তো ইহাই চাই। তুমি তোমাদেরে লইয়াই। সোস্যালিষ্টরা তোমাদের তাহাদের দলের সদস্য করিবার জন্য সর্ব্বক্ষণই দেখি ওৎ পাতিয়া বসিয়া আছে। তোমাদের উপর ভরসা আর পাই কই ?.....সন্ধ্যাবেলায় ঞায় প্রাতঃকালেও প্রার্থনা করার প্রস্তাব ইহাদের কাছে তুলিয়া সেদিন কি অপ্রস্তুতই হইতে হইল। মেহেরচন্দকে পর্য্যন্ত আমার আড়ালে ঠাট্টা করিয়া বলিতে শুনিলাম, দশ আনার খোরাণীতে আর দুই বেলা প্রার্থনা করা পোষায় না। রেশন পাঁচসিকা করিয়া দিক, তাহার পর দুইবেলা

সামূহিক প্রার্থনা করিব। জিনিযপত্র দুর্মূল্য হওয়ার জন্ত শীঘ্রই শুনিতেনিছ বারো" আনা করিয়া 'খোরাকি' হইবে। বাড়িবার পর সপ্তাহে একদিন করিয়া ভোর বেলা প্রার্থনা করিতে পারি। বলে, আর হি হি করিয়া হাসে। প্রার্থনা না করিতে চাও করিও না। কিন্তু প্রার্থনার কথা লইয়া ঠাট্টা তামাসা করিতে নজ্জাও করে না! তোমরা হইলে 'গান্ধীজির শিষ্য—সত্যগ্রহী, তোমরা তো আর নাস্তিক নও। তোমরাও যদি এই সকল বিষয় লইয়া ঠাট্টা-তামাসা করো তাহা হইলে সোস্যালিষ্টদের যাহা মনে আসে তাহা বলিলে দোষ দিব কি করিয়া?

সদাশিউ ও মেহেরচন্দ সারি সারি কক্ষল বিছাইয়া দিল। 'আমার সিট ঠিক ওয়ার্ডের মধ্যখানটীতে। ঘরে ঢুকিতে বাঁ দিকে থাকে মহাত্মাজীর ভক্তের দল অর্থাৎ কংগ্রেসের মেজরিটা পন্থীরা! ইহাদের ছাড়া সে দিকে আছে একজন কম্যুনিষ্ট, একজন কিষণ সভার সদস্য। এ দুই জনকে গভর্নমেন্ট কেন আটক করিয়া রাখিয়াছে, ইহারাই তাহা জানেনা। ইহারাতো অন্তরের সহিত বর্তমান যুদ্ধে গভর্নমেন্টের সহিত সহযোগিতা করিতে চায়। ঘরের ডান দিকটীতে থাকে সোস্যালিষ্ট ও কেরোয়ার্ড ব্লকের সদস্যরা। মধ্যে আমি বাফার—(Buffer)। জেল হইতে একরূপ ভাবে সিটের বন্দোবস্ত করিয়া দেয় নাই। নিজেদের সুবিধামতো অনেক দিনের সিট অদলবদলের ফলে, এইরূপ স্থিতি দাঁড়াইয়াছে। আমার সিটের কাছেই ওয়ার্ডে ঢুকিবার দরজা। দরজার সম্মুখে অনেকখানি স্থান একেবারে খালি। এটো স্থানটী একে রাস্তার উপর পড়ে, তাহাতে আবার ইহার ঠিক উপরে পায়রার বাসা। সেইজন্য এখানে কোন সিট নাই। এইখানেই কক্ষল পাতিয়া সকলে চরখা আনিয়া বসিল; রামচন্দর, বিষ্ণুদেও, হরিহর, রামদেনী, সদাসিউ, রামশরণ, ভূষণপ্রসাদ, রামলোচন, মেহেরচন্দ। অধিকাংশ নামের প্রথমেই দেখি রাম কথাটী। রামদেনী ছাড়া আর সকলেরই সম্মুখে যাববেদা চক্র। আর রামদেনী জেলে আসিয়া চরখা কাটা শিখিয়াছে, রেমিশনের লোভে। থানা রেড আর খাসমহল কাছারী জানানো, এই দুই অপরাধে বেচারার বারো বৎসর সাজা হইয়াছে। জেল হইতে সে চরখা কাটার কাজ পাইয়াছে। সেইজন্য তাহার সম্মুখে জেলের দেওয়াল প্রকাণ্ড

“বিহার চরখা”—দুই জন লোকের জায়গা জুড়িয়া আছে। রামদেনো বেদিন প্রথম সুপারীণ্টেণ্ডেন্টকে বলে যে, সে জেলের কাজ করিতে রাজী আছে, তাহাকে কাজ দেওয়া হউক, সে দিন সকলে উহাকে এক-ঘরে করিবার কথা তুলিয়াছিল। রাজবন্দী আবার কাজ করিবে কি? কিছু দিন হইতে দেখিতেছি যে আবার সকলে উহার সহিত কথাবার্তা বলা আরম্ভ করিয়াছে। উহার চরখা আনিয়া বসিতেই, ডান দিকের একটা সিট হইতে চরখার শব্দের নকল করিয়া একজন মুখ দিয়া শব্দ করিতে আরম্ভ করিল—আর দুই তিন জন হাসিয়া উঠিল। সুখলাল না হইলে আর কে হইবে? না সুখলাল নয়, কমরেড সুখলাল ছাই, মনেও থাকে না। বেশ নকল করিতে ও ক্যারিকেচার দেখাইতে পারে ছোকরাটা।

দুইটা লণ্ঠনে এতগুলি লোকের সূতা কাটার মতো আলো কি হয়? কিন্তু আর আলো পাওয়া বাইবে কোথা হইতে? যুদ্ধের জন্তু কেরসিন তেলের পরিমাণ কমাইয়া দিয়াছে। মাথা পিছু তেল দেয় বোধহয় সিকি ছটাক। সেই জন্তু জনকয়েকে মিলিয়া এক একটা লণ্ঠন জ্বলাইতে হয়। ওয়ার্ডের বাহিরে ইলেক্ট্রিক আলো জ্বলিতেছে। ওয়ার্ডের ভিতরে কয়েকটা আলোর ব্যবস্থা করিয়া দিলে কি হয়? গভর্নমেন্ট কি ভাবে বুঝি না। উহাদের ভয়, যে ইলেক্ট্রিক আলো দিলেই কয়েদীদের আত্মহত্যা করার সুবিধা হইবে। সকলেই যেন আত্মহত্যা করিবার জন্ত উদ্গ্রীব হইয়া রহিয়াছে। এই জন্তুই জেলের যত পুরাতন ইঁদারা আছে, সবগুলি কাঠের তক্তা দিয়া মজবুত করিয়া ছাওয়া হইয়াছে। নজীরের অভাব নাই; কবে কোন আসামী ইঁদারার মধ্যে লাফাইয়া পড়িয়াছিল। এইত সেদিন কয়েকজনের ব্যাসিলারী ডিসেন্ট্রী হইবার পর, আমি ডাক্তারকে বলিয়াছিলাম যে, আমাদের ওয়ার্ডে এক বোতল ইলেক্ট্রোলিটিক ক্লোরিন দিলে, পানীয় জলে সকলে যাহাতে উহা নিয়মিত ব্যবহার করে, তাহার ব্যবস্থা আমি করিতে পারি। ডাক্তারবাবু হাতজোড় করিয়া আমাকে বলিলেন “না প করবেন মশাই, অমন অনুরোধ করবেন না। আর পেন্সন নেওয়ার মাত্র তিন বৎসর দেবী আছে। এরই মধ্যে দুইবার ডিপার্টমেন্টাল এক্সমন্ হইবে। একবার একজন একশিশি মালিশের ঔষধ খেয়েছিল; আর

একজন ফিনাইল খেয়েছিল। আমার উপর এক্সপ্লেনেশন চাওয়া হ'ল কিনা, এতটা ফিনাইল একসঙ্গে কোন কয়েদী পার কি ক'রে। যেন সাফাইয়া' (মেথর) কয়েদীর কাছ থেকে আর কেউ ফিনাইল নিতে পারে না। এ ডিপার্টমেন্টের কি আর কিছু মা বাপ আছে মশাই?"...

একসঙ্গে অনেকগুলি চরখার নানারকন শব্দ শুনতে ভারি ভাল লাগে। অনেক উচু দিয়া যেন এরোপ্লেন উড়িয়া চলিয়া যাইতেছে। মনে পড়াইয়া দেয় যে সোনার ভারত গড়িয়া তুলিবাব পথে আমি একলা পথিক নই। ইহাতো কেবল এত গজ এত হাত সূতা কাটা মাত্র নয়। এখন যে চরখায় প্রাণ প্রতিষ্ঠা করা হইয়াছে। ইহা যে রাম রাজ্য ফিরাইয়া আনিবার একমাত্র অস্ত্র। হইবে প্রেমের রাজ্য, গৌরাজের রাজ্য; লোকে হিংসা ঘেঁষ ভুলিবে। পরিশ্রম করো; সুখে খাও দাও থাকো, কাহারও অভাব নাই। প্রত্যেকের গোরালে গজ, মরাইয়ে ধান। যত গজ সূতা কাটবে, ততটা লক্ষ্যের নিকট পৌঁছাবে। একজন আর একজনকে সাহায্য করিতেছে, ধনী দরিদ্রকে নিজের বিত্ত বিলাইয়া দিতেছে। গ্রামগুলি আর নিজের প্রয়োজনের জন্ত বাহিরের দিকে তাকাইয়া নাই। দরিদ্রের শোষণের সব পথ বন্ধ। কাহারও মুখাপেক্ষীই নই তো শোষণ করিবে কেমন করিয়া।... 'সূত্রযন্ত্র' (২৭) মনে করাইয়া দেয় যে, আমার ধরণে তাহা হইলে আরও অনেকে ভাবে। দলে দলে রাজনৈতিক কর্মীরা আমাদের মত ছাড়িয়া চলিয়া যাইতেছে। বোঝো না বোঝো, মানো না মানো, সোম্যালিট হওরাও একটা ফ্যাশন হইয়া দাঁড়াইয়াছে। নিলু বিলুর কথাই ধরো না। এইতো ১৯৩০—৩২, সে কত চরখা কাটা, কত রকমের কথা! এমন ভাবে উহারা গড়িয়া উঠিয়াছিল যে, আমি কোনদিন ভাবি নাই যে ঐ উচ্চ আদর্শ উহারা কোন দিন ছাড়িতে পারিবে; যাহারা এখনও আমার মতাবলম্বী, তাহারা চলিয়া গেলে হয়তো আমারই নিজের মনে সন্দেহ হইবে যে, আমার পথ ঠিক তো? নিজের দেশের বেদ পুরাণ, মুনি ঋষি, ইতিহাস সব গেল—সকলের নজর রুশের উপর। আরে, রুশ কি নিজের দেশের চাইতেও উঁচুতে? দেশ বিদেশের ইতিহাসের

কথা .আমরাও পড়িয়াছিলাম। ম্যাজিনি, গ্যারিবল্ডী, ওয়াশিংটন, কোম্বুথের অমর কাহিনী আমাদেরও রোমাঞ্চ আনিয়া দিত। তাঁহাদের কীর্তির প্রেরণাইতো আমাদের ছাত্রাবস্থায় অনুপ্রাণিত করিয়াছিল! কিন্তু তাই বলিয়া আমরা শিবাজীর গৌরব কথা ভুলিয়া যাই নাই। বিবেকানন্দের বাণী ছাড়িয়া মার্কসের বুলীর ফাঁদে পড়ি নাই। মহাত্মাজী অপেক্ষা ষ্ট্যালিনকে বড় বলিয়া মনে করিতে পারি নাই। বিদেশী মনীষীদের লেখা পড়িবে না কেন, পড়ো। আমরাও কি বেনথাম, স্পেন্সার, মিল পড়ি নাই? কিন্তু তাই বলিয়া নিজেদের কথা একেবারে ভুলিয়া যাইতে হইবে? বিলু যখন প্রথম কংগ্রেস সোস্যালিষ্ট পার্টিতে যোগদান করে, তখনই যদি উহাকে বুঝাইবার চেষ্টা করিতাম, তাহা হইলে হয়তো আজ আর এরূপ ঘটত না। আর বিলুকে শাসন করিতে পারিলে নিলুও হাত হইতে বাহির হইয়া যাইতে পারিত না। কান টানিলে মাথা আসে। দাদা যাহা করিবে তাহার তো সকল জিনিষ নকল করা চাই, তাহা ভালই হউক আর মন্দই হউক—সে বুঝুক আর নাই বুঝুক। কিন্তু গায়ের জোরে কি কাহাকেও কোন মতের মধ্যে ধরিয়া রাখা যায়—আর বিশেষ করিয়া যাহারা নেহাৎ বুদ্ধিহীন নয়। বিলু হইল বয়স্হু ছেলে—আর তাহাকে করিতে যাইব শাসন? আর কি বলি? না, আমার মতের সহিত তাহার মত মিলে নাই বলিয়া? তাহার ব্যক্তিত্বের এতটুকু মর্যাদা, তাহার স্বাধীন চিন্তার এতটুকু সম্মান যদি আমি না রাখিতে পারি তাহা হইলে আমাদের পথের সংঘন ও সহনশীলতা রহিল কোথায়? উহারা তো নির্বোধ নয়। আমি যে সকল কথা উহাদের বুঝাইতে পারিতাম, তাহা কি উহারা নিজেরাই বিচার করিয়া দেখে নাই? উহারা যে আমার মতের আবহাওয়ায় রাজনৈতিক আশ্রমে মানুষ। উহারা যে এবিষয়ের সূক্ষ্মাতিসূক্ষ্ম ভেদাভেদও জানে! এসব বিষয়ের কত আলোচনা, কত সময় কত স্থানে শুনিয়াছে। বিলুতো তিন মাস সবরমতী আশ্রমেও ছিল। মহাত্মাজীর পায়ের ধূলা লইবার সুযোগ নিলু বিলু দুইজনেরই হইয়াছে। উহারা পূর্ণিমা আশ্রমে মহাত্মাজীর সহিত ফটোও তুলিয়াছিল। হউক অল্পদিনের, তবুও এমন মহাত্মার সংস্পর্শ আসিয়াও

কাহার প্রভাব বাহাদের উপর খাটল না—সেখানে আমার কিছু করিতে যাওয়া ধুটতা। আর, আমি যখন সরকারী স্কুলের হেডমাষ্টারীর চাকুরী ছাড়িয়া রাজনীতিক্ষেত্রে আসি তখন কি কাহারও কথা শুনিয়াছিলাম। পৃথিবী শুদ্ধ লোক বারণ করিয়াছিল। ডি-পি-আই আমার পদত্যাগের দরখাস্ত চাপিয়া রাখিয়া আমাকে ডাকিয়া পাঠাইয়াছিলেন, বুঝাইবার জন্য। পাটনায় সেই সাহেবের কুঠিতে সাহেবের সহিত দেখা করিতে গিয়াছি, দেখিলাম সাহেবের বেহারাটা পর্যন্ত আমার পদত্যাগের কথা জানে। অন্তর দেখা করিবার কার্ড দিবার সময়, বেহারাকে খোসামোদ করিতে হইত, বখশীস্ দিতে হইত। আরদালীটা দেখাইত কেমন একটা নির্লিপ্ত ভাব। আর এখন দেখিলাম, গড় হইয়া পায়ের ধূলা লইল। “মাষ্টার সাহাব শুনতে হে স্বরাজীমে শরীক হয়ে হেঁ।” আমাকে প্রণাম করিতে পারিয়া, আমার কোন কাজ করিয়া দিতে পারিতেছে বলিয়া কৃতজ্ঞতার তাহার মুখ গদগদ হইয়া উঠিয়াছে। বলিয়াই ফেলিল “আমারও মনের ইচ্ছা স্বরাজীমে যাইয়া আপনাদের কুছ সেবা করে। ছেনেটা আগামী বৎসর ‘মিডল ইন্সিহান’ (২৮) দিবে। তাহার পর সাহেবকে বলিয়া উহার একটা চাকরি করিয়া দিব। তারপর আমিও ‘স্বরাজীমে’ যাইব।” ডি-পি-আই এর নেকনজরে আমি ছিলাম। বি-টি পড়িবার সময়, তিনি ছিলেন আমাদের কলেজের প্রিন্সিপাল। সাহেব হাত ধরিয়া বসাইলেন, গুরু শিষ্যের সুবেই কথাবার্তা হইল,—উপরওয়ালার, আর অধস্তন কর্মচারীর মধ্যে যেরূপ হওয়া উচিত সেরূপ নয়। আসিবার সময়ও সাহেব বলিলেন “সাত্তাল, ভুল করিতেছ। আবার ভাবিয়া দেখিও। তখন বলিয়া আসিয়াছিলাম “এতকাল ভুল করিয়া আসিতেছিলাম, আর করিব না!”পাড়ার বৃদ্ধ মিত্রের মশাই কালী বাড়ীর পিছনের ইটের পাজার কাছে লইয়া গিয়া, খুব দরদের সহিত আমাকে বুঝাইয়াছিলেন, “কেন ওসব ব্যাপারে পড়িতেছ। বিয়ে থা করিয়াছ। স্ত্রী পুত্র পরিবার আছে। একেবারে আগে পিছে না ভাবিয়া ঝাঁপাইয়া পড়া কি ভাল? ভারতবর্ষের অন্য সব জায়গায় যদি স্বরাজ হয়, তাহা হইলে

পুণিয়াতেও হইবে। এ জায়গাটুকু বাদ দিয়াতো আর স্বরাজ হইবে না!” বত লোক কত রকম প্রতিক্রিয়া করিয়াছিল। কাহারও কথায় কি আমি কান দিয়াছিলাম। এপথে আসিবার পূর্বে কি কাহারও সহিত পরামর্শ করিয়াছিলাম? জিজ্ঞাসা করিবার মধ্যে একমাত্র জিজ্ঞাসা করিয়াছিলাম বিনুর মাঝে। তাও ঠিক জিজ্ঞাসা নয়। নিজের গল্প স্থির করিবার পর, একরকম জানানো। সে কি ভাবিয়াছিল তাহা জানি না; কিন্তু কেবল বলিয়াছিল “তুমি যা ভাল বোঝো তাই ক’রো। মেয়ে মানুষের আবার মতামত।” আমি কাহারও মত লইয়া চলি নাই। যাহা ভাল বুঝিয়াছি তাহাই করিয়াছি। আর বিনুরা আমার মতামত লইয়া চলিবে কেন?.....

একটা চরখা হইতে গরুর গাড়ীর চাকার শব্দের মতো ক্যাচ ক্যাচ শব্দ হইতেছে। এই শব্দের অন্তহীন পুনরাবৃত্তি, কানে বড়ই কর্কশ লাগিতেছে। সিমেন্টের মেঝের উপর দিয়া একটা ধাতু নিশ্চিত বাসন টানিয়া লইয়া গেলে, এইরূপই অসহ্য মনে হয়। নরম ঘা’র উপর দিয়া কেহ যেন শিরীষ কাগজ ঘসিতেছে। জেলে আসিবার পূর্বে আমার এই স্বাভাবিক দৌর্ভাগ্য লক্ষ্য করি নাই। আমার সুস্থ স্নায়ুগুণী অল্পতে বিচলিত হয় না, ঠিকই ছিল আমার গর্ভ। এবার জেলে আসিয়া একি হইল? নিশ্চয়ই রামদেনীর চরখা হইতে এই শব্দ আসিতেছে। আমার হাতের সূতা হইতে চক্ষু ফিরাইয়া রামদেনীর চরখার দিকে তাকাই। রামদেনীর সঙ্গে চোখোচোখী হইয়া গেল। রামদেনী একটু অপ্রস্তুতের দৃষ্টিতে তাকাইতেছে—দোষটা যেন তাহারই। রামদেনী চরখা ছাড়িয়া উঠিয়া পড়িল। নিজের সিনেটের দিকে দৌড়িয়া যাইতেছে। সকলেই উহার দিকে তাকাইয়া আছে; নোধহয় ভাবিতেছে, একি শিষ্টাচারের অভাব! “সামূহিক চরখার” (২৯) ভিতর হইতে উঠিয়া যাওয়া! রামদেনী ফিরিল, হাতে তেলের শিলা। চরখায় ফোঁটা ফোঁটা করিয়া তেল ঢালিয়া দিল। তাহার পর আবার সূতা কাটা আরম্ভ করিল। সকলেই দেখিতেছি সূতা কাটিতেছে আর আমার দিকে তাকাইয়া মধ্যে মধ্যে কি দেখিতেছে, অুমার চেহারায় কিছু

পরিবর্তন দেখিতে পাইতেছে কি? আজ কিছুদিন হইতে আমার মনের মধ্যে যে দ্বন্দ্ব—যে সংশয় চলিতেছে, তাহার ছাপ কি ইহারা আমার চোখে মুখে দেখিতে পাইয়াছে? মনের ভাব কি চাপা যায়? গরমের মধ্যে উপোষ করিয়া হয়তো আমাকে শুকনো শুকনো দেখাইতেছে। না, উপোষ তো কতদিন হইতে প্রতি সোমবারে করিয়া আসিতেছি, উপোষের জন্ত কিছু হয় নাই। ইহাদের সমবেদনার মূল্য কি দিতে পারি? আমি যাহাতে অত্যন্ত কিছুক্ষণের জন্তও মনের অশান্তি ভুলিতে পারি সেই জন্তই ইহারা একসঙ্গে চরখা কাটিতে বসিয়াছে। সকলে মিলিয়া আমার বোঝার ভার লইয়া, আমার মন হাক্কা করিতে চায়।.....

.....মাথাভরা কৌকড়া চুল, ফুটফুটে রং, একটু মেয়েলি মেয়েলি লম্বা ধরণের মুখ, চিবুকটা সরু, কালো চোখের গভীর দৃষ্টি ভাবুকতার ভরা। আমি বিলুর দিকে তাকাইলেই সে চোখ নামাইয়া লয়। কিন্তু ঐ চোখ হইতেও বাজের বহিঃশিখা বাহির হইতে দেখিয়াছি।.....আমার চাকরি ছাড়িবার কিছুদিন আগের কথা। হাইস্কুলের পাশেই প্ল্যান্টারস ক্লাব। ছুই কম্পাউণ্ডের মধ্যে একটি তারের বেড়া। ক্লাবে একটি চ্যারিটী বেল না কি হইতেছে। মেয়েরা নানা প্রকার সৌখীন জিনিষের দোকান খুলিয়াছে। নিলু আর বিলু এ তারের উপর চড়িয়া, সাহেব মেমদের উৎসব দেখিতেছে। নিলু তখন খুবই ছোট; বিলু মধ্যের তারটির উপর নিলুকে দাঁড় করাইয়া ধরিয়া আছে। কাঝাকুঠীর পেরিন সাহেব হঠাৎ দেখি আমার কোয়ার্টারের গেটের ভিতর আসিয়া ঢুকিল হাতে ছড়ি, উন্নত দৃষ্টি। আমাকে বলিল—ক্লাবে 'লেডিজ' ষ্টল খুলিয়াছেন। কম্পাউণ্ডের তারের উপর দিয়া, ছেলেরা চব্বিশঘণ্টা হাঁ করিয়া কি দেখে? 'ইউ সি হেডনাটার' এ যদি তুমি বন্ধ না করিতে পার, তাহা হইলে আমরা নিজেরাই দেগিব, ঠিক করিয়া এই অসভ্যতা বন্ধ করিতে হয়। তারের বেড়ার উপর উপবিষ্ট, নিলু বিলুর দিকে, সাহেব ছড়ি দিয়া দেখাইয়া,—বেমন অশিষ্ট বলদৃশ্যভঙ্গীতে আসিয়াছিল, তেমনি ভাবেই চলিয়া গেল। আমি বিলুকে ডাকিয়া বলিলাম—খবরদার, ওদিকে বেওনা। যে বিলু আমার মুখের দিকে তাকাইতে পারে না, তাহার চোখে সেদিন

দেখিয়াছিলাম সুশ্রু পৌরুষের ব্যঞ্জনা। আমার দিকে তাকাইল, যেন চোখ দুইটি হইতে আগুনের ফুলকী ছিটকাইয়া পড়িল। “কেন, ওখানে গেল কি হয়েছে?” আমাকে জিজ্ঞাসা করা “কেন?” আমার কথার উপর কথা? কান ধরিয়া টানিতে টানিতে উহাকে বাড়ীর ভিতর লইয়া গেলাম। উহার মা তখন রান্না ঘরে। “আঁখো তোমার গুণধর ছেলের কাণ্ড! সাহেব সুবোর সঙ্গে ঝগড়া করে কি চাকরি থাকে?” পরে আমি আমার ঘরের বারান্দা হইতে শুনিলাম, মা’র সহিত বিলু তর্ক করিতেছে “কেন? আমাদের জমি থেকে সাহেব মেমের মেলা দেখছিলাম, তাতে হয়েছে কি?”.....সে রাত্রে বিলু খার নাই, রাগে কি অভিমানে জানি না। অর্ধেক রাত্রে বিলুর মা আমাকে ডাকিয়া জাগাইল। বিলুতো বিছানায় নাই। বিলু কোথায় গেল? খোঁজ্ খোঁজ্! চাকর বাকর, শুলের দরওয়ান, আমি সকলে লাঠি লঠন লইয়া বাহির হইলাম। বিলুর মা হাউ হাউ করিয়া কাঁদিতেছে, আর আমাকে দোষ দিতেছে যে ঐ একরত্তি ছেলে মেমদের মেলা দেখিয়াছে, ইহার মধ্যে মেমদের অপমান হইল কোথা হইতে? কোথাও বিলুকে পাওয়া যায় না। শেষকালে একজন বোডিংএর ছেলে বিলুকে খুঁজিয়া বাহির করিল।—দিনের বেলা যেখান হইতে নিলু আর বিলু মেমদের খেলা দেখিতেছিল, ঠিক সেইখানে তারের বেড়ার উপর বিলু বসিয়া আছে। মেলার আলো কখন নিবিয়া গিয়াছে। বিলু কিন্তু আমার ভৎসনার অনাব্যতা প্রমাণ করিবার জন্য, তাহার নিজের অকাটা যুক্তির সহিত কাজের সঙ্গতি রাখিবাব জন্য এই অন্ধকার শীতের রাত্রে একলা এখানে আসিয়া বসিয়া আছে। গায়ে একখানি কচিকলাপাতা রংএর আলোয়ান ছাড়া, আর কিছু নাই। খালি পা, হাত পা বরফের মতো ঠাণ্ডা হইয়া গিয়াছে।

জোর করিয়া বিলুকে দিয়া কেহ কিছু করাইয়া লইবে তাহা হইতে পারে না। উহাকে ঠকাইয়া, খোসামোদ করিয়া, বা উহার কোমল হৃদয়ের সুবিধা লইয়া উহাকে দিয়া লোক যে-কোন কাজ করাইয়া লইতে পারে। কিন্তু গায়ের জোর দেখাও বিলু রাখিয়া দাঁড়াইবে। মুহূর্তের মধ্যে উহার স্বাভাবিক নমনীয়তা

কোথায় চলিয়া বাস। উহার বাল্যকাল হইতেই ইহা লক্ষ্য করিয়াছি।……বহুর কুড়িক আগের কথা হইবে। বিনুর মার চীৎকার শুনিয়া, জেলা কংগ্রেস অফিসের ঘর হইতে উঠিয়া, আমার কুটারের দিকে চলিলাম। শুনিলাম বিনুর মা চীৎকার করিয়া বলিতেছেন, “বল্ শীগ্‌গির—এখনও বল্। তুই নিশ্চয়ই মুসলমানের খুতু খেয়েছিস। আবার না বলছিস ?” বাড়ী ঢুকিয়া দেখি বিনুর মা খুন্তী দিয়া নিলুকে মারিবার ভয় দেখাইতেছেন। আর এক হাতে একটি নলভাঙ্গা চুনাবের টিপটুট—তাহার ভিতর সূজী থাকে। রাগের জ্বালায় টিপটু নীচে রাখিয়া দিতে ভুলিয়া গিয়াছেন। সম্পূর্ণ ব্যাপারটা শুনিলাম। বিনু গিয়াছিল বেহবুদ মোক্তারের বাগানে কুল খাইতে। সেখানে বেহবুদ মোক্তারের জামাই উহাদের ধরে। দুইজনকে একখানি কুলের পাতার উপর খুতু ফেলিতে বলে, আর হুকুম দেয় যে উহা চাটিয়া ফেলিয়া বলিতে হইবে যে আর কখনও কুল পাড়িতে আসিবনা। ইহা না করিলে মারিবার ও মাষ্টার সাহেবকে বলিয়া দিবার ভয় দেখায়। বিনু ভয়ে ভয়ে খুতু খাইয়াছে—বিনু রাজি হয় নাই। কি সব যেন বলিয়াছে। তাহার পর—বেহবুদ মোক্তারের জামাই উহাদের ছাড়িয়া দেয়। এখন বেহবুদ মিয়ার মেয়ে আসিয়া বিনুর মার কাছে নাগিশ করিয়াছে, যে বিনুরা তাহার স্বামীকে অপমান করিয়াছে। ইহাতেই সব কথা ফাঁস হইয়া গিয়াছে। বিনুর মা এখনও আসল প্রশ্নে অর্গাৎ কুলচুরী ও অপমান করার প্রশ্নে হাত দেন নাই। এখন তাঁহার নিকট যেটা মুখ্য বিষয় তাহারই উপর জেরা চলিতেছে—বিনু যে খুতুটুকু খাইয়াছে, তাহা সত্যই বিনুর না বেহবুদ মোক্তারের জামাইয়ের।……

চমকিয়া উঠিয়াছি। হো! হো! হো!—সমস্ত ঘরটা কম্পিত করিয়া এতগুলি চরখার সম্মিলিত বর্ধরধ্বনিতে ডুবাইয়া দিয়া হাসির রোল উঠিল। আমার ডান দিকের দুইটা সিটের পরে, জানালার পর্দা ও বিছানার চাদর দিয়া ঘিরিয়া একটি ঘরের মতো খাড়া করা হইয়াছে। ইহারই ভিতর হয় সোশ্যালিষ্ট পার্টির “ক্যাপিটাল” ক্লাস। ফরওয়ার্ড ব্লকের চারজন এ ক্লাসে যোগদান করে

না; তাহারা দিনের বেলায় একত্র বসিয়া কি কতকগুলি মার্শ্বিষ্ট বই পড়ে। ‘ক্যাপিটাল’ পড়িতেছে তাহার মধ্যে আবার এত হাসি কিসের? এই গরমের মধ্যে আবার চারিদিকে পর্দা টাঙ্গাইয়া বসিবার দরকার কি? আজকালকার ছেলেদের সবই অদ্ভুত। পর্দাগুলির উপর দিয়া রানী রানী কুণ্ডলীকৃত ধোঁয়া উঠিতেছে। উহারা সিগারেট খাইবার সুবিধার জন্য ঐরূপ পর্দা ফেলেনাতো? না, সে দিন-কাল কি আর আছে? সিগারেট চুরুট খাইবার জন্য উহাদের আর কোন আড়াল দরকার হয় না। ওদের দলের কমরেড বাণারসী—বিলুর চাইতে কত ছোট, বিলুরই ছাত্র—আমারই সঙ্গে বিলুর সম্বন্ধে আসিয়া গল্প করে,— মুখের কোণে একটা সিগারেট। সকলে জেল অফিসের পার্সনাল একাউন্ট হইতে টাকা ধার করে, আবার ওঁদিকে।.....

“কিৎনে আদমী হৈঁ আপলোগ”?

তাহা হইলে এগারটা বাজিয়া গিয়াছে। নূতন ওয়ার্ডার আসিয়াছে। ধেরা পর্দার মধ্য হইতে একজন ওয়ার্ডারকে লক্ষ্য করিয়া বলিল “যাও চিল্লাও মাৎ”। (৩১) আর একজন বলিয়া উঠিল এ ওয়ার্ডে আসামী সাড়ে সাতজন। ওয়ার্ডার রাগে গজ্ গজ্ করিতে করিতে চলিয়া যায়। বলিতে বলিতে যায় “পাঁউকুটা আর মুরগীর আঙা খায়—এঁরা আবার ‘মহাত্মাজীর’ কাজ করতে জেলে এসেছেন।”

পর্দার ভিতর হইতে একজন বলিয়া উঠে “বৈজনাথ, শীগ্গির ওঠ। দেতো রাফেলটার গায়ে কুঁজোর জল ঢেল।”

সকলে হৈ হৈ করিয়া উঠে। কমরেড বৈজনাথ একটা গ্লাস লইয়া পর্দার বাহিরে আসে। রোগা, শুখনো, দড়ি পাকানো পাকানো শরীর। পায়ে জামা পরিহিত। গায়ে পাঞ্জাবী; পাঞ্জাবীর কলারটা উঁচু। সোশ্যালিষ্টদের সকলেই দেখি, “কাপড়া গুদাম”এর কয়েদী-দর্জিকে বিড়ি দিয়া, এইরূপ জামা তৈয়ারী করাইয়াছে। এত গরমেও ইহারা খালি গা করিবে না। এঁরাই আবার পৃথিবীতে সর্ব্বহারার রাজ্য আনিবেন।

এগারটা বাজিয়াছে। সকলে চরখা কাটা শেষ করিল। মাকু, পাঁজ, সব ঠিক ঠাক্ করিয়া উঠিবার জন্য তৈয়ারী হইতেছে। একসঙ্গে দুই ঘণ্টার বেশী চরখা কাটিতে কি সকলে পারে। ব্যক্তিগত সত্যাগ্রহের সময় হাজারীবাগ জেলে গান্ধী-ঈশ্বরীর দিন, একসঙ্গে আট ঘণ্টা সূতা কাটিবার পর আমার কিডনীর গোলমাল হয়! সেই হইতে আর একবারে বেশী সূতা কাটি না। হয়তো অসুখ করিয়াছিল অন্য কারণে, কিন্তু জেল ডাক্তারের মত হইল যে একসঙ্গে অত্যধিক এক অবস্থায় বসিয়া, কিডনীর গোলমাল হইয়াছে। ডাক্তারের মতের উপর তো আর কথা বলা চলে না। সকলে নিজের নিজের গিটে চলিয়া গেল। সদাশিউ ও মেহেরচন্দ দাঁড়াইয়া আছে।

মেহেরচন্দ বলে "মাষ্টার সাহেব, একটু কিছু খান। সারাদিন পিছু পড়িয়াছে। আপনার খাবার ঐ টেবিলের উপর রাখিয়া দিয়াছে। দুখানি রুটী খান।"

একটা কাগজে লিখিয়া দিলাম যে, এই গরমে আর খাইতে ইচ্ছা করিতেছে না।

মেহেরচন্দ বলে—“একটু দই এনে দিই। আমার বাড়ীর থেকে আজ দই দিয়া গিয়াছে। নিজের বাড়ীর গরুর দুধের দই। তাহা না হইলে আপনাকে বলিতাম না। আপনি গান্ধী সেবাসভ্যের মেম্বর ছিলেন। বোম্বের দুধ বি খান না। তাহা আর কে না জানে। জেলে তো এই জন্য দুধ বি আপনার খাওয়াই হয় না। যদি বা দৈবক্রমে আমার বাড়ী হইতে আসিয়া গিয়াছে, তাহাও যদি আপনি না খান তাহা হইলে বড়ই দুঃখিত হইব।”

মেহেরচন্দ নাটকীয় ভঙ্গীতে হাতজোড় করিয়া দাঁড়াইয়া রহিয়াছে—“এ অনুরোধটা আমার রাখতেই হবে মাষ্টার সাহেব। আমার ‘ফাদার’ সঙ্গে ক’রে নিয়ে এসেছিলেন দইটুকু”……আবার ফাদার বুলিয়াছে। বিহারে যে অন্ন ইংরাজীও শিখিয়াছে, সেও মা, বাবা, বোন এই শব্দগুলি নিজের ভাষায় বলিবে না। কাহারও শুনিবে সিষ্টার কি সাদী হইবে। কেহ মাথা নেড়া করিয়াছে, কারণ জিজ্ঞাসা করো, বলিবে, মাদার কী ডেথ হো গয়ী। কথার মধ্যে ইহার

যে বেশী ইংরাজী শব্দ ব্যবহার করে তাহা নয়। তবে বাবুজী, মা, বহিন্ এই শব্দগুলি নিজের ভাষায় বলিতে কেমন যেন সঙ্কোচ বোধ করে।.....

“ফাদার বারবার আমাকে বলিয়া গিয়াছেন যে, মাষ্টার সাহেব যেন দই খাইয়া দেখেন। একেবারে যুঁটের আগুনে জাল দেওয়া দুধের ফাষ্ট কিলাস দই।”

এমন করিয়া অনুরোধ করিতেছে; না বলিবারও উপায় নাই। একটু না খাইলে ইহারা বড়ই দুঃখিত হইবে। ইঙ্গিতে উহাদের স্বীকৃতি জানাই। এমন নাছোড়বান্দা ইহারা। সম্মতি না দিলে একঘণ্টা ধরিয়া আমার কান ঝালাপালা করিত। উহাকে তো আমি জানি। মেহেরচন্দ ও সদাশিউ, দুই জনের চোখে চোখে একটা ইঙ্গিত খেলিয়া গেল। ও, তাহা হইলে সদাশিউই মেহেরচন্দকে আমার পিছনে লাগাইয়াছিল। নিজে সাহস পায় নাই। বোধ হয়, বলিয়া গিয়াছিল যে যতক্ষণ না রাজী হ'ন ছাড়িওনা। মেহেরচন্দ গুছাইয়া চরখার বাক্সটি বন্ধ করিল ও উঠাইয়া রাখিল। তাহার পর কম্বলগুলি এককোণে জড় করিয়া রাখিয়া দিল। ঘরের মধ্যে যেখানে জলের ড্রামটি থাকে সেখানে আমার গামছা ও মগ রাখিয়া আসিল এবং খাটের তলা হইতে খড়মজোড়া বাহির করিয়া সম্মুখে দিল। আমার নিজের ছেলেদের নিকট হইতে এত সেবা ও যত্ন কোন দিন পাই নাই। কোন দিন চাহিয়াছি বলিয়াও মনে পড়ে না। চাকরি ছাড়িবার আগে, ছুটিছাটার দিনে, নিলু-বিলুকে রৌদ্রে খেলা না করিতে দিবার উদ্দেশ্যে, হয়তো পাকা চুল তুলিয়া দিতে বলিয়াছি।

আর, ১৯২১ এর পর হইতে তো ইচ্ছা করিয়াই কাহারও নিকট হইতে কোন প্রকার সেবা লই নাই। বিনুর মার ইহা লইয়া কত কান্নাকাটি, কত অভিযোগ! নূতন খড়মজোড়া চার-পাঁচ মাস আগে রামচরিত্তরজী আমাকে প্রেজেন্ট করেন। তাঁহাকে “না” বলিতে পারি নাই। বেশ পছন্দও হইয়াছিল। পরে শুনিলাম বিষ্ণুদেওজী রামচরিত্তরজীকে বলিতেছেন, “বেলটিং কা চামড়া কিৎনেমে জোগাড় কিয়া”। রামচরিত্তরজী উত্তর দেন “চামড়া চার বিড়ীমে, আওর লকড়ী ছে

বিড়ীমে”। বিষ্ণুদেওজী অবাক হইয়া বলে “এত আক্রা। দশ বিড়ীতে তৌ জেলে ‘বিটা’ কখন (৩২) পাওয়া যায়। আপনারা বাজার খারাপ করিয়া দিতেছেন।”—তাই বলি। এমন চণ্ডা, সুন্দর নূতন ধরণের ব্যাণ্ড,—উহা জেল ফ্যাক্টরীর কখনের কলের বেল্টিং! অভদ্রতা হইবে বলিয়া খড়ম জোড়া ফিরৎ দিই নাই। কিন্তু খড়ম জোড়া আজ পর্যন্ত ব্যবহারও করি নাই। রাখিয়া দিয়াছিলাম খাটের তলায়। সদাশিউ আবার টানিয়া বাহির করিল। এমন সংসর্গে আসিয়া পড়িয়াছি যে ইহার মধ্যে নিজের নাতি ও সিক্কাত বজায় রাখিয়া চলাও শক্ত। খড়ম জোড়াকে ঠেলিয়া আবার খাটের নীচে রাখিয়া দিই। ড্রামের নিকট গিয়া মুখ তাত ধুই, সদাশিউ হাতে গামছা দেয়। ড্রামের পাশের সিট দাসজীর। তাহার নাক ডাকিতেছে। প্রতিবার নিঃশ্বাস ফেলিবার সময় মুখের ভিতর দিয়া গাওয়া বাহির হইতেছে। ইহাতে ঠোট দুইটা কম্পিত হইয়া উঠিতেছে ফর্-র্-র্-র্—বোড়া বাস খাইবার সময় মধ্যে মধ্যে একটা শব্দ করে। ভদ্রলোকটী ঠিক সন্ধ্যাবেলায় শোন—আর শৌওয়া মাত্র ঘুমাইয়া পড়েন। আর ওঠেন রাত দুইটার সময়। এই গরমের মধ্যেও সন্ধ্যা আটটার ঘুমার কি করিয়া? স্বাভাবিক মহাভারতে ইচ্ছামৃত্যুর কথাই পাওয়া যায়। কিন্তু ইচ্ছানিদ্রা—ইহাও কম সাধনার ফল নয়। সন্ধ্যার পর ঘরে প্রার্থনা হয়, কত ট্যাচানিচি হট্টগোল হয়, ইহাতে তাহার নিদ্রার কিছুমাত্র ব্যাঘাত হয় না।

আমার চৌকীর পাশে মেহেরচন্দ দই দিয়া সরবৎ তৈয়ারী করিতেছে। আমাকে জিজ্ঞাসা করিল—“গুড় দিব, না ভূরা দিব? আমার কাছে একটু ভূরা আছে।” তাকে ইঙ্গিত করিয়া গুড়ই দিতে বলি। একঘণ্টা সরবৎ তৈয়ারী হইল। সদাশিউ কখন পাতিয়া দিল। তাহার সম্মুখের জায়গাটিতে জলের ছিটা দিয়া সেখানে বটা গ্লাস রাখিয়া দিল। আমি এলুমিনিয়ামের গ্লাসে এক গ্লাস সরবৎ ঢালিয়া লইলাম। দই দিয়াছে! সরবৎ তো নয়--পাতলা দই। স্কলের গ্লাসগুলিও শুকুত। জল খাইবার সময় গায়ে আর কাপড়ে নিশ্চয়ই জল পড়বে। মিষ্টিও দিয়াছে খুব।

মেহেরচন্দ গল্প করিয়া বলে—“সকালে ইন্টারভিউ ছিল। দই দুই হাঁড়ী আসিয়াছিল, আর এক হাঁড়ী “গঁদকা-লাড্ডু” (৩৩) অফিসের লোকদের খাইতে ইচ্ছা না কি কে জানে! জেলের প্রথমে জমাদারকে বলিলেন, কাঠি গুঁজিয়া হাঁড়ীর নীচে পর্য্যন্ত দেখ, দই ছাড়া আর কিছু আছে কিনা। তাহার পর রাখিয়া দাও, ডাক্তার সাহেব আসিলে পাশ হইবে। জেলের আমার উপর একরূপ চটিল কেন কে জানে। আর কাহারও বেলায় তো এমন করে না। আমি জমাদার সাহেবকে চারিটা গঁদের লাড্ডু দিয়া, চুপচাপ হাঁড়ীটা লইয়া চলিয়া আসিলাম।”

তাহার পর কি মনে হয়। আমাকে বলে—“চিনি দিয়া তৈয়ারী লাড্ডু কিনা, সেই জন্ত আপনাকে দিই নাই। আর এক গ্লাস দিই মাষ্টারসাহেব?” তাহাকে বারণ করি। এক গ্লাস খাওয়াই শক্ত, তাহার উপর আবার এক গ্লাস। মুখ হাত ধুইয়া আবার কন্বলের উপর আসিয়া বসি। মেহেরচন্দ গ্লাস দিয়া বটী বাজাইতেছে, আর চ্যাচাইতেছে “চলো, চলো-ও সব্বৎ পিনেবালো? বিষুদেওজী ছাড়া আর কেহই লইল না—চিনির সব্বৎ হয়তো কেহ কেহ লইত। বিষুদেওজী আধমের আটার রুটী খায়। বয়স কম; স্বাস্থ্য বেশ ভাল। কিন্তু তাই বলিয়া রাত দুপুরে খাওয়া-দাওয়ার পর, এক বটী দই খাইবে নাকি? এই ওয়ার্ডে গুড়ের সব্বৎ কেহ খাইতে চাহে না। আর বিনু? তৃতীয় শ্রেণীর কয়েদীরা একটু গুড়, একটা লক্ষা বা একটা পেঁয়াজ পাইলে কৃতার্থ হইয়া যায়। স্বার্ভির প্রতিশোধক হিসাবে তাহারা সপ্তাহে দুই দিন একটু একটু আচার খাইতে পায়। এই সোখীন খাদ্যদ্রব্যটি যে দিন থাকে, সেদিন যেন ভাত খাইয়া তাহাদের পেটই ভরে না। কেবল আচার দিয়াই সমস্ত ভাত খাওয়া হইয়া যায়! ডাল দিয়া খাইবার ভাত কোথায়? বহু কষ্টার্জিত ডালের লক্ষাটি বৃথাই নষ্ট হইয়া গেল বলিয়া মনে হয়।.....বিনুর দুই বেলাই ভাত খাওয়া অভ্যাস—এখানে তাহাও পায় কিনা কে জানে? জেলকোর্ড অফিসারের দুইবেলা ভাতের নাম বেঙ্গল ডায়েট। যে ইহা না পায়, তাহাকে সন্ধ্যার সময় দেয় দুই হস্ত পরিধি—রুটী নামক পদার্থ—দুইখানি করিয়া। এই অর্কসিক, দুপ্পাচ্য খাদ্যদ্রব্যটিকে

আরত্যাধীন করা ভীমভবানী বা গোবরের পক্ষে সম্ভব হইলেও হইতে পারে,—কিন্তু সাধারণ বাঙ্গালীর পক্ষে অসম্ভব।...মনে ইচ্ছা হয়, বিনু জানুক যে তাহারই কথা মনে করিয়া, এইবার জেলে ফলমূল হুধ, এ সকল জিনিষ খাইনা, মশারী ফেলিয়া শুই না। হয়ত বিনু এ খবর জানিতে পারিলে তাহার মনে একটু তৃপ্তি হইত। তাহার বাবা যে তাহার জন্ত একটুও ভাবে, একথা সে বুঝিতে পারিত। বিনুর যদি ফাঁসীর সাজা না হইত, তাহা হইলে হয়ত এতক্ষণ, এইরূপ একটা পর্দা ঘেরা ঘরের মধ্যে বসিয়া, দলের লোকদের ‘ক্যাপিটাল’ পড়াইত। বিনু এখানে থাকিলে, আর কমরেড লক্ষ্মী চতুর্বেদীকে এখন গুরুগিরি করিতে হইত না। মণিহারী ঘাটে, সেবার উহাদের দলের যে সামার-ট্রেনিং-ক্যাম্প খুলিয়াছিল, বিনুই তো তাহার অধ্যক্ষ ছিল। কমরেড বাণারসীও সেদিন চুরুট টানিতে টানিতে আমার নিকট বলিতেছিল “বিনুবাবুর মতো আমাদের দলে আর কেহ পড়াইতে পারে না। সেইজন্যই সেবার যখন শোনপুরে আমাদের প্রাদেশিক সামার-ক্যাম্প খোলে—সেখানেও বিনুর উপর ‘ডায়ালেক্টিকাল মেটোরিয়ালিজম, পড়াইবার ভার পড়িয়াছিল। ‘অপরচুনিটদের কথা ছাড়িয়া দিয়া যদি কেবল যথার্থ কর্মীদের কথা ধরা যায়, তবে আমাদের দলের ‘ইনটেলেকচুয়াল্‌স্’দের মধ্যে বিনুবাবুর স্থান খুব উচ্চ। অবশ্য বিনুবাবু মিলিট্যান্ট একটু কম। এইজন্য পাটির সর্বাপেক্ষা উচ্চ শিখরে উঠিতে পারে নাই।” কমরেড বাণারসী আরও কত কি বলিয়াছিল—সব মনে রাখাও শক্ত। কথা বলিবার সময় উহাদের এমন এমন শব্দ ব্যবহার করা অভ্যাস হইয়া গিয়াছে, যেগুলির আসল অর্থ, আমাদের কাছে একরূপ অজ্ঞাত। উহাদের সহিত গল্পের সময় ঠিক থই পাই না। সাধারণ চলতি ভাষায় কি কথাবার্তা বলা যায় না? উহারা বাড়াইতে কি এই ভাষাতেই কথা বলে? আমরাই উহাদের কথা অদ্ভিক বুঝি না—উহাদের মা-বোনেরা এসব কথার কি বুঝবে? সেই যে গল্প আছে না— একজন ইংরাজী পড়িতে আরম্ভ করিয়া ঠিক করিয়াছিল যে তাহার মার সঙ্গে ইংরাজী ছাড়া আর কিছুতে কথা বলিবে না। তারপর বেচাৰা অস্থখে পড়িয়া

অল-তেষ্টার মারা যায়—ওয়াটার কথাটা তাহার না বুঝিতে পারেন নাই। সেই রকমই হবে আর কি। বিনু তো তাদের দলের একজন নেতা। তাহার এরূপ ধরণের কথাবার্তা তো কোনদিন আমার কানে পৌছায় নাই। দলের মধ্যে কি সব বলিত তাহা জানি না; কিন্তু বাড়িতে তো তাহাকে অস্বাভাবিক সাম্যবাদী অভিধানের কোন শব্দ ব্যবহার করিতে শুনি নাই। উহাকে পারজামা আর কলার উঁচু পাঞ্জাবী পরিতেও কোনদিন দেখি নাই। তামাকের গন্ধও উহার গা হইতে কোনদিন পাই নাই। তোমাদের ভাষার ‘মিলিট্যান্ট’ কথাই নানে হয়ত আমি ঠিক বুঝি না—যে দেশের জন্ত আজ রাতে ফাঁসী যাইবে তাহাকে তোমরা বলা মিলিট্যান্ট নয়। সে কেন মিলিট্যান্ট হইবে—মিলিট্যান্ট ঐ শব্দটিকে বৈজ্ঞানিক—যে খানিক আগে ঘাস লইয়া বাহির হইয়াছিল, ওয়ার্ডারের গায়ে জল দিবার জন্ত।……ছি, আমি একি ভাবিতেছি! বিনু মিলিট্যান্ট হইলেই যেন আমার গর্কের বিষয়। মহাত্মাজী, আমার প্রণাম গ্রহণ করো। হয়তো বাণারসী ঠিকই বলিয়াছে। বিনু আমার পক্ষপুটে, আশ্রমের আবহাওয়ায় মানুষ। উহার পক্ষে ‘মিলিট্যান্ট’ না হওয়াই স্বাভাবিক।……সদাশিউ আমার টেবিলের উপর পা ঝুলাইয়া বসিয়া রহিয়াছে। সে আমার মুখের দিকে তাকাইতেছে। নিশ্চয়ই ভাবিতেছে যে হঠাৎ আমি প্রণাম করিলাম কেন? উহার একটি মনগড়া অর্থ নিশ্চয়ই করিয়া লইল।

“বিষুদেও বাবু! বিষুদেও বাবু!”

বাঁদিকে দুই তিনটি সিট পরে বিষুদেওজীর সিট। একটা ওয়ার্ডার, তাঁহার সিটের সম্মুখের জানালার বাহির হইতে তাঁহাকে ডাকিতেছে। বিষুদেওজীর বাহিরে বেশ বড় কারবার আছে,—ব্যবসাদার লোক। ঢেঁকি স্বর্গে গেলেও ধান ভানে। বিষুদেওজী জেলের মধ্যেও বেশ বড় কারবার ফাঁদিয়া বসিয়াছেন। উনি আমাদের কিচেন্ ম্যানেজার। জেলের কন্ট্র্যাক্টরের সহিত উহার আলাপ আছে। এই ওয়ার্ডারটা উহার ও জেল কন্ট্র্যাক্টরের মধ্যে খবরাখবর ও জিনিষপত্র আদান প্রদানের কাজ করে। প্রত্যহ জেল কন্ট্র্যাক্টর ‘রেশনে’এর যে রিকুইজিসন থাকে

তাহা অপেক্ষা কম জিনিষ দেয়,—ও কাগজের উপর ম্যানেজারের দস্তখত করাইয়া লইয়া যায়, যে সে সব জিনিষই দিয়াছে। তাহার পর রাতে এই ওয়ার্ডার আসিয়া অন্যান্ত জিনিষ দিয়া যায়—যে সব জিনিষ বেশনের মধ্যে পড়ে না। জেলের কর্তৃপক্ষও মোটামুটি ব্যাপারটি জানেন, এবং ইহা বন্ধ করিবার জন্য জেলের রসদ স্তদাম হইতে, শিডিউল অনুযায়ী জিনিষ দিবার চেষ্টাও কয়েকবার করিয়াছেন। কিন্তু এই বৃদ্ধের বাজারে শিডিউল অনুযায়ী সব জিনিষ প্রত্যহ দেওয়া শক্ত। আর না দিলেই ফ্যাসাদ। হয়তো আপার ডিভিসন রাজবন্দীরা অনশনই আরম্ভ করিয়া দিবে। হয়তো বা লক-আপ হইতে অস্বীকার করিয়া বসিবে। গায়ের জোরে এবং লাঠি চার্জের বলে অবশ্য ইহাদের সাময়িক বাগ মানানো যায়। কিন্তু দুই চারিবার এইরূপ ঝগড়া হইলে, ট্যাক্টফুল নয় বলিয়া ডিপার্টমেন্টে জেলর, সুপারিন্টেন্ডেন্টের বদনাম হইয়া যায়। কিছুদিনের মধ্যে বদনীর হুকুম আসে। তাহার উপর মারবোঝ করিয়া জিনিষটি চাপিয়া দিব, নিরাপত্তা বন্দীরা থাকিতে সে উপায় নাই। জেলা ম্যাজিস্ট্রেটের হুকুম না হইলে উহাদের উপর লাঠি চার্জ করা যায় না। আর এখন জেলে স্থানাভাব এত বেশী যে, নিরাপত্তা বন্দীদের আলাদা রাখিবার ব্যবস্থা করাও শক্ত। এই দাত পাচ ভাবিয়া, জেল কর্তৃপক্ষ চাহেন যাহাতে রাজবন্দীরা গোলমাল না করে। একটু আধটু দেখিয়াও দেখিতেছি না, এই ভাব দেখাইলেই যদি চলে, তবে ইহাদেরে যাঁটাইবার দরকার কি? তাঁহাদের কন্ট্র্যাক্টরের নিকট হইতে প্রাপ্তির তো ইহাতে কিছু হ্রাস বৃদ্ধি নাই।... কাজেই সুবিধা হইয়াছে বিষ্ণুদেওজীর। বিষ্ণুদেওজী ও ওয়ার্ডার আস্তে আস্তে কি সব কথা বলিতেছে, ঠিক বুঝা যাউতেছে না। হঠাৎ বিষ্ণুদেওজী জোরে বলিলেন “সিপাহীজী, একটু দধির সরবৎ খাইবে নাকি?” সিপাহীজী বলিল “লাইয়ে।” গ্রাসটি গরাদের মধ্য দিয়া বাহির হইল না। “ঠাহরিয়ে মৈ পিয়ালী লাভা হু” (৩৪)। বিষ্ণুদেও চায়ের কাপে করিয়া, ওয়ার্ডারকে ঘোলের সরবৎ খাওয়াইতেছে। ও—এইজন্যই সে সরবৎ লইয়াছিল। তাইতো বলি—হঠাৎ উহার গুড় দেওয়া ঘোলের সরবৎ খাইবার ইচ্ছা হইয়াছিল কেন। সিপাহীজী চলিয়া গেল। বোধ হয় উহার ডিউটা অন্য ওয়ার্ডে। ভূষণজী তাহার

বিছানায় মশারী ফেলিয়া শুইয়া পড়িয়াছিল। ঠিক বিষুণদেওজীর পাশেই তাহার সিট। সে মশারীর ভিতর হইতে বলিল “কেয়া তিক্রম্ কর্ রহেখে ইয়ার ?” নিয়ম বিরুদ্ধভাবে যোগাড়-যাগাড় করার নাম ইহারা দিয়াছে ‘তিক্রম্’। আসলে শকটীর কোন অর্থই নাই—এই জেলের মধ্যেই কথাটির সৃষ্টি। বিষুণদেও উত্তর দেয় বিশ বাণ্ডিল ‘বিড়ী নিয়ে।’ বিষুণদেও প্রত্যহ বিড়ী আনায় আর দিনের বেলায় নেটের হাত দিয়া, এই বিড়ীগুলি বিক্রী করিতে পাঠায় জেল ক্যান্টিনীতে। সেখানে সাধারণ কয়েদীরা এই বিড়ী কেনে—দশ পয়সা প্যাকেট। বিষুণদেওজীর ইহাতে বেশ লাভ থাকিয়া যায়। মেসের মেম্বরদের মধ্যে যাহারা হয়তো একটু গোলমাল করিতে পারে, তাহাদের মুখ বন্ধ করিবার জন্ত মধ্যে মধ্যে গন্ধ-তেল ও অন্যান্য টুকীটাকী প্রয়োজনীয় জিনিষ—আনাইয়া দেয়। তাহা ছাড়া জেলের গুদামের কয়েদীদের সহিতও বন্দোবস্ত করিয়া লইয়াছে—দুই বাণ্ডিল বিড়ীতে এক প্লাস বি, এক প্যাকেট বিড়ীতে আধসের চিনি। বিড়ীই জেলের লিগাল টেণ্ডার মুদ্রা। ভূষণজী বিষুণদেওকে বলে, “আমাকে এক বাণ্ডিল বিড়ী দাও তো—গরম জামাটা শীতের পর কাটানো হয় নাই। কাল ওটাকে ধোবী-কম্যাণ্ডে পাঠাইতে হইবে, ইস্ত্রী করিবার জন্ত। আর কাল আমার জন্ত একটা ফাউন্টেন পেনের কালী আনিতে বলিয়া দিও তো ভাই, কণ্ট্রাক্টরকে।” তাহার পর হাসিয়া উঠিয়া বলে “আমি হচ্ছি ভাই ঝপটানন্দের দলে।” ঝপটানন্দ কথাটির একটি ইতিহাস আছে। বিষুণদেওজী একটা ছড়া তৈয়ার করিয়াছিল। ছড়াটা ঠিক মনে আসিতেছে না। তবে তাহার ভাবার্থ এই যে—জেলের রাজবন্দীরা সকলেই সিদ্ধ পুরুষ। তাহাদের তিন শ্রেণীতে ভাগ করা যায়। প্রথম শ্রেণীর নাম “যোগাডানন্দ”। ইহারা বিড়ী ও পয়সা ঘুঁষ দিয়া, মিষ্টি কথা বলিয়া জেলডাক্তারকে খোসামোদ করিয়া, ও মধ্যে মধ্যে জেলকর্মচারীদের সহিত ঝগড়া করিয়া, নানাপ্রকার জিনিষপত্র যোগাড় করেন। ইহাদের নেশার জিনিষ হইতে আরম্ভ করিয়া, কোন জিনিষের অভাব জেলে হয় না। একমাত্র অভাব স্ত্রীপুত্র-পরিবারের। সকাল হইতে সন্ধ্যা পর্যন্ত ইহারা যোগাড়ের ফন্দি ফিকিরেই থাকেন। দ্বিতীয় শ্রেণীতে পড়েন

“ঝপটানন্দের দল।” “ঝপট্টা মারনা” কথাটির মানে ছোঁ মারা। এই ধরণের বন্দীরা সাধারণতঃ থাকে চুপচাপ নিষ্ক্রিয় ভাবে। মুখে চোখে নিস্পৃহতার চিহ্ন পরিস্ফুট করিবার চেষ্টা করে! কিন্তু চিল যেমন উঁচু গাছের উপর সমাধিস্থের স্তায় বসিয়া থাকিলেও, শিকারের উপর ঠিক নজর রাখে, ইঁহারাও সেইরূপ সব সময় নজর রাখেন—যোগাড়াইনন্দরা কে কি করিতেছে তাহার উপর। ঠিক যে সময় কোন জিনিষ যোগাড়াইনন্দদের হাতে পৌঁছায়, সেই সময় ঝপট্টানন্দরা, সম্মুখে গিয়া হাজির হন—উহার একটি অংশ দাবী করিতে। ‘ত্রিকম্’ ক্রমে গিয়া ধরা পড়িলে বিপদ আছে—কিন্তু ঝপট্টানন্দদের কোন বিপদের ভয় নাই। তবে যোগাড়াইনন্দদের তুলনায় ইঁহারা জিনিষপত্র পান কম পরিমাণে। যোগাড়াইনন্দরা অল্প অল্প জিনিষ অনিচ্ছা সত্ত্বেও ইঁহাদের দিতে বাধ্য হন—গোলমলে লোকদিগকে ঠাণ্ডা তো রাখিতে হইবে—তাহার পর বাকী থাকে আর একশ্রেণীর রাজবন্দী। ছড়াতে ইঁহাদের নাম দেওয়া হইয়াছে “বেকুফানন্দ”। ইঁহাদের সংখ্যাই বেশী। যোগাড় করিবার বা যোগাড়ের জিনিষের অংশ লইবার ইচ্ছা ইঁহাদেরও ঘোলা আনার। কিন্তু ইচ্ছা থাকিলে কি হইবে—সামর্থ্যে কুলায় না। ইঁহাদের ভয় বে ধরা না পড়িলেও, অপর সকলে ইঁহাদের নামে কাণাবুঝা করিতে ছাড়িবে না। আর হাতে নাতে ধরা পড়িয়া গেলেতো বদনামের একশেষ। কাজেই এই সব গোলমলে জিনিষ হইতে আলাদা থাকিয়া, সমালোচনার অধিকার রাখাই বুদ্ধিমানের কাজ।.....

হট্টগোল করিতে করিতে সকলে ডান দিকের পর্দাঘেরা স্থানটি ভর্তি হইতে বাহির হইল। উঁহাদের ক্লাস তাহা হইলে শেষ হইল। সারাদিন সময় পায়, তাহা হইলেও ইঁহারা রাত্রি জাগিয়া পড়াশুনা করিবেই করিবে। সকালে তো আটটার আগে ইঁহাদের কাহারও উঠিবার নাম নাই। কিন্তু রাজনীতিক্ষেত্রে আনিরাও ইঁহারা যে পড়াশুনা ভুলে নাই, ইঁহা দেখিয়া সত্যই আনন্দ হয়। প্রতিমাম মাষ্টারী—ছেলেদের পড়িতে দেখিলে সেইজন্য এখনও মনের আনন্দ চাপিতে পারি না। সোস্যালিস্টরা, ফরওয়ার্ড ব্লকের ছেলেরা, কম্যুনিষ্ট ও কিয়ান সভার

ছেলে দুইটা, সকলেরই পড়ার উৎসাহ দেখি, আর অবাক হইয়া আমাদের পন্থার কন্মীদের সহিত তুলনা করি। ফরওয়ার্ড ব্লকের তিনজন মাত্র তো থাকে এখানে, কিন্তু তাহারাও দেখি কত খরচ করিয়া সেসর না করা মার্জিটে বই সব আনাইয়াছে। কমানিষ্ট ছেলেটারও টুকী টাকী বই আনা লাগিয়াই আছে। ইহাদের মতো ঘড়ী ধরিয়া পড়া শুনার ক্লাস করিতে যাওতো আমাদের মধ্যে— নিশ্চয়ই ছেলে জুটিবে না। তাহার প্রত্যক্ষ প্রমাণ তো হইয়াই গিয়াছে। সদাশিউ-র উৎসাহে ও অনুরোধে আমি শীতকালে বেলগাছটির তলার “রচনাশুক কার্যক্রম (৩৫)”এর উপর ক্লাস লওয়া—আরম্ভ করিয়াছিলাম। প্রথম সপ্তাহে কিছু ছেলে হইয়াছিল। পরে দেখিলাম থাকিয়া গেল কেবল সদাশিউ, দাসজী, আর রামশরণজী। আর—সি-এস-পির রুণ বিপ্লবের ইতিহাসের ক্লাসে দেখি লোক ধরে না—আমাদের ছেলেরাও দেখি সেই ক্লাসে বসিয়া আছে। অবশ্য ইহা অস্বাভাবিক নয়। নিলু বিলুর দলের প্রোগ্রামের ভিত্তি মানুষের মন আত্মকে যেমন আছে তাহারই উপর। আর আমাদের কার্যক্রমের ভিত্তি, হিংসা লোভহীন আদর্শ মানব মনের উপর। সেইজন্য সাধারণ লোককে উহাদের পথই আকর্ষণ করে বেশী।.....

নিলু বিলুর কি পড়ার ঝোক? আর আমাদের পন্থার লোকদের? তাহাদের কথা আর বলিয়া কি হইবে? আমি একখানি বই নিয়া বসিলেই বলে—“মাষ্টার সাহেব আবার ‘ইত্তিহান’ দিবেন নাকি?” আমাদের দলের রামচন্দরজী আর হরিহরজী এই দুই জনের একটু পড়াশুনার বাতিক আছে। তাহার মধ্যে রামচন্দরজী পড়েন জল চিকিৎসার বই, আর হরিহরজী পড়েন আসন ও প্রাণায়ামের বই। ইহাদের ধারণা যে গান্ধিজীর মতের উপর যাহাদের আস্থা আছে, তাহাদের আবার পড়াশুনা করিয়া নূতন জানিবার কি থাকিতে পারে? সাধে কি আর নিলু আমাদের ঠাট্টা করে? আমি টুরে বাহির হইবার সময়, বিলুর মা যখন লোহার স্কটকেসটা গুছাইয়া দেন, তখন কতবার শুনিয়াছি নিলু তাগর দিকে ঠাট্টা করিয়া বলিতেছে,—“মা. পরানো সর্কেদরের ফাইনটা দিয়েছো তো?”

লঘুগুরুর জ্ঞান নিলুর ছোট বেলা হইতেই কম। এ বিষয়ে বিলুর সহিত তাহার আকাশ পাতাল তফাৎ। নিলু চিরকালই একটু উদ্ধত স্বভাবের, রাগিলে উগার জ্ঞান থাকে না।

.....বাড়ীর ভিতর ঢুকিয়া দেখি, রান্নাঘরের বাবান্দার বিলুর মা, নিলু ও বিলু অল্প দূরে দূরে বসিয়া রহিয়াছে—যেন একজন্মের সহিত আর এক জনের কোনই সম্বন্ধ নাই। বিলুর মা ও বিলু কাঁদিতেছে। আর নিলু একটা ঝাটার কাঠি দিয়া, নিকানো মাটির মেঝের উপর, বোধহয় কিছু লিখিতেছে কিম্বা আঁকিতেছে। পাশে একটা বঁটা পড়িয়া আছে। কাছে গিয়া দাঁড়াইতেই লক্ষ্য করিলাম, বিলুর মা কাপড় দিয়া কি একটা যেন ঢাকবার চেষ্টা করিল। আমি গিয়া জিজ্ঞাসা করিতে ব্যাপারটী বাহির হইয়া পড়িল। বিলুর হাত হইতে দোষাত উন্টাইয়া পড়িয়া নিলুর ক্ষীরের পুতুল নইটীর মলাট পাকাপ হইয়া গিয়াছে। তাই নিলু রাগ করিয়া বিলুর মাসডেনের ইতিহাস বঁটা দিয়া কাটিরাছে। সত্যসত্যই টুকরা করিয়া কাটিয়াছে—একেবারে ছোট ছোট নোটবুকের মতো দেখিতে হইয়া গিয়াছে। আশ্চর্য্য ছেলে? উহাদের মাও আবার দিবা বেলাদের মাথা খাইয়াছেন; হেনে অন্নার করিয়াছিল, কোথার আনার কাছে আসিয়া বলিয়া দিবে, তা নয়, আমার কাছ হইতেই ব্যাপারটী লুকাতবার চেষ্টা করা হইতেছিল।

“কেহা সদাশিউ, ভূমিহার-রাজপুত জাতীয় মহাসভা কি বৈশিষ্ট্য পশ্চিম ভূট”—
কমবেড বৈজনাথ সদাশিউকে ব্যঙ্গ করিয়া বলিল। লক্ষ্য স্বদেশের উপর।
বিহারের গরমপছীরা, অর্থাৎ মোস্তাফিজ, কমানিষ্ট, ফরওয়ার্ড ব্লক ও কিষণ সভার সদস্যরা, দক্ষিণপছীদিগকে এত বলিয়া ঠাট্টা করে যে, বিহার প্রাদেশিক কংগ্রেস কেবল স্থানীয় ভূমিহার ও রাজপুত জাতের পারম্পরিক দলাদলির মুখপাত্র মাত্র। প্রাদেশিক কংগ্রেসে নাকি রাজনৈতিক দলাদলি নাই, দলাদলি আছে জাত লইয়া, আর ব্যক্তিকে কেন্দ্র করিয়া। কথাটা কতকাংশে সত্য। জেলের মধ্যেও দেখি রামশরণজী আর হরিহরদা জাতের ভিত্তিতে ছোট ছোট উপদল গড়িবার চেষ্টা করেন—বাহিরে গিয়াও বাহাতে তাঁহাদের লীডারগিরি বজায় থাকে।

আমাদের দেশে স্বরাজ কি কখনও হইবে—এক এক সময় ঘুণা ধরিয়া যায়—নিলু বিনুর দলগুলি যাহা বলে তার সবই ভুল নয়। কিন্তু তাই বলিয়া ইহার কিছুক্ষণ পূর্বে যে সূত্রযুক্ত বসিয়াছিল তাহার সহিত জাতীয় দলাদলির কি সম্বন্ধ? আর সদাশিউ না হয় তোমার সমবয়সী; কিন্তু যখন সে আমার সম্মুখে বসিয়া রহিয়াছে, তখন ইহার অর্থ আমাকেও আঘাত দেওয়া। ব্যোজ্যেষ্ঠকে একটু সমীহ করিলে কি মহাভারত অশুদ্ধ হইয়া যাইত নাকি?

সদাশিউ জবাব দেয় “চুপ কর ‘লালদাসিয়া’। কথায় বলে বামুনকে খাওয়াইয়া, রাজপুত্রকে বাবুসাহেব বলিয়া, কায়স্থকে টাকা দিয়া, আর বাকী সব জাতকে প্রহার দিয়া, যে কোন কাজ করাইয়া লওয়া যায়। কয়টি টাকা পাইলে তো এখনই পাটি ছাড়িয়া দিতে ইতস্ততঃ করিবে না। তোমাদের কায়স্থদের আর জানি না!”

বৈজনাথ কায়স্থ। মিথিলার কায়স্থদের প্রায়ই পদবী হয় লাল, না হয় দাস। এইজন্য এখানে কায়স্থদের সাধারণ লোকে অনেক সময় বলে লালদাসিয়া। জমিদারের নায়েব, গোমস্তা, পাটোয়ারী প্রভৃতি কাজ ইহাদেরই একচেটিয়া। সেইজন্য গরীব কিসাণদের নিকট ইহাদের জনপ্রিয়তা কম। ইহা হইতেই লালদাসিয়া কথাটির মানে আর কেবল হানীয় কায়স্থ নয়—উহার যোগরূঢ় অর্থ দাঁড়াইয়াছে, একটা অর্থলোলুপ পাটোয়ারী মনোবৃত্তি যুক্ত জীব।”

বৈজনাথ বলে “হাঁ, আর একটা প্রবাদ মনে আছে তো? গয়লার দেখা ঘাস, আর বামুনের দেখা দই—দুটি জিনিষেরই বরাং একই রকমের।”

সদাশিউ ভূমিহার ব্রাহ্মণ। সে জবাব দেয়—

“সে তো আমি স্বীকারই করি। দেখলেন না আমার দেওয়া দই মাষ্টার সাহেব খেলেন। কায়স্থরা ‘কহাবতের সচ্চাই’ (প্রবাদের সত্যতা) মানিতে রাজী নয় বলিয়াই তো কথা বাড়িয়া যায়।” তাহার পর সদাশিউ টেবিল হঠতে নামিয়া বৈজনাথের নিকট গেল। দুইজনে ফিস্ ফিস্ করিয়া কি সব কথা বলিতেছে। উহাদের আবার হঠাৎ গোপনীয় কথা কি মনে পড়িয়া গেল?

আজ বৈজ্ঞানিকের দলের একজন নেতৃস্থানীয় কমরেডের ফাঁসী, কিন্তু ইহাদের কার্যকলাপে অন্য দিন হইতে বৈলক্ষ্য্য তো কিছু দেখি নাই। সেই পর্দাধারা ক্রাস, সেই হাশ্বধ্বনি, মধ্যে মধ্যে ভ্যানু, লেবার পাওয়ার, সারপ্লাস ভ্যানু শব্দগুলি অন্তদিনের মতো আজও কানে আসিয়াছে। আমার বাদিকে বাহারা থাকে, তাহাদের জীবনও তো প্রায় অন্তদিনের মতোই দেখিতেছি। কোথাও একটা আঁচড়ও পড়ে নাই। না, হয়ত সকলেই অনুভব করিতেছে—না হইলে দাসছী ছাড়া আর প্রত্যেকে এখনও জাগিয়া থাকিবে কেন? ভূষণী, কিম্বৎ দেওজী মশারী ফেনিয়া শুইয়াছে বটে, কিন্তু ইহাদের কথাবার্ত্তাতে কিছুক্ষণ আগেই শুনলাম। ইহারা ঘুমায় নাই। অনেক সিন্টেই মশারী ফেনা, সেইজন্য বেশী দূর পর্যন্ত দেখা যায় না—তবে কানে কথাবার্ত্তার গুঞ্জনধ্বনি আসিয়া পৌঁছাইতেছে। সেই অস্কারওয়াল্ড-এর Ballad of Reading Gaol-এর ফাঁসীর রজনীর লাইন কয়টা মনে পড়িতেছে।

But there is no sleep, when men must weep

Who never yet have wept :

So we the fool, the fraud, the knave—

That endless vigil kept,

And through each brain, on hands of pain

Another's terror crept.....

আর মনে পড়িতেছে নু। কবে মাঠারী ছাড়িয়া দিয়াছি। সে কি আজকের কথা? এই কয়টা লাইনও যে মনে আছে তাহাই আশ্চর্য্য! এখন মনে করিবার চেষ্টা করিতেছি। এখন আর মনে পড়িবে না। পরে হঠাৎ কোনো এক অপ্রয়োজনীয় মুহূর্ত্তে, অপ্রত্যাশিতরূপে মনে পড়িয়া যাইবে। ইহারা সকলে কি ভয় জাগিয়া আছে? হয়ত সহানুভূতিতে। না, এ জাগিয়া থাকা ইচ্ছাকৃত নয়। চেষ্টা করিয়াও ইহাদের ঘুম আসিতেছে না। গল্প করিয়া ইহারা মনের গুরুভার লাঘব করিতে চায়। আমার নিজের মনওতো বেশ শান্ত

আছে। বোধ হয় আমি আমার ছেলেদের যতটা গভীর ভাবে ভালবাসা উচিত ততটা গভীরভাবে স্নেহ করিনা; না হইলে এখনও আমার মনে সে রকম চাঞ্চল্য নাই কেন? বৈজনাথের সিটের পাশে সদাশিউ আর বৈজনাথ খান কয়েক চেয়ার আনিয়া রাখিল। এত রাত্রে আবার চেয়ার দিয়া কি হইবে? সদাশিউ তাহার পর আসিয়া আমার খাটের উপর বসিল। আমি নীচে কন্মলে বসিয়া আছি। বৈজনাথ, লছমী, চতুর্বেদী, রামপ্রকাশ, গিরধর চেয়ারগুলিতে বসিল। ইহারা সারারাত জাগিবে নাকি? বিলুরও রাত জাগিয়া পড়া অভ্যাস। কতদিন বারণ করিয়াছি! এখন বিলু কি করিতেছে? হয়ত পাগলের মতো সেলের মধ্যে পায়চারী করিয়া বেড়াইতেছে। তাহার কি একবার তাহার বাবার কথা মনে পড়িবে না? ভয় পাঠবার ছেলে সে নয়, কিন্তু না কাটে চরখা, না আছে ভগবানে বিশ্বাস। আঙ্গকের রাত্রে এই দুইটির মধ্যে একটীও থাকিলে মনে কত বল পাইত! স্কুলের সংস্কৃত পণ্ডিত জেলের রিলিজিয়াস ইন্সট্রাক্টর। রবিবারে জেলে হিন্দু কয়েদীদের ধর্মোপদেশ দিতে আসেন। আমি হেডমাষ্টার থাকার সংয়েই পণ্ডিতজী চাকরীতে ঢুকিয়াছিলেন। সেই সূত্রে সেদিন দেখা করিতে আসিয়াছিলেন। বিলু তাঁহার ছাত্র। তিনি ছুঃখ করিয়া গেলেন যে, তিনি বিলুর সেলে গিয়াছিলেন। বিলু বলিয়াছে ধর্মোপদেশের কোনো দরকার নাই। পণ্ডিতজী আরও বলিয়াছিলেন যে, বিলু অবশু তাহাকে পায়ে হাত দিয়া প্রণাম করিতে ভুলে নাই। বিলু সে ছেলেই নয়। আচ্ছা ভগবানে বিশ্বাস থাকিলে কি সত্যই সাম্যবাদী হওয়া যায় না? কত গেরুয়া পড়া স্বামিজী যে দেখি, ওদের সব দলের কন্মী। তাঁহারাও কি ভগবানে বিশ্বাস করেন না? একদিন একজন এসিষ্ট্যান্ট জেলরের হাতে পাঠাইয়া দিয়াছিলাম একখানি পকেট গীতা, বিলুকে দিবার জন্য। এসিষ্টেন্ট-জেলর পরের দিন বইখানি ফেরৎ দিয়া যাইবার সময় বলিলেন “আপনার ছেলে বলিয়াছেন যে ঐ বইয়ের দরকার নাই, অন্য ভাল বইটাই দেন তো পড়িতে পারি।” আমার কাছে খান কয়েক অন্য বই ছিল! তাহাকে সেই বইগুলি বিলুর কাছে পৌছাইয়া দিবার জন্য অনুরোধ

করিয়াছিলাম। তিনি বলিলেন “ধর্মপুস্তক দিবার আমার অধিকার আছে। ডিভিসন থি. কলেজ প্রিন্সনারকে অল্প বই দিতে হইলে সুপারিন্টেন্ডেন্টের হুকুম লইতে হয়। সাহেব ভারী লিনিয়েন্ট আর ভাল মানুষ। তিনি আপনার ছেলেকে জিজ্ঞাসাও করিয়াছিলেন, কোন জিনিষের দরকার আছে কিনা। কিন্তু প্রিন্সনার নিশ্চই তো সাহেবের সম্মুখে বলিলেন, তাঁহার কোনো জিনিষের প্রয়োজন নাই।”

ঠিকই বলিয়াছে। এইরূপ কথাই বিনুর নিকট হইতে আশা করিতে পারা যায়। শেষ মুহূর্ত পর্যন্ত গিন্নি উন্নত ব্যগিরা বিনু চলিয়া যাইবে। আনার নাম উজ্জ্বল করিয়া, সকল প্রকার হীনতায় পদাবত করিয়া, গৌরবোজ্জ্বল মুখে তাচ্ছনোর হানি লইয়া, ননমিলিটিয়াট্ বিনু চলিয়া যাইবে।.....

গত মহাযুদ্ধের পরের একটা ব্যঙ্গ চিত্রের কথা মনে পড়িতেছে। “পাক”-এ বাতির হইয়াছিল।..... দুই জন বৃদ্ধ লর্ড তাঁহাদের মেদাভুল সমতুলানিত শরীর এক অতি এরিষ্টফ্রেটীক ক্লাবের পুরু কৃগনবৃদ্ধ সোফার এলায়িত করিয়া বসিয়া আছেন। মুখে চুরুট, টেবিলের উপর বোতল গ্লাস। দুই জন পাল্লা দিয়া গল্প করিয়া চলিয়াছেন—কাহার কর ছেলে যুদ্ধে মারা গিয়াছে। ছেলের মৃত্যুর জন্ত কেহ দুঃখিত নহেন—। অপরকে পরাজিত করিতে পারিবার গর্কের কাছে, ছেলের গর্মহৃদ মৃত্যু একটা অতি গৌণ ঘটনা। অথচ তাঁহার গর্কের ভিত্তি ঐ ঘটনার উপর। সে কথা কে ভাবে? আমার গর্বও এইরূপই হাশ্বাস্পদ। কাহার উপর পিতার কর্তব্য করি নাই, সেই পুত্রের কৃতকর্মের গৌরবে অংশ লইতে, আমার মন কুণ্ঠিত নয়।আমি যদি এ পথে না আসিতাম তাহা হইলে আজ বিনুর কি এ দশা হইত? আমার বাবা সরকারী চাকরী করিতেন; আমি সরকারী চাকরী করিতাম; আমার ছেলেও অন্যান্য গৃহস্থবাড়ীর ছেলের মতো, পড়াশুনা শেষ করিবার পর, —অর্থোপার্জন করিত, স্ত্রীপুত্র-পরিবার লইয়া ঘরসংসার করিত। পাড়ার বৃদ্ধ মিত্রের মশাই ঠিকই বলিয়াছেন। বিবাহ করিবার পর, বিশেষ করিয়া যদি সন্তানাদি থাকে, তাহা হইলে, কাহারও নিজের ইচ্ছামত জীবনের গতি চালিত করিবার অধিকার থাকে না। তখন তাহার জীবনটা কেবল তাহার নিছের নয়।

তাহার উপর আরও অনেকের দাবী জন্মিয়া গিয়াছে। আমার তো পয়সাও ছিল না, তার কথাও নাই। যাহাদের পয়সা থাকে, তাহারা হয়ত এরূপক্ষেত্রে, স্ত্রীপুত্র-পরিবারের জন্ত কিছু ব্যবস্থা পূর্ব হইতে করিয়া রাখিতে পারে। কিন্তু তাহা হইলেই কি কর্তব্য সম্পন্ন হইল? তাহা হইলে ছেলেপিলেরা হয়ত একটু আরামে থাকিতে পারিবে, কিন্তু আরামে থাকাই কি পৃথিবীতে একমাত্র কাম্য! গার্হস্থ্য জীবনে বে মধুর সম্বন্ধগুলি পরস্পরের মধ্যে গড়িয়া উঠে, তাহার কি কোন মূল্যই নাই? রাজকীয়র্থে রাখিয়া গিয়াছিলেন বলিয়া, সিদ্ধার্থ কি সন্তান ও স্ত্রীর প্রতি স্মৃতিচার করিয়াছিলেন?.....

বিনুকে ইংরাজী কলেজে পড়াই নাই। তাহার মার একান্ত অনুরোধে ইংরাজী হাইস্কুলে ম্যাট্রিকুলেশন পর্যন্ত পড়াইয়াছিলাম। যদি আমার ইচ্ছায় কাজ হইত তাহা হইলে হয়ত ইংরাজী স্কুলে এতদূর পড়া হইত না। আমার ইচ্ছা ছিল উহাকে বিহার বিদ্যাপীঠে পাঠাই। বিনু ইংরাজী স্কুলে পড়িত বলিয়া, আমাকে নানা প্রকার কথা, সহকর্মীদের নিকট হইতে শুনিতে হইয়াছে। মহাত্মাজী যখন আমাদের আশ্রমে-পায়ের ধূলা দিয়াছিলেন তখন জয়সোয়ালজীর ভগ্নী একথা, তাঁহার কানেও তুলিয়া-ছিলেন। ভদ্রমহিলার একটু পাগলামীর ছিট আছে। কিন্তু আমি জানি যে তিনি আপনা হইতেই এই সকল কথা, মহাত্মাজীকে বলেন নাই। আমারই কোন শুভাধ্যায়ী সহকর্মীর প্ররোচনায় তিনি এই কাজ করেন। মহাত্মাজী এ বিষয়ে আমাকে সে সময় কিছু বলেন নাই। “সব রকমের ছেলেই তো এত বড় দেশে থাকিবে। আমার ছেলেরাও তো আমাকে দোন দেয়”—কেবল এই কথা বলিয়া হাসিয়া কথাটা উড়াইয়া দেন। আমার মাথা লজ্জায় হেঁট হইয়া যায় আর এই মস্তব্যের তীব্রতা বিনু ও বিনুর মা বেশ অনুভব করিয়াছিল। সেই জন্ত বিনু ম্যাট্রিকুলেশন পাশের পর তাহার মা ও সে ঠিক করে যে, তাহার কাশীবিদ্যাপীঠে পড়াই উচিত। ইংরাজী কলেজে যাহা পড়িতে পাইত, তাহা অপেক্ষা কি সেখানে কম শিখিয়াছে? বিনু তো বি-এ পাশ। সে কি কোনো বিষয় বিনু অপেক্ষা ভাল জানে? বিনুর দলের অধিকাংশই তো কলেজে পড়া, বি-এ, এম-এ পাশ

করা ছেলে। তবে তাহারা সকলে বিলুর কাছে পড়িতে যাইত কেন? কিন্তু এসব সত্ত্বেও ইহা স্পষ্ট অনুভব করিতে পারা যায় যে, লোকে বিদ্যাপীঠের 'শাস্ত্রী' উপাধিকে তাচ্ছিল্য করে।—যে দিন বিলুর পাশের খবর আসে, আমি চিঠিখানি হাতে করিয়া বিলুর মাঝে বাড়ির ভিতর খবর দিতে গিয়াছিলাম। বলিলাম “আজ হইতে বিলুর নাম হইল পূর্ণচন্দ্র শাস্ত্রী”।—আমি ভাবিয়াছিলাম—বিলুর মার কত উৎসাহ দেখিব। কিন্তু দেখিলাম আমার কথা একটুও উত্তর দিল না,—মাথা নীচু করিয়া এক মনে বড়ি দিতে লাগিল।—তাহার পরও অনেক সময় দোখিয়াছি পড়াশুনার কথা উঠিলে বিলুর মা সে কথা চাপা দিবার চেষ্টা করে। এই সব নানা কারণে বিলুর মধ্যে inferiority complex আসিয়া পড়িয়াছে। বিলুর মাও মনে মনে ভাবে যে তাহার ছেলের উচ্চশিক্ষা হয় নাই—ছেলের দোষে নয়, দশচক্রে পড়িয়া; আর মুখ্যতঃ আমারই দোষে। সত্যই বিলুর মতো বুদ্ধিমান ছেলে যদি সুযোগ সুবিধা পাইত তাহা হইলে হয়ত বড় প্রফেসর বা বিখ্যাত বৈজ্ঞানিক হইত। নূতন নূতন গবেষণায় তাহার জগৎজোড়া নাম হইত। আর আমি তাহাকে এমন পারিপার্শ্বিকের মধ্যে আনিয়া ফেলিয়াছি, যেখান হইতে ছেলে আসিলেও বিশ্রাম, আরাম ও শান্তি পাওয়া যায়। এমন পরিবেষ্টনীতে সে মানুষ হইয়াছে, যেখানে ফাঁসীর হুকুম সামান্য দুর্ঘটনার অতিরিক্ত আর কিছু নয়। কিন্তু বিলু গুর্খ নয়, তাহার ভাল মন্দ বিচারের ক্ষমতা আছে। বড় হইয়া সে নিজের পথ নিজেই বাছিয়া লইয়াছে। এ ছাড়া আর অন্য কি-ই বা করিত?.....

চমকিয়া উঠিয়াছি! এমন করিয়া দরজা ধাঁকা দিতে হয়? দরজা বন্ধ আছে কিনা দেখা—এই তো তোমার কাজ। ইহার জন্য এত জোর দেখানোর প্রয়োজন কি? পাশের সিট হইতে একজন বলিয়া উঠিল “হাঁ, তোড়; তোড় দেও।” আর একটী মশারীর ভিতর হইতে কে একজন সঙ্গে সঙ্গে বলে “তাহা হইলে তো বাঁচা যার।”

রাত একটার ওয়ার্ডার তাহা হইলে আসিয়া গেল। ওয়ার্ডারটী আমাকে

দেখিতেছে। বড় বড় পাকা গৌফ—বেশ সুন্দর চেহারা। চোখো-চোখি হইতেই, আমাকে হাত জোড় করিয়া নমস্কার করিল। তাহার পর বৈজনাথরা চার জন যেখানে :সেয়ারের উপর বসিয়াছিল, সেই দিকে ফিরিয়া বলিল “নমস্কে ! বাবুসাহেবলোগ মজ্জেম হৈ ন।”

লছমী চতুর্বেদী বলে “আরে সিংজী যে ! অনেক দিন পরে তোমাকে এখানে ডিউটীতে দেখিতেছি। ব্যাপার কি ?”

“এক সপ্তাহের ছুটি লইয়া বাড়ী গিয়াছিলাম। কাল জয়েন করিয়াছি ; যুদ্ধের খবর টবর বনুন।”

“আমরা খবর দেবো তোমাকে ? আমরা থাকি জেলে। কোথায় তুমি আমাদের বাইরের পবর দেবে, তা’নয় আমাদের কাছ থেকেই খবর শুনতে চাও।”

“হজুররা ‘অংরেজী অখরার’ (৩৬) পড়েন, সেই জন্তই জিজ্ঞাসা করছিলাম”। তাহার পর ওয়ার্ডার সাহেব আদন্ত করে যুদ্ধের, মহরের, নিজের দেশের, মহাত্মাজীর, যত সব আজগুবি খবর।—মালগাড়ী বোঝাই করিয়া কত শিয়াল আর শকুন যুদ্ধক্ষেত্রে লইয়া যাওয়া হইতেছে ; মহাত্মাজী যেদিন অনশন আদন্ত করিয়াছিলেন সেদিন কি জানি কেন হঠাৎ ফট করিয়া লাট সাহেবের বাড়ীর ছাত ফাটিয়া গিয়াছিল ; মহাত্মাজীর সঙ্গে লাগিতে গিয়া সেবার রাজকোটের দেওয়ানের কি হইয়াছিল ;—আরও কত খবর। এই খবরগুলি বনিবার জন্তই সে অস্থির হইয়া পড়িয়াছিল। তাহার প্রথম দিককার প্রশ্নগুলি ইহারই অবতরণিকা মাত্র। তাহার পর সে বৈজনাথদের জানালার বাহিরে বারান্দার উপর বসিয়া পড়ে, বেশ ভাল ভাবে গল্প জমাইবার জন্ত। অল্প দিন নাইট ডিউটীর সময় কেহ আগিয়া পাকে না। তখন বড়ই একলা একলা লাগে। তুলিয়া খয়নি খাইয়া, পাহারাদের জাগাইয়া, আর পাষচারী করিয়াও দুই ঘণ্টা সময় যেন কাটিতেই চান না। তাহাদের গল্পর মধ্যে ওয়ার্ডারটি বসিয়া থাকিবে, একথা বোধহয় বৈজনাথের দলের ভাল লাগে না।

বৈজনাথ বলে “সিংজী তোমরা ছাপরে কিয়ুগজীর মাকে, আর কিয়ুগজীকে বন্ধ করেছিলে জেলের মধ্যে, আর এ যুগে মহাআজীকে আর তাঁর শিষ্যদের বন্ধ ক’রেছো।” “কন্মের লেখা কি খণ্ডাবার উপায় আছে? কিন্তু কিয়ুগজীকে আর ক’দিন আটক রেখেছিলাম। আপনাদের বে বাবু কতদিন থাকতে হবে, তার কি ঠিক আছে? এ ছাই যুদ্ধও কোন দিন শেষ হবে বলেতো মনে হয় না।”

বৈজনাথের দল হো হো করিয়া হাসিয়া উঠিয়াছে। সিংজীকে তাহারা ফাদে ফেলিয়াছে। “রাধাকিয়ুগ” বলিলেই সিংজী চটিয়া যায়। সে বলে “বোলো সীতারাম”। আজ নিজেই নিজের অজ্ঞাতসারে কিয়ুগজীর নাম লইয়াছে। লজ্জায় হাসিতে হাসিতে, দুইহাতে একবার তালি দিরা, সিপাহীজী দোড়াইয়া ঐ স্থান হইতে চলিয়া যায়। বৈজনাথরা ডাকে “শোনো শোনো সিংজী, আমাদের ছাড়া পাবার খবর।” কে উহাদের কথা শোনে,—সিংজী এতক্ষণে ওয়ার্ডের অন্তর্দিকে চলিয়া গিয়াছে। ওয়ার্ডারদের হাতে থাকে একটা করিয়া লঠন। সিংজী তাহার লঠনটা জানালার সম্মুখে ফেলিয়া গিয়াছে। কমরেড গিরধরু গরাদের মধ্য দিয়া হাত বাড়াইয়া তাহার লঠনের তেলটা একটা চায়ের কাপে ঢালিয়া লইল। তাহার পর কাপটা ভিতরে আনিয়া, তেল নিজেদের লঠনে ঢালিল। আজকাল যুদ্ধের বাজারে কেবোসীন তেলের বড়ই অভাব।—উহারা সকলে ছাড়া পাইবার গল্প করিতেছে। হোম মেম্বরের ষ্টেটমেন্টের পুর, আমেরী সাহেব পার্লামেন্টে কি বলিয়াছেন, কোন্ কোন্ কংগ্রেসকর্মীকে ছাড়িয়া দেওয়া হইয়াছে,—এই সকলের ভিত্তিতে তাহারা জল্পনা-কল্পনা বাদানুবাদ করিতেছে যে, গভর্নমেন্টের ভাবের কোন পরিবর্তন হইয়াছে কি না। জেলে আসিয়া প্রথমটা স্বস্তির নিশ্বাস ফেলিয়া বাঁচা যায়—কিন্তু কিছু দিনের মধ্যেই জেলজীবন বড়ই একঘেয়ে লাগে। তাহার পর আরম্ভ হয়—দিনরাত্রি কেবল ছাড়া পাইবার কথা—খবরের কাগজ হইতে তাহার সমর্থনে ও বিপক্ষে প্রমাণ একত্র করা। ফুদনবাবু স্বতঃপ্রণোদিত হইয়া ছাড়া পাইবার সমর্থনের প্রমাণ জড় করিবার ঠিকা লইয়াছেন। খবরের কাগজ পড়া হইয়া খাইবার পর তাঁহার চারিদিকে কি ভিড়

হয়! বিষুণদেওজী এই বিষয়ের উপর তুলসীদাসের অনুকরণে একটা দোহাও তৈয়ারী করিয়াছে। প্রত্যহ যেই মেট খবরের কাগজের বোঝা লইয়া ঢুকে, অমনি কেহ না কেহ এই দোহাটা আবৃত্তি করে—

“তুলসী চুরত জেলমে বহু বড়হঁয়া অথবার,
জিস্মে চর্চা সুল্হ কী করতি হো সরকার”

অর্থাৎ তুলসীদাস জেলে সেই সুন্দর খবরের কাগজখানি খুঁজিতেছেন, যাহাতে লেখা আছে যে গভর্ণমেন্ট আমাদের সহিত সন্ধির আলোচনা চালাইতেছে।

আজ ছাড়া না পাক, কোনো না কোনো সময়ে তো সকলেই ছাড়া পাইবে। কিন্তু বিলু? বিলুকে তো সঙ্গে লইয়া যাইতে পারিব না। আমি বুড়ো হইয়াছি— আমার মধ্যে এখনও ঝাঁচিবার আকাঙ্ক্ষা কত? আর বিলুর কিবা বয়স? সারা-জীবনই তো এখনও উহার সম্মুখে পড়িয়াছিল। আর, আমিই ফিরিয়া যাইব— বিলু নয়। বিলুর বিবাহ দিয়া দিলে হয়ত তাহার গান্ধীজির মতে বিশ্বাস থাকিত। বিবাহের পর জীবনের উদ্দামতা কমিয়া যার—দাম্পত্যজ্ঞান বাড়ে? তাহা হইলে বোধ হয় বিলু সাম্যবাদের বিপদসঙ্কুল পথে পা বাড়াইত না। “সর্বোদয়ে” (৩৭) কালা কালেকার সেই প্রবন্ধটিতে, হান্স-কৌতুকের মধ্য দিয়া—মোটামুটি ঠিক কথাই বলিয়াছিলেন। তিনি দেখাইয়াছিলেন যে কংগ্রেস নেতাদের মধ্যে যাহাদের স্ত্রী আছে, তাহাদের স্বভাব বেশ নরম,—আর যাহারা অবিবাহিত বা বিপত্নীক তাহারা একটু মারমূর্তি গোছের। জহরলাল, সুভাষ বোস, বল্লভভাই প্যাটেল কেহই ঠাণ্ডা মেজাজে কোন জিনিষ বিচার করিতে পারেন না। না, সাম্যবাদী দলে যোগদান না করিলেও হয়ত বিলুকে বাঁচাইতে পারিতাম না। এ আন্দোলনে কত লোক মারা গিয়াছে, দৈনন্দিন জীবনে যাহাদের রাজনীতির সহিত কোন সঙ্কর্ষ ছিল না। মহাত্মাজীর শিষ্যদের মধ্যেও তাঁ কত লোক হিংসাত্মক কার্য করিয়াছে, তাহার কি ইয়ত্তা আছে? অন্য আর মৃত্যু কাহারও হাতের মুঠার মধ্যের জিনিষ নয়।……

.....সরস্বতীর সহিত বিলুর বিবাহ দিলে ভাল হইত ! দুইজনেই সুখী হইতে পারিত। বেশ মেয়ে সরস্বতী। আগষ্টমাসে পুলিশ তাহাকে ধরে। মাস তিনেক পরে প্রমাণাতাবে ছাড়িয়া দেয় ! আবার ২৬শে জানুয়ারী স্বাধীনতা দিবসে জেলে আসিয়াছে। উহার সহিত বিবাহ হইলে দুইজনেই রাজনীতি-ক্ষেত্রের কাজের সহিত ঘরসংসারও করিতে পারিত। লেনিনও তো বিবাহ করিয়াছিলেন।.....

কপিলদেও ও তাহার মা আমার নিকট প্রস্তাবও আনিয়াছিলেন। উহাদের নিজেদেরই বংশে একটু গোলমাল আছে। তাহা না হইলে কি আর ঐ অল্প শিক্ষিত ভূমিহার ব্রাহ্মণ-পরিবার, বাঙ্গালীর ঘরে মেয়ে দিতে রাজী হইত। আমার অবশ্য ইহার জন্ত কোনো আপত্তি ছিল না। বিলুর মার মত হইল না। আর বিলুর মত তো জিজ্ঞাসাই করা হয় নাই। আজকালকার ছেলে,—উহার মত আমার আগেই জিজ্ঞাসা করা উচিত ছিল। কিন্তু বিলুর মারই যখন মত হইল না, তখন আর জিজ্ঞাসা করিয়া কথা বাড়াই কেন? বিলুর মা-ই আমাকে অনেকদিন পূর্বে বলিয়াছিল যে, বিলুর মতে, রাজনৈতিক কাম্যের বিবাহের মত রাখা উচিত নয় : কিন্তু সরস্বতীর সহিত খাসা মানাইত ! আজকালকার মধ্যবিত্তঘরের বাঙ্গালী মেয়ে অপেক্ষা সরস্বতী অনেক বেশী কাজের। স্বাস্থ্যও তাহার অনেক ভাল। দেখিতে স্নিগ্ধও বেশ। এই তো দেখিতে দেখিতে এত বড় হইয়া উঠিয়াছে। কপিলদেও-এর নামনা-মোকদ্দমা সদরে লাগিয়াই আছে। আর এই কোর্টের কাছে আসিয়া সে আশ্রনেই ওঠে। প্রায় প্রতি-বারেই সে আশ্রমের সময় সরস্বতীকে লইয়া আসিত। এই তো সেদিনও, গোলাপীরাং-এর শাড়ী-পরা ফুটফুটে মেয়েটি গুলাববাগের মেলা দেখিতে বাইরে বলিয়া, গরুর গাড়ীতে চড়িয়া কপিলদেও-এর সঙ্গে আশ্রমে আসিয়াছে। আনাদের বাড়ীর মেয়েরা হইলে ঐ বয়সে ফ্রক পরিত। রান্নাঘরের দাওয়ায় বিলুর মা উহাকে খাইতে দিয়াছেন। দুধের বাটীতে চুমুক দিয়া মেয়ে কাঁদিয়া আকুল। কিছুতেই বলিবে না, কেন কাঁদিতেছে। পরে সহদেও আসিয়া বকিয়া-বকিয়া, খোসামোদ করিয়া, আদর করিয়া কান্নার কারণ বাহির করিল—“দুধম ফিকম

লগইছে (৩৮)”—অর্থাৎ তাহার মোষের দুধ খাওয়া অভ্যাস ; গরুর দুধ পান্বে লাগিছে বলিয়া খাইতে পারিতেছে না।……বিষে না হইয়াছে, ভালই হইয়াছে। হইলে তো কেবল আর একটি অভাগিনীর সংখ্যা বাড়িত মাত্র ? আমারই বোঝা বাড়িত। আরও জড়াইয়া পড়িতাম। তা'ছাড়া আমিই আর কতদিন বাঁচিব ? তাহার পর নিলু তো আছে। নিলুর আবার থাকা আর না থাকা ! সে থাকিয়াও, নাই। তাহার উপর নির্ভর করিতে হইলেই হইয়াছে। যা খামখেয়ালী আর দাবিদ্বন্দ্বিতাহীন ! এক বিলুর কাছেই সে একটু ঠাণ্ডা থাকে। সে কি আর কাহাকেও মানুষ বলিয়া মনে করে, না আর কাহার কথায় কান দেয় ? ছোটবেলা হইতেই সে শাসনের বাহিরে ! বড় হইয়া বরঞ্চ শাস্ত ও গস্তীর হইয়াছে। ছোটবেলায় কি ডানপিটেই না ছিল। প্রত্যহ একটা না একটা দুষ্কর্ম লাগিয়াই আছে !……

……সেবার দুর্গাবাবুর একটি পাতিহাঁস কাটিয়া বাঁধিতেছিল, আশ্রমের পশ্চিমের বাঁশঝাড়ে। দুর্গাবাবু হস্তদস্ত হইয়া আসিয়া নালিশ করিলেন। তাঁহাকে লইয়া নিলুর খোঁজে বাহির হইলাম ! দুর্গাবাবুর বড় ছেলে সঙ্গেই ছিল। সে-ই বাড়ীতে খবর দিয়াছিল। বাঁশঝাড়ের মধ্যে আসামী ও মাল গ্রেফতার হইল। সঙ্গে পাড়ার আরও কয়েকটি ছেলে—আর সব চাঠিতে আশ্চর্যের বিষয় যে দুর্গাবাবুর ছোট ছেলে নরুও তাহাদেরই মধ্যে। নিলুকে হাঁস কাটিবার কথা জিজ্ঞাসা করিতেই সে বলিল—“হাঁ আমরা সকলে মিলিয়া হাঁস মারিয়াছি !”—সে যেন এই প্রশ্নের জন্য প্রস্তুত হইয়াই ছিল ! পরে জেরায় বাহির হইল যে ছুরী আনিয়াছিল নরু—কাটিয়াছে নিলু। কাটিবার পূর্বে নিলু সকলের নিকট হইতে সর্ব আদায় করিয়া লয় যে, বাকি সকলে তাহাকে ছুঁইয়া থাকিবে। সে কাটিয়াছিল ও তাহার পিছনে নরুর একের পর এক, ছেলেদের রেলগাড়া খেলার স্রায় পিঠ ধরিয়া দাঁড়াইয়াছিল।……এত ফন্দিও উহার মাথায় খোলে !……

নিলুর বলিষ্ঠ ঋজুদেহ, ভাবুকতাহীন, বিলুর পাশে যেন মানায় না। আজকাল নিলুকেই দেখিতে বিলু অপেক্ষা বড় বলিয়া মনে হয়। সে যাহা মনে করিবে

তাহা সে করিবেই। তাহার অদম্য সাহসের সম্মুখে সকল বাধাবিপত্তিই 'তুচ্ছ' বলিয়া মনে হয়। নিলুকে কিছু বলিতে ভয় ভয় করে। উহার মুখে তো কিছু আটকায় না। কিন্তু বিনুকে কিছু বলিবার পূর্বে নিজেই ভাবিয়া লই যে আমার কথা ঐ ভাবপ্রবণ মনে কিছু আঘাত তো দিবে না! বিনু মুখ ফুটিয়া কিছু বলিবে না—কিন্তু হয়ত উহার চোখে জল আসিয়া যাইবে। আর নিলু—নিলু তো আমার প্রাণে আঘাত দিবার সুযোগ পাইলে ছাড়ে না। নিলুর যখন কলেজে পড়ার কথা প্রথম উঠিল, আমি বারণ করি নাই। কারণ আমি লক্ষ্য করিয়া-ছিলাম যে, নিলুর তো ইচ্ছা আছেই;—তাহার উপর বিনুর ও বিনুর মারও ইচ্ছা যে সে ইংরাজী কলেজে পড়ুক। কানী বিদ্যাপীঠে পড়িয়া সন্তুষ্ট হয় নাই, আর উহার না বিদ্যাপীঠে পড়াকে পড়া বলিয়াই মনে করে না!.....সব ঠিকঠাক। ইহার মধ্যে নিলু বলিয়া বসিল যে, সে গান্ধীসেবাসঙ্ঘের পয়সায় কলেজে পড়িবে না। এত কথাও উহার মাথায় খেলে। চাকরি করিবার সময় যে সামান্য টাকা পয়সা জমাইয়াছিলাম, তাহা হইতে পূঁজি ভাঙ্গিয়া খাইতে খাইতে প্রায় সব শেষ হইয়া আসিয়াছিল। নিজের টাকা দিয়া আশ্রমের গোড়াপত্তন করিয়া-ছিলাম। ইহাতেও অনেক টাকা খরচ হইয়া যায়। তিনবার জরিমানাতেও প্রায় নয়শত টাকা গিয়াছে। অনেক লোকে কংগ্রেসের নাম করিয়া আমাকে সাহায্য করিবার চেষ্টা করিলে, তাহাও আমি লইতে অস্বীকার করি। অস্ত্রাণ্ড আশ্রমে যেরূপ চাঁদা প্রভৃতি তোলা হয়, আমার আশ্রমে প্রথম হইতেই সে সব নিষিদ্ধ। চাঁদা লইলে আত্মসম্মান রাখাও যেমন শক্ত, নিষ্পক্ষ ও নির্ভীকভাবে কাজ করাও সেইরূপই অসম্ভব! অর্থাভাবে যখন আমার সংসার প্রায় অচল হইয়া উঠিয়াছে, সেই সময় খবর পাইলাম যে গান্ধীসেবা-সঙ্ঘ হইতে আমাকে পঁচাত্তর টাকা করিয়া নাসহারা দেওয়া হইবে। মহাত্মাজী বোধ হয় সবই জানিতে পারেন। এ টাকা না পাইলে আমাকে হয়ত আশ্রমের আয়ের উপরেই নির্ভর করিতে হইত। আশ্রমের আয়ই বা কি? দুইখানি গরুর গাড়ী ভাড়া পাটে। দুইটা তেলের বানি, একটি "গ্রামোছোগ" (৩৯), ভাণ্ডার, কাপড়কাটা সাবান

তৈয়ারী করা, আর কয়েকখানি দৈনিকপত্রের এজেন্সী, ইহাই আয়ের সূত্র। মৌমাছি পোষা ও গুটীপোকা চাষের কাজে কখনও বিশেষ আর্থিক লাভ আমাদের আশ্রমের হয় না। তবে তরকারীর বাগান হইতে আশ্রমের খাওয়ার মতো শাকসব্জী পাওয়া যায়। কিন্তু এত করিয়াও, আশ্রমের যে আয় হয় তাহা হইতে আশ্রমের ভ্রাট্টিয়ারগুলিরই খাওয়া, পড়া, চলা শক্ত! তাহার উপর যদি আমার সংসারের খরচ, আশ্রমের উপার্জন হইতে চালাইতে হইত, তাহা হইলে কোথায় থাকিত আশ্রমের পাঠাগার, আর কি করিয়া চলিত, জেলা কংগ্রেসের সাপ্তাহিক পত্রিকা? জেলা-কংগ্রেসের অন্যান্য খরচের সহিত অবশ্য আশ্রমের কোনো সম্বন্ধ নাই। এত সব দুশ্চিন্তা হইতে আমাকে বাঁচাইয়া দিয়াছিল, ঐ গান্ধী-সেবা-সভ্যের দেওয়া মাসহারা। এই টাকা লওয়ার মধ্যে যে কিছু অপমানজনক থাকিতে পারে তাহা আমার মনেও হয় নাই। এ টাকা আমাকে যে প্রতিষ্ঠান হইতেই দিক, ইহা যে কোনো ক্রোড়পতির দান হউক না কেন,—আমি তো জানি যে ইহা মহাত্মাজীর আশীর্ব্বাদ,—তাহার সেবকের অঙ্গবিধা হইতেছে ভাবিয়া তিনিই ইহার ব্যবস্থা করিয়া দিয়াছেন! আর নিলু কিনা বলিয়া বলিল যে, সে কলেজে পড়িবে না—কারণ তাহা হইলে তাহাকে গান্ধী-সেবাসভ্যের টাকা লইতে হইবে! বাপুজীর সেবারকার জয়সোয়ালজীর ভগ্নীর সহিত কথাবার্তা, সকলেরই মনে ছিল। কেহ জোরও করিতে পারে না। বিনু ও বিনুর মাও দেখি, বিনুর মতেরই সমর্থন করেন। আমার দৃষ্টিকোণ দিয়া কেহই দেখি জিনিষটিকে দেখে না। আমার ও আমার পরিবারের মধ্যের ব্যবধান একস্থানে এত গভীর, তাহা আমি পূর্বে ভাবিতেও পারি নাই। বিনুর মা'র সহ করিবার শক্তিকেই আমি উৎসাহপূর্ণ সম্মতি বলিয়া ভুল করিয়াছিলাম। ছেলেদের জন্য রাজনৈতিক পথ গ্রহণ করার মূলেও হয়ত রহিয়াছে এই আন্তরিক হৃদয়। তাহার পর দেখিলাম নিলু কলেজেও পড়িল—আমার এক পয়সাও নেয় নাই। কলেজের খরচ জুগাইয়াছিল বিনু। বিহার আর্থকোয়েক রিলিফের কাজ কংগ্রেসকর্মীদের উপর পড়িয়াছিল। এই কাজের পূর্ণিমা জেলার একাউন্টেন্ট

ছিল বিনু। তাহাতে সে তিরিশ টাকা করিয়া মাসহারা পায়।—এই টাকা সে নিলুর পড়ায় খরচ করে। দাদার নিকট হইতে টাকা লইতে নিলুর আপত্তি হইল না—যত সঙ্কোচ আমার টাকা লইতে! এত বড় নিশ্চয় আঘাত, আমার জীবনে আর কাহারও নিকট হইতে পাইয়াছি কিনা সন্দেহ!...অথচ একথা আমি মনে মনে ঠিক জানি যে পড়াশুনার দিক ছাড়া, নিলুকে যে কোন ক্ষেত্রে ছাড়িয়া দেওয়া যাক না কেন, সে সেই ক্ষেত্রের সর্বোচ্চ স্থানে উঠিবেই। আর বিনু শিক্ষকতার লাইন ছাড়া, অন্য কোন দিকে থাকিলে বিশেষ সাফল্য অর্জন করিতে পারিত না। কত ছাত্র এই হাত দিয়া বাহির হইয়া গিয়াছে, আর এটুকু বুঝিনা? কিন্তু নিলু, তোমার নিজের দাদার বিরুদ্ধে সাক্ষী দিবার মন্য আমি বুঝিতে পারি নাই। তোমায় পাটি আদেশ করিয়া থাকিলে আমার বলিবার কিছু নাই। মহাত্মাজীর আদেশ হইলে, আমিও আমার সর্বস্ব ত্যাগ করিতে প্রস্তুত আছি। কিন্তু কোন রাজনৈতিক পাটি কি এরূপ আদেশ দিতে পারে। নিলু ও বিনু উভয় দলেরই লক্ষ্য এক—কার্যক্রমে হয়ত একটু পার্থক্য হইয়া গিয়াছে। ইহার ফল কি এতদূর গড়াইতে পারে। গণনতের উপর যে পাটি নির্ভর করে, তাহার তো একমাত্র কর্তব্য হওয়া উচিত, জনতাকে অন্য দলের ভুলের কথা বুঝানো, আর বুঝাইয়া ভ্রান্তপথে চালিত জনমতকে নিজের দিকে করা। নিলুর নিশ্চয়ই আদেশ বুঝিতে ভুল হইয়াছে, আর এই ভুলের ফল ভোগ করিতেই হইবে। আমি তোমাদের ফর্মুলায়-ফেলা যুক্তি বুঝি না সত্য, কিন্তু সাদাবুদ্ধিতে যেটুকু বুঝি, তাহা ঠিক কি না, সে কথা তোমার দলের নেতৃস্থানীয়দের কাছে জিজ্ঞাসা করিয়া লইও। আর এখন তাহা ঠিক হউক বা বেঠিক হউক তাহাতে কি আসে যায়? অন্য় ও ক্ষতি বাহা হইবার হইয়া গিয়াছে। সারাজীবন উঠিতে বসিতে একথা তোমাকে খোঁচা দিবে। তিলে তিলে অনুতাপের জালা তোমাকে দগ্ধাইবে—তবুও তোমার কৃতকর্মের প্রায়শ্চিত্ত হইবে না। একি, নিজের ছেলেকে অভিসম্পাত দিতেছি নাকি? না, নিলু, ভগবান করুন, তুমি কোনো দিন যেন তোমার ভুল না বোঝো। তুমি তোমার

পাটির আদেশ সম্বন্ধে বাহা বুঝিয়াছ তাহাই যেন ঠিক হয়। কেন না উহার উপর ভর দিয়াই তুমি এখনও দাঁড়াইয়া আছো। তোমার মনের জোর যত অধিকই হউক না কেন, তোমার যুক্তির স্থায়িতা সম্বন্ধে তোমার সন্দেহ আসিলেই, তুমি ভাঙ্গিয়া পড়বে। “আমিতো জানি, তোমার কাছে তোমার দাদা কি ছিল।”

“মহাশয়জী !”

চোখ তুলিয়া দেখি, খেদনলালজী আমার সম্মুখে দাঁড়াইয়া আছেন।

“যুম আসিতেছে নাকি ?”

না বসিলেই ভাল। বসিলেই এখন অনর্গল কথা বলিয়া চলিবে, এত বাজে কথা বলিতে পারে ভদ্রলোক। ভদ্রলোকের তিন ছেলে—স্বরাজ প্রসাদ, স্বতন্ত্র প্রসাদ, আর সংগঠন প্রসাদ। আশ্চর্য্য নামগুলি। নিলু আর বিনু। আর্মার ছেলেদের নাম অতি সাধারণ। ভাবিয়া চিন্তিয়া নামকরণ করা হয় নাই। বাবা বিনুকে ডাকিতেন বলাই বলিয়া,—তাহা হইতেই ক্রমে বিনুতে দাঁড়ায়। নিলুকে বোধ হয় বাবা দেখেন নাই। না, যেবার নিলু হয়, সেই বারইতো বাবা মারা যান। ভেবেচিন্তে নাম রাখাও আবার এক ক্যাসাদ! খেদনলালজী তাঁহার মেজ ছেলে স্বতন্ত্র প্রসাদকে চিঠি লিখিয়াছিলেন। চিঠিতে অন্যান্য ছেলেদের নামেরও উল্লেখ ছিল। জেল সি-আই-ডি, সে চিঠি কিছুতেই পাস করিবে না। তাহার বিশ্বাস কোণ্ডে কোনো খবর পাঠানো হইতেছে। তাহার পর হইতেই সি-আই-ডি-র সহিত ইঁহার ঝগড়া চলিতেছে। ভাল কথায় বুঝাইয়া দিলেই হইত। তা' নয়, দুই জনেই নিজের নিজের জিদ বজায় রাখিবে। ভদ্রলোক ছোট ছেলেকে চিঠি লিখিয়াছিলেন। জিদাজিদির ফলে পরশু সে চিঠি ফেরৎ আসিয়াছে। চিঠির এক লাইন ছিল—“তোমরা যে এতদিন আমার চিঠি পাও নাই, তাহার উপর আমার কোনো হাত ছিল না। এ চিঠিখানি কিন্তু কোনো উল্লুর (পেঁচার) বালাও আটকাইতে পারিবে না।” সে চিঠিও ফেরৎ আসিল—সঙ্গে এক টুকরা কাগজে লেখা সি-আই-ডি-র নোট “এই কয়েদী চিঠিতে

নিজের বাবার সম্বন্ধে কি সব লিখিয়াছে, সেগুলি সন্দেহাম্পদ বলিয়া মনে হয়। সেইজন্য এই চিঠি পাস করা হইল না।”

একি, খেদনলালজী উঠিয়া যাইতেছেন যে। এখন আমার অনুরোধে কবলের উপর বসিলেন, আবার এখন চলিয়া যাইতেছেন। বোধ হয় আমি কথা বলিলাম না বলিয়া উঠিয়া পড়িলেন। কি মনে করিলেন ভদ্রলোক? ভদ্রলোক গিয়া বৈজনাথদের চেয়ারে বসিলেন। বৈজনাথের দল শুইয়া পড়িয়াছে বুঝি? বসিয়া রহিয়াছে খেদনলালজী, সুরজবল্লী বাবু, হরিহরজী আর রামশরণজী। বোধ হয় ইহারা পালারিয়া রাত্রি জাগিতেছে। জাগিয়া তো বোধহয় সকলেই আছে। পালারিয়া চারজন চারজন করিয়া আমার পাশের সিটে আসিয়া বসিতেছে। এই জগুই বুঝি বৈজনাথের দল কিছুক্ষণ আগে বসিয়াছিল? সদাশিউ আর বৈজনাথের ভিতর সেই যে প্রাইভেট কথা হইতেছিল, তাহা এই জগুই,—এতক্ষণে বুঝা গেল। ইহারা আমার উপর নজর রাখিতে চায়। পাহারা দিতেছে, পাছে আবার আমি কিছু করিয়া ফেলি। কে ইহাদের বুঝাইবে যে, আমাকে ইহারা যতটা উতলা মনে করিতেছে, আমি ততটা উতলা হই নাই। ছেলের উপর আমার যদি অত টান থাকিবে, তাহা হইলে কি বিন্দু আজ এই অবস্থা হয়? সদাশিউ আবার গেল কোথায়? আমারই খাটের উপর তো বসিয়াছিল। ও এইতো দেখিতেছি, আমার বিছানার উপরই শুইয়া পড়িয়াছে। বোধহয় উহার তন্দ্রা আসিতেছে। আহা, মশায় উহাকে একেবারে খাইয়া ফেলিল। উঠিয়া বরঞ্চ মশারিটা ফেলিয়া দিই। আমাকে উঠিতে দেখিয়া সুরজবল্লী বাবু ও হরিহরজী ছুটিয়া আসিলেন—“কেন কেন কি হইয়াছে? ছাড়ুন আমিই মশারি ফেলিয়া দিতেছি। আপনি বসুন।” চ্যাচামেচিতে সদাশিউ উঠিয়া বসিল। বেচারী একেবারে অপ্রস্তুত হইয়া গিয়াছে—ছি ছি এত গোলমালের কেন্দ্র সেই। আবার আসিয়া কবলের উপর বসি।

“বসুন সুরজবল্লী বাবু।”

সুরজবল্লী বাবু আমার পাশে কবলে আসিয়া বসিলেন। ভারি ভাল লাগে

ভদ্রলোককে। এমনিই গস্তীর প্রকৃতির লোক। তাহার উপর তাহার একমাত্র ছেলে গত আন্দোলনে আগষ্ট মাসে বন্দুকের গুলিতে মারা গিয়াছে। দশ বছর বয়সের ছেলে। তাহার বাবাকে যখন গ্রেফতার করিয়া থানায় লইয়া আসে, তখন দলে দলে লোক প্রোসেশন্ করিয়া থানার দিকে আসিতে থাকে। সেও ভিড়ের মধ্যে আসিয়াছিল, সদরে পাঠাইবার পূর্বে বাবাকে একবার দেখিতে। বাড়ীতে তাহার 'দাদী' (৪০) কান্নাকাটি আরম্ভ করিয়াছিলেন। মা জানালার ধারে বসিয়াছিলেন। তাহার কিছু বেশ লাগিতেছিল। "জয় সুরজবল্লী জী কি জয়"। অগণিত লোকের মুখেই তাহার বাবার নাম। সকলের মুখে তাহার বাবার প্রশংসা। বোম্বাইয়ে মহাত্মাজীর মিটিং হইয়াছে। আজ সকালেই বাবা সকলকে খবর শুনাইয়াছেন যে, মহাত্মাজী গ্রেফতার হইয়া গিয়াছেন। তাহার পরই হইল বাবার গ্রেফতার। মুহূর্তের মধ্যে লোকের মুখে মুখে বাবার নাম ছড়াইয়া পড়িয়াছে। বাবা মহাত্মাজীর মতো বড় হইয়া উঠিয়াছেন। পুলিশ-গুলোর উপর তাহার রাগ হইতেছে। কি জানি এই বুঝি তাহারা বাবাকে কিছু করে। জেলের কথাতেও আরো তাহার ভয় ভয় করিত। কিন্তু গত বৎসর তাহার বাবা সত্যগ্রহ করিয়া জেলে যাইবার সময় সে দেখিয়াছে, কত গাঁদা ফুলের মালা বাবার গলায়। দাদী তো তাহার পূর্বে বলিয়াছিলেন যে যেই বাবা "ন এক পাই, ন এক ভাই অংরেজকো লড়াইমে", (৪১) এই "নারা লাগাইবেন", অমনি পুলিশ লাঠীর গুঁতায় জান বাহির করিয়া দিবে। কিন্তু তাহার পরিবর্তে সে সময় সে দেখিয়াছিল যে দারোগা সাহেব—অত বড় একজন হাকিম—বাবাকে নিজের বাড়ীতে নিমন্ত্রণ করিয়া খাওয়াইয়াছিলেন। দারোগা সাহেবের স্ত্রী তাহাকেও ডাকিয়া খাবার খাওয়াইয়াছিলেন। বাবা কয়েক মাস পরে জেল হইতে ফিরিবার সময় বাবাকে করিয়া কত জিনিষ আনিয়াছিলেন। সাবান, পেন্সিল, রুলটানা খাতা। জেলের দাড়ী কামানোর "বিলেড" দিয়া, সে ছুরী তৈরী করিয়াছিল। সেই বাব্বার ভিতর সে "বিলায়তী দাঁতোয়ন" (৪২) দেখিয়াছে। 'নানা' মাথা নেড়া করিবার দশ বার দিন পরে, তাহার চুলগুলি বেরকম হয়,

বিনায়তী দাঁতোগানের সাদা রোঁয়াগুলিও ঠিক সেইরূপ দেখিতে। উহার উপর ক্ষীরের মতো দাওয়াই রাখিয়া দাঁতোগান করিতে হয়। ছোট বোন ধনখনিয়া এত বোকা যে তাহার গালে ঐ দাঁতোগান একটু ঘষিয়া দিলেই সে কাঁদিয়া ওঠে। ছোটবেলার নানাও তাহাকে ঐ রকম করিয়া দাড়ী ঘষিয়া দিবার ভয় দেখাইতেন।খানার তারের বেড়ার চারিদিক লোকে লোকারণ্য। খানার ছাদ দেখাই শক্ত, তো বাবাকে দেখা যাইবে। বেড়া ভাঙ্গিয়া জনসমুদ্র খানার “হাতায়” (৪৩) ঢুকিল। ভিড়ের চাপে সে ক্রমেই আগাইয়া যাইতেছে! সুরজবল্লী জী কী জয়! সকলে খানার দিকে দৌড়াইতেছে কেন? তাহার পর!.....

তাহার পরের দিন রাত্রে সুরজবল্লী বাবুকে ‘লকআপ’এর পর দরজা খুলিয়া জেলের বাহিরে লইয়া গেল। সুনীলাম সদর হাসপাতালে লইয়া যাইতেছে। উহাদের অসীম করুণা—শেষ মুহূর্তে দেখা করাইয়া দিয়াছিল। কয়েক ঘণ্টার জন্ত শ্মশান-ঘাটেও থাকিতে দিয়াছিল। ছেলেটির বাঁ পা-খানি হাঁটুর উপর হইতে কাটিয়া ফেলিতে হয়, আর তাহার পরই সিভিলসার্জন বুঝিতে পারেন যে সে বাঁচবে না!... পরের দিন সন্ধ্যায় যখন আবার সুরজবল্লীবাবু আমাদের মধ্যে ফিরিয়া আসিলেন, তখন তাঁহার সম্মুখে যাইতেই সঙ্কোচ হইতেছিল। সেই নির্ঝাক গস্তীর ভদ্রলোককে কি বলিয়া প্রবোধ দিব? সেদিন আমিও এইরূপই তাঁহার পাশে গিয়া বসিয়া ছিলাম। ভদ্রলোকও মুখের কোণে হাসির ব্যঞ্জনা আনিবার চেষ্টা করিয়া বলিয়াছিলেন “বসুন”। অনেকক্ষণ পর, কেবল একটা কথা বলিয়াছিলেন— “অল্পক্ষণের জন্ত জ্ঞান হয়। তখন আমার গলা জড়াইয়া ধরিয়া আমাকে বলিয়াছিল “উঃ, কি গরম জোরে আসে। না বাবুজী?” তাহার পর দুই ঘণ্টার মধ্যেই তো সব শেষ। একি! আমার চোখের কোণে জল আসিয়া গেল দেখিতেছি। না, এ জল আসিয়াছে সুরজবল্লীবাবুর প্রতি সহানুভূতিতে; বিনুর কথা ভাবিয়া নয়। সুরজবল্লী বাবুর চোখেও জল দেখিতেছি। একজনকে কাঁদিতে দেখিলে নিকটস্থ লোকের পক্ষে চোখের জল চাপা বড় শক্ত। ছি ছি, আমার এতটুকু নিজেকে সংযত করিবার ক্ষমতা নাই! এতটুকু সহ কুকরিবার শক্তি নাই! মহাত্মাজী,

আমার মনে বল দাও। একমাত্র সুব্রজবল্লী বাবুই আমার মনের অবস্থা ঠিক বৃত্তিতে পারিতেছেন। তাঁহার সহানুভূতি.....

বারান্দার উপর দিয়া দৌড়াইয়া কে এইদিকে আসিতেছে? ওয়ার্ডার সিংজী হাঁপাইতে হাঁপাইতে আসিয়া জানালার সম্মুখ হইতে লণ্ঠনটা উঠাইয়া লইল। তাহার পর ধীর পদক্ষেপে গভীরভাবে অন্তদিকে চলিয়া গেল। দুই এক মিনিট পর গরাদের দরজার সম্মুখে আসিয়া দাঁড়াইলেন, জাফর সাহেব—এসিস্ট্যান্ট-জেলর। আমাদের সকলকে হাসিয়া আদাব করিলেন;—তাহার পর আর অন্ত কোনো কথা না বলিয়া চলিয়া গেলেন। ইনি আসিয়াছিলেন রাত্রে রাউণ্ডে। এক একদিন এক একজন এসিস্ট্যান্ট জেলরের ডিউটা থাকে। এইজন্যই ওয়ার্ডার আসিয়া লণ্ঠন লইয়া গেল।...

আচ্ছা, সুব্রজবল্লী বাবুকে দাহকার্যের জন্য যেরূপ শ্মশানে যাইতে দিয়াছিল, আমাকেও কি সেইরূপ যাইতে দিবে? বোধহয় দিবে না। দিলে, আমাকে নিশ্চয়ই পূর্বেই খবর দিত। দিলে, বিনুর মুখটা একবার শেষবারের মতো দেখিয়া লইতে পারিতাম। দেখিবারই বা কি আছে? হয়ত সেদিকে তাকাইতেই পারিব না। না, না, বিনুর যে সুন্দর চলচলে মুখ আমার মনে গাঁথা আছে, সেই মুখই ভাল। সেই স্বাভাবিক পরিচিত মুখই আমার হৃদয়ে থাকুক। আবার কি না কি দেখিব! তবে কাল একবার বাহিরে যাইতে পারিলে, বিনুর সহিত দেখা হইত। উহার সহিত দেখা হওয়া এখন একান্ত দরকার। তাহার মনের এখন যা অবস্থা! শেষকালে কি করিতে কি করিয়া বসে এই আমার ভয়। একজন তো গিয়াছে। আর একজনের ভাগ্যে কি আছে, ভগবান তুমিই জান। আমার তো যাহা হইবার হইবে—ভাবনা বিনুর মাকে লইয়াই। সে তো নিশ্চয়ই নাওয়া খাওয়া ছাড়িয়া দিয়াছে। জেলের ভিতর কোনো খবর পৌঁছাইতে কি দেবী লাগে। সব খবরই সে পাইয়াছে। বিনুর সাক্ষী দিবার কথাও হয়ত সে জানে। সে কি করিয়া এ আঘাত সহ করিবে? রাজনীতির বন্ধুর ক্ষেত্র, সে ইচ্ছা করিয়া বাছিয়া লয় নাই। বানভাসির মতো ভাসিয়া আসিয়াছে মাত্র। তাহার স্বাভাবিক ক্ষেত্র একটা ঘর-

কণ্ঠার সংসার—নিবিড় সুখে ভরা, অতি দরদেব সহিত নিজহাতে গড়িয়া তোলা ; যে গৃহপ্রাচীরের মধ্যে বাহিরের কোনো বাত্যাবিক্ষোভ পৌঁছায় না, যে গৃহপ্রাচীর বিরাট অমুগলক জগৎকে সীমিত, প্রত্যক্ষ ও নিশ্চিত করিয়া দিয়াছে, তাহাই ছিল উহার কাম্য । সেখান হইতে একরকম জোর করিয়াই, আমি উহাকে এক অস্পষ্ট লক্ষ্যের কণ্টকময় পথে লইয়া আসিয়াছি । মুখ ফুটিয়া না বলিলেও সে ইহা সহ্য করিতে পারিবে কেন ? বিনুর মা অনেক সহ্য করিয়াছে ; কিন্তু সহ্যেরও তো একটা সীমা আছে ।...উহাকে কি কাল দাহকার্যের সময় যাইতে দিবে ? না যাইতে দিনেই ভাল । কর্তৃপক্ষ হয়ত কাহাকেও যাইতে দিবে না । হয়ত মিলিটারী লরীতে করিয়া শবদেহ লইয়া যাইবে । আর বোধহয় সুপারিন্টেণ্ডেন্ট বিশেষ খাতির করিয়া ব্রাহ্মণ ওয়ার্ডারদের দিয়া দাহকার্য্য করাইবে ।...জেলের চারিদিকে আজ কি সশস্ত্র পুলিশের পাহারা পড়িয়াছে ? তাহারা বোধহয় এতক্ষণ প্রাচীরের চতুর্দিকে টহল দিতেছে । বৃথাই পরিশ্রম করিতেছে । এত সতর্কতার কোনো প্রয়োজন ছিল না । বাহিরের আবহাওয়া কিরূপ জানি না ; জেলের ভিতরে তো বিন্দুমাত্র বিক্ষোভ ও কিছুমাত্র চাঞ্চল্য নাই । সবই অল্প দিনের মতো চলিয়াছে ।...সকালে হয়ত জেলগেটে খুব ভিড় হইবে । ছকুম অমান্ত করিয়াও বোধহয় কেহ কেহ শোকসভা করিবে । হয়ত সহরে হরতাল হইবে । কিন্তু আমার ক্ষতির তো তাহাতে কিছু পূর্তি হইবে না । বিনুর মাকে পর্য্যন্ত সাস্তুনা দিবার লোক কেহ নাই । তাহার ছোট বোন থাকে বৃন্দাবনে । সে তো সংসার সম্বন্ধে উদাসীন । বোনপো'দের সহিত ভাল করিয়া পরিচয় পর্য্যন্ত তাহার নাই । আর বিনুর নামা সরকারী কর্মচারী ; এমনিই তো একটু ছাড়াছাড়া ভাব । ৬বিজয়া দশমীর প্রণামী চিঠিটা পর্য্যন্ত আসে না । তাহার উপর আবার এই কাণ্ড । ইহার পর তো সে চাকরির খাতিরে আমাদের সহিত আত্মীয়তার কথা স্বীকার করিবেই না ।...নিলু বিনু কেহই আমার বাড়ী যাইতে চায় না । বড় হইয়া একবার গিয়াছিল । হঠাৎ একদিন দেখি চলিয়া আসিয়াছে । কেন চলিয়া আসিল কিছুই বঝা গেল না । পরে জানিতে পারিলাম । উহাদের মামা, আমার সম্বন্ধে মন্তব্য

প্রকাশ করিয়াছিলেন যে, আমি একজন পারফেক্ট ভ্যাগাবণ্ড। উহারা আমার সেই অপমান সহ্য করিতে পারে নাই। সত্যই তো—তাহার দৃষ্টিতে আমি ভ্যাগাবণ্ড ছাড়া আর কি? সংসার সম্বন্ধে দায়িত্ব জ্ঞান আমার নাই, অর্থোপার্জন করি না, আর হৈ হৈ করিয়া ঘুরিয়া বেড়াই। হিসেবী লোকে ইহাকেও ভ্যাগাবণ্ড বলিবে না তো, ভ্যাগাবণ্ড আর কাহাকে বলে? সাধারণতঃ উহারা আমাদের জানে পাগল বলিয়া। যখন একটু প্রশংসা ও সম্মানের দৃষ্টিতে দেখে, তখনই বলে ভ্যাগাবণ্ড। বিলাতে আগেকার কালে যে সব 'ভ্যাগ্রান্সি' আঠন ছিল, তাহার মধ্যে আমরা ঠিকই পড়িতাম। এখানে এখনও অনায়াসে আমাদের নামে বি-এল কেস চলিতে পারে। ১৯২১—২২ সালে অনেক বড় বড় কংগ্রেস নেতার বি-এল কেসে সাজা হয়।...ছেলে-পিলেরা এত ভাবপ্রবণ হয়। আমি হইলে তো হাসিয়া উড়াইয়া দিতাম। আর নিলুর কথাই বলি—নিজে তো বাবাকে যা সমীহ করিয়া কথা বলে তাহা বাড়ীর সকলেই জানে। অন্য লোকে কিছু বেফাঁস বলিয়াছে, আর কি রক্ষা আছে? তবে হাঁ, একথা আমি নিশ্চয়ই স্বীকার করিব যে এখনও আমার সম্মুখে সে কিছু বলে না। আমার মুখের উপর জবাব আজ পর্য্যন্ত সে কোনোদিন দেয় নাই।

যাই একটু মুখে চোখে জল দিয়া আসি। বসিয়া বসিয়া পিঠে কোমরে ব্যথা ধরিয়া গিয়াছে। নিজের শরীরের কথা কি লোকে ইচ্ছা করিয়া মনে করে—উহা যে মনে করাইয়া দেয়। উঠিতেই সুরজবল্লী বাবু জিজ্ঞাসা করেন "কি কোথায় চলেন?"

বলিলাম "ড্রামে, একটু মুখহাত ধুয়ে আসি"।

একটা এরোপ্লেনের শব্দ কানে আসিতেছে। ইহাদের যাতায়াতের আর বিরাম নাই। যাহাদের শত শত লোক যুদ্ধে মরিতেছে, তাহারা একটা প্রাণের মূল্য কি বুঝিবে। আমার চোখে বিনু, আমার ছেলে। কিন্তু উহাদের চোখে? যুদ্ধকালে কি অন্য সময়ের বিচারের সাধারণ মান বজায় রাখা চলে? আজ সাধারণ নাগরিক, রক্তমাংসে গড়া বিচার বুদ্ধিশীল মানুষ নয়,—আজ তো তাহার পরিচয় আইডেনটিটি

কার্ডএ, রেশন টিকিটের নম্বর। যুদ্ধরত নৈনিকদের কথা ছাড়িয়া দাও। সর্বত্রই স্বাভাবিক জীবন লোকে ভুলিয়া গিয়াছে। পূর্বে হুই একখান এরোপ্লেন চানিয়া যাইলে লোকে চোখ তুলিয়া দেখিত, এখন তিন ডজন বোম্বার্ক একত্র গেলেও কেহ তাকাইয়া দেখে না। যখন বোম্বা পড়িতেছিল, তখন কলিকাতার লোকেরা কি এইরূপ উদাসীনতার সহিতই ব্যাপরটীকে লইয়াছিল। তাহারা কি বিন্দুমাত্র বিচলিত হয় নাই? লোকদের এখন বিনুর কথা ভাবিবার অবকাশ কোথায়? লোকেরাই যদি না ভাবিল, তাহা হইলে গভর্নমেন্টের কি মাথা ব্যথা পড়িয়াছে? বিনুর দল ঠিকই বলে—কাহার হৃদয় পরিবর্তন করিবে? হৃদয় থাকিলে তো তাহা পরিবর্তিত হইবে! কিন্তু একথা তো ঠিক যে, হিংসা যত বাড়াইবে, অপর পক্ষের দমনও ততই বাড়িবে। অতটা দমন সহ্য করিবার শক্তি কি দেশের লোকের আছে। লক্ষ্যে পৌঁছিবার আকাঙ্ক্ষা কতটা তীব্র, তাহার মাপকাঠি হইতেছে যে তাহার জন্ম কতটা ভাগ করিতে দেশ প্রস্তুত আছে। এই সোজা কথাটা বিনুরা বোঝে না। ঝাঁপাইয়া পড়িবার আগে, নিজেদের সামর্থ্যও তো বিচার করিতে হয়।...

মুখহাত ধুইয়া, গামছা দিয়া মুখ মুছি। একি, দাসজী উঠিয়া পড়িয়াছে দেখিতেছি। আমার মুখহাত ধুইবার ও কুলকুচার শব্দে উহার ঘুম ভাঙ্গাইয়া দিলাম না তো। না বোধহয় তিনটা বাজিয়া গেল। ভদ্রলোক প্রত্যহ রাত তিনটার ওঠে। তাহার পর কি শীত কি গ্রীষ্ম আধঘণ্টা টবে বসিয়া থাকিবে। অনেক খরচ করাইয়া জেল ফ্যাক্টরী হইতে জলচিকিৎসার টব তৈয়ারী করাইয়াছে। কতকটা ইজি চেয়ারের মতো দেখিতে। তাহার মধ্যে গলা পর্যন্ত জলে ডুবাইয়া বসিবে, আর মুখ দিয়া একটা শব্দ করিবে। গাড়ুর নল দিয়া জল ঢালিবার সময় বেকুপ শব্দ হয়, আওয়াজটা সেই ধরণের। বিছানার চাদর টাঙ্গাইয়া টবের চারিদিকে একটা পর্দা করিয়া রাখিয়াছে। বাধ লওয়া শেষ হইলে, তাহার পর করিবে শীর্ষাসন। আধঘণ্টার উপর মাথা নীচের দিকে, পা উপর দিকে করিয়া, নিশ্চল নিঃস্পন্দ হইয়া থাকিবে। আমার ভয়ই করে, কোনদিন আবার নাক মুগ দিয়া যুক্ত না বাহির হইয়া যায়।

নিজের সিটে কিরিয়া আসিলাম। সুরজবল্লী বাবু বসিয়া আছেন। বিনু এখন কি করিতেছে। বোধহয় ভয়ে চিন্তায় জর্জরিত হইয়া সেলের মধ্যে পায়চারী করিতেছে। আমার কথা কি উহার একবার মনে পড়িবে? আমার সম্বন্ধে বিনু শেষ মুহূর্ত্তে কি ভাবিয়া গেল, তাহা যদি জানিতে পারিতাম, বিনুকে সে দোষ দিবে না। তাহাকে সে ক্ষমা করিবে, একথা আমি জোর করিয়া বলিতে পারি। এখন তাহার মনের অবস্থা যে কি হইতেছে তাহা ভগবানই জানেন। হয়ত পাগলের মতো হইয়া গিয়াছে। উন্মোখুন্মো চুলগুলি হয়ত ছইহাত দিয়া ছিঁড়িতেছে। হয়ত গরাদের উপর মাথা ঠুকিতেছে। হয়ত ছেলেনানুষের মতো ওয়ার্ডারকে দরজা খুলিয়া দিবার জন্য অনুরোধ করিতেছে। না না, বিনু কি কখনও এমন করিতে পারে? হুঃসহ মর্ষ বেদনায় তাহার হৃদয় চূর্ণ বিচূর্ণ হইয়া গেলেও তাহার মুখে সে ভাব প্রকাশ পাইবে না। শেষ মুহূর্ত্ত পর্যন্ত উহার আদর্শের যোগ্য সম্মান বাহাতে বজায় রাখিতে পারে, তাহার চেষ্টা সে করিবে। সুপারিন্টেণ্ডেণ্টকে দেখাইবার জন্য, সে জোর করিয়া শেষ মুহূর্ত্তে মুখে হাসি আনিবার চেষ্টা করিবে; জেলরকে হয়ত কৌতুক করিয়া কিছু বলিবে, সিঁড়ী দিয়া মঞ্চে চড়িবার সময়, হয়ত অফিসারদিগকে ধন্যবাদ দিয়া বাইবে, এমন সুন্দর প্রত্যুষে শুকতারাজীকে সাক্ষী রাখিয়া, তাহাকে ফাঁসী দিবার জন্য; কিন্তু সে কিছুতেই দুর্বলতা দেখাইয়া তাহার নাম এবং বিশেষ করিয়া তাহার পাটির নাম কলঙ্কিত হইতে দিবে না। আমার ছেলে, আমার বড় ছেলে, তাহাকে আর আমি চিনি না! সাথে কি আর সবাই বিনুকে ভালবাসে? হৃদয় ছবে ছবেইন বিনু বলিতে অজ্ঞান, সহদেওএর মা বিনু বলিতে পাগল, আর জিতেনের মা বৌঠাকরুণের তো কথাই নাই। বিনুও স্নেহের কাঙাল কম নয়। জিতেনের মা বৌঠাকরুণ তো বাড়ীর লোকের মতো। অন্য অল্প পরিচিত স্থানেও, যেখানেই স্নেহ বর্ষণের ইচ্ছিত পাইয়াছে, সেইখানেই বিনু সেই ধারাকে স্থায়ী করিতে ও বজায় রাখিতে সচেষ্ট। কোথাও হোলীর পর প্রণাম করিতে যাইবে। কোথাও আশ্রম হইতে লেবু পাঠাইয়া দিবে। কাহারও বা ছেলের পড়ার ব্যবস্থা

করিয়া দিবে। এ ধরনের কাজের তাহার অন্ত নাই। এসব স্নেহেব দায়িত্ব নাই, কোনো দাবী নাই, বন্ধনও সর্বত্র সেরূপ দৃঢ় নয়। ইহা কেবল স্নেহ আদায় করার নেশা। বাড়ীতে মাঘের স্নেহের উপর এগুলি উপরী পাওনা সেইজন্য ইহার আমেজ এত মধুর। নিলুর কিন্তু এসবের বালাই নাই। স্নেহের দাবী জন্মাইবার মতো, মিষ্টি করিয়া কি সে কথা বলিতে জানে? নিজের খেরালেই সে উন্নত! নিজের মত প্রব সত্য বলিয়া মনে করিয়া, তাহা জোরের সহিত ব্যক্ত করিতেই সে বাস্ত। স্নেহের ঋণ শোধ দিবার জন্য, যে সকল ছোট ছোট কর্তব্যগুলি সর্বদাই করিতে হয়, তাহাতে সময় নষ্ট কি নিলু করিতে পারে? ততক্ষণ তাহাদের সমালোচনা করিতে পারিলে, তাহার আনন্দ বেশী হইবে। আর বিলু? বিলু যেন লোককে বাছ করিতে পারে। বাবাকেও করিয়াছিল। বলিতে নাই, তিনি স্বর্গে গিয়াছেন, বাবার চিরকালই রাগটা একটু বেশী। কতদিন দেখিয়াছি,—খাইতে বসিয়াছেন; রান্না পছন্দ হইতেছে না; প্রথমে একটু খুঁত খুঁত করিলেন, তাহার 'রেসেড্ ডায়েট' এই কথাটা বলিয়া, ঠক করিয়া স্নানের ঘাসটা মাটিতে ঠুকিয়া উঠিয়া পড়িলেন। না খাইয়া অফিসে চলিয়া গেলেন। এদিকে বাড়ীতে মাকেও সারাদিন না খাইয়া থাকিতে হইল।...চা খারাপ হইয়াছে, আর বাবা "যত সব!" এই কথাটা বলিয়া, কাপ সমার ছুঁড়িয়া ফেলিয়া দিয়াছেন। এরূপ কত দিনের কথা মনে আছে। বৃদ্ধ বয়সে রাগ আরও বাড়িয়াছিল। শেষকালে অল্প অল্প পাগলামীর লক্ষণ দেখা দিয়াছিল। পা দুইখানি ধীরে ধীরে অকর্মণ্য হইয়া বাইতেছিল। বাবা হইয়া তাঁহাকে কানী 'ছাড়িয়া পূর্ণিয়া আসিয়া থাকিতে হয়। দেহ বতই অপটু হইতেছিল, কোষও ততই বাড়িতেছিল। এই সময় আসে বিলু। দিনরাত ঐ একরক্মি ছেলেকে লইয়াই আছেন। চলা ফেরা করিতে পারেন না, ইজিচেয়ারে শুইয়া থাকেন, কিন্তু বলাইকে চোখের আড়াল করিবেন না। অন্য কোন বাড়ীর মেয়েরা বেড়াইতে আসিলেই বলিতেন, উহারা ডাইনী—বলাইকে বাছ করিবার জন্য আসিয়াছে। বিলুর মাকে ইহার জন্য কত গালাগালি দিতেন। শেষকালে বখন শব্দ্য লষ্টলেন তখন

মাথা বেশ খারাপ হইয়া গিয়াছে। খাটের চারিদিকে কাঠের ফ্রেম করিয়া দিলাম, বাহাতে গড়াইয়া নীচে না পড়িয়া যান। কথা প্রায় বন্ধ হইয়া গেল। চোখ বুজিয়া থাকেন। বোধশক্তিও বেশ কম হইয়া গিয়াছিল। কিন্তু ইহার মধ্যেও রাগ কমে নাই। বিনুর মাকে ও আমাকে আঁচড়াইয়া খামচাইয়া অস্থির করিয়া দিতেন। ভাত খাওয়াইয়া দিবার সময় আঙ্গুল কামড়াইয়া ধরিতেন। কিন্তু তখনও বিনুকে তাঁহার কাছে বসাইয়া দিলেই সব ক্রোধ নিমেষে কোথায় চলিয়া যাইত! খুব রাগে বিছানায় ছেলেমানুষের মতো গড়াগড়ি দিতেছেন, বিনুর কচি কচি হাত দুখানি যেই তাঁহার মুখের উপর রাখিয়া দিতাম, অমনি মন্ত্রমুগ্ধ সাপের মতো ঠাণ্ডা হইয়া যাইতেন। হরত চোখ বুঁজিয়া আছেন; আমরা কত ডাকাডাকি করিতেছি; কিছুতেই চোখ খুলিবেন না। যত বলিতেছি, ততই বেন দুষ্ট ছেলের মতো তাঁহার জিদ বাড়িতেছে। আমরা বিনুকে বলিয়া দিলাম, ‘বিনু দাছকে ডাক তো।’ আশ্চর্য্য এই অর্দ্ধ চৈতন্য অবস্থার মধ্যেও ঠিক বুঝিয়াছেন যে বিনু ডাকিতেছে। অমনি হাত দিয়া খুঁজিতে আরম্ভ করিলেন বিনু কোথায়। তাহার পর চোখ খুলিয়া তাকাইলেন।...যেদিন বাবার সব শেষ হইয়া গেল, সেদিন শেষ মুহূর্ত্তেও বাবার কানের কাছে মুখ লইয়া বলিয়াছি “বাবা! বলাই ডাকছে, বলাই, বলাই।” তখনও মনে ক্ষীণ আশা যে যদি বিনুর নাম শুনিলে সাড়া দেন। কিন্তু তখন তিনি কোন ডাক কানে পৌঁছিবার বাহিরে।...আশ্চর্য্য বুদ্ধি ছিল বিনুর। কতই বা তখন বয়স। সে ছাড়া আর কেহ যে দাছকে বশ করিতে পারে না, একথা অতটুকু ছেলে ঠিক বুঝিয়াছিল। তাহার দাছকে ঠাণ্ডা করিবার জন্ত বা খাওয়াইবার জন্ত যে তাহার উপস্থিতির প্রয়োজন, একথা সে তাহাকে ডাকিবার স্বর শুনিয়াই বুঝিতে পারিত। তখন যেন একটু ঔনামীজ ও নকল গান্ধীর্ষ্য দেখাইত। বোধ হইত বেন সে চায় যে তাহার মা একটু তাহার খোসামোদ করুক।...বিনু কি তাহার দাছকে আবার দেখিতে পাইবে? বাবা, আমাদের বলাইকে কি শেষকালে এমনি করিয়া নিজের কাছে টানিয়া লইলে?...

মন বড়ই অস্থির লাগিতেছে। ঘরের মধ্যে এত লোক। সকলে জাগিয়া

রহিয়াছে। ঘরের বাহিরে ওয়ার্ডার। ঘরের গল্প গুজবের শব্দ ক্ষীণ হইয়া আসিলেও একেবারে বন্ধ হয় নাই। দাসজীর স্নানের সময়ের শব্দ কানে আসিতেছে। ঘর একটু ঠাণ্ডা হইয়াছে। বাহিরের কুকুরের ডাক শুনা যাইতেছে। তবুও কেমন যেন থমথমে ভাব আকাশে বাতাসে চারিদিকে।

গরাদের ভিতর দিয়া আলো বাহিরের বারান্দায় গিয়া পড়িয়াছে। শাড়ী পরা—ও কে? না ও কতকগুলি জালানী কাঠ জড় করা রহিয়াছে, তাহার উপর আলো পড়িয়া ঐরূপ দেখাইতেছিল। বিষুণ-দেওজী মেসের জালানী কাঠ পর্যন্ত সঞ্চয় করিয়া রাখিবে। জেলের সকলেরই দেখি এই সঞ্চয়ের প্রবৃত্তি। ছেঁড়া জামা, পুরানো খড়ম, সব জমানো চাই। জেলে থাকিলেই এইরূপ মনোবৃত্তি হয়। কাঠের বোঝা দেখিয়া হঠাৎ এরূপ দৃষ্টি বিভ্রম হইল কেন?...আশ্রমের বান্ধবের বারান্দায় চেল। কাঠ আর ঘুঁটের স্তূপ। ঘরের ভিতর বিলুর মা রাখিতেছে। বিলু কোথায় ঘেন যাইবে। তাই সে খাইতে বসিয়াছে। এত তাড়াতাড়ি খায় কিছুতেই চিৎসাইবে না।...উন্মোখুন্মো রুক্ষ চুল। জেলের আধ ময়লা নীল ডোরা কাটা গেঞ্জি ও জাম্বিয়া পরা। রোগা ক্যাকাশে হইয়া গিয়াছে.....

ভগবান! গান্ধীজি! তোমাদের নাম লইয়াও তো গনে বল পাইতেছি না। আমার চরখাটা লইয়া বসি। ইহাই আমার শেষ সম্বল, অন্ধের বসী, আমার জপের মালা।...তিব্বতে 'ঘারবেদা চক্রের' (৪৪) স্তায় একটি জিনিষ দুর্ভাগ্য লোকে নাম জপ করে।...সুরজবল্লী বাবুর দিকে হঠাৎ চোখ পড়িল। ভদ্রলোক চিন্তামিগ্ধভাবে আমার মুখের দিকে তাকাইয়া আছেন। আমার মুখে চোখে ব্যবহারে নিশ্চাই কোন বৈলক্ষ্য প্রকাশ পাইয়াছে। এত ধারাপ পাঁজগুলি—সূতা কেবল কাটিয়া কাটিয়া যাইতেছে।...বিদেশে একটু অসুখে পড়িলে লোকে ব্যস্ত হইয়া উঠে; আত্মীয় পরিজনকে দেখিতে ইচ্ছা করে; বাড়ীর লোকের দরদভরা সেবার জন্ত মন ব্যাকুল হয়। আর আজকের মত দিনে বিলু বাড়ীর লোককে কাছে পাইল না। হয়ত কত কিছু তাহার বলিবার ছিল। ছেলেদের সামান্য অসুখে, বিলুর মা'র স্নানাহার বন্ধ হইয়া যায়। দারা দিনরাত রোগীর বিছানার পাশেই কাটে।

পাখা করিবার বিরাম নাই। আরোগ্যের পথে আসিলে, পথ্যাপথ্যের কত বিচার। জ্বর ছাড়িবার পরের দিন কেবল একটু শুকতো ; তাহার পরের দিন দুধ পাঁউরুটি ; তাহার পরের দিন আটার রুটি ; তাহার পরের দিন ভাত। নিলু বিনু জানে যে জ্বর হইলে ইহার ব্যতিক্রম হইবার জো নাই।...কিন্তু আজ আমি ইহাদের এমন অবস্থায় আনিয়া ফেলিয়াছি যে অস্তিম মুহূর্তে বিনুর না বিনুকে নিজের কাছে পাইবে না।...অনেক জানোয়ার নিজের সন্তান খাইয়া ফেলে। আমি কি তাহাদেরই দলে ? আবার সূতা কাটিয়া গেল। বোধহয় খুব মিহি সূতা কাটিতেছি বলিয়া বারবার ছিঁড়িয়া যাইতেছে। না, ইহা অপেক্ষা মোটা সূতা কাটিলে তো প্রায় সতরঞ্চি বোনার সূতা হইয়া বাইবে।...

নেপালে শুনিয়াছি, একজনের বদলে আর একজন রাজদণ্ড ভোগ করিতে পারে। সত্য কিনা জানি না, তবে শুনিয়াছি বড় লোকেরা চাকর বাকরদের নিজেদের পরিবর্তে জেলে পাঠাইয়া দেন। এখানে যদি এমন একটা নিয়ম থাকিত, বাহাতে বিনুর বদলে আমার গেলেও চলিত...।

কত গল্প শুনিয়াছি যে একজন আর একজনের রোগ নিজের উপর লইয়াছে। হুমায়ূনের মৃত্যু শয্যায় বাবর এইরূপ করিয়াছিলেন। যুদ্ধের সময় যে হোস্টেজ রাখে, তাহা একটি প্রাণের পরিবর্তে আর একটি প্রাণ দাবী করা ব্যতীত আর কি ?

আবার সূতা ছিঁড়িল। তুলাটাই বোধ হয় পুরানো। এতবার সূতা ছিঁড়িলে কি চরখা কাটা যায়। এই পাজ দিয়া তো পূর্বেও সূতা কাটিয়াছি, তখন তো ছেঁড়ে নাই। না, আমার হাত-পা কাঁপিতেছে। পাজটী ঠিক ধরিতে ও ইচ্ছামতো টানিতে পারিতেছি না। চোখের মণিও নাচিতেছে। সূতা ঝাপসা হইয়া যাইতেছে, লণ্ঠনটার তেল বোধহয় ফুরাইয়া আসিয়াছে। চোখের দৃষ্টিই বা আর কতকাল থাকিবে, বয়সের কি গাছ-পাথর আছে ? না বৃথাই নিজেকে ভুল বুঝাইবার চেষ্টা করিতেছি। আমার এখনকার মানসিক অবস্থায়, চরখা কাটা অসম্ভব।...সোরাব-রুস্তমের কাহিনীর মূলে কোনো ঐতিহাসিক সত্যই নাই, —উহা সম্পূর্ণ কাল্পনিক। পিতা-পুত্রে কি কখনও ঐরূপ হইতে পারে ? হইবে না

কেন, পৃথিবীতে সবই সম্ভব। সিংহাসন নইয়া পিতা-পুত্রের যুদ্ধ ইহাই তো ইতিহাসের সাধারণ ধারা।……কিন্তু আনার আর কি শাস্তি হইতেছে। শাস্তি হইয়াছিল, শিখগুরু বান্দার। নিজের হাতে বুকের ছলনাকে হত্যা করিতে হইয়াছিল। “উঃ, কি রক্ত! ফিনকী দিয়ে রক্ত বের হয়েছিল বুকের ভেতর থেকে!”

সুরজবল্লীবাবু জিজ্ঞাসা করেন “কিছু বলেন নাকি?”

অপ্রস্তুত হইয়া বলি “না কিছু বলিনি তো। বুঝি যে, শেষের কথাগুলি অন্তমনস্কভাবে জোরে বলিয়া ফেলিয়াছি। সুরজবল্লীবাবু আমতা আমতা করিয়া বলেন “চরখা কাটতে একটু-উ—একটু যদি-ই ইয়ে হয়, তাহ’লে এখন থাক না কেন।”

বলি না না “বেশ তো হ’ছে।”

মনে হইতেছে যেন অন্তায় করিতে গিয়া ধরা পড়িয়া গিয়াছি। কথার উত্তর দিতে গিয়া কথা জড়াইয়া আসিতেছিল, কোনো রকমে ঐ ছোট কথাটা শেষ করিয়া, সূতার দিকে দৃষ্টি নিবদ্ধ করিতে পারিলে যেন বাঁচি। পাঞ্জের যেখান হইতে সূতা বাহির হইতেছে, জোর করিয়া সেইদিকে তাকাইয়া আছি—যাহাতে কাহারও সহিত চোখো-চোখি না হইয়া যায়। চোখ ফাটিয়া জন আসিতেছে। নিশ্চয়ই রাত্রি জাগিয়াছি বলিয়া; আর অন্য কোন কারণে নয়। রাত জাগিলেই চোখ জালা করে। মহাআজী, আমার মনে বল দাও। সংসদের বাঁধ আর বুঝি থাকে না। আর তো নিজেকে ঠিক রাখিতে পারিতেছি না।……

সুরজবল্লীবাবু বলেন “মাষ্টার সাহাব! মাষ্টার সাহাব! ও মাষ্টার সাহাব!”

যেন বহু দূর হইতে এই শব্দ কানে ভাসিয়া আসিতেছে। তন্দ্রার ঘোরে দূর হইতে বেলগাড়ীর শব্দ যেমন লাগে সেইরূপ। বুঝিতেছি, সুরজবল্লীবাবু ডাকিতেছেন। কিন্তু সাড়া দিতে ইচ্ছা করিতেছে না। সুরজবল্লীবাবু পিঠে হাত দিয়াছেন—দরদী হাতের স্পর্শ লাগিতেই আর নিজেকে সংযত রাখিতে পারি না। “বিলু! বিলু!” চরখা পাঁজ ফেলিয়া সুরজবল্লীবাবুর হাত চাপিয়া ধরি। দুই

অন্যেই নির্ঝাক। ভদ্রলোকের চক্ষু হইতেও অশ্রুর ধারা বহিতেছে। চেয়ার ছাড়িয়া ও চারজনও আসিয়া পড়িল। ছি, একি করিলাম! লোক জড় হইয়া গেল যে! তাড়াতাড়ি হাত ছাড়িয়া দিই। আবার চরখার বসিবার চেষ্টা করি। বৃথা চেষ্টা। সদাশিউ আবার দেখি পাথা করিতে আরম্ভ করিল। ও তো বুঝি ঘুমাইয়া পড়িয়াছিল। আবার উঠিল কখন? সুস্থ লোককে আবার পাথা করার কি দরকার? উহারা কি ভাবিতেছে যে আমি এখনই অজ্ঞান হইয়া যাইব?

সদাশিউকে বলি, “বেশ ঠাণ্ডা হাওয়া হছে। আর পাথা করবার দরকার নেই।”

কে কাহার কথা শোনে।

কিছুক্ষণ পর সুরজবল্লীবাবু খুব আশ্চর্যে আশ্চর্যে আমাকে জিজ্ঞাসা করিলেন “একটু গীতা পড়বো, শুনবেন?”

এমন দরদভরা মিষ্টি কথা; অনুরোধ এড়াইবার জো নাই। বলি, “পড়ুন।”

আবার চরখা কাটিতে বসি। উনি গীতা পাঠ আরম্ভ করেন। আমি বুঝিয়াছি কেন উনি আমার সম্মুখে গীতা পাঠ করিতে চান। আমার মনে বল আনিবার জন্ত নয়, সহানুভূতিতে নয়, নিজেদের হুশিচিন্তা দূর করিবার জন্ত নয়—শব্দেহবাহী মিলিটারী লরীর শব্দ, আর ম্যাজিষ্ট্রেট ও ডাক্তার সাহেবের মোটরকারের শব্দ যাহাতে আমার কানে না পৌঁছায় সেই জন্ত। ইহার পূর্বে যতগুলি ফাঁসী হইয়াছে, তাহার প্রত্যেকটির বেলায়ই আমরা ভীতিমিশ্রিত উৎকণ্ঠার সহিত এই শব্দের জন্ত অপেক্ষা করিয়াছি। মোটর হর্ণের তীব্র কর্কশ ধ্বনি তখন আমাদের স্নায়ুগুলীকে যেন হঠাৎ আলোড়িত করিয়া দিয়াছে। তাহার পর আসিয়াছে ওয়ার্ড জুড়িয়া এমন নিস্তরতার রাজ্য, যে নিজের বুকের ধড়ফড়ানির শব্দও শোনা যায়। তখন সময় যেন কাটিতেই চায় না—সকাল যেন আর হয় না। আবার মোটর লরীর শব্দ হইতে লোকে বুঝিতে পারে না স বাহিরে গিয়াছে। তাহার পর নয়টা ঘণ্টা পড়ে, কয়েদীদের জাগাইবার জন্ত। ফাঁসীর দিন সকলে জাগিয়াই থাকে—তথাপি নিয়মের ব্যতিক্রম হইবার উপায় নাই। ইহার পর শোনা যায় দুইটা ঘণ্টা—সকালের “গিনতী মিলানের”।

সে ধ্বনি সকলকে জানাইয়া দেয় যে রাত্রে যতগুলি কয়েদী বন্ধ করা হইয়াছিল, প্রাতঃকালেও ঠিক ততগুলিই আছে—একটীও বাড়ে নাই, একটীও কমে নাই। সব ওয়ার্ডের ওয়ার্ডাররা নিজের নিজের ওয়ার্ডের কয়েদী সংখ্যা জানিয়ে দেয় গুহ্যমুহুর্তে। এগুলির টোটাল রাত্রের সংখ্যার সহিত মিলিয়া গেলেই, এই অভাবনীয় সংবাদ চতুর্দিকে প্রচার করিয়া দেওয়া হয়, দুইটা ঘণ্টার মধ্যে; জেলর সাহেব চাবি দিয়া দেন জমাদারের কাছে, আর সব ওয়ার্ডের দরজা খোলা হয়। পিঁপড়ার সারির জায় লাইন বাঁধিয়া বাহির হয় কয়েদীরা। “জোড়া ফাইল।” “জোড়া ফাইল”! মেয়াদের একটা দিন তাহার কমিয়া গিয়াছে, নূতন উত্তমে, দুর্ব্বহ দুর্ভতিক্রম্য আর একটা দিন মুছিয়া ফেলিবার জন্য সে সচেষ্ট হয়। প্রতিটা ঘণ্টা তাহাকে মনে করাইয়া দেয় যে চব্বিশ ঘণ্টায় একদিন কাটিয়া গেল— এখনও এত দিন বাকী থাকিল।.....

আমাকে ইহারা ভুলাইতে চেষ্টা করিতেছে। কিন্তু এখন কি বিলুর কথা ভুলিতে পারা যায়? এখন কি চেষ্টা করিলে অগ্রমনস্ক হওয়া যায়? হইতে পারিলে তো বাঁচিয়া যাইতাম।...ভগবানের অশেষ করুণা যে একসঙ্গে একই মুহূর্তে একটার বেশীর বিষয় ভাবা যায় না। বিলু যদি শেষের কিছুক্ষণ, নিজের মৃত্যুর কথা ব্যতীত অন্য কোনো কথা ভাবিতে পারে, তাহা হইলে সে মানসিক অশান্তি ও আতঙ্ক হইতে বাঁচিতে পারে। হয়ত ব্যথা বৃদ্ধিতেও পারিবে না। ভগবান, তোমার নিকট হইতে কখন কোনো জিনিষ চাহি নাই। আজ এই কঠিন বিপদের সময় আমার সকল সিদ্ধান্ত জলাঞ্জলি দিয়া, তোমাকে আমার ইচ্ছা না জানাইয়া থাকিতে পারিলাম না। ভগবান, বিলুকে শেষ মুহূর্তে অন্য কথা মনে পড়াইয়া দিও, অন্য কথা ভাবিবার ক্ষমতা দিও। অন্তিম মুহূর্তের অনেক পূর্ব হইতেই, মৃত্যু ভয়ে তিলে তিলে যেন তাহাকে না মরিতে হয়।...টেলিপ্যাথি কি সত্য! আমার মনের ইচ্ছা আকাঙ্ক্ষা বিলুর কাছে পৌঁছিতেছে? বিলু দেখো, তোমার বাবা, তোমার অন্য নিজের কাছে, ভগবানের কাছে আজ কত ছোট হইয়া গেল!.....

স্বরজবল্লীবাবু গীতা পাঠ করিতেছেন। অতি পরিচিত গীতার শ্লোকগুলি যেন

শুনিয়াও শুনিতে পাইতেছি না, শুনিতে পাইয়াও বুঝিতে পারিতেছি না। শব্দতরঙ্গ কানে পৌঁছিতেছে, কিন্তু মনে ও মস্তিষ্কে সাড়া জাগাইতে পারিতেছে না। —বিরাট যুদ্ধক্ষেত্রের সম্মুখে দাঁড়াইয়া গীতার বাণী শোনা ছাপর যুগেই সম্ভব হইয়াছিল; আমি তো আর হুজুঁন নই। আমরা আর গীতার মর্ম কি বুঝিয়াছি? যে নাস্তিক বিনু গীতা ফেরৎ দিয়াছিল, সেই কিন্তু কর্মঘোণের মূলমন্ত্র বুঝিয়াছে, কাজের মধ্যে নিজেকে লীন করিয়া দিয়াছে। আর নিলু, সেই বা কম কিসে? তাহার কঠোর কর্তব্য জ্ঞানের সম্মুখে স্নেহ ভালবাসা, আত্মীয়তার দাবী, জনমত, অত আদরের দাদা—সব তুচ্ছ হইয়া গিয়াছে। ইহাদেরই আবার আমি ভাবি নাস্তিক। ঈশ্বরে বিশ্বাস আমাদের মনে বল আনে; আর ঈশ্বরে অবিশ্বাস ইহাদের মনে দুর্বলতা আনে নাই। যে জিনিষে অপরের পতন, তান্ত্রিক সাধকের হয় তাহাতেই সিদ্ধি।... ..

“অ্যা”! চমকিয়া উঠিয়াছি। হাত হইতে পাঁজ পড়িয়া গেল। চরখার ঘর্ঘর আর গীতা পাঠের একঘেয়ে সুর ভেদ করিয়া, অল্প সকল শব্দ ডুবাইয়া দিয়া, শোনা গেল মোটর লরীর হর্ণ—তাহার পর মোটর থামিবার শব্দ। আমার বুকের উপর দিয়াই যেন লরীখানি চলিয়া গেল, টানিয়া বদি ধরিয়া রাখিতে পারিতাম,—গায়ের জোরে, বত শক্তি আছে আমার শরীরে—কাঁকরভরা রাস্তার উপর দিয়া আমাদের টানিয়া লইয়া যাইতেছে—লরীর ঢাকা থামাই, এত জোর কি আমার আছে—লরী থামিল—আমার হৃদস্পন্দনের সহিত সুর মিলাইয়া মোটর ইঞ্জিনের শব্দ হইতেছে—ক্রুর হিংস্র জন্তুর নির্ঘোষের মতো।...সদাশিউ পিঠে হাত বুলাইয়া দিতেছে। চারিদিকে সকলে আসিয়া দাঁড়াইয়াছে, কেহ গাড়ী চাপা পড়িলে সেই স্থানে যেরূপ ভিড় হয় সেইরূপ।...

সদাশিউ বলে “আসুন, সকলে মিলে একটু ‘প্রার্থনা’ করা বাক।” সকলে সেইখানে বসিল। বৈজনাথের দল, ফরওয়ার্ড ব্লকের দল, কিষণ সভার ছেলেটি, কম্যুনিষ্ট পার্টির ছেলেটি, আর বাকী সকলে তো আছেই। মেহেরচন্দ্রী “রাষ্ট্রগগনকী দিব্য জিহ্বাতি”...স্বরস্ত করিলেন। আজ কাহারও প্রার্থনায় আপত্তি নাই, ইহাকে ব্যঙ্গ করিয়া চুটকী গান নাই। মেহেরচন্দ্রীর যে কলিটি মনে


থাকে না, সেটা আগে হইতেই সকলে গাহিয়া দিল। পকেট হইতে কাগজখানি আর তাঁহাকে বাহির করিতে হইল না। সকলেই প্রাণপণে চীৎকার করিতেছে। এত চীৎকারের মধ্যে আর ম্যাজিষ্ট্রেট ও ডাক্তার সাহেবের মোটরকারের শব্দ শোনা যাইবে না। সেই মতলবেই ইহারা প্রার্থনায় বসিয়াছে। যেই মেহেরচন্দ্রজীর শেষ হইল, আর অমনি সদাশিউ আরম্ভ করিল “রঘুপতি রাঘব রাজারাম...”

মহাত্মাজীর প্রিয় ভজনটা। কি মধুর চির নূতন সুর ভজনটার। বিনুর দলের আজ এই ভজন গানেও আপত্তি নাই। আগের গানটা না হয় ছিল ‘জাতীয় পতাকা’র বিষয় লইয়া, কিন্তু এ ভজনটা তো আর তা নয়। বিনুর অন্তিম মুহূর্তে তাহার আত্মার শুভ কামনার, আর বিনুর বাবাকে একটু অকৃত মনস্ক রাখিবার প্রয়াসে উহারা নিজেদের মতবাদ একটু নমনীয় করিয়া লইয়াছে। বিনুর দল—ইহারা একটুও কি করিবে না? হইত নিলু—তাহা হইলে সে কি ভজনে যোগদান করিত? কখনই নয়। সে ভাঙ্গিবে কিন্তু মচকাইবে না। নিলু বিনু আগে আশ্রমে এই ভজনটা কেমন সুন্দর গাহিত। মহাত্মাজীর সম্মুখেও গাহিয়াছিল।... মানসিক উদ্বেগ চাপিবার জন্ত ইহারা অস্বাভাবিক জোরে গাহিতেছে। ঠিক করিয়াছে যে এখন আর শেষ করিবে না—বতফণ পাবে প্রাণপণে গাহিয়া চলিবে... মঞ্চের সিঁড়ির উপর দিয়া বিনু উঠিতেছে—আহা, খালি পায়ে ঠোকর খাইল—কি রোগা হইয়া গিয়াছে—গলাটা পাখীর গলার মতো সরু—নাকটা খাঁড়ার মতো হইয়া উঠিয়াছে, নীচে অন্ধকার—দড়ীতে হেঁচকা টান পড়িল—বিনু—বিনু যাইলে কি হইবে? আমার এতগুলি বিনুকে সে রাখিয়া গিয়াছে। ভগবান! মহাত্মাজী! বিনুর মাকে এ আঘাত সহ্য করিবার শক্তি দাও, নিলুর মনে বল দাও, বিনুর আত্মাকে শান্তি দাও। ভজন চলিয়াছে—

রঘুপতি রাঘব রাজারাম, পতিত পাবন সীতারাম।

—জয় রঘুনন্দন জয় বনশ্রাম, জানকী বল্লভ সীতারাম।

জোরে, আরও জোরে!



আওরৎ কিতা

(মা)

আওরৎ কিতা

সরস্বতী চ'লে গেল। তাহ'লে দরজা এক ২৩টার সময় বুঝি হ'ল। ইং. তাইতো—ঐ তো কথা শোনা যাচ্ছে লুসী জমাদারণীর। সরস্বতী একটু মাথা টিপে দিচ্ছিল, বেশ লাগছিল। ভারি নরম ওর আঙ্গুলগুলো। দুই রগের উপর চেপে ধ'রে, তারপর আস্তে আস্তে আঙ্গুলগুলো নিয়ে আসে, ভুরুর উপর দিয়ে নাকের ডগায়। রগের দবদবানি সঙ্গে সঙ্গে কমে যায়। 'আর মাথার মধ্যে কি যেন জমে আছে, চাপ বেঁধে,—সেটাও যেন সঙ্গে সঙ্গে মনে হয় গলে, হাক্কা হয়ে গেল। জমাদারণী কি ওকে এক মিনিটও বেশী বসতে দেবে! আমাদের তে! তবু একটু সমীহ ক'রে কথা বলে—কিন্তু সরস্বতী যে সি কেনাসী। ওদের ওয়ার্ডে যে আলাদা। ওকে এতক্ষণ এই ওয়ার্ডে থাকতে দিয়েছে সেই বখেটে। আহা-রে, ও যে আবার জ্বলে ফিরে এল কেন, সে তো আমি বুঝি। আমার কাছ থেকে কি তা' লুকোতে পারে? আগে যদি এতটা বুঝতাম, তাহ'লে সহদেও এর মা যখন আমার কাছে কথাটা পেড়েছিল, তখনই রাজী হয়ে যেতাম। তাহ'লে হয়ত বিলুর আমার, এদশা হতো না। তা রাজী হব কেন? ভগবান আমার এমনি ক'রেই সৃষ্টি করেছেন! তাহ'লে রাজ্যশুদ্ধ, সবাইকে নিজের পেটে পুরে ব'সে থাকবো কি ক'রে? "অভাগা যেদিকে চায়, সাগর শুকায়ে যায়।" আমার হয়েছে তাই। সরস্বতীর কপাল এমনিও পুড়েছে, আর বিয়ে হ'লেও হয়ত পুড়তো। আমি বিলুর মত পর্যন্ত জিজ্ঞাসা করিনি। মেয়ে মোটে ছাত্রবৃত্তি পর্যন্ত পড়া। আজকালকার

ছেলেরা কখনও তা পছন্দ করে? একথা সহদেওএর মাকে একটু আভাসও দিয়েছিলাম। সহদেওর মা তো আমার কাছে কোনো জবাব দেয়নি। কেবল সে সময় অবাক হয়ে ড্যাঁব ড্যাঁব ক'রে তাকিয়েছিল আমার মুখের দিকে। কিন্তু এর জবাব পরে সহদেও আমাকে শুনিয়ে দিতে ছাড়েনি। সহদেও বলেছিল— “আমরা চাষা-ভূষা মানুষ। আমাদের বোন মিডিল পাস করা হবে না তো কি সরোজিনী নাইডু আর বিজয়লাক্স্মী পণ্ডিতের মতো বিদুষী হবে। তা'ছাড়া বিলুবা'বুই এমন কি একটা লেখা-পড়া করেছে। বিদ্যাপীঠের শাস্ত্রী বইতো নয়।” সহদেও মিটমিটে দেখতে। থাকে চুপচাপ গুরুচোরের মতো। কিন্তু কথা যখন শোনায় তখন একেবারে বি'ধিয়ে বি'ধিয়ে বলে। আমার ছেলের বিয়ে। আমি— আমি যেখানে ইচ্ছে দেবো, যেখানে ইচ্ছে দেবো না; এ নিয়ে আবার সাতমুখ করা কি? আমি রাজ্ঞী হইনি, দুজনকে মানায় না ভাল ব'লে। হিন্দুস্থানী আর বাদ্ধানীতে কি মানায়? যেখানকার যা সেখানকার তা'। এক গাছের বাকল আর এক গাছে এঁটে দিলে তা' কি কখনও জোড়া লাগে। আমি বলবো সরস্বতী, তো ওরা বলবে সরসোয়াতী। সরস্বতী কি শুকতো রাঁধতে জানে? গোকুল পীঠের নাম শুনেছে? বিলু অড়রের ডাল পছন্দ করে না, আর ওরা অড়রের ডাল ছাড়া আর অন্য কোনো ডাল ভালবাসে না। ওরা মুসুরীর ডাল খায়, কেবল যখন ছেলেপিলে হওয়ার পর মেয়েরা আঁতুরে থাকে তখন।...একদিন বহুরিয়াজীকে ডাঁটা-চচ্চড়ি রেঁধে দিয়েছিলাম। সে বললো যে “হামি ড্যাঁটা খেতে খুব পসন করে।” ডাঁটাগুলো মুখে দেয় আর চুষে চুষে ফেলে দেয়; চিবোতে হয় তা' জানে না। আবার বাংলা বলার সখ কত? এরা কি একটা ভাল মিষ্টি তৈয়ের করতে জানে? জেলে দেখছি তো। আর ওদের দেশেই তো জীবনটা কাটিয়ে দিলাম—কিন্তু জানতে তো আর বাকী নেই। মিষ্টির মধ্যে ঐ এক 'পুয়া'—সব পূজোর-আচ্চায়, ঝোলে-ঝালে, অস্থলে সর্ব্বঘটে আছে। জলে একটু আটা গুলে নিয়ে, তাতে একটু গুড় দিয়ে কোনরকমে ভেজে ফেলতে পারলেই হয়ে গেল 'পুয়া'। না আছে রসে ফেলা; না আছে কিছু। দুটো জিনিষ মিলিয়ে তরকারী রাঁধা, ওরা

অতিকে উঠবে। আৰু তাৰই সঙ্গ আমি আমাৰ বিলুৰ বিষয়ে দিতাম। এতে আমি একদিন দু-দিনেৰ কথা নয়। সারা জীৱন বসুন আৰু গোলমৰীচ খেয়ে কি আৰু বাঙালীৰ ছেলে বাঁচতে পাৰে? তাহ'লেও ভাৰি ভাল লাগে আমাৰ সৱস্বতীকে। নিজের ছেলেৰ বোঁ করতে চাইনি ব'লে যে ওকে দু'চক্ষে দেখতে পাৰি না, তাতো আৰু নয়। ওকে ব'লে ছোটবেলা থেকে দেখিচি। কপিলদেওএৰ সঙ্গ এসে, কতবার কতদিন থেকে গিয়েচে আশ্রমে। বিলু বিলুৰ মতো সহদেও আৰু সৱস্বতী তো, আমাৰ নিজের হাতে ক'ৰে গ'ড়ে তোলা বললেও হয়। কি-উ বা বয়স? সেদিনও তো ও মেয়ে একরত্তি ছিল।

...আমাৰ ৱান্নাঘরের ৱান্নান্দায় শিউনী ফুলেৰ বোঁটা দিয়ে ৱান্নানো খন্দেৰেৰ বুনাবনী শাড়ী প'ৰে, দুটো মেয়েটী, বাঁশ ধ'ৰে ঘূৰপাক খাচ্ছে। কোথাৰ চুল কোথাৰ গোঁপা, কোথাৰ আঁচল,—বাঁই-বাঁই ক'ৰে ঘূৰেই চলেছে। আমি বলি থাম, আবার মাথাটাথা ঘূৰে প'ড়ে যাবে, গা বমি বমি কৰবে—কে কাৰ কথা শোনে “সৱসোয়াতী কি ইস্কুল; ভেৰী ব্যাড ভেৰী ব্যাড টিচাৰ ফুল”—এই পণ্ড বলে চ্যাচাতে চ্যাচাতে বিলু এসে ৱান্নাঘরের ৱান্নান্দায় দাঁড়ালো। তবুও কি মেয়েৰ ঘূৰনী থামে। ঐ ঘূৰতে ঘূৰতেই বিলুৰ কথাৰ পালটা জবাব দেওয়া হ'ল—

“ম্যাও ম্যাও ম্যাও ম্যাও কু ;

বিল্লি ভাইয়া, থাঙ্কু।

বিলু তাৰ সঙ্গ সুর মিলিয়ে বলে—“মুৰগী ভাইয়া কি ঠ্যাং পাও।”

তখন মেয়েৰ ঘূৰপাক খাওয়া থামে। মেয়ে হেসে তখন ৱান্নান্দায় উপৰ লুটোপুটি লুটোপুটি !.....

খাসা গড়ন-পেটন মেয়েটাৰ। কাজ চালিয়ে নিতে পাৰতো কিয়। ৱান্নালী গেরস্থ ৱাড়ীৰ মেয়ে এসে কি আৰু কংগ্ৰেস আশ্রমেৰ সংসাৰ চালাতে পাৰে? আশ্রম তো নয়—একটা হোটেল। মামলাবাজ লোকেৰা সদৰে মোকদ্দমাৰ তছিৰে আসবে, আৰু এসে উঠবে আশ্রমে। মিটিং তো লেগেই আছে। সময় নেই অসময় নেই, ৱাত নেই বিৱাত নেই, লোক আমাৰ কি আৰু

বিরাম আছে? আমি ব'লেই সামলাতে পেরেছি;—অল্প কেউ হ'লে কেঁদে মরতো।...সরস্বতীর হাতে খেয়ে কিন্তু বিনুর একদিনও পেট ভরতো না। বিনু আমার তরকারী খেতে ভারি ভালবাসে। বসে বসে টুক টুক ক'রে খাবে, যতটা ভাত প্রায় ততটা তরকারী। তাই খেয়েই তো কোনো রকমে হাড় ক'খানি টিকে আছে—তা না হ'লে ভাত খাওয়ার যা ছিরি! পাখীর মতো ঠোকর মেরে মেরে এই চাড়ি তো ভাত খাওয়া। আর ঐ সরস্বতীদের,—ওদের আবার তরকারী খাওয়ার অভ্যাস আছে নাকি? ওদের মধ্যে যে লাখপতি তার গর্ভে যে সে ভাতের সঙ্গে দু-তিন রকমের তরকারী খায়। পুড়ার সবাই সে কথা নিয়ে আলোচনা করে। আর সাধারণ গেরহু বাড়ীতে? কাঁধা উঁচু পিতলের থালায় লাল চালের ভাতের মধ্যে গর্ভ ক'রে এক নাদ অড়রের ডাল, আর থালার কোণের দিকে নম নম ক'রে চন্দনের ফোটার মতো এতটুকু তরকারী। সোনা-মুখ ক'রে, তাই খেয়ে উঠে, কপিলদেও আর সহদেও এক এক ঘটি জল খায়।.....

এ কে? আমার পা নিয়ে আবার টানাটানি কেন? কে রে? মন্চনিয়া? পায়ে তেল লাগাতে কে বলেছে? নিশ্চয়ই বহুরিয়াজী। নিজেরা গিয়ে রামায়ণে বসেছেন, আর একে পাঠিয়ে দিয়েছেন আমাকে বিরক্ত করতে; রামায়ণ পাঠতো বেশ জমে এসেছে দেখছি। বহুরিয়াজী পড়ে,—আর বাকি সতর জন তার সঙ্গে সুর মেলায়। একেবারে কান ঝালাফালা। আমাদের কেমন একজন রামায়ণ কি মহাভারত পড়ে, আর বাকি সকলে ব'সে শোনে। বড় ছোর একটু আধটু আহা উহু করে। এদের সবই অদ্ভুত।...“হ্যাঁ রে মন্চনিয়া আমার পায়ে তেল দিয়ে দিতে কে বললরে?”

“সরসোয়াতীজী যাওয়ার সময় ব'লে গিয়েছিল যে কদিন থেকে পিণ্ডি প'ড়ে প'ড়ে, মাইজীর হাত পা জালা করছে। হাতের তেলোয় আর পায়ে একটু তেল জল লাগিয়ে দিস। আপনি মাইজী, বিরক্ত হবেন মনে ক'রে, আমি তো এতক্ষণ দিই নি। আমি ব'সে ছিলাম দোর-গোড়ায়। এখন জমাদারনী এসে আবার শাসিয়ে গেল। বলে যে এখন থেকেই যুনোনার ব্যবস্থা হচ্ছে। মাইজীর

সেবার জন্ত তোমার আর গলকটির ডিউটী পড়েছে,—এখনই এসে দোরগোড়ার বসলে কি? অর্ধেক রাত তুমি জাগবে, আর বাকী অর্ধেক জাগবে গলকটি। এই ব'লে তো সে ফড়ফড়িয়ে চ'লে গেল।—সরকার জেলে পুরেছে, এখানে তোমরা যা বলো তাই করবো। অনেক পাপ করেচি, না হ'লে কি আর বামুনের মেয়ে অল্প লোকের গা টেপার কাজ করতে হয়? আবার ওদের হুকুম মতো তোমার পা টীপতে এলাম—তো আবার তুমি মাইজী, নারাজ।”.....

বছর তিরিশেক বয়স হবে মনচনিয়ার। সে সি ক্লাস সাধারণ করেদৌ। বেশ সুশ্রী চেহারা ব্রাহ্মণের ঘরের বাল-বিধবা। কিছু দিন আগে একটা ছেলে হয়। সন্তজন্মানো ছেলেটির গুণদেহ পাওয়া যায় বাশঝাড়ের মধ্যে একটা হাঁড়িতে। ছেলেটির গলায় আঙ্গুলের দাগ। আহা, নদীর মতো নরম গলায় রক্ত জ'মে নীল হয়ে গিয়েছে। ঐ তো একরঙা রক্তের দাগ। তাইতেই মনচনিয়ার গাঙ্গা হয়েছে দশ বছর, আর মনচনিয়ার মা'র দু-বছর। বেশ হয়েছে, খুব হয়েছে। তুই হলি মা। নিজের পেটে ধরেছিস ছেলে। ও ছেলে তখনও ভাল করে কাঁদতে পর্যন্ত শেখেনি। সেই ছেলে কি-না মা হয়ে এমনি করলি। তোর মতো? মাকে তো হেঁটোয় কাঁটা মাপায় কাঁটা দিয়ে, তুভের আগুনে দগ্ধে মারতে হয়। না, ও কখনই নিজেকে একাজ করে নি। ও হয়তো তখন অজ্ঞান অচেতন। করেছে ওর মা। সে মাগী ভারি দজ্জাল। আর তারই সাজা হলো কিনা দু বছর। এদের আইন-এজলাসের কি আর কিছু ঠিক ঠিকানা আছে। তা থাকলে কি আর বিলুর আমার এমন সাজা হয়। না ও কাউকে খুন করেছে। না ও কাউকে মারতে গিয়েছে। কংগ্রেসের কাজ করেছে। তার জন্ত জেল দাঁও, জরিমানা করে। তার জন্ত ফাঁসী! ভগবান, এত অবিচার কি সহাবে?

“মাইজী হাতের তেলোয় তাহ'লে একটু তেলজল লাগিয়ে দি।” মাহা আর জালাসনা তো। মাথার ঘায়ে কুকুর পাগল। আমি বলে মরি নিজের জালায়। আর এরা সবাই মিলে আমার রাশে লেগেছে। আমাকে নিয়ে আর টানাটানি করিস না। একটু শান্তিতে নিরিবিলি থাকতে দে। চক্ৰবর্তী

ছত্রিশ জন লোক, আমাকে বিরে মেলা ক'রে ব'সে আছে, যেন আমাকে তুঙ্গী-
তলার নামানো হয়েছে। রামায়ণ পাঠ আরম্ভ হতে দেখে, কোথায় ভাবনাম
যে বাক, খানিকক্ষণের জন্ত নিশ্চিন্তি,—তা নয়, এ আবার এসে আরম্ভ করলো
'ল্যাজর্ ভ্যাজর্। মনচনিয়া ব'লে চলে "মাইজী, আজ সকালে আপনি যখন
বেহুঁস হয়ে গিয়েছিলেন-না, তখন ডাক্তার সাহেব এসেছিল। ব'লে গিয়েছে
যে তিন দিন আপনার উপোস হয়ে গেল, কালকে যদি কিছু না খান, তাহ'লে
জোর ক'রে খাওয়াবে। 'শুই' (ইনজেকশন্) দেবে, আর নাকের মধ্যে দিয়ে
নল চালিয়ে মুর্গীর ডিম খাইয়ে দেবে।

"হ্যাঁ রে হ্যাঁ, আমার এখন খাওয়াই বড় হলো। আরে আমি না খেলে
কার সাধি আমাকে খাওয়ায়?"

...“আপনি জানেন না বুড়ী মাইজী এদের। নশুঁদা বেনের বিছানা বাঁধবার
খলি আছে না? খাটিরার সঙ্গে ঐরকম চামড়া দিয়ে বাঁধবার 'ইন্তিজাম' এদের
আছে। জোর ক'রে কজন জমাদারনী মিলে আপনাকে ঐ খাটিরায় শুইয়ে দেবে।
তারপর বিছানা বাঁধবার মতো ক'রে আপনাকে আট্টে পৃষ্ঠে বাঁধবে, ঐ 'গদ্দিদার'
খাটিরার সঙ্গে।”

“আরে আমি না গিললে তো আর গিলিয়ে দিতে পারবে না। বা আর
বেনী বকিস না তো।”

ভবী ভুলবার নয়। মনচনিয়া আপন মনে বকিয়া যায়—“ঐ যে হারীন
মবাইয়া ডোমিন আছে,—তার নাকের মধ্যে ঘা আছে জানেন মাইজী। যখন
তখন রক্ত পড়ে। ও গত বছর, আপনারা আসবার আগে 'অনসন্' করেছিল,
ওকে পারখানার সাফাইয়া কমাওে কাজ দেওয়া হয়েছিল ব'লে। ও বলে যে
রাজা হরিশ্চন্দ্রের বংশের লোক ওরা; নিজের জাতের মধ্যে ওদের কত “বোল
বলা” (খ্যাতি)। ওকি কখন ময়লা সাফ করতে পারে? ওদের জাত 'মুর্দা'
ছোঁয় না, আর যারা নালী সাফ করে, তাদের সঙ্গে ব'সে তো ওরা খায় না।
ও একথাও বলেছিল যে এ জ্বলে চিরকাল 'সাফাইয়া'র কাজ করে 'সান্তালীন'রা।

তারপর কতদিন ধরে ওকে মুর্গীর আঙুর সববৎ খাইয়ে দেওয়া হয়। কিন্তু দিলে কি হবে,—ওর সংস্কার ভাল; মুর্গীর আঙুর কথা ডাক্তাররা না ব'লে দিলেও, ওর বমি হয়ে যেতে আরম্ভ করলো। তারপর সরকারকে তার মানতে হলো। সাহেব হুকুম দিল ওকে পায়খানা কম্বাও থেকে সরিয়ে নেওয়ার। মহাত্মাজী সরকারের সঙ্গে পারেন না। ও কিন্তু সরকারকে ক'দিনের মধ্যে একেবারে ঠাণ্ডা ক'রে দিল। 'কলক্টর' সাহেব এসে 'সুপারিটন' সাহেবকে কিছু বকুনি! চমাইন জমাদারনী একদিন আনার কাছে গল্প করেছিল। এক বালাই তো গেল, কিন্তু সেই থেকে ওর নাক দিয়ে রক্ত পড়ে।”

ফাঁসীতে ঝুলবার সময় নাক মুখ দিয়ে রক্ত বেরোর নাকি? মনচ'নিয়াকে জিজ্ঞাসা করলে হয় যে, গলাটা তখন টিপে ধরেছিল, তখন ক'টা ছেলেটার নাক মুখ দিয়ে রক্ত বেরিয়ে এসেছিল নাকি? না, মা হয়ে মা'র কাছে এসব কথা কি জিজ্ঞাসা করা যায়? ও যদি নিজের হাতেই এ পাপ কাজ ক'রে থাকে, তা হ'লে কি সে সময় সেই ক'টা মুখটির দিকে তাকাতে পেরেছে?...

হুর্গার সেই ছোট ছেলেটার কি হলো। আমারই কোলের মধ্যে তো তার মা শেষ হয়ে গেল। অরে ভুগে ভুগে তার চেহারা হয়ে গিয়েছিল হাড় জিঞ্জিলা পেট ডিগ্‌ডিগে।.....হঠাৎ হুর্গার মা ডেকে পাঠালো, আনি তরকারীর কড়া নামিয়ে রেখে ছুটলাম তাদের বাড়ী। হুর্গার মা আনার বা আটানী, সব তাতে ভয়েই মরে। চেষ্টা মেচিয়ে কেঁদেকেটে পাড়াশুদ্ধ সরগরম ক'রে তুলেছে। কিন্তু যে বৃন্দে ছেলেটার তখন ভগবানের ডাক পড়েছে তার কাছে হুদুও নিশ্চিত হয়ে বোস।—তা' না—বলে, সে আমি পারি না দিদি, আমার বড়ডো ভয় করে। গিয়ে দেখি হুর্গা ভয়ে আড়ষ্ট হয়ে পাশে ব'সে রয়েছে ছেলেটার। সেটার তখন, অতন-তখন অবস্থা। গিয়ে ছেলেটাকে কোলে তুলে নিয়ে বসলাম। গলায় মধ্যে পরে ঘর্শক হচ্ছে। চোখের মনিটা সাদা দেখা যাচ্ছে। প্রাণপণে বাছা নিঃশ্বাস নেওয়ার চেষ্টা করছে। কষ্টে মুখ,—হাতপা নীল হয়ে গিয়েছে। অতটুকু

ছেলেটার বাঁচবার কি চেষ্টা, কি চেষ্টা! তারপর আনার কোলের মধ্যেই, তার সব চেষ্টা শেষ হয়ে গেল। ওষুধ তো দূরের কথা, এক ফোটা জলও তার গলা দিয়ে নামলো না। কিন্তু সব চাইতে আশ্চর্য্য বে শেষকালটার নাকমুখ দিয়ে রক্ত পড়ে আমার কাপড় চোপড় একেবারে ভেসে গেল। অনন আর কখনও দেখিনি। দুর্গার মা তখন কেঁদেকেঁদে বাড়ী মাথার করছে। দুর্গা কাঠ হয়ে বসে আছে—আর তাকে টেপীর মা খুঁটিয়ে খুঁটিয়ে জিজ্ঞাসা করছেন “হ্যারে দুর্গা, খোকা সকাল বেলা পেঁপে আর তালনিছরীটুকু খেয়েছিল তো?”...

.....বিলু যখন হর তখন দিব্যি মোটামোটা ছিল—এত বড় কোল জোড়া' ছেলে। আঁতুরে হেডপণ্ডিতজীর স্ত্রী দেখতে এসেছেন। রুকমিনী দাই এম ধানড়া কাজল ছেলের গালে লাগিয়ে দিল। সে বলে যে, তুমি জান না এই পণ্ডিতাইনদের—এরা ডাইনীর বাড়া। এদের বিবের নজর যেদিকে পড়ে, একেবারে জ'লে পুড়ে থাক হয়ে যায়। গালে কানী না লাগালে ছেলে দেখবে দিনে দিনে শুকিয়ে দাড় হয়ে উঠবে। বুড়ী দাই আমাকে চব্বিশ ঘণ্টা শাসনে রাখে—এটা ক'রোনা তো ওটা ক'রোনা; উঠতে বসতে আমাকে সাবধান করে। আচ্ছা বাবা, যা বলো তাই। বিলু হয়েছিল ৮বিজয়া দশমীর দিন। হেডপণ্ডিতজীর স্ত্রী এলেন পূজোর ছুটির পর। তিনি আগে দেশেই থাকতেন। সেইবারই হেডপণ্ডিতজী প্রথম পরিবার নিয়ে এলেন। পণ্ডিতজীর স্ত্রী তখন বিশ্বাসই করবেন না যে বিলুর বয়স তখন কুড় দিন। বিলুর কোঁদা কোঁদা হাত-পা'র দিকে তাকায়, আর রুকমিনী গজ্ গজ্ করতে করতে কাঁথা দিয়ে ঢেকে দেয়।.....

তারপর বিলুটার শরীর ভেঙ্গে গেল সেবার ডবল নিউনোনিয়া হওয়ার পর থেকে। তখন ওর বয়স হবে বছর আড়াই। 'ঠাকুর' তখন শয্যাগত, পায়ে দিকটা আশু আশু তাঁর অবশ হয়ে আসছে। তখনই বিলুরও অসুখ করলো।কার্তিকে কার্তিকে ছ'বছর, অঘ্রাণ পোষ, মাঘ, ফাল্গুন, চৌৎ, ছ'বছর পাঁচ মাস—বিলুর বয়স তখন ছ'বছর পাঁচ মাস।...অত ছাই মাস দিনের হিসাব আনার মনেও থাকে না, তার কথাও নেই। থাকতো টেপীর মা, তাহ'লে আমার হিসেবে

নিশ্চয়ই দিত ভুল বের ক'রে। তার সামনে কি কোনো কথা বলার জো আছে
 “—একটা কথাও পড়তে পার না।.....প্রথম দিন বিনুর কপালটা চ্যাক্ চ্যাক্
 করতে দেখেই, আমার মনটা অস্থির অস্থির করতে লাগলো। মাঝরাতে ছেলের
 কি কান্না আর ছটপটানি। আব ঠাকুরের পাশের ঘর থেকে কি রাগা রাগি আর
 বকুনি। ছেলেকে কিছুতেই সামলানো যায় না। উনি বলেন কাল সকালে
 হরগোবিন্দ ডাক্তারকে দেখালেই হবে। বিনুর ঠাকুরদাদা চ'টে ম'টে অস্থির।
 তাঁর বকুনির চোটে শেষকালে ডাক্তারকে খবর পাঠানো হলো। ডাক্তারবাবু বলে
 পাঠালেন যে রাত্রে আসতে পারবেন না। ঠাকুরের তাই শুনে সে কি রাগ!
 বলেন যে, গভর্ণমেন্টে রিপোর্ট ক'রে ওর ডাক্তারী করা আমি যুচিয়ে দেবো। রাত
 একটা পর্যন্ত মীতাপতির দোকানে পাশা খেলবে, আর রুগী মরলেও রাতে রুগী
 দেখতে আসবে না। এখন শীতও নয়—বর্ষাও নয়। এরা সব খুনে! ডাক্তার
 নয় ডাকাত, বাটপাড়। ‘ঠাকুর’ তো তখন বিছানা থেকে উঠতে পারেন না। তাঁর
 কাছে রিপোর্ট লিখবার জন্য নগ্ন, চশমা, কাগজ কলম রেখে, তাঁকে চুন করিয়ে
 আসি। সূনের দাঁড়ায়ান ননকুকে আবার পাঠাই ডাক্তারের কাছে। আলিবকসেন
 ঙ্গাম্পনি, ননকু ঐ রাতে নিজে চালিয়ে ডাক্তার বাবুকে নিয়ে আসে... এখনও নাটির
 উপর ভর দিয়ে বড়ো ননকু মধ্যে মধ্যে আশ্রমে আসে, মাইজীর সঙ্গে দেখা করবার
 জন্য।.. হরগোবিন্দ ডাক্তারের মুখ দেখেই আমি বুঝেছি যে, ছেলের আমার অস্থখ
 বেশ ব্যাধি।...তারপর ক'দিন ধ'রে চললো যমে-মানুষে লড়াই। একদিন তো হঠকট
 গিয়েছিল। সেই প্রথম দেখলাম মৃগনাভির গুণ। হাত পা গিয়েছিল একেবারে
 ছিম ছমে। হরগোবিন্দ ডাক্তার নাড়ী টিপে মুখ বেজার ক'রে ব'সে রয়েছে।
 কি বিক্ ওষুধে! নেপ'তে দেখতে বিনকুড়ী বিনকুড়ী ঘামে গা হাত পা ভিজে
 গেল। বিছানা বালিশ ভিজে জবজবে। ঐ নেত্রিয়ে পড়া একরত্নি ছেলেকে
 শিক মুছিয়ে উঠা যায়। তার উপর আবার বুকে পিঠে পুলাটিসের বোঝা। সকাল
 বেলা ডাক্তারবাবু আমাকে ব'লে গেলেন,—‘আপনার ছেলেকে নূতন জীবন
 দিলাম’; কথাটার মধ্যে একটুও বাড়াবাড়ি নেই। ষষ্ঠি বধন্তরী ডাক্তার

হরগোবিন্দ বাবু। কিন্তু ঐ কস্তুরী খাওয়ার পরে, একমাস ছেলের গায়ের জলুনী যায় না—দিনরাত ছটফট করে। সারারাত টানাপাথা টানানোর ব্যবস্থা হলো ৫ তারপর আস্তে আস্তে ছেলে তো সেরে উঠলেন। কিন্তু সেই যে গেল শরীর পটকে, আর কি কখনও ঠিক ক'রে সামলে উঠতে পারলো? গায়ে আর মাংস লাগলো না। নিত্যি অস্থখ লেগেই আছে। বড়লোকের বাড়ী হতো তো বাস্ত্রে আগুর রাখার মতো আদর বত্রে মানুষ হ'তে পারতো। কিন্তু যে কপাল ক'রে এসেছিল, তেমন আদর বত্রে খাওয়া পরা তো একদিনের জন্তুও বাছার জুটলো না! হরগোবিন্দবাবু কেন তখন ওকে বাঁচিয়েছিলেন? কেন এত বড়টা হ'তে দিয়েছিলে? ভগবান, যদি ওকে নেওয়ার ইচ্ছা ছিল, তা হ'লে তখন নিলে না কেন? কেন আমার লোভ বাড়িয়ে দিলে? এমন রাস্কুসে নেওয়া ঠিক করলে কেন? কত পাপই না আমি করেছি! ভগবান, আমার পাপের জন্তু আমাকে ধে-কোন শাস্তি দিতে পারতে, কিন্তু আমার পাপের জন্তু তাকে শাস্তি দিলে কেন? তখন গেলে, হয়তো নিলুকে কোলে পেয়ে, আমি এতদিন ওকে ভুলতে পারতাম। এক এক ছেলে তো নয়, তার হাজার রকমের রূপ। তার লক্ষ রকমের হাবভাব কথাবার্তা মনের মধ্যে আসে। একছেলে একহাজার ছেলের সমান। কত স্মৃতি, ছোটখাটো কত ঘটনা, কত আদর আবদার হাসিকান্নার ছবি চোখের সামনে চব্বিশ ঘণ্টা ভেসে বেড়াচ্ছে, তার কি হিসেব আছে? ইচ্ছে করে বে এই সব মনে-পড়াগুলোকে আঁকড়ে ধ'রে প'ড়ে থাকি। পারি তো বুকের মধ্যে ঢুকিয়ে রেখে দি; মনে হয় বিলুকেই আমি যেন বুকের মধ্যে পেয়েছি, তাকে ছুঁয়ে আছি, গায়ে হাত বুলিয়ে দিচ্ছি,—জড়িয়ে ধ'রে আছি--কিছুতেই ছাড়বোনা, কার সাধ্য আমার বুক থেকে ছেলেকে ছাড়িয়ে নিয়ে যায়।...

বিরাত চীৎকার ক'রে এরা রামায়ণের আরতি আরম্ভ করলো। এইবার তা হ'লে রানারণ পাঠ শেষ হবে। এরা আরতি বলবে না, বলবে 'আর্তি'।... এসময়টা কি চীৎকারই করে? জেলে আমার পর থেকে নিত্যি তিরিশ দিন শুনে শুনে একবারে ত্যক্ত-বিরক্ত হয়ে গিয়েছে মন।...

আরতিগান চলেছে, সব কথা বুঝাও যায় না...

“আরক্তম শ্রীরামাঙ্গণ-অ জী কি
 কীরতি-কলিত-ললিত-অ সিয় পী-কি ॥
 গাওয়ত-অ ব্রহ্মা দিক-অ মুনি নারদ-অ
 বান্মিক বিজ্ঞান বিশারদ-অ
 শুকা সনকাদি শেযু অরু সারদ-অ
 বরনি পবন-সুত্রী কীরতিনী-ই-ই কি ॥
 কীরতি নীকি রামা কীরতিনী-ই-ই কি ॥
 গাওয়ত-অ বেদ-অ পুৰাণ-অষ্টাদশ-অ
 ছয়ো শাস্ত্র-অ সব-আ গ্রন্থ-অ নহকো রস-অ
 মুনিজন-অ ধন-অ সন্তানহকো সরবস-অ
 সার-অ অংশ-অ সন্মতি সবহী-ই কী-ই ॥
 সান্মাতি সাবহী কী রামা, সান্মাতি সবহী-ই কী-ই ॥
 আরত-অ শ্রীরামাঙ্গণ-অ-জী কি-কীরতি কলিত-অ
 ললিত-অ সিয় পী-কী ॥

গাওয়ত-অ সন্তত-অ সন্তু ভবা-আ-নী
 অরুদহ-অ সন্ত-অ-ব-অ মুনি বিজ্ঞা-নী-ই
 ব্যা-র্যা-স-আ আ-দি কবি বর্জ বখা-আ-নী
 কাগা ভুংগি গরুড়াকে হী-ই কী-ই ॥
 গরুড়াকে হিয়া রাম, গরুড়াকে হী-ই কীই
 আরত-অ শ্রীরামাঙ্গণ-অ জী-কি কীর-অ-তি
 কলিত-অ ললিত-অ সিয় পী-কী ॥

তারপর নতুন সুরে আরম্ভ হলো—

অজ-অ কথা-আ ইতনী ভই, সুনহ বীর-আ হনুমান ।
 রাম-আ লক্ষণ-আ সিদ্ধা জানকী—সদা-আ করহ কল্যাণ ॥

এইবার ঘর ফাটিয়ে চীৎকার আরম্ভ হলো ব'লে—

“অধোধিরা রামলালা কী জ্যা ! বৃন্দাবন বিহারীলাল কী জ্যা !

উমাপতি মহাদেব কী জ্যা ! রমাপতি রামাচন্দ্রা জী কি জ্যা !

প্যাবানা সূতা হনুমান কী জ্যা ! মহাত্মা গান্ধী কি জ্যা !

মর্ক-অ সন্তান-কী জ্যা ! জ্যায় জ্যায় হো-ও-ও-ও-ও !...

সকলে একবার হুইহাতে তানির শব্দ ক'রে প্রণাম করে। এইবার সবাই উঠে পড়লো। লুসী জমাদারনী, চমইন জমাদারনী সবাই যেখানে রামায়ণ হয় তার বাহিরে বারান্দায় জানালার কাছে হাত জোড় ক'রে ব'সে থাকে। লুসী সাঁওতাল খুঁটান ;—কিন্তু ভগবানের নামের আবার জাতবিচার আছে নাকি ? খুব ভক্তি তার। ‘আরত শ্রীরামায়ণ জী কি, কীরতি কলিত নলিত সিয় পীকি’, এই ধুয়োটা তার মুখস্থ হয়ে গিয়েছে। জ্যায় দেওয়ার সময় আর ঐ ধুয়োটা যখন গাওয়া হয় তখন সেও বাইরে থেকে চীৎকার করতে ছাড়ে না।...গলা হচ্ছে গরুড়জীর।... তাঁর আসল নাম সন্ধ্যা দেবী। রামায়ণের সময় তাঁর গলা, আর সকলের স্বরকে ছাপিয়ে ওঠে। আরতির যেখানে ‘গরুড়াকে হি কী’ কথাগুলি আছে, সেই জায়গাটিতে এলেই তাঁর স্বর সপ্তমে চড়ে। তার উপর তাঁর নাকটাও গরুড়ের ঠোঁটের মতো। সেইজন্য সকলে ঠাট্টা ক'রে তাঁকে গরুড়জী ব'লে ডাকে আরম্ভ করে। এখন এমন হয়েছে যে সকলে তাঁর আসল নাম ভুলে গিয়েছে। জমাদারনীরা পর্যন্ত তাঁকে গরুড়জী ব'লে ডাকে। প্রথম প্রথম তিনি রাগ করতেন, এখন স'য়ে গিয়েছে।সেই একদিন জমাদারনী ‘কাপড়া গুদাম’ থেকে, গরুড়জীর নামে শাড়ী নিয়ে এসেছিল—সেদিন কি কাণ্ড। যে খাতায় জেলের জিনিস পত্রের পাওয়ার পর নাম দস্তগত করতে হয়, সে খাতা খুলেই দেখে লেখা—গরুড়জী—একখানা শাড়ী—আর বাবে কোথায় ! ভদ্রমহিলা কেঁদে কেটে খাওয়া-দাওয়া ছেড়ে ব'সে থাকলেন। জমাদারনী তাঁকে অপমান করেছে এই ব'লে জেলের সাহবকে চিঠি লিখে পাঠালেন। আরও লিখেছিলেন যে লুসী—অন্ত মেয়ে কয়েদীদের কাছে বিড়ী আর থয়নি বেচে। লুসীতো অপ্রস্তুতের

একশেষ। জেলর সাহেব এসে লুমীকে ফনা চাওয়ালেন গরুড়জীর কাছে। তারপর তাঁর রাগ পড়লো। কিন্তু তাঁর নাম আর বদলালোনা.....

বিনু ছোটবেলায় আমাদের কত রামায়ণ মহাভারত প'ড়ে শুনিয়েছে। বর্ণিৎ স্কুলের সময়, আর গরমের ছুটির সময়, ছপুর রোদে পুড়তে পুড়তে টেপীর মা, আর ছুর্গার মা, আর জিতেনের মা—দিদি আসতেন আশ্রমে—বিনুর রামায়ণ মহাভারত শোনার ভক্ত। বিনুর রামায়ণ পড়তে ভাল লাগতো না। 'ও চার মহাভারত পড়তে। কিন্তু জিতেনের মা—দিদি এসেই আরম্ভ ক'বে "ওরে বারিন্দীরের ব্যাটা, তোকে বলেছি না যে, আমরা পুণ্যবান না, কাশীরাম দাস শুনেচে চাই না। নিয়ে আর রামায়ণ খান। রামায়ণ হলো এক জিনিষ, আর এ হলো এক জিনিষ।" বিনু বলে, থামো না জ্যাঠাইমা, এই খানটা একটু শেষ ক'রে নি। মাথা আর শরীর ঠলিয়ে ছলিয়ে বিনু প'ড়ে চলে--"কাদে বাজুসেনী, তিতিল অবনি, নয়নের-অ নীর-অ কাবে..." বিনু চোখে জল এসে গিয়েছে যখনই খানটা পড়বে তখনই ওর চোখে জল আসবে। আর অমনি টেপীর মা বলবে "আচ্ছা ৩বিজয়া দশমীতে জন্মেছিল কি না,—তাই এসেছে ওর বর্ষার ধাত।" ম'থ্রই পড়তে পড়তে কত জায়গায় যে ওর চোখে জল আসতো তার ঠিক নেই। আমরা বুড়ো নাপী ; হেলের মা ; ব'ষ্টি-মঙ্গলদাব করি ; ধর্ম-কর্মের এই প'ড়ে কোথায় আমাদের চোখের জলে বুক ভেসে বাওয়ার কথা। তা' না এ পোড়া চোখে কি জল আসতো ? বিনু ক'রিয়ে অন্তরিকে মুখ কিরিয়ে, চোখের জল মুছে ফেলবার চেষ্টা করতো, বিনু খানিক দূরে উঠে হয়ে শুয়ে সব দেখতো, আর চেষ্টা করে উঠলো, মা দ্যাখো, দ্যাখো, দাদা কি করছে ? জিতেনের মা দিদি তাকে ভাড়া দিয়ে থামিয়ে দেন। বলেন "বরের কোণের ভাঙ্গা হাঁড়ি ;—বলে আমি সব জানি। আপনি থামুন তো।" কিন্তু নীলুকে কি থামানো যায় ? সে ভেসে, চাঁৎকার ক'রে বাড়ী মাথায় বরে। মহাভারতখানা ননকু বাঁধিয়ে এনে দিয়েছিল স্কুলের দপ্তরীর কাছ থেকে। তার প্রথম পাতায়, বিনুর হাতের লেখা ছ লাইন "খোদ-ই

মালেক—মা। বকনুম বিলু।” যত মেলেচ্ছ পণ্ডিতী ফলানো হয়েছিল মহা-ভারতখানার উপর।—দুর্গার মা বলতো, “এবার বিলুর একটা টিকি রেখে দাও। মহাভারত পড়ার সময় বেশ টিকিটা নাচবে। ওরে সংক্রান্তি বামুন, খুব ছলে ছলে পড়িস, বুঝলি।” লজ্জায় বিলু তাঁদের মুখের দিকে তাকাতে পারে না। নিলু এদিকে চ্যাচাতে আরম্ভ করেছে—“টিকি ধ’রে মারবো টান, উড়ে যাবি বর্দ্ধমান।” জিতেনের মা—দিদিও বলে “হ্যাঁ ভাই, এবার বিলুর পৈতেটা দিয়ে ফেলো।”.....

হ্যাঁ, বিলুর এত ঠাকুর-দেবতায় ভক্তি, হঠাৎ যেন বড় হওয়ার সঙ্গে সঙ্গে কপূরের মতো উবে গেল। বিলুরও তাই, নিলুরও তাই। কিছুদিন এমন হলো যে, পৈতে না হ’লে জীবনটাই যেন বৃথা হয়ে যাচ্ছে। সময়ে অসময়ে বিলু সেই কথাটা পাড়ে, আর বলে—“তোমাদের পৈতে না দেওয়ার মতলব। পৈতে তো ন’বছর বয়সেই হয়ে যাওয়া উচিত ছিল। এ বছরে একটা মাত্র তো দিন আছে।” ...পৈতের পরেও, দেখেছি নিয়মিত সন্ধ্যা, গায়ত্রী, পূজা, একাদশী। কতদিন পর্যন্ত খাওয়ার সময় কথা বলতো না, বাজারের খাবার খেতো না, কোথাও ভোজে কাজে খেতে যেতো না। কত নিষ্ঠা! কত বিচার আচার। ছোট বেলা থেকেই ওর পূজা আচার ঝাঁক। কত শ্লোক, শ্লোকের ওর মুখস্থ ছিল। চার বছর বয়সের সময়ই, শ্রীকৃষ্ণের অষ্টোত্তর শতনাম, আর “দেবী সুরেশ্বরী ভগবতী গঙ্গা,” গড় গড় ক’রে ব’লে যেতে পারতো। এই তো বড় হয়েও—পৈতের আগের বছর, —আমি রয়েছি ঝান্ডাঘরে, ওরা দু’ভাই শোবার ঘরে বিছানা চটকাচ্ছে, আর পাশ বাঁশ নিরে দুখোঁধনের উকুভঙ্গ করেছে। এরই মধ্যে হঠাৎ বিলুর চীৎকার শুনলাম। “মা, মা, শীগ্গীর এসো।” কি আবার হলো? হাঃ-পা ভাঙ্গলো নাকি? সাপ বিছে নয়তো? ভয়ে বুক টিপটিপ ক’রে মরি। উল্লুনের তরকারী উল্লুনেই থাকলো। পড়ি কি মরি, গিয়ে দেখি—নিলু স্থির হয়ে বিছানার উপর ব’সে রয়েছে,—নাপিতের সামনে মাথা ঝাড়া করার সময় লোকে যেমন ক’রে ব’সে থাকে তেমনি ক’রে; বিলু নিলুকে জড়িয়ে ধ’রে ব’সে আছে। দুজনেই ভয়ে আড়ষ্ট; বিলু এক হাত মুঠো ক’রে কনুই-এর উপর কি যেন চেপে ধ’রে রয়েছে। আমি

যেতেই দেখালো। নিলুর হাতে বাঁধা ছিল মা পূর্ণেশ্বরীর মাদুলি একটা রুডাফ, আর চাকা ক'রে কাটা একটুকরো হরতুকী। সূতোটা ছিঁড়ে গিয়েছে। ওরা জানতো মাদুলী হাতে বাঁধা না থাকলে, আর একপাও চলতে নেই। চললেই নিলুর অনঙ্গল হবে। বললো, মা শীগগীর একটা সূতো ঠিক ক'রে নিয়ে এনো। মাদুলি আবার হাতে বাঁধা হলো। তারপর তুই মহারথী বিছানা থেকে নামলেন।.....

...সেবার মহাআজীর টুরের সময়, ঠিক মানসাহী পুলের উপর ধেই আমাদের মোটরখানা উঠেছে, সম্মুখে দেখি ধুলো-কাদা মাখা দুটো ল্যাংটা ছেলে। হঠাৎ মোটরকার দেখে ভয় পেয়েছে। কি করবে ঠিক না করতে পেরে, এদিক ওদিক একটু দৌড়বার চেষ্টা করলো। তারপর দুজনে জড়াজড়ি ক'রে রাস্তার মধ্যখানে শুয়ে পড়লো। ভগবানের দয়ার তারা রক্ষা পেয়ে গেল। কিন্তু বখন মোটর থেকে নেমে তাদের ওঠাতে গেলাম,—দেখি তারা ভয়ে নীল হয়ে গিয়েছে। কিছুতেই চোখ খুলে চাইবে না। বিনু নিলু দুটি ভাইএর কথা মনে ক'রে তখন আমার চোখ ফেটে জল আসছিল। তাদের বাড়ীতে পৌছে দিয়ে মনটা একটু শান্ত হলো। কি কাণ্ডই আর একটু হ'লে হয়ে যেতো! এর পর বখনই বিনু নিলুর কথা একমুহুরে মনে পড়েছে, তখনই চোখের সম্মুখে ভেসে উঠেছে, ঐ অসহায় ধলোমাখা ছেলে দুটোর সেই রূপ।.....

ভগবান, তোমার উপর বিনু নিলুর এত বিশ্বাস ছিল, সে বিশ্বাস কেন কেড়ে নিলে।.....বিনু যেদিন প্রথম আশ্রমে সন্ধ্যার কীর্তনে গেল না, আমি ভাবলাম বুঝি মাথা টাথা ধরেছে। জিজ্ঞাসা করি, তো বলে যে শরীর ভাল আছে। গায়ে হাত দিয়ে দেখি জ্বর-জারীও না—তবে হলো কি? পরে বখন বুঝলাম তখন বুক চাপড়ে মরি। বিনুর যখন এমন হলো, তখন পৃথিবীতে সবই সম্ভব। এতো আর নিলুর পৈতে ফেলার মতো উড়িয়ে দেওয়ার ব্যাপার নয়। নিলু হলো গোঁয়ার-গোবিন্দ ছেলে—ও নিজের খেয়ালেই থাকে। ওর নাথা গরম দেখলে, আমি মনে মনে হাসি; উনি এসেছেন তম্বি দেখাতে। আরে আমি তো আর তোঁর পেটে জন্মাইনি, তুই আমার পেটে জন্মেছিস। তোঁর নাড়ীনক্স আমি

জানবো না তো আর কে জানবে ? আজকে চটেছি, কাল সকালেই তোরা রাগ প'ড়ে যাবে। ছোটবেলা থেকেই তোরা গৌয়ারতুমি দেখে আসছি। সেই ছোটবেলায়, মূদীখানার ফেলে দেওয়া কাগজের ঠোঙ্গাতে পা লাগলেও নিলু প্রণাম করতো। ভুলে পঞ্জিকা ডিঙ্গিয়ে ফেলে, মুখ কাঁচুমাচু ক'রে, আমার কাছে এসে তার পাপের কথা বলতো—আমার কাছ থেকে বলিয়ে নিতে চাইতো যে অজান্তে করলে পাপ হয় না।...একদিন আমি রান্নাবাড়ীর কাজ শেষ ক'রে রাত্রে সোড়া দিয়ে এগুর কোকুন সেক করছি, এমন সময় বিনু ডাকলো,—মা দেখো নিলুর কাণ্ড। ছেলেদের পরীক্ষা তখন শেষ হয়ে গিয়েছে। পড়াশুনোর বালাই নেই। ভাবলান একটা নতুন কোনো ফন্দী আবার হয়তো নিলুর মাথায় ঢুকেছে। গিয়ে দেখি ফ্রেনে বাঁধানো মা সরস্বতীর ছবিখানাকে নীচে রেখে, তার উপর নিলু চাপা দিয়েছে বাড়ীর সব ক'থান জুতো। আমি তো অবাক! নিলু কখন এ কাজ করতে পারে! ওষে পরীক্ষা দিতে যাওয়ার সময়, প্রত্যহ আমাকে প্রণাম করার আগে সরস্বতীর ছবিখানাকে প্রণাম করে। এই পটখানায় যে প্রতিবছর সরস্বতী পূজোর দিন পূজা হয়। এখনও চন্দনের দাগ লেগে রয়েছে। ওরে ডাকাত পিচেশ, তোরা এ দুর্শ্রুতি হলো কেন? বিনু বললো যে অঙ্কে ফেল করেছে ব'লে রাগে নিলু এট কাণ্ড করেছে। কি বদরগী ছেলে বাবা! “অঙ্কে ফেল করেছিস, তা এ কাণ্ড করার দরকার কি? পড়িসনি—শুনিসনি, সারা বছর খেলে বেড়িয়েছিস, তা অঙ্কে ফেল করবি না। কতদিন বলেছি না যে, গুর কাছে ব'সে একটু অঙ্ক টক দেখিয়ে নিস।” জবাবে ছেলে বলে কিনা “যদি প'ড়েই পাস করবো, তবে মা সরস্বতীর খোসামোদ করতে যাব কেন? না পড়া ছেলেকেই যদি পাস করতে না পারে তবে আবার ঠাকুর কিসের?” ব'লে, ছেলে গৌজ হয়ে কোণের দিকে ব'সে থাকলো। বিনু তখন জুতো টুতো সরিয়ে, গঙ্গাজল ছুঁইয়ে পটখানিকে আবার দেওয়ালে টাঙ্গিয়ে দিল। আমি পাঁচটা পরসামা মা সরস্বতীর ছবিখানায় ঠেকিয়ে রেখে দিলাম যে, ঐ গৌয়ার গোবিন্দর রাগ পড়লে, তাকে দিয়ে পূজা মেওয়ান ব'লে।

বিনুর এ সব খামখেয়ালী কাণ্ড ধর্তব্যের মতোই নয়। কিন্তু বিনুর কীৰ্তনে না যাওয়া, দেবে-দ্বিজে ভক্তি মন থেকে মুছে ফেলা, আমাকে সত্যিই ভাবিয়ে তুলেছিল। বিনুর আমার ঠাকুর-দেবতায় বিশ্বাস ছিল। ছোটবেলায় লক্ষ্মী পূজার দিন, তার লাটিম আর মার্কেলের উপর আমাকে মা লক্ষ্মীর পায়ের আলপনা আঁকিয়ে নিত। না হ'লে অনেক লাটিম আর অনেক মার্কেল হবে কি কি ক'রে? সেই বিনু এমন হয়ে গেল—আর আমারই চোখের সম্মুখে! আমি চব্বিশ ঘণ্টা ভগবানের কাছে বসি, ভগবান, বিনুর তুমি এ কি করলে? ওদের বাবার কানে যাতে একথা না পৌঁছায় তার জন্তু কত চেষ্টা করি। কিন্তু ও ছেলে কীৰ্তনে বাবে না—এ কথা আর কদিন চেপে রাখা যায়? আমি লুকিয়ে বিনুর খাওয়ার জলের সঙ্গে পূর্ণেশ্বরীর খাঁড়া ধোয়া জল তার চরণামৃত মিশিয়ে দিই, আর বলি মা পূর্ণেশ্বরী, আমার ছেলের দোষ নিও না।..... আর সে মানুষই বা কি? তুমি হ'লে ওদের বাবা। ওদের ভুল ভ্রান্তি হয়, ওদের একটু বুঝিয়ে দিলেই পারো। তোমার বোঝানোর কাছে তো ওদের ভারী-সুন্দরী চলবে না। কিন্তু উনি মুখ খুলে কিছু বলবেন না। ছেলেদের ভালমন্দের ঠিকে যেন আমারই একার। ঐ এক ধরনের মানুষ।.....

এইরে, আবার সব এল জাগতিন করতে। এখন লোক দেখলে আমার গা জ্বালা করে, একথা এদের বলিই বা কি ক'রে, বোঝাই-ই বা কি ক'রে।.....

কামলা দেবী এসে আমার নাড়ীটা টিপে ধরলেন।.....কতই না নাড়ী দেখতে জানো। সে তো আর আমার জানতে বাকি নেই। স্বামী ভিস্ট্রীক বোর্ডের ডাক্তার—কাজে কাজেই উনি ভাব দেখান যে উনিও কিছু কিছু ডাক্তারী জানেন। মিছে এ গুমোর কেন? উনিও তো মাঠার ছিলেন। আমি তো একদিনের জন্তুও মনে করিনি যে তাঁর পরিবার ব'লে আমিও পণ্ডিত হয়ে গিয়েছি। উনি কংগ্রেসের কত বোঝেন—তাই ব'লে কি আমি বলবো যে আমিও বুঝি?

কামনা দেবী জিজ্ঞাসা করলেন “এখন কেমন আছেন ?” রাগে মাথা থেকে পা পর্যন্ত জ্বলে যায়। আমার জন্ম তোমরা যা ব্যস্ত তাতো বুঝি—তবে আবার এ চং কেন ? রাগের জ্বালায় জবাব দিই “যা ভাবছেন, তার এখনও অনেক দেবী আছে। ভেমন বরাত ক’রে কি আর পৃথিবীতে এসেছি যে, সবাইকে ফেলে থুয়ে, ড্যাং ড্যাং ড্যাডং করতে করতে স্বর্গে চ’লে যাব। তাহ’লে তো হয়েই ছিল। গুপ্তি শুদ্ধ না খেয়ে তো আর আমি পৃথিবী থেকে নড়ছি না।”

কামনা দেবীর নাড়ী টেপা মাথার চ’ড়ে গেল। তার হাত আলগা হয়ে এল। টপ ক’রে আমার হাতখান বিছানায় পড়লো। হাতে ঝিনঝিনি ধ’রে গিয়েছে। উঃ গেছি গেছি ! কি ব্যথা লাগে হাতে ! মাথার বাঁ দিকটা কি রকম ভারী মনে হয়। বাঁ কানের পিছনে, মাথার ভিতরটা, মনে হয় যেন অবশ হয়ে গিয়েছে। বালিশ থেকে মাথা তুললে বাঁ দিকটা যেন টাল খেয়ে ধপ ক’রে আবার বালিশের উপর প’ড়ে যায়। কানের মধ্যে ঝিঁ ঝিঁ পোকাকার ডাকের মতো শব্দ অষ্টপ্রহর চলেছে।...আচ্ছা ক’রে শুনিয়ে দিয়েছি কামনা দেবীকে। ও সব মোড়লী ফলিও ঐ রামায়ণের দলের মধ্যে যারা তোমার সব কথা শোনে না, হাঁ ক’রে গেলে। ওদের মধ্যে—যারা গোটা কয়েক তো না কিছু বোঝে’ না কিছু জানে। অনহুয়াঙ্গীকে সেদিন দিয়েছিলাম চা ক’রে, বললো, সর্দি হয়েছে। একটু আদালুন দিয়ে ‘চাহা’ ক’রে দেবেন ? নিলো তো নিজের ষটীতে ক’রে চা-টুকু। তারপর যেমন ক’রে ষটি থেকে আলগোছে জল খায়, অমনি ক’রে হড়হড় ক’রে মুখে আলগোছে ঢেলে দিয়েছে চা টুকু। আর যাবে কোথায়। মুখ জিত পুড়েটুড়ে একাকার। তৈরী করা চা টুকু ঠিক ক’রে খেতে জানে না তার আবার বিত্তের বড়াই। ও দলের সব সমান। আর একজন ঐ যে সারলা দেবী সেটারও যদি একটু বুদ্ধি-শুদ্ধি থাকে। তার বাপের বাড়ী রূপেটলী খানার বড়হিয়াধনকটা গ্রামে। গ্রামটি নাকি খুব বড়। কত বড় তাই বোঝাতে গিয়ে সেদিন বললো কি না—“গ্রামে হাকিম-হুকুম, দারোগা পুলিশ, হৈজার (কলেরার) ডাক্তার, এরা অহরহ যাতায়াত করে। এত বুদ্ধিগু গ্রাম যে গাঁয়ের কুকুরগুলোর পণ্যস্ত এসব

দেখে দেখে স'য়ে গিয়েছে—হাফপ্যান্ট পরা লোক দেখলে তারা আর ডাকে না পর্য্যন্ত”। ধন্তি দেশ তোমাদের, আর ধন্তি তোমার বুদ্ধি। এই গুলোকে নিয়ে আবার কামনা দেবী মোড়লী ক'রে দল পাকায়। কামনা দেবী এসেস্বস্তীর মেঘের কিনা। ইংরিজী জানে না। কি ক'রে যে হাততোলা ছাড়া, সেখানকার অল্প কাজ চালায়, তাতো বুঝিনা। নর্মদাধেন সেদিন আমায় বলেছিলেন যে, কামনা দেবী চায়না যে, বিহারে কোনো লেখা পড়া জানা মেয়ে কংগ্রেসে আসুক। তাই'লে ওর কদর ক'মে যাবে কিনা। সেই জন্ত ও এই বোকা সোকা গুলোকে নিয়ে ছাটনা করে। কথাটা হয়তো ঠিকই। ও টানের বিলিতী দুধকে বলে 'মেমিয়াকে দুধ (মেমের দুধ)। টানের মাখন এখানে কাউকে খেতে দেবে না। বলে যে ওতে ডিম মেশানো আছে। তানা হ'লে মাখন কি কখন হ'লদে রং এর হয়। কে ওর সঙ্গে বাজে তর্ক করবে?...

...একি কামনা দেবী কু'কিয়ে কু'কিয়ে কাঁদছে যে। ছি টি আমি কি কাণ্ডই করলাম। উঠে ব'সে কামনা দেবীর হাত চেপে ধরি।...

“কামনা আমি তোমার মা'র বয়সী। দোষ হয়ে গিয়েছে কিছু মনে কোরোনা। আমি কি আর এখন আমি আছি? এখন আমার মাথার ঠিক নেই; কি বলতে কি ব'লে ফেলেছি।” তার মাথার হাত বুলিয়ে দি। সে চোখের জল মুছে, মুখে হাসি আনবার চেষ্টা করে।

জিজ্ঞাসা করি “আমায় ক্ষমা করেছো তো?”

“কি যে বলেন। এখন শুয়ে পড়ুন।”

ব'লে জোর ক'রে আমাকে বিছানায় শুইয়ে দেয়। আমার উপর সহানুভূতি আর দরদ তার মুখেচোখে ফুটে বেরুচ্ছে। ঠিক যেন মেয়ে মায়ের সেবা করছে। আমার তো আর মেয়ে নেই—আমার বা কিছু ঐ বিলু আর নিলু। একটা মাদি মেয়ে থাকতো। মেয়ের সাধ কি আর ছেলেতে মিটাতে পারে। এখনই মেয়ের কথা মনে হয়, তখনই মনে হয় বিলু আমার মেয়ে, নিলু আমার ছেলে। বিলুর স্বভাব মেয়ের মতো নরম; ওর ব্যবহার সেই রকমই দরদভরা, মেয়ে মতো ওর

সহ করবার ক্ষমতা, আর সেই রকমই ওর চোখে একটুতে জন আসে। এই ছাখো, না কেন, কাম্বলা দেবীকে এত কড়া কথা বললাম তা কি সে একটুও রাগ করলো? ওতো আমাকে পাল্টা শুনিয়েও দিতে পারতো। মুখ তো ওর কন নয়। সেদিন রসদ গুদামের এসিষ্ট্যান্ট জেলরকে তো কাঁদিয়ে ছেড়েছিল।...এ ঘরের সবাই আমাকে কত ভালবাসে, আমার জন্তু কত ভাবে, কত সেবা করে। আর আমি কি না এদের মুখনাড়া দিই, ভাল মন্দ কথা শোনাই। এমন তো আমি ছিলাম না। আমার সঙ্গে জীবনে কখন, কারও ঝগড়া হয় নি। জেলের মধ্যে যেন আমার স্বভাব বদলে গিয়েছে। এখন আর আমার, মুখের আর মনের উপর একটুও বাঁধন নেই।...কাম্বলা আমাকে পাখা করছে।

সে বলে “মিছরীর সরবৎ একটু খাননা কেন—অল্প একটু দিই।”—“না।” একটু নিষ্টি কথা বলেছি কিনা, আবার মাথায় চ’ড়ে বসেছে। এদের নিয়ে কি করি ভেবেও তো পাইনা। আর খিদে পেলে নিজেই গিলতো। তখন আর কারও খোসামোদের দরকার হবে না। লুসি জমাদারনী বলছিল যে, পরশু ডাক্তার ঘ’লে গিয়েছে যে, চব্বিশ ঘণ্টা যেন আমার বিছানার পাশে, কিছু না কিছু খাবার জিনিস রেখে দেওয়া হয়, কখন খেতে ইচ্ছা হয় বলা তো যায় না। এদের হাবভাব দেখে হাসি পায়, হুঃখও হয়। এ যেন হারিন মঘাইতোমিন-এর অনশন কি না। আমরা বায়ুনের ঘরের বারব্রত করা মেয়ে। দু-এক দিনের উপোসতো আমাদের গা সওয়া।

ঢং ঢং ঢং ক’রে ওয়ার্ডের ঘণ্টা বাজছে। এত রাতে আবার কে এল? ঘরের তালী বন্ধ ক’রে, জমাদারনী দেওয়াল টপকে চাবিটা বাইরে জমাদারের কাছে ফেলে দেয়। সেই জমাদার গিয়ে চাবী জমা দেয় জেলর সাহেবের কাছে। আর আমাদের ওয়ার্ডের বাইরের ফটক চব্বিশ ঘণ্টা বন্ধ থাকে, ভিতর থেকে। কারও কিছু বলার হ’লে, বাইরে থেকে দড়ি টানে, আর ভিতরে ঘণ্টা বাজে।...এ তো লুসি কার সঙ্গে যেন কথা বলছে। আবার কিছু কাণ্ড-টাণ্ড হ’লা নাকি? লুসিটা নিজেও কন নাকি? সারাদিন টো টো ক’রে বাইরে বাইরে ঘুরবে, রাছোর

ওয়ার্ডারদের সঙ্গে আলাপ করবে ; আর যেই আমি বললাম, তোরে একটু তরকারী রেখে দি, বিলুকে দিয়ে আসতে পারবি জেলে ? অমনি চোখমুখ বড় ক'রে বলবে, এমা সে কি ক'রে হবে ? জেলে কি কোনো জিনিষ পৌছনোর জো আছে নাকি ? সেখানে যে চব্বিশ ঘণ্টা কড়া পাহারার ব্যবস্থা। সেখানে গেলে কি আর আমার চাকরি থাকবে !—ওরে আমার ধর্মপুত্রুর যুধিষ্ঠির রে ! সাতকাল গেল ছেলে থেয়ে, এখন বলে ডান। তুমি তো ওয়ার্ডারের ভয়ে একেবারে জড়সড় কি না। দিনরাত ওদের সঙ্গে হাসি মস্করা চলছে। আর যেই একটা কাজের কথা বললাম, খমমি আশীর্ষা ছুতো। আরে তুইও তো ছেলের মা। তুই-ই যদি আমার কথা না বুঝলি, তবে অল্প কেউ না বুঝলে তাকে দোষ দিই কেমন ক'রে। ভগান করুন, তো'র যেন আমার বরাত কোনো দিন না হয়—কিন্তু হতো যদি, তো'র বুঝতিস। পরশু আবার বত্রিশ পাটী দাঁত বের ক'রে আমার কাছে এসে দলা হলো আপনার ছেলেকে আজ আলাদা ক'রে রেখে, আনুর তরকারী পেতে দিয়েছে। একটা খবরের মতো খবর বটে। কি মহামূল্য জিনিষই দিয়েছে। সরকার একেবারে ভাণ্ডার উজাড় ক'রে দানহস্তর খুলে দিয়েছে। সেই খবর দিতে এসে আবার উনি আনন্দে গ'লে পড়লেন।...

দরজার বাইরে থেকে লুসী চ্যাঁচাচ্ছে—“কামলা দেবী”! “কি'রে, কে এসেছিল রে ?”

—“রাতের ডাক্তারবাবু। জিজ্ঞাসা ক'রে গেল যে বাঙ্গালী মাইজী কেমন আছে ? বেশী বাড়াবাড়ি টাড়াবাড়ি হ'লে হাসপাতালে তার কাছে খবর দিতে। আর বেহ'স হয়ে গেলে সবুজ শিশিটা শুঁকোতে। মন্চনিয়া আর গলকুড়ি শুনে রাখ্। ছুটোতে মিলে প'ড়ে প'ড়ে যুচ্ছে বুঝি ?”

দরদ তো'র কত ! যেমন ডাক্তারবাবুর তেমনি লুসী জমাদারনী'র। তোমাদের আর আমি চিনি না। তোমাদের সকলকে আমি এক এক ক'রে হাড়ে হাড়ে চিনি। তোমাদের মুখে এক, আর মনে এক। উপর থেকে নীচ পর্যন্ত সব সমান। এই দারোগা সাহেবকেই ণাখো না। যেদিন বিলুর বাবাকে গ্রেফতার

করলো, সেদিন জেলা কংগ্রেস অফিসেও তালি লাগিয়ে দিয়ে গেল। আর আমাকে ব'লে গেল "মা, আপনি আপনাদের বাড়ীতে থাকতে পারেন। ওটা গভর্নমেন্ট দখল করেনি, 'জপ্তো' হয়েছে কেবল জেলা কংগ্রেস অফিস।" ওমা তিন চার দিন পরে এসে, আমাকে গ্রেফতার ক'রে তো খানায় নিয়ে এল। বললে যে মাষ্টার সাহেবের মতো আপনাকেও আটকবন্দী রাখা হবে। খানায় এনও কত খাতির! দারোগাবাবুর কোয়ার্টারে দারোগাবাবুর স্ত্রী, আমার জপ ও সন্ধ্যার ব্যবস্থা ক'রে দিলেন। স্বামী স্ত্রী দুজনেই মা, মা, ক'রে অস্থির। খাসা বৌটি, কচি খোকাটাকে আমার কোলে দিয়ে বললো—“আপনারা আশীর্বাদ করুন আমার এ খোকা যেন বেঁচে বর্তে থাকে। যেমন চাকরি, রাজ্যের লোকের শাপমুক্তি কুড়ানো! আপনি মা প্রাণ খুলে একটু আশীর্বাদ করুন। পর পর দুটো কোল খালি ক'রে চ'লে গিয়েছে।” আমি বনি “ঘাট ঘাট বালাই আমার, আমার কি ছেলেপিলে নেই। ভাল মানুষে কি শাপমুক্তি করে। এছলে তোমার বংশের নাম উজ্জ্বল করবে। এখানকার বরহমথান জানো তো,—পূর্ণেশ্বরীর মন্দিরের কাছে—ভারি জাগ্রত। সেই গাছে তোমার ছেলের নাম ক'রে একখান ইট বেঁধে দিও।”—বাক সে পর্ব তো শেষ হলো। জেলে আসবার পর শুনি যে, দারোগা রিপোর্ট করেছে যে, সরকারের জপ্তী জেলা কংগ্রেস অফিস থেকে, গভর্নমেন্টকে বেদগল ক'রে, আমি সেখানে অনধিকার প্রবেশ করেছিলাম। সেইজন্য আমার উপর নাকি মোকদ্দমা চালানো হবে। আচ্ছা ঠাখো! কি কাণ্ড বলোতো। আকাশে চন্দ্র সূর্য্য থাকতে এত বড় মিছে কথা! দারোগাবাবু নিজেই আমাকে বললো যে, আমাদের নিজেদের ধরে থাকলে কোন ক্ষতি নেই—ওদিকটা গভর্নমেন্ট দখল করেনি। আবার দেখ নিজেই সাতখান ক'রে গিয়ে লাগিয়েছে।...

জেলের ডাক্তারও ঐ দারোগারই মতো। কয়েদীকে লাল নীল জল দিয়ে ভাল করা, পরে তাকে ফাঁসীর দড়িতে বুগনোর জন্ত। ঠিক যেন মিয়ার মুর্গী পোষা। আবার মা ব'লে ডাকতে আসে। কেউ মা ব'লে ডাকলে তখন এমন মনটা গ'লে যায়, যে দুটো হক্ কথা শুনিবে যে গায়ের ঝাল মেটাবো, তার পর্য্যন্ত উপায় থাকে

না। আমি রাজ্যশুক লোকের মা ; জেলার সব কংগ্রেস কর্মীর মা ; আমার তো বিশ্বজোড়া ছেলে। কিন্তু মন যে বিনু নিলুর উপর প'ড়ে থাকে। এদেরে ছাড়া, অন্য কোনো ছেলের মা হ'তে আমি চাই নি। এদের ছজনকেই বলে আমি প্রাণভ'রে ভালবাসতে পারিনি—তা না হ'লে কি আমার বিনু, এত ভালবাসার কাপাল। না হ'লে কি সে জিতেনের মা—দিদিকে মা বলে ? না হ'লে কি নিলুরা জ্যাঠাইমা বলতে অস্বস্তান। আমি চাই বিনু নিলুকে একেবারে আমার নিজের ক'রে রাখতে, বাতে ওদের উপর আর কারও দাবী নাওরা না থাকে। কিন্তু আমি ওদের আঁকড়ে ধ'রে থাকলে কি হবে, রাজ্যের লোকে যে ওদেরে চায়। সকলেরই টান যে ওদেরই উপর। আমি কি ওদের ধ'রে রাখতে পারি ? এননিই তো বিনু না অভিমানী ছেলে। 'তুই' না ব'লে 'তুমি' বললেই অভিমানে তার চোখ দিয়ে জল আসে। সেই উনি একদিন ছপুর্নে খাওয়ার সময় বলেছিলেন—“বড়বাবুকে বাড়ীতে দেখছি না। এখনও করেন নি ব'ঝি ?” বিনু ছিল বরের মধ্যে। একথা শুনে সে কেঁদে কেটে অস্থির। নিলু হ'লে তো হৈ চৈ ক'রে বাড়ী কাটাতে। ...দিন প্রাণের তো জিতেন, ধীরেন, হেবল, বেলা, বৌরা, নাতি নাতনী সবাই রয়েছে। তোমার বাড় বাড়ন্ত লক্ষ্মীর সংসার। কোন কিছুই অভাব নেই। কেন তুমি নিলুকে আমার কাছ থেকে কেড়ে নেবে ? কেন পর ক'রে দেবে ? আমার ছেলের একটুও ভাগ আমি কাউকে দেবো না। আমার তো সংসার ঐ বিনু নিলু ছাড়া আর কিছুই নেই। চাল নেই চুলো নেই, মাথা শুঁজবার একটু জায়গা নেই। না আছে টাকাকড়ি, না আছে ধন দৌলত। আমি তো ছেলেদের মুখের দিকেই জেয়ে সব ছুখ-কষ্ট ভুলেছি। তাও ভগবান তোমার সহঁন না। ছেলে ভুলানো মনুর দিয়ে সবাই আমার ছেলেকে পর ক'রে দিল। জিতেনের মা—দিদিকে ঐ দেখতে ভাল মানুষ ব'লে মনে হয়, কিন্তু মনটা যেন একেবারে জিলীপীর প্যাচ। অন্য বাড়ীর কেউ একটা নতুন গয়না গড়াক না—সেটাকে খুঁটিয়ে খুঁটিয়ে দেখে তার মাত রকম বিল্বেস করবে। সব খবরে তার দরকার,—সোনাটা মরা সোনার মতো লাগছে—কত পান দিয়েছে—কাকে দিয়ে গড়ালে—কত ভরী ওজন—বানী কন দিয়েছো

তো গড়ন ভাল হবে কি ক'রে ? বিলু নিলুর কাছ থেকে আমার সংসারের সব খবর নেওয়া চাই ; তোর মা তেল দিয়ে ফোড়ন দেয়, না ঘি দিয়ে—তোর মা ছাঁকা তেলে বেগুন ভাজে, না অন্ন একটু তেল দিয়ে বেগুন সাঁতলে নেয়, এইসব কথা স্মিতাসা করতো ছোটবেলায় নিলুদের। আচ্ছা বলো ! এসব খবরে তার দরকার কি ? বিলুতো যা চাপা, কোনদিন কিছু বলে না ; কিন্তু নিলু আবার আমার কাছে এসে ঐসব কথা নকল ক'রে ক'রে বলে। একেবারে হুবহু দিদির মতো সুর, দিদির মতো হাবভাব, শুনে হেসে বাঁচি না। কিন্তু দিদির কি এটা উচিত ? আমার হলো অভাবের সংসার। তোমরা আপনার জন। এ নিয়ে আলাপ আলোচনা করার দরকার কি ? এদিকে দিদি আমাদের করেও খুব, সেকথা আমি অস্বীকার করি না। অসুখে বিস্মুখে দেখাশুনো করা, ছুতোয়-নাতায় খাওয়ানো দাওয়ানো, এসবের তো কথাই নেই। নিলুতো এখনও সেখানেই থাকে। প্রাণ দিয়ে করবে—কিন্তু খুব করছি একথা শুনিরে দিতেও ছাড়বে না—দিদির স্বভাবই ঐরকম। আর একটুও গন্তীর না—বড় হনহন গলগল ভাব। বিলুকে বলবে “বারিন্দিরের ব্যাটা”, নিলুকে বলবে ‘মাছপাতরী’, আর ওদের বাবার নাম দিয়েছে ‘দাড়ী’। এসব ফটিনটি না ক'রে সাদা ভাবায় নামটা ধ'রে ডাকলে কি হয় ?... মানুষের মুখওয়ানা একরকম ডিবের বাটী আমাদের সময় ছিল—অবিকল সেইরকম মুখ। ঝিন্ডের বাঁচির মতো কাল দাত। এক গাদা জর্দা মুখে দিয়ে, চব্বিশ ঘণ্টা প্যাচ প্যাচ ক'রে খুতু ফেলা হচ্ছে।...ছিলে তো বামুন পুরুতের মেয়ে। নৈবিঞ্জির চাল আর কাঁচকলা খেয়েতো মানুষ হয়েছিলে ছেলেবেলায়। পুরুতের পাওয়া লালপেড়ে কাপড় ছাড়া, অল্প কোনো কাপড় পরোনি বারো বছর বয়স পর্য্যন্ত। বড়লোকের বাড়ীতে বিয়ে হয়েছিল ব'লে ত'রে গেলে। তা না, এখন আর ঠেকারে মাটীতে পা পড়ে না—একেবারে যেন সাপের পাঁচ-পা দেখেছেন। তোমায় ভগবান দিয়েছেন তোমার আছে। তাই ব'লে বাদের নেই তাদেরও একটু মানুষ ব'লে ভেবো ! আমিও এমন হা-ভাতের ঘরের মেয়ে ছিলাম না—আর হা-ভাতের হাতে পড়িও নি। কিন্তু আমার কর্মফল—সোনামুঠো হাতে নিলে ধূলো মুঠো হয়ে

যায়।...আচ্ছা দিদি, বিনু তোমাকে জ্যাঠাঠান্না বলতো তাতে তোমার মন ভরেনি কেন? না দিদি, সত্যি কথা বলি, তোমার উপর আমার একটুও রাগ নেই। তোমরা ছিলে ব'লে নিলু বিনু তাদের জীবনের একটু আধটু সখ আহ্লাদ মিটোতে পেরেছে। বখন উনি জেলে, ওদের দাঁড়ানোর জায়গা ছিল না, তখন তো তুমিই ওদের থাকবার জায়গা দিয়েছো। বিনু গেলে, তোমার ছুঃখ কি আমার থেকে কম হবে? তা কি আর আমি জানি না। অন্তরের থেকে যদি বিনুকে তোমাকে দিয়ে দিতে পারতাম, তাহ'লে কি দিদি, বিনুকে তুমি বাঁচাতে পারতে? বিনু আমার বাঁচুক দিদি, আর তাকে তোমার হাতে দিতে আমি কিপেটপানা করবোনা। এখন তোমারও সম্বল থাকলো কতকগুলো বিনুর স্মৃতি, আর আমারও তাই। তাই নিয়ে নাড়াচাড়া ক'রেই এখন জীবন ভোর কাটাতে হবে। না দিদি, তোমার দরা, তোমার টান আমি কোনো দিন ভুলতে পারবোনা। আমার ছেলেরা মাছ খেতে এত ভালবাসে, কিন্তু আশ্রমেতো আর মাছ রাখার উপায় নেই। আমরা বুড়ো মানুষ—গান্ধীজীর কথামতো বিশ্ব বছর থেকে মাছমাংস খাওয়া ছেড়ে দিয়েছি! কিন্তু ছেলেপিলেদের উপর জোর করি কি ক'রে? তুমি তো দিদি আমার ননের কথা বুঝেছিলে। নিত্যি বিনু নিলুকে ডেকে মাছ খাওয়ানো ;—আমাকে তোমাদের বাড়িতে মাছ খাওয়ার জন্তু কত জোর ক'রে ধরা ;—দিদি তোমার প্রাণের টান আমি ঠিক বুঝি। তোমার কাছে আমি জন্মে জন্মে ঋণী। তোমার নিন্দে করলে আমার জিত খ'সে প'ড়ে যাবে না? তোমার নিন্দের কথা ভাবলেও আমার পাপ। আজ আমার ননের ঠিক নেই দিদি। বিশ্বসংসার তো বিষ হয়ে গিয়েছে আমার কাছে। ভালকথা মনে আসবে কি ক'রে? তুমিও তো বিনুর মা—তোমাকে তো আর নতুন ক'রে আমার গনের অবস্থা বুঝিয়ে দিতে হবে না। বিনু তোমাকে কত ভালবাসে, কত ভক্তি করে। বিনু বাকে একবার মা বলেছে, আজকের দিনে আমি কি তার উপর রাগ করতে পারি? বিনুর মা ব'লে ডাবার মর্শ্ব আনিতো বুঝি। ডাক তো নয়, ডাক শুনে সমস্ত মন ছুটে চ'লে যায় তার দিকে। ছেলে তো নয় এক একটা শত্রু। ছেলেদের কথা দত ভেবেছি তার অর্ধেকও যদি

ভগবানের কথা ভাবতাম, তাহলে নিশ্চয়ই ভগবানকে পাওয়া যেত। কিন্তু যতই আঁকড়ে ধরো, পিছলে বেরিয়ে যাবে। বজ্র-আটনি ফস্কা গেরো। না হ'লে—ঐ ছেলে বিনু বারান্দার পাটী পেতে ব'সে পড়ছে—আমি যদি পিছন দিয়েও পা টিপে টিপে নিঃশব্দে চ'লে যাই, তাহ'লে ও বুঝতে পারে। বলবে “মা মা গন্ধ পাচ্ছি”। আর সত্যি ক'রেই গন্ধ পায়। যখন ছোট ছিল—স্নান ক'রে এলেই আমাকে জড়িয়ে ধরতো। বলতো তুমি স্নান ক'রে এলেই তোমার গায়ে মা'র গন্ধ পাই। আমি বলি, ওরে ছুঁ, ছেলে, তো'র সাত বাস্টে জামা কাপড় প'রে আমাকে ছুঁস্না, ঠাকুর ঘরে হেঁসেলে আমার ছিষ্ট কাজ প'ড়ে রয়েছে। তা' কি ছেলে শুনে,—বলবে মট্কার কাপড় কি ছুঁলে নষ্ট হয় নাকি? আর নিলুটা এত বড় শয়তান, ও কতদিনের কত কথা জমিরে জমিরে রেখেছে; সেই সব কথা মনে করিয়ে দিয়ে আমার পিছনে লাগবে, আর বলবে মা তুমি দাদাকে আমার চাইতে বেশী ভালবাসো। ...আরে পাগল তা কি হয়? মা কি কখনও এক ছেলেকে বেশী এক ছেলেকে কম ভালবাসে। ভগবানের নিয়মই যে সেরকম না। অমনি নিলু বলবে—“আচ্ছা মা, মনে করো পূর্ণিমাতে বকরান্ধস এসেছে। সে কেবল ছেলের মাংস খাবে। আর কোনো মাংস সে খায় না। প্রত্যেক বাড়ী থেকে একটা ক'রে ছেলে, তাকে জোগান দিতে হবেই হবে। আজকে তোমার বাড়ীর পালা। বলো, এই রকম অবস্থায় তুমি বক-রান্ধসের কাছে কা'কে পাঠাবে—দাদাকে না আমাকে?” “বা বা বকিস না তো। এতও বাজে কথা বলতে পারে। এত কথা তো'র মাথায় আসে কোথা থেকে, আমি তো বুঝতেই পারি না। কা'কে আবার দেবো, কাউকেই দেব না।” অমনি নিলু ‘বুঝেছি, বুঝেছি’ ব'লে বাড়ী মাং করবে।—বুঝেছো তো ছাই। তোমরা যদি মা'র মনের কথা বুঝতে তাহ'লে আর আনার দুঃখ কিদের? না হ'লে কি আর নিলু আমাকে একদিন বুঝিয়েছিল বে—মা'র ভালবাসা স্বার্থের খাতিরে। সেই কথা বোঝাতে ও গল্প বলেছিল বে—“একটা বিড়াল আর তার বাচ্চাকে একটা কড়ার উপর বসিয়ে, নীচে থেকে উলুনে আঁচ দেওয়া হলো। আর এমন ব্যবস্থা করা হলো যাতে বিড়াল পালিয়ে যেতে না পারে।

যখন কড়াটা খুব গরম হয়ে উঠলো, তখন বিড়ালটা, আশু আশু গিয়ে বাচ্চাটার পিঠের উপর বসলো।” সব মা'ই নাকি এই রকম ধরণের, বতক্ষণ নিজের গায়ে আঁচ না লাগে, ততক্ষণ মা ছেলে ছেলে ক'রে মরে। কোথা থেকে আজকালকার ছেলেরা বে এসব শেখে তা বুঝিও না, কিছই না। আজকালকার কলেজে এই সব পড়ায় নাকি? বিনুতো কখন এমন কথা বলে না। একথা শোনার পর, নিলুর সঙ্গে এ বিষয়ে তর্ক করতেও ঘেন্না লাগে। কিন্তু নিলুর এই কথাটা আমার মনের মধ্যে গেঁথে গিয়েছে। আর একদিন ও আরও একটা কথা বলেছিল— সে কথাও কোনো দিন ভুলবো না। সেও না'র স্বার্থপরতা লক্ষ্যেরই কথা। বড় ভূমিকম্পের পর অনেকদিন একটু আধটু ছোটখাট ভূমিকম্প হ'ত। একদিন রাত্রে যেই একটু কাঁকি মেরেছে, জ্বিতেনের বৌ ঘুমের ঘোরে, কোলের ছেলেটাকে ধরে ফেলে, দৌড়ে বাইরে চ'লে এসেছে। আর যাবে কোথায়। তাই নিয়ে বাড়ীশুধ লোক তো বেচারীকে ছিঁড়ে খায় আর কি। আর নিলুর পুঁজীতেও একটা গল্প জমা হলো, আমাকে শোনানোর। ইঁটা বাপু, মায়েরা স্বার্থপর, হাজারবার স্বার্থপর। আর ছেলেদের ভালবাসা একেবারে নিঃস্বার্থ—একটুও ভেজাল নেই। হলো তো? এই শুনলেই যদি খুদী হও তো তাই।...ছোটবেলা থেকে নিলুটা কি কম জানাচন করেছে আমাকে? কিন্তু নিলু ছ'তাই একই সঙ্গে মানুষ, কিন্তু নিলুটা কোথা থেকে বে এত ছষ্ট্রমি শিখেছিল, তাই ভাবি। কত সময় একেবারে কাঁদিয়ে ছেড়েছে। ছপু'রে হয়তো আমার একটু তন্দ্রা এসেছে। কোথা থেকে বগলী ছেলে, একরাশ দোপাটা কুলের পাকা ফলগুলো এনে, আমার নাকের সম্মুখে ফাটাতে আরম্ভ করলো। সব বীচিগুলো ছিটকে নাকে কানে ঢুকে যায়। ঠাঁই-মাই ক'রে তো উঠি। আর বকলে তা গায়েও মাখে না; ক্যাক্ ক্যাক্ ক'রে হাসে, লঘুগুরুর জ্ঞান ওর একটুও নেই। নিজের খেয়ালেই উন্মত্ত। একদিন করেছে কি,—এই বড় হয়ে—ছারপোকা মেরে মেরে তার রক্ত দিয়ে, মাইন পোডে'র মতো লিখেছে—“অহিংসা পরমোধর্ম”। আমি তো বুঝি কাকে ঠেন্ দিয়ে এ লেখা। আবার তাঁর কানে বাবে, এই মনে ক'রে আমি ভাব দেখালাম যেন লেখাটা দেখিইনি।

ওরে নিলু, একদিন যখন মা বাবা থাকবে না, তখন বুঝবি যে মা বাবা কি জিনিষ। দাঁত থাকতে কি দাঁতের মধ্যদা বোঝা যায়? ওর বাবার মনে দুঃখ দেওয়ার জন্ত নিলু করবে কি, ঠিক আশ্রমের জমির সীমানা যেখানে শেষ হয়েছে, ইঞ্চি মাপে সেইখানটায়, মাংস রেঁধে খাবে। আর বলবে “আশ্রমের জমিতে ছাগল খাওয়া বারণ, এখানে তো আর নয়।” ওরে নিলু, মহাত্মাজী ছাগলের দুধ খান ব’লেই কি, আশ্রমে মাংস খাওয়া নিষেধ? আশ্রমে কেন আমিষ খাওয়া বারণ তা’ তুইও জানিস, আমিও জানি, তবে কেন ঠুকে খোঁচা দিয়ে এমন কথা বলবি।...তুই মাছ মাংস খেতে ভালবাসিস, আর তোদের রেঁধে খাওয়াতে পারি না, একি আমার কম দুঃখের নাকি? কিন্তু আশ্রমের নিয়ম যে, কি করি? কতদিন দিদির বাড়ী গিয়ে, ব’সে ব’সে বিলু নিলুর মাছ খাওয়া দেখেছি। নিলু মাছ বে কি ভালবাসে— ‘রেওয়া’ মাছের কাঁটাখানি পর্যন্ত চিবিয়ে খায়। বিলু কিন্তু কতদিন বলেছে যে, এবার মা আমি মাছ ছেড়ে দেবো; আমি আর দিদিই ব’লে ব’লে ওকে ছাড়তে দিইনি। এমনিই তো যা চেহারা।...দিদির বাড়ীতে তাও তো দু-চার দিন একটু আদটু মাছ পেটে পড়ে। ছোটবেলায় আমাদের দেশে, আমরা ভাবতেও পারতাম না, বিনা মাছে লোকে কি ক’রে একবেলাও ভাত খেতে পারে। আমার ছেলেদের এ অবস্থায় তো আমরাই নিয়ে গিয়েছি। তারা বাংলা দেশে থাকলোও না, সেখানকার কথা, আচার ব্যাভার কিছু জানলোও না। এরা সঁতার কাটতে জানে না: বন্যা, হিজল, গাব এসব গাছের নাম শোনেনি। একদিন ছেলেদের কাছে দেশের ঢপ-কীৰ্তনের কথা বলেছিলাম। নিলু তো ‘ঢপ’ নাম শুনে হেসেই আকুল, বলে ‘এমন বেঢপ নামও তো কখনও শুনিনি। বিলুকে একদিন বলেছিলাম তিজেলটা ওঘর থেকে, এনে দিতে। ও জিজ্ঞাসা করলো তিজেল কি মা? আমাদের দেশের কচি ছেলেটা পর্যন্ত যে কথাটা জানে, এরা এখনও সেকথা জানে না। বারো মাসে-তেরো-পার্বণ কি তা-কি এরা জানে? বিলু আবার খুঁটিয়ে খুঁটিয়ে এসব জিজ্ঞাসা করে। ওর সব জিনিষ জেনে নেওয়া চাই। মা, দোল কোন পূজাকে বলে। চড়কের দিন ছোটবেলায় তোমরা কি করতে? গাজন

গানের সুর কেমন? তোমাদের গাঁয়ে বৈরাগী ছিল?—রাজ্যের খবরে তার দরকার। কবে মনেও নেই, বিনু তখন ছোট; ওর কাছে গল্প করেছিলাম যে আমাদের গাঁয়ের নিখিল চৌধুরীর জামাই পিশাচ সিদ্ধ হ’তে গিয়ে শ্মশানে মারা গিয়েছিল। সেদিনও দেখি ও সেই কথা গল্প করলো। বিনুকে যদি জিজ্ঞাসা করি, ওরে কি করবি এত সব গল্প শুনে, ত’ বলবে—“তোমার ছোটবেলা মুখস্থ করবো।” আমার ছোটবেলা মুখস্থ করবি কিরে। এমন মিষ্টি ক’বেও ছেলে কথা বলতে পারে! শুনলেই মনটা আনন্দে ভ’রে যায়। নিনুর কিন্তু এসবের বালাই নেই। তার এত সব খবর শুনবার সময় অপর ধৈর্য্য কোথায়? দিনরাত টো টো ক’রে বেড়াবে; মধ্যে মধ্যে একবার হুড়মুড় ক’রে ঢুকবে বাড়ীতে। টান মেরে ফেললো জামাটাকে। হুকুম হলো মা গঞ্জিটায় সাবান দিয়ে দিও। মাথায় এক খাবলা তেল দিয়ে, দু’ঘণ্টা জল গায়ে পড়লো কি না পড়লো, এলেন রান্নাঘরে। ‘এখনও ভাত বাড়নি।’ কখন থেকে রেঁধেবেড়ে, আমি আর বিনু ভাত আগলে ওর জন্তে ব’সে রয়েছি, সে কথা ছেলের খেয়ালট নেই।...আর বিনু নিজের কাপড় জামা তো কাচেই, কতদিন ওয়াড় ও কাপড় জামা সাবান দিয়ে কেচে দেয়। কার সঙ্গে কার তুলনা।

.....“এখন কেমন আছেন?” আঙ্গুল নিয়ে একটু ঠেলা দিয়ে নৈনা দেবী আমাকে জিজ্ঞাসা করে।

এরা কি আমাকে নিশ্বাস ফেলার ছুটি দেবে না নাকি? হু দণ্ড নিরিবিনিতে বিনুর কথা ভেবে, তাকে একটু কাছে পাওয়ার চেষ্টা করবো তার কি উপায় আছে? কি আমার হিতৈষী রে! এখনই পর পর সাতটা প্রশ্ন জিজ্ঞাসা করবে—কলের গানের রেকর্ডের মতো। একটা প্রশ্ন শেষ হবে আবার তৈরী হ’তে হবে পরের প্রশ্নটার জন্ত। সে সময় যদি ঘরটাতে আগুন পর্য্যন্ত লেগে যায়, তাহ’লেও নৈনাদেবী ওর সেই বাঁধা প্রশ্নগুলো করতে ছাড়বে না; দরদ দেখে ম’রে যাই! জবাব দিই, “হ্যাঁ গো হ্যাঁ। খুব ভাল আছি, গা বমি বমিটা নেই, মাথাপিরা ক’মে গিয়েছে,

গরম লাগছে না, পেটের মধ্যে জ্বালা করছে না, মুখের তেতো ভাবটা ক'মে গিয়েছে ; কঞ্চল বিছানা বেড়ে দেওয়ার দরকার নেই। হয়েছে তো? আর আমার জন্ত চিন্তা করতে হবে না। এখন গুটী গুটী গিয়ে নিজের বিছানায় ঠাণ্ডা হয়ে শোও।” নৈনা দেবী আমার উত্তর শুনে অবাক হয়ে গিয়েছে। বোধহয় ভাবছে যে মাথা খারাপ হলো নাকি? একটাও কথা না বলে ও নিজের বিছানার দিকে চ'লে গেল। ও কারও মুখ-ঝামটা চুপ ক'রে সুইচার পাত্তর নয়। ও আমার কথা নিয়ে একটা জটলা করবেই করবে—তা সে আজই হোক আর কালই হোক। এইতো দিন কয়েক আগে ওর মা ইন্টারভিউএ এসেছিল। ও করেছে কি,— সাবান, পেন্সিল, খাতা, মাখন, কিসমিস, আরও কত জেল থেকে পাওয়া টুকিটাকি জিনিষ, সব সঙ্গে ক'রে নিয়ে গিয়েছে জেলগেটে—মা'র সঙ্গে বাড়ীতে পাঠিয়ে দেবে ব'লে। সেখানে সি-আই-ডি আর জমাদার চেপে ধরেছে। প্রথমটার তাদের সঙ্গে ঝগড়া করেছে। বলছে যে এসব আমার নিজের জিনিষ। কেন বাইরে পাঠাতে দেবে না? তখন সি-আই-ডি বলেছে যে আমার সঙ্গে আইন ফলাতে আসেন তো, এসব জিনিষ নিয়ে যেতে দেবো না। আর যদি নরম হয়ে আমাকে অনুরোধ করেন, আর বলেন যে এসব জিনিষ আপনার বাড়ীর জন্তে দরকার, তাহ'লে আপনার মা'কে এগুলো নিয়ে যেতে দিতে পারি। তখন নৈনা দেবী, তাতেই রাজী। গেটের জমাদারকে কিসমিসও খাওয়ানো হলো। ঝাঞ্ঝা দেখি, কি অপমানটা হ'তে হলো। আর অপমানটা কি ওর একার। এতে তো আমাদের সকলকারই মুখেই চূণকালী পড়লো। জমাদারনী এসে সব কথা আমাদের ওয়ার্ডে ব'লে দিল। বহুরিাজী একটু মুখকোড় গোছের লোক। তিনি যেই না একটু নৈনা দেবীকে বলতে গিয়েছেন, আর যাবে কোথায়। একেবারে আগুন লেগে গেল। সে কি হৈ হৈ রৈ রৈ কাণ্ড! বহুরিাজীকে এই মারে তো এই মারে! এখানে নরম মাটি পেয়েছে কিনা। সি-আই-ডির সম্মুখে এসব তেজ ছিল কোথায়? তারপর দিন পনের ধ'রে চললো, ওতে আর বহুরিাজীর দলে কুকুরকুণ্ডলী। ওতো একাই একশো। কথায় কি বিষ, কি

ঝাঁঝ। সেই বলে না—‘মোষের শিং বাঁকা; যোঝার সময় একা’। ও একাই সকলকে ঝগড়া ক’রে ঠাণ্ডা ক’রে দিয়েছিল। কি জানি আবার আমার পিছনে লেগে, কি করবে। করবে তো করবে। বা মনে হয় করুক গিয়ে, মরার বাড়া আবার গাল আছে নাকি? ভগবান আমাকে যে ছুঃখ দিলেন, তার চেয়ে বেশী ও আর আমার কি করবে। সব জিনিষের সীমা আছে, আর লোকের ছুঃখের কি আর সীমা নেই।...এমনিই তো বিলুর কথা ভেবে আমার রক্ত জন হয়ে আসে,—তার উপর চমইন্ জমাদারনী একদিন আমাকে বললো “বান্ধালী মাইজী, তোমার ছেলের সাজা নাকি, সরকার বাহাদুর নিজে ইচ্ছে ক’রে দেয়নি। তোমারই আর এক ছেলে নাকি সাক্ষী হয়ে এই সাজা কারবেছে।” বলে কি এ? আমি শুনে ঠকঠক ক’রে কেঁপে মরি। জিজ্ঞাসা কবলাম, কে বললো তোকে? সে জনাব দিল যে “নৈনা দেবী একদিন আমাকে বলেছিল যে, এই রকম একটা কথা শুনছি। বাইরে ওয়ার্ডারদের কাছে জিজ্ঞাসা ক’রে ঠিক ব্যাপারটা কি ছেনে নিম তো। বাইরে জিজ্ঞাসা ক’রে আমি জানতে পাবলাম যে নৈনাদেবী যা বলেছিল তা সত্য। নৈনাদেবীরা তোমার কাছে বলতে বারণ করেছিল মাইজী। কিন্তু আমি ভাবলাম যে তোমার বাড়ীর কথা। জানবে, সকলে বলাবলি করবে, আর তুমি জানবে না। তা কি হয়? আমারও তো ধরম আছে। আচ্ছা মাইজী, তোমার ছেলেতে ছেলেতে ঝগড়া আছে নাকি? আমার ছু ভাইও একবার একটা কাঠাল গাছ নিয়ে নাথা কাটাফাটি করেছিল। তাই নিয়ে কত থানা পুলিশ। মুঠো মুঠো টাকা খরচ হয়েছিল। সতর টাকা নিয়ে, তারপর দারোগা সাহেব মোকদ্দমা তুলে নেন। তোমাদের কি মাইজী অনেক জোতজমি ‘মরেশী’ আছে নাকি? সে ছেলে ‘গান্ধীজীতে’ নাম লেখায়নি বুঝি? কার পেটে যে ভগবান কি সন্ধান দেন—কেউ বলতে পারে না।”—শুনে তো আমার বুক শুকিয়ে গেল। বললাম বত সব মিথ্যা কথা রটাছিন্। তোমার নামে আমি রিপোর্ট করবো। সে বলে যে “মাইজী আমি তো ভাল ভেপেই তোমাকে বলেছিলাম। হ’তেও পারে মিথ্যা। আমি তো যা শুনেছি, তাই বলেছি—একট

কথাও আমার মনগড়া নয়। ‘রিপোর্ট’ কোরো না মাইজী তুমি। আমার ‘পুরুথ’ তিন বছর থেকে পক্ষাঘাত হয়ে প’ড়ে আছে—আমার রোজগার থেকেই ছেলে পিলেরা হু মুঠো খেতে পায়।” আমি তাকে বলি, আচ্ছা হয়েছে যা যা। আর খবদার এমন কথা আমার কাছে বলিস না। সে তো চ’লে গেল। কিন্তু তারপর থেকে, আমার মনের মধ্যে তোলপাড় চলেছে। এত মিথ্যেও লোকে বলতে পারে।.....

.....ইজেরপরা দাদা বিলু, ছোটটো ল্যাংটা নিলুকে গাল টিপে টিপে আদর করতে ‘নিল-নিলু পিল-পিলু’।...

সেই নিলু দেবে বিলুর বিরুদ্ধে সাক্ষী। এতো আমি ম’রে গেলেও বিশ্বাস করতে পারি না। নিলু গোয়ার, নিলু অবুঝ, নিলু খামখেয়ালী, সব ঠিক,—কিন্তু সে যে দাদা-অন্তপ্রাণ। নিলু কি কখন এমন করতে পারে? সেইদিন থেকে যখনই কথাটা ভাবি আমার বুকের রক্ত হিম হয়ে আসে। যদি খবরটা সত্যি হয়। জেলগেটে সেদিন ওঁর সঙ্গে ইনটারভিউ ছিল। সুপারিন্টেন্ডেন্ট মধ্যে মধ্যে খাতির ক’রে আমাদের দেখাশুনা করতে দেন। সেদিন ভাবলাম যে তাঁর কাছে একবার কথাটা জিজ্ঞাসা ক’রে দেখি, তিনি কিছু জানেন কিনা। তারপর মনে হলো থাক—একথা কি জিজ্ঞাসা করা - যায়? তিনি যদি বলেন যে, নিলুর বিরুদ্ধে এমন কথা তুমিও বিশ্বাস করো, আর ধরো, যদি কথাটা সত্যিই হয়। এমনিই তো তাঁর চেহারা দেখেই বুঝতে পারলাম যে তাঁর মনের মধ্যে দিয়ে কি ঝড় ব’য়ে চলেছে। আমার মনে কি চলেছে, তা’ তো আমি জানি। তাই দিয়ে তো তাঁর মনের অবস্থাটা কিছু ঝাঁস করতে পারি। তার উপর লক্ষ্য করলাম যে উনি আমার মুখের দিকে তাকাতে পারছেন না। শেষকালে সাত পাঁচ ভেবে আর কথাটা জিজ্ঞাসাই করা হলো না। মুখের কথা মুখেই থেকে গেল। সি-আই-ডি বললো, এবার তাহ’লে উঠুন সময় হয়ে গিয়েছে।...ঘুরেফিরে কেবল এই কথাটা মনে পড়ে। নিলু কি কখন এমন কাজ করতে পারে? ওষে দাদা বলতে অজ্ঞান, ছোট বেলো থেকে দাদা যা করবে তা ওরও করা চাই। নিলুকে যে আমি বিলু থেকে

আলাদা ক'রে ভাবতেই পারি না। নিলু বদরগী। কখন বাইরে কি কাণ্ড ক'রে বসে ; তাই ভেবে তো আমি তটস্থ হয়ে থাকি। কিন্তু সব সময় মনের মধ্যে ভরসা থাকে যে, ওর দাদা আছে ওকে সাধলে নেবে।...ও বখন জেলে গিয়েছিল, তখনও মনের মধ্যে ঐ ভরসাই ছিল। ছোটবেলার কেউ নিলুকে কিছু বললেই, ও দাদার কাছে নাগিশ করতো—“ও জাজ্জা, ঠাখো না।”.....

সেই ছোটবেলার নিলু আর বিনু হেডনাষ্টারের কোথাটারের আমগাছটার নীচে খেলা করছে—হামিদ দফতরি গেটের মধ্যে ঢুকলো। ঢুকেই দূর থেকে কুর্নোশ করার মতো ক'রে আদাব করলো, আর বললো, “আদাব নিলুবাবু, একটা বুড়হিদ্দা মেমের সঙ্গে তোমার ‘সাদী’ দেব। কাল আমাকে একটা বুড়হিদ্দা নেন বলাছিল যে সে নিলুবাবুকে ছাড়া আর কারও সঙ্গে সাদী করবে না।”

“দাদা ঠাখনা, আনাকে কিসব বলছে।”

বিনু নিলুকে বোঝালো “সত্যি তো আর নয়, ওতো ক্ষ্যা পাচ্ছে। বুড়ী মেম আবার বিয়ে করে নাকি ?”

নিলু বলে “না। ও বলবে কেন ?”

দফতরী ব'লে চলে—“বুড়হিদ্দা মেমটার অল্প অল্প গৌফ আছে। আমাকেই বলেছিল প্রথমে সাদী করবে। তা' আমি বললাম, যার দাড়া নেই তাকে আমি বিয়ে করি না। তখন সে বললো, যে তাহ'লে আনাকে নিলুবাবুর সঙ্গে বিয়ে দিয়ে দাও।”

—“দাদা ! ঠাখো না”।

নিলু কান্নাকাটি আরম্ভ করলো। বিনু তাকে বোঝাতে বোঝাতে আবার কাছে নিয়ে এল। “বোকা ছেলে কোথাকার, ক্ষ্যাপালে বুঝি কাঁদতে হয়। তাহ'লে বত কাঁদবে তত ও ক্ষ্যাপাবে।” তারপর বিনু আবার কাছে গল করে— “নিলুটা একটুও বোঝে না। আমি বত বোঝাই তত ও কাঁদতে আরম্ভ করে।” সেই বিনুকে বলি “তুমি হ'লে ওর দাদা, তুমি না বোঝালে ওকে আর কে বোঝাবে বলো।” অমনি বিনু ভারি খুশী। দাদাগিরির দায়িত্ব তো কম নয়।...

বিলু নিলুকে চোখে চোখে রাখতো। দিন কতক নিলুর সখ হলো কক্কে ফুলের বীচি নিয়ে খেলার ; তাকে এদেশে 'কনৈল' না কি খেলা যেন বলে। বিলুকে বলি—
 “বিলু দেখিসতো বাবা, নিলুর উপর নজর রাখিস। আমার বড় ভয় করে, নিলু আবার কোন দিন কক্কে ফুলের বীচি-টিচি না খেয়ে ফেলে। ও বীচি বিষ জানিস তো ?” বিলু পণ্ডিতের মতো বলে—“নে আর বলতে হবে না আমাকে। এই তো সেদিন নিলুরা ভেরেণ্ডার বীচি জড় করেছিল, খাবে বলে। ওরা বলছিল যে ঐ বীচিগুলোর নাম হিন্দুহানীবাদাম। আমিই তো ওদের সেদিন খেতে দিই নি।”……সত্যিই ছোটবেলায় বিলু নিলুকে একদণ্ড চোখের আড়াল করতো না। ও তখন কত ছোট, নিলুর জামার বোতাম লাগিয়ে দেওয়া, জুতোর ফিতে বেঁধে দেওয়া, সব নিজহাতে করেছে। সেই নিলু কখনও বিলুর বিরুদ্ধে যেতে পারে ? আর যদি গিয়েও থাকে, তাহলে স্বৈচ্ছায় কখনই যাবনি। পুলিশের জুলুমে হয়তো গিয়েছে। ও দারোগা সব করতে পারে। হয়তো কত অত্যাচার করেছে নিলুর উপর। হয়তো জঙ্গসাহেবের সম্মুখে বিলুর বিরুদ্ধে বলার সময় ওর বুক ফেটে গিয়েছে চোখে জল এসে। কিন্তু বোধহয় না বলে উপায় ছিলনা। না না, নিলুর সাক্ষী দেওয়া, একি একটা বিশ্বাসের মতো কথা, কিসের থেকে কি শুনেছে চমাইন জমাদারনা,—আর তাই সাতখানা ক’রে এসে লাগিয়েছে। নিলু যদি তাই ক’রে থাকে তাহলে ও ছেলের আর আমি মুখ দেখবো ? যেখানে ছুঁচোখ চ’লে যায় সেখানে চ’লে যাব। আমার মন বলছে যে এমন হ’তেই পারে না, আব মায়ের মন কি কখনও ভুল বলে ?……

সেই কপিলদেও-এর বিয়ের সময় বিলু নিলু গিয়েছিল ওদের বাড়ীতে। আমার ইচ্ছে নয় যে ওরা যায় সেখানে। তখন তো ওরা ছোট। আবার গিয়ে অশুখ-বিস্মুখে পড়বে ; ওদের বাড়ীর আচার-ব্যভার জানা নেই, কি করতে কি ক’রে বসবে। কিন্তু যেদিন থেকে দহিভাত গ্রামের নাপিত, হনুদ মাখানো সুপুরী ওদের হাতে দিয়ে গিয়েছে, সেদিন থেকেই ওরা বাঘনা ধরলো যে ওরা বিয়েতে যাবে। কপিলদেও-এর বাবা তখন বেঁচে। তিনি একদিন এসে গরুরগাড়ী ক’রে

ছেলেদের নিয়ে গেলেন। সেখানে গিয়ে আট দশ দিনের বেশী ছিল না। কিন্তু কি বে শিক্ষা নে দেশের, ঐ ক'দিনের মধ্যে যা তা সব গান শিখে এসেছিল। ...উঠানের একদিকে বসেছিল নিলু—আর একদিকে বিলু।—ছ'জনেই ম'থুখে একটা ক'রে পুরানো বিস্কুটের টিন আর হাতে একটা ক'বে কাটি। তাই নিয়ে টিনটা বাজাচ্ছে। নিলু বললো... 'এবার কিন্তু দাদা, 'বকড়ীকে পাঁচ টেং'টা আর বাজাবোনা। 'তবাই-কে তাকা-ছ' মকই-কে লাওয়া' টাও না। এবার নিজের সময়ের গানটা হবে।' ছ'জনে বাজাতে লাগলো। বিলু গাইছে "কপিনদেওকে পাঁচ বিয়া, ছটনা চুমোনা"। বিলু বরপক্ষ। আর উঠানের অন্য কোণ থেকে কল্লাপক্ষ নিলু পালটা জবাব দিচ্ছে "বাজাতে বাও বাই বাই—কপিনদেওকে বহুকে ছটমা মাই।" খুব বকলাম ওদের। এই সব ছাই-ভণ্ড ছোটলোকদের গান ভদ্র লোকের ছেলেরা গার নাকি? বিলু একেবারে অপ্রস্তুত হ'য় গিয়েছে। নিলু বলে "দহিভাতে তো সহদেওদের বাড়ীর সব ছেলে মেয়েরা গায় এই গান। তারা ভদ্রলোক না বুঝি? আমি জানি যে নিলুকে যে কাজ তত দারণ করবে, ও'ছেলে সে কাজ তত বেশী ক'রে করবে। বিলু গো আমার কথা বুঝেছে। এখন ও'থমে গেলে একা নিলু আর কতক্ষণ চালাবে? ওর তো আছে কেবল নকলনবিনী। বিলু খামবার পর নিলু খানিকটা বাড়াবাড়ি ক'রে আমাকে শুনিয়ে গাইতে লাগলো "তকইকে তকাহ্ন মকইকে লাওয়া"; তারপর আন্তে আন্তে ঠাণ্ডা হয়ে গেল। পরে ঘর থেকে শুনাছ বে সে দাদার কাছে গিয়ে চুপি চুপি জিজ্ঞাসা করছে "দাদা, গানটা সত্যিই খারাপ নাকি?" দাদা বলে দেবে খারাপ, তবে খারাপ হবে। দাদার কথাই বেদবাক্য, আর আমি যে এতক্ষণ বোঝালাম, সীংকার ক'রে মরলাম—সে কথা কথাই না।.....

আজকাল বড় হওয়ার পর কতদিন দেখছি—ছ'ভাই ঘরে ব'সে গল্প করছে। আমি হয়তো একটা কিছু বলবার জন্য কিম্বা গল্প করবার জন্য গিয়েছি। অমনি নিলু ক্যাটল্যাট্ ক'রে ইংরাজীতে দাদার কাছে কি যেন সব বলবে। ব'লে হো হো ক'রে হেসে উঠবে। আমি বুঝি যে, আমার ম'থুকে একটা কি যেন বলা হলো

—কিছু ঠাট্টা-টাট্টা হবে বোধ হয়। আর ইংরেজী ক’রে গুরুজনের নামে কিছু বললে তো দোষ হয় না। কি শিক্ষাই সব হয়েছে! বিনু বলে “মা রাগ কোরো না। বিনু রাগের কথা কিছু বলেনি, কেন বিনু মিছামিছি মাকে চটাস?” আমি আর তাদের কাছে কি চাই? ছুঠো মিষ্টি কথা ব’লেও উপ্গার করতে পারিস না। দিনের মধ্যে কত গল্পই বা বিনু তুই আমার সঙ্গে করিস? তাও কি ঐ ঠ্যাঙ্গা মারা কথা না বললেই নয়? আবার হাসহিস লজ্জা করে না। ছোটবেলা থেকেই একই রকম থেকে গেলি। ‘অঙ্গার শতধৌতেন মলিনশচ ন মুঞ্চতি।’ বিনু আবার হেসে ওঠে। ভুল বলেছি বুঝি।...

“জমাদারীন! জমাদারীন! এ মন্চনিয়া! বাঙ্গালী মাইজী যুনুচে নাকি?”
কোথায় জমাদারীন, কোথায় মন্চনিয়া। জমাদারীন বারান্দার উপর ঘুমিয়ে পড়েছে, আর মন্চনিয়া আমার পাশে ব’সে ঢুলছে। নর্মদাবেনের কথার কে জবাব দেবে? আর জবাব না দিলেই ভাল। না হ’লে আবার খানিকক্ষণ মন্চনিয়া হয়তো আমাকে জালাবে। নর্মদাবেনের বাড়ী আহমদাবাদে। খুব বড়লোকের মেয়ে। বিলেত ফেরৎ; হাবভাব ও পোষাকটা ছাড়া বাকি সব, মেমসাহেবদের মতো। মহাত্মাজীর আদরের শিষ্যদের মধ্যে তিনি একজন। গায়ের রং ফুটফুটে ফর্সা, পরনে খদরের শাড়ী। জামসেদপুরের মজুরদের সেবার জন্তু বিহারে এসেছিলেন! সেখান থেকে গ্রেফতার হন। আমাদের ওয়ার্ডের সম্মুখেই আছে একটি ছোট ঘর। আগে ঘরখানা আতুর ঘরের জন্তু কিম্বা কারও ছোঁয়াচে রোগ হ’লে তাকে আলাদা রাখবার জন্তু ব্যবহার করা হ’ত। নর্মদাবেন ইংরাজীতে কথা বলে; কাজেই সুপারিন্টেণ্ডেন্টের সঙ্গে ওর খুব আলাপ। তাঁকে ব’লে ও ঐ ঘরটার চ’লে গিয়েছে। সেখানে একলাই থাকে। বড়লোকের মেয়ে; এখানে আমাদের সকলের সঙ্গে একসঙ্গে থাকতে ওর একটু অসুবিধা হচ্ছিল। ঘরখানাকে খুব সাজিয়েছে। কত পর্দা, কত টেবিল ক্লথ! চারিদিকে ফুলের বাগান করেছে। দিনরাত্তির সেই বাগানে টুকটাক কাজ করেছে। প্রত্যহ

কত ফুল আমাকে দিয়ে যায়। এখনও মাথার কাছে রয়েছে ওরই দেওয়া একটা কাঁচের ঘটীর মধ্যে কত ফুল। ফুলগুলো যেন কাগজের ফুলের মতো দেখতে। একটুও গন্ধ নেই। বিনু থাকলে নিশ্চয়ই এর নাম বলে দিত। অশ্রমে গিলে কত যে ফুলের গাছ পুঁতেছিল তার কি ঠিক আছে? এত কোনো নতুন মদস্বর্মী ফুল ফুটবে, আনাকে সে ফুলের নাম শোনানো, ওর চাই-ই চাই। আমার কি কি ছাই অত ইংরাজী নাম মনে থাকে? নর্মদাবেনের বিনুই মতো ফুলের মগ বলে, তাকে আমার খুব ভাল লাগে। কিন্তু সে আনাকে ওত ফুল দেবে, আমি ফুলের মন্য কি বুঝি? এতো কেবল বেনাবনে যুক্ত ছড়ানো। একটা যদি রোজ মেলে কিছু ফুল পাঠাতে পারতে, তবে তো দুঃখাম তোমার ইংরাজী জোর। নর্মদাবেন সাহেবের বঙ্গলে, সাহেব নিশ্চয়ই প্রত্যেক মেলা ফুল পাঠানোর অনুমতি দিত। সেই মনে ক'রেই নর্মদাবেনকে একদিন বিনু ফুলের মনের কথা গল্প করেছিলাম। সে কথা ওর মাথায় ঢুকতে কেন? বিনুই মতো গিলে কি ধান চাল দিয়ে লেখাপড়া শিখেছিল। বিচ্ছেদ হনো এক জিনিষ, আর গিলে হনো আর এক জিনিষ।—সেইদিন থেকে একরাশ ক'রে ফুল, আমার অশ্রমে দিয়ে যায়। আর সাহেবের কাছে অনুরোধ করার সময়, করা হনো কিনা নিজের ইউরোপীয়ান ডায়েটের জন্ত। সাহেব প্রত্যেক নর্মদাবেনের অঙ্গে নিজের বাড়া থেকে একখান ক'রে চোকণ্ডুরা আটার পাউরুটী পাঠিয়ে দেয়। আর আনার মনের কথা ওকে পরিষ্কার ক'রে বলতেও কেনন বাধবার লাগে। ও নেরে কিছু বড় লেকচার দেয়। কথকঠাকুরের মতো বখন তখন দিনের বেলায় এনে আনাদের বোঝাবে সত্য আর অহিংসার কথা। হিন্দী তো বলেন আনারই মতো। ভাঙ্গা ভাঙ্গা হিন্দীতে কি সব বলে, তার অনেক কথা ছাই বোঝাও যায় না। কেবল মধ্যে মধ্যে কানে আসে সত্য, অহিংসা, আর বাপুজী। যদি এসব লেকচারই দিতে হয়, তা হ'লে কথকঠাকুরের মতো মিষ্টি ক'রে এসব বলতেও শিখতে হয়। গান্ধাজীর অশ্রমে এসব লেকচার শেখায় নাকি? না—বিনুতো একবার গিয়েছিল সবারমতীতে—সেতো সে কথা কখনও বলেনি। আচ্ছা, এত লোক থাকতে নর্মদাবেন আমাকেই

কেন এসব কথা বেনী ক'রে শোনাতে আসে? ওকি ভাবে যে আমি সত্য কথা বলি না, না অন্তের গুনগাণ্ডি দেখে হিংসেয় ফেটে মরি। আরে ওসব কথা আমাকে কি শোনাবে। আজ বিশ বছর ধ'রে ওসব শুনে শুনে কানে পাকা প'ড়ে গিয়েছে। কত বক্তৃতা বলে শুনালাম—আর নর্মণ্যেণে ভাবছেন যে আমাকে নতুন কথা শিখাচ্ছেন।...সেই প্রথম প্রথম যখন নতুন আশ্রম হলো, তখন উনি আমাকে এসব কত কথা বুঝানোর চেষ্টা করতেন। আমার মন তখন বিগ্ন নিলু আর সংসারের উপর প'ড়ে রয়েছে। ও-ব কথা জানবার আশাও ইচ্ছাও নেই, বুঝতেও পারি না। এ কান দিয়ে শুনি ও কান দিয়ে বেরিয়ে যায়। আমার লাভের মধ্যে একটু কেবল মনে হ'ত, যে এর মধ্যে দিয়ে তাঁর একটু কাছে আসতে পারছি। উনি চিরকালই একটু গল্পের প্রকৃতির লোক। ওঁর সঙ্গে কি কোনদিন প্রাণ খুলে কথা বলতে পেরেছি? মন খুলে কথা বলতে কি—ভয়েই মরি। আমাদের তো ঠিক অন্ত সবাব মতো নয়। স্বামীর সঙ্গে মতো যে কথা আসবে সে কথা না বলা, —হাসি এনে হাসি চাপা, সব সময় এই কি ক'রে ফেললাম এই কি ক'বে ফেললাম ভাব, এর দুঃখ ভুক্তভোগীই জানে।...তিনিই আমাকে শেখাতে আরম্ভ করলেন—চরখার কথা উঠলে, মহাআজীর কথা উঠলে, দেশের কথা উঠলে, হিন্দুস্তানীদের সম্মুখে কি বলতে হবে। এদেশে তো আর কেউ 'চরখা আমার ভাতার পুত, চরখা আমার নাতি' একথা বুঝবে না—এখানে তো অন্তরকম কথা সব বলতে হবে। তাই উনি হিন্দীতে কত ছড়া শিখিয়েছিলেন। ওঁর কত জায়গায় নিত্য লেকচার দেন, —ওঁদের ঐ সব ছড়া-পাঁচালীর দরকার হয়।...কবের কথা হলো, ভুলেও গিয়েছি ছাই। একটা কি যেন ছিল;—স্বামীর আবার দ্বিতীয় পক্ষে বিষে করতে ইচ্ছে চয়েছে। বৌ তা' বুঝতে পেরেছে। পেরে বলছে, ইচ্ছে যখন তোমার হয়েছে তখন বিষে করো। আমার জন্তে ভাবার দরকার নেই; আমার তো চরখা সম্বল থাকলো। এরকম আরও কত গল্প উনি শিখিয়েছিলেন। ভেবেছিলেন যে আমিও হরতো তাঁর মতো লেকচার দিয়ে বেড়াতে পারবো। পরে যখন উনি বুঝলেন যে আমার দ্বারা এ সব কিছু হবে না, এ কেবল ভয়ে ঘি ঢালা

তখন উনি হাল ছেড়ে দিলেন। আমিও হাল ছেড়ে দিয়ে বাঁচলাম।...তুমি সব ছেড়েছো এদিকে এসেছো, বেশ কবেছো, আমি তো তাতে বারণ করিনি। আমাকে সারাজীবন কষ্ট সহিতে হবে, তার স্বত্ত্বও আমি তৈরী, জেলে আসতে বলেছো, জেলে এসেছি। তাই বলে এক শাট লোকের মধ্যে দাঁড়িয়ে “পয়সার ভাইয়ো”, সে আমার দ্বারা হবে না। তোমার আশ্রমের সংসার চালানো, ছেলে মানুষ করা সেও তো একটা কাজ....

.....রামগড় কংগ্রেসের আগে, তোমার কথা শুনে বাভনগামায় গিয়ে কি অপ্রস্তুত, কি অপ্রস্তুত!—পাটনা থেকে চিঠি এসেছে যে শীগগীর জনকয়েক স্বেচ্ছাসেবিকা পাঠাও। জোর বাগিদ। এখনই তাদের ট্রেনিং দিতে হবে, নইলে কংগ্রেস অনিবেশনের সময় তারা তৈরী হ’তে পারেন না। মহারাষ্ট্র থেকে একজন ভদ্রমহিলা এসে রামগড়ে ন’সে বসেছেন, স্বেচ্ছাসেবিকাদের ট্রেনিং দেওয়ার জন্য। গেল রাজা, গেল মান। জেলাও ইজ্জৎ আর বুঝি পাঠে না। জেলে থাকার মতো মেয়েহলে তো বলতে গেল জেলায় পাঁচটা—আমি, হরদাস তনেইন, বলবিয়াঙ্গী, বুড়হিয়াখানকাটার সার্বনা দেবী, আর গোপড়ার খাদিজবিসারও আবার চোখে ছানি পড়ার, কয়েক বছর থেকে আর বাড়ী থেকে বেরুতে পারেন না। দরস্বত্রী তো এবারে এসেছে।...তখন আমার উপর ভরসা হলো যে, কোড়হা পানার সব কংগ্রেস-কর্মীর বাড়ী বাড়ী যাও। জোর ক’বে তাদের বাড়ীও মেয়েদের দরস্বত্রী ‘স্বয়ং-সেবিকা প্রতিজ্ঞাপত্র’ করিয়ে আনতে হবে। ব্যাটাছেলেরা গেলেন হবে না, তোমাকেই যেতে হবে।...বাগা বাবে তারা কেমন কাকি দিয়ে বিনা পয়সার কংগ্রেস দেখে নেবে; কোনো রকম পরসের বন্ধন নেই; দেশী বরসী ভদ্রমহিলা হ’লে তাঁকে খুব ভালকা কাজ দেওয়া হবে, বেগন স্বত্ত্ব স্বেচ্ছাসেবকদের ছেলেপলে চালানো, ভাড়াবের চাবি রাখা, কিছা ঐ গোছের কিছু; এই রকম কত টুকটাকি উপদেশ উনি যাবার সময় আমাকে দিয়ে দিলেন। ভলাটিয়ার মিস্ত্রি, আমার গুরুগাড়ী হাঁকিয়ে তো বাভনগামায় নিয়ে এলো। হুপুবেলার পাড়ার সব মেয়েছেলেরা ঝা-জীর বাড়ীর উঠানে জড় হয়েছে। আমি তাদের সঙ্গে গল্প করছি, কংগ্রেস

স্বচ্ছাসেবিকা হওয়ার কথা। কত রকম কথা, সবাই আমাকে জিজ্ঞাসা করছে, জুতো না পরলে চলবে কিনা ; ঘোড়ায় চড়তে হবে কিনা ; সিঁদুর লাগানো, আর 'এতোয়ার' করা বারণ কিনা ; আরও কত অবাস্তুর প্রশ্ন। তারপর জনকয়েক রাজী হ'লো—অবিশি যদি তাদের বাড়ীর ব্যাটাছেলেদের আপত্তি না থাকে সেই সর্ত্তে। আবার ছুটলাম বাড়ীর কর্তাদের কাছে। সকলের সঙ্গে খোঁটামুটি জানাশোনা আগে থেকেই ছিল—কত দিন তারা সব আশ্রমে গিয়ে থেকেছে। তারাও প্রথমটা আমতা আমতা ক'রে, পরে যেই একজন রাজী হয়ে গেল, আমি তখন প্রতিজ্ঞাপত্রগুলো নিয়ে আবার গেলাম বাড়ীর ভিতর, সেগুলিতে দস্তখত করানোর জন্ত। কালি এল, কলম এল, কয়েকজনের দস্তখত, টিপসই হলো। ঝা-জীর মেয়ে শকুন্তলা ফর্মে দস্তখত করবার আগে কাগজ খানা জোরে জোরে পড়লো—“মৈ দেশকে বাস্তে হর তরহকী কুর্দানীকে নিরে তৈয়ার হ”। অ্যা কুর্দানী কি ? এটাতো ঠিক বুঝলাম না। হ্যাঁ বান্দানী মাই, দেশের জন্ত সব রকমের কুর্দান করবো, কথাটা লিখিয়ে নেওয়া কি তোমার ঠিক হলো। প্রথমে সবাই ছিল নরম। বেলগরামিয়ার নানী প্রথমটা একটু চ'টে আমাকে বললো “আমরা অতশত মহাৎমাজী ফহাৎমাজী বুঝিনা ; এ তোমার কেমন ব্যবহার ; তোমরা মুসলমান হ'তে চাও হওগে না, আমাদের জাত নিরে টানাটানি কেন ? এই কর্ম্মর জন্তে তুমি আশ্রম থেকে এতদূর উজিয়ে এসেছ। ছি ! লজ্জাও করেনা। গরু হচ্চেন সাক্ষাৎ ভগবতী.....। আমাদের জাত মারবার দস্তখত করা প্রমাণ নিয়ে যতে এসেছো ?”—সবাই মিলে আমার উপর পড়লো। আমারও একথার কোন উত্তর জোগালো না। সত্যিই তো কুর্দানীর কথা এতে লেখা থাকবে কেন ? উনি আসবার আগে এত কথা বুঝিয়ে দিলেন, আর একথাটা বুঝিয়ে দিলেন না। বোধহয় হিঁহদের প্রতিজ্ঞাপত্রের বদলে মুসলমানদের প্রতিজ্ঞাপত্র এসে গিয়েছে। আমার তখন ভয়ে গা দিয়ে ঘাম বেরুতে আরম্ভ হয়েছে। ওদের বোঝালাম যে আমি তো হিন্দী জানি না, বোধহয় কাগজ বদল হয়ে গিয়ে থাকবে। তাদের রাগ কি তবু পড়ে ? তারপর বাইরে ঝা-জীর কাছে গিয়ে বললাম, আর একদিন আসতে

হবে, অন্য প্রতিজ্ঞাপত্র সঙ্গে ক'রে! ঝা-জী প্রতিজ্ঞাপত্র প'ড়ে হেসেই খুন। বলে এতো ঠিকই লিখেছে। হিন্দীতে 'কুর্বানী' মানে ত্যাগ। ঝাথ দেখি কি কাও! কোথায় কুর্বানী আর কোথায় ত্যাগ। আমি কি ছাই অত জানি! আমি না হয় না জানতে পারি, কিন্তু উঠানে মেয়েছেলেদের মধ্যে কেউ ও কথার মানে জানে না? তবে অমন কথা লেখার দরকার কি? বাদেবর জন্ত লেখা ভারাই বোঝে না, তবু লেখা চাই। নম নম ক'রে তো সেদিনকার কাজ শেষ হলো। আমি আশ্রমে ফিরে এসে বললাম—“এই রইলো তোমাদের কাগজ। এ কাজের পায়ে শওকোটি দণ্ডবৎ। আর যদি আমি কোনও কংগ্রেসের কাজে বাইরে গিয়েছি।” নিলু এ নিয়ে আমাকে কত ঠাট্টা করে।...

সখাবতীজীর ছেনেটা চাঁচাছে, “বাংগাজী,, বাংগাজী”। আনাকে বলে বাংগাজী। আমার ভারি ঝাওটা। দিনরাত্তির আমার কাছে ঘুর ঘুর করবে—মতলব কোলে চ'ড়ে ব'সে থাকা। খুব বখন ছুট্টমী করে, আর কথা শুনে না, তখন ওর মা ওকে আমার কাছে দিয়ে যায়। আমার কোলে চ'ড়ে শান্ত। ছেনেটাকে নিয়ে এলে হ'ত। মন্সনিয়া তো কখন ঘুমিয়ে পড়েছে। এখন তো ওর জাগবার কথা না। এখন ডিউটী গলকটির। সেটাও তো দেখছি পাখা হাতে ক'রে পাশে ব'সে ঢুলচে। সারাদিন ডালের—খুদ বাছার কম্যাণ্ডে কাজ করেছে। এখন সারারাত কি জেগে থাকতে পারে? জেলে এসেছে বনেতো পুনটুমগুলো খুয়ে আসেনি। কিই বা দোষ করেছিল। এক লক্ষ্মীছাড়া স্বামীর অত্যাচারে জ'লেপুড়ে ও গিয়েছিল আত্মহত্যা করতে। ক্ষুর দিয়ে নিজের গলাটা' নিজে কি ক'রেই কেটেছিল। ভাবলেও গা-টা শিউরে ওঠে। এখনও গলার দিকে ভাকানো যায় না। ঘা-টা নেই। কিন্তু গলার নলী কেটে এতখানি হাঁ হয়ে রয়েছে নলীর ভিতরটা দেখা যায়। ঐ কাটাটার উপর চকিবশ ঘটা একখানা গামছা দিয়ে চেপে বেঁধে রাখে। বলে নে, না হ'লে কথা বলবার সময় ফ্যাস্ ফ্যাস্ ক'রে তার মধ্যে দিয়ে হাওয়াটা বেরিয়ে যায়, আর খাওয়ার সময় তার নদো লিগে খাওয়ার

জিনিষ বেরিয়ে আসে। এমনি গামছা জড়ানো থাকলেই জল খাবার সময় গামছাটা অল্প অল্প ভিজ়ে যায়। ছাথে দেখি একবার পোড়াকপালীর বরাহখানা। মরলে নিজেও বাঁচতো, স্বাণীরও হার জুড়োতো। তা মরলোও না, কিছুই না। নাক থেকে আত্মহত্যার চেষ্টা করার জন্ত এক বছরের জেল হয়ে গেল। কি যে এদের আইন। নিজের প্রাণটার উপরেও অধিকার নেই। যে মরতে চায় না তাকে দেয় ফাঁসী, আর যে মরতে যায়, তাকে নিঃশ্বাসে ধরে জেলে।

ছেলেটা পরিভ্রাণী চীৎকার করছে। ওটা গলা ফেটে মরলো - ওর মাথের কি আকেন বলোতো। আহা রে, ছেলেটা অজকে সাগাদিন আমার কাছে আসতে পায়নি। সখাবতীজী ছেলেকে বলছে, লাড্‌নী-ই বাঙ্গাজীকে পাস জ্যাভ্ন কি ? — বাঙ্গাজীর কাছে যাবে নাকি লাড্‌নী। 'বাঙ্গাজীর যে অজকে অসুখ করেছে। কাল সকালে য়েও। অসুখ করলে তার কাছে যেতে হয় নাকি ?' ছেলেটা খানিকক্ষণ চুপ করে বোধহয় কথাগুলো বুঝবার চেষ্টা করছে। তাৎপর আবার আস্ত হয় তার কান্না। "বাঙ্গাজী ...". সখাবতীজী চ'টে গিয়েছে ছেলের উপর। "ঐ ছুথো ওখানে গলকটি আছে। ধরে নেবে।"—ছেলেটা চুপ করে। বোধহয় ভরে। আবার আস্ত হয় তার একটানা চীৎকার "বাঙ্গাজীই-ই..."। "আবদার! কি জেন বাগা ছেলের। এতটুকু ছেলের এত জিন্দ!" ঠাস্ ঠাস্ করে ছেলেটাকে মারছে রে। মা'টার কি এমটুও দরাম'য়া নেই। গলকটি, এট গলকটি, শীগ্‌গির লাড্‌নীকে এখানে নিয়ে আস তো। গলকটি ভাঙ্গা ভাঙ্গা গলায় জয়া দেয় "ও ছেলে কি আমার কোলে আসবে নাকি ?" গলকটিটা কি কুড়ে! যু। আ ছে উঠতে ইচ্ছে করছে না—তা' একটা ছুতো দেখানো হলো। আমায় গলকটিকে ডাকতে শুনে, বহুরিয়াজী, কাম্বলা সখাই এসে জিজ্ঞাসা করে "কি বলছেন, একট জল খাবেন নাকি ?" এইরে! কেন মরতে গলকটিকে ডাকতে গেলাম! এরা সব এখানেই চুপটি করে বসে আছে তা কি আমি জান। সত্যিই তো গলকটিকে দেখে তো ছেলেটা ভয়ে আড়ষ্ট হ'য় যায়। লুদী জমানারীনের কাছ থেকে, কাপড়কাচা সাবানের বদলে, আমাদের ওয়ার্ডের সকলে মধ্যে মধ্যে বিড়ী নেয়।

আর গলকটিকে সেই নিড়ো'দিয়ে সবাই মিলে মজা খাণে—কাটাটার মধ্য দিয়ে কি ক'বে ধোঁয়া বেরোয়। গলকটিকে চারটে বিড়ী দিলে, সে একবার গলাব গানছা খুলে ধোঁয়া বের করে দেখাবে। লাড্‌নৌটা কিছু এইনব দেগে ভয়ে নীল হয়ে ব'য়, আর আমাকে অঁ কড়ে ধবে। আরে, ওতো ছেলে মানুষ, অনেক বয়স্ক নোকেও সে দৃশ্য দেখলে ভিমি থেয়ে প'ড়ে যাবে।.....

আমার কাছ থেকে কোন গাড়া না পেয়ে বহুরিয়াজী, তুলন্ত গলকটিকে ঠেনা দিছে জাগিয়ে জিজ্ঞাসা করে “বান্দানী মাইজী কি বলছিল বে?” “মাইজী বল'ছিল লাড্‌নৌকে নিয়ে আসতে।”

“তা' বলতে হয়। আমিই নিয়ে আসছি তাকে। গলকটি, তাই'লে তুই ঐ দরজার উপর গিয়ে খানিকটা বোস! তুই থাকলে তো ওখানে এখানেও চ'্যাগাবে। লাড্‌নৌ ঘুনিয়ে পড়লে, আমার এখানে এনে বসিগ'না।”

গলকটি হাঁক ছেড়ে ব'সলো। বহুরিয়াজী ছেনেটাকে এনে আমাকে দিল। লাড্‌নী একবারে আমার গলা জড়িয়ে ধরছে। শু'ব নাকি, শুয়ে পড়, আমি একটু পান্না করি। রাতচপুবে লক্ষী ছেলেরা জেগে থাকে নাকি? কি কথা শোনে আমার লাড্‌নী! কোথায় গেল ক'য়, কোথায় গেল আদার? লাড্‌নী আমার বুক বেসে শুয়ে পড়ে'ছ। আমি ওর হাতে, শোয়া অদহাতেই নর্মদা-বেনের দেওয়া একটা ফুল গুঁজে নিই। আর বলি কাল সকালে, সবকুলগুলো দেবো। ও হাতের ফুলটা ফেলে দেয়। ওর এখন কুলেরও দরকার নেই, কিছুরই দরকার নেই। ও বা চাচ্ছিল তা পেয়েছে। একটু পান্না না করলে আমার মশায় পেয়ে ফেলবে। পান্না খুঁজছি দেখে বহুরিয়াজী একটু কাছে এসে বসলো—পান্না করতে। এতক্ষণ মাহম পাচ্ছিল না—পাছে আমার আনি চ'টে ধাই। আচ্ছা এ ছেনেটা আমাকে ভালবাসে ব'লে মথাবতীজী কি আমার উপর ারক্ত হয়? মনে তো হয় না। ওবে আমি কেন নিতেনের মা—দি দর উ'র ারক্ত হই? আমার চাইতে তো মথাবতীজীর মন অনেক ভাল বসতে হবে। মাধে কি আর নর্মদা'নে আমাকে গুনিয়ে গুনিয়ে আহংসার বুকনো ঝাড়ে। বহুরিয়াজীও

লাডনীটাকে ভারি ভালবাসে। ওর ছোট ঘেয়ে লজ্জার সঙ্গে লাডনী খুব ভাব ছিল কিনা। লজ্জার বয়স ছিল বছর পাঁচেক। কিন্তু সে মাকে ছেড়ে থাকতে পারে না। গ্রেফতারের পর বহুরিয়াজী চেয়েছিল যে লজ্জা যেন তার চাচীর কাছে থাকে! ও মেয়ে কিছুতেই মায়ের আঁচল ছাড়বে না। মহা মুন্সিল। এদিকে তিন বছরের উপরের ছেলেমেয়েকে সঙ্গে নিয়ে জেলে আসবার নিয়ম নেই। দারোগাও বলে যে ওকে রেখে আসুন। তখন বহুরিয়াজী বাধ্য হয়ে দারোগার সঙ্গে ঝগড়া করে। বলে যে কে বললো যে এর বয়স তিন বছরের উপর। মেপে দ্যাখো! দেড় হাত উঁচু মেয়ের কি কখন পাঁচ বছর বয়স হতে পারে। ওকে সঙ্গে না নিয়ে যেতে দাও, তো দেখি তুমি আমাকে কি ক'রে ধ'রে নিয়ে যাও। এখন স্বরাজী ভলাটিয়ারদের দিখে তোমাকে গ্রেফতার করিয়ে দেবো। দারোগা সাহেব ভাবলেন দরকার কি এসব ফ্যাসাদে। লজ্জাকে শুদ্ধু সঙ্গে ক'রে এনে জেলে পুরলেন।...দিনরাত লাডনী আর লজ্জা একসঙ্গে খেলা করতো। খেলা আর কি—লজ্জাটা লাডনীকে কোলে কাঁখে ক'রে নিয়ে ঘুরতো। এখানে তো আর বেশী সঙ্গী সাথী নেই। মিশতে হ'লে অন্য ওয়ার্ডের ছোটলোকের বদ ছেলেমেয়েদের সঙ্গে মিশতে হবে। তাদের আবার নানারকমের খারাপ রোগ। চব্বিশ ঘণ্টা নিজেদের মধ্যে গালাগালি করছে। তাদের সঙ্গে কি আমাদের ছেলেমেয়েদের মিশতে দিতে পারি? তাই আমরা সবাই ওদের অষ্টপ্রহর চোখে চোখে রাখতাম। আহা রে, মেয়েটা ক'দিনের রক্ত আমাশায় মারা গেল। মায়ের প্রাণ তো—বহুরিয়াজীর তারপর কি দুঃখ, কি কান্নাকাটি। কেবল নিজের বুক চাপড়ে মরে, আর বলে—যদি আমি ওকে সঙ্গে ক'রে না আনতাম, তাহ'লে হয়তো লজ্জার আমার এদশা হ'ত না। লাডনীটা ও মারা যাবার পর থেকে ঘেন দিন দিন শুকিয়ে উঠছে। জেল থেকে ছেলেটা আধসের ক'রে তো দুধ পায়। তাও আবার জেলের দুধ। মাখনতোলা নোষের দুধে জল মিশিয়ে, কণ্টকটর নিয়ে আসে। তারপর গেটে, গুদামে, ওয়ার্ডে, যত জায়গা হয়ে দুধটা আসে, সব জায়গার ওয়ার্ডার, মেট, পাহারা, আর কয়েদীরা, সবাই তার থেকে এক এক গ্লাস ক'রে দুধ নিবে, কাঁচাই ঢুক্ ঢুক্ ক'রে খায়।

এ একেবারে বাঁধা নিয়ম; আর এর মধ্যে কিছু নুকোচুরী নেই। কেবল একটা বাধ্যবাধকতা আছে; যিনিই এক গ্লাস দুধ তুলে নেবেন, তাঁকে মেহনৎ ক'রে দুধের ড্রামের মধ্যে ঠিক এক গ্লাস জল মিশিয়ে দিতে হবে। সেই দুধ যখন এখানে এসে পৌঁছোয়, তখন তা' এমনি জিনিস হয়ে দাঁড়ায় যে তা খেয়ে আর ছেলেপিলে বাঁসতে পারে না। ছোট ছেলেপিলেদের না দেয় ফেল থেকে কাপড়জামা, না দেয় খাওয়ার জিনিস; বোধহয় ভাবে যে বারা দুধ ছাড়া অন্য জিনিস খেতে শিখেছে তাদের আবার না'র সঙ্গে আসবার দরকার কি? দিব্যি পরিষ্কার উত্তর!...

আহা, ছেনেটার পেটটা একেবারে প'ড়ে রয়েছে। কেন, মা রাতে খাওয়ানি নাকি? আমার জন্তে খাবার তো মাথার কাছে রেখে দিয়েছে। দেবো নাকি কিছু খেতে? না থাক ওসব খেয়ে আবার অসুখ বিসুখ করবে, তখন আবার ওর মা ঠেনা সামলাতে গিয়ে অস্থির হয়ে পড়বে। কি নরম গাটা! বিলু যখন ছোট ছিন, এমনি ক'রে কোল বেঁসে শুয়ে থাকতো। ঠাকুরের কোলে ও ব'সে—সেই ফটোখানা যখন তোলা হয়, তখনও এত বড়ই হবে। ও কিছুতেই চুপ ক'রে বসবে না। দূর থেকে আমি এক টুকরো মিছরী দেখানাম। সেই কথা ভেবে ও যখন মনের আনন্দে মশগুল, তখনই নিতাইঠাকুরপো ওর ফটো তুলে নিল। সে কি আজকের কথা! অস্থির পর কি রোগা হয়ে গিয়েছিল। চব্বিশ ঘণ্টা খাই খাই মন করে;—তা' ব'লে মুখ ফুটে গাঁ গাঁ করে কান্নার অভ্যাস তো ওর কোনো দিনই ছিল না। আমি হঠাতো ওকে তক্তাপোষের উপর বসিয়ে রেখে ভাঁড়ারে কি রান্না বর গিয়েছি, আর সেখানে কোনো কাজে আটকে পড়েছি; খানিক পরে এসে দেখি, ছেলের দু চোখ দিয়ে জল প'ড়ে বুক ভেসে যাচ্ছে। নীচের ঠোঁটটা একটু বাইরে বেরিয়ে এসেছে, আর কেঁপে কেঁপে উঠছে। আমাকে দেখে ছেলের কি অভিমান, কি অভিমান! “আমার আসতে দেবী হয়েছে ব'লে কাঁদছি। ম'রে যাই, ম'রে যাই—কি লক্ষী ছেলে আমার বিলু” এই ব'লে ওর মাথাটা বৃকের দিকে টেনে নিলাম। আর ছেলে আমার ঠাণ্ডা—মধ্যে মধ্যে স্থানি একটু ফোপানির শব্দ।...এখনও যেন সেই কোঁপানীর গরম ভিজে নিশ্বাস,

থেকে থেকে গনার কাছে লাগছে। ১০০ লাড়নী তুই আমার সেই ছোটবলার বিনু নাকি। হোর নবম নরম গা'টাকে বেবো নাকি একবার সেই কন ক'রে চটকে। ...না এগা সব দেখছে। আবার কি মনে করবে। বিনুকে এখন যদি একবার পেতাম, তাহলে একবার নিতাম বুকের মনো টেনে। বহুটুকু সময়ের জন্যে হোক না কেন বুকটাভো একটু জুড়াভো। হুইজনে একসঙ্গে কেঁদে মনে একটু শান্তিও ভো পেতাম। শেষ সময়টার কাছে থাকগো, এ উপায়টুকুও ভগবান রাখলে না। চারিদিকে লোহার গগাদ আর তাল। যুদ্ধে গুনি এত লোগা লাগে। বিনু গল্প করেছিল যে যুদ্ধের সময় কোথায় যেন গির্জার ঘটা গলিয়ে কামান তৈরী করা হয়। আর তাদের কি জেলের এই রাশি রাশি লোহার উপর নজর পড়ে না। এতগুলো পোড়া বুকের নিশ্বাস যে যমের সিংহাসনও টলরে দিতে পারে।

—বহুরিয়াজী, আজ্ঞা সত্যি ক'রে বলোতো!—ভগবান কি আমার উপর আশিচার করেন নি?

—বহুরিয়াজী আমার মুখের দিকে তাকিয়ে আছে। এ প্রশ্নটার জন্যে সে তৈরী ছিল না। সে আমার কথা উত্তর দিল না। একবার মৈনাদেবার মুখের দিকে তাকিয়ে, কি যেন ইসারা করলো। তারপর আমার মাথার চুলগুলোর মধ্যে দিয়ে আস্তে আস্তে আস্তে চালিয়ে দিতে লাগলো, আর জোবে জোবে পানি বরতে লাগলো। তোমার কাছে ঠাৎ জিজ্ঞাসা ক'রে ফেনেছিলাম বটে কথাটা, কিন্তু জবাব চাইও নি, আশাও করিনি।

লাড়নীটা কখন ঘুমিয়ে পড়েছে। এহুটুকু ছেলে, কিন্তু নাকডাকানি ঠিক বড় মানুষের মতো। আহা! একদিকে কত হয়ে শুয়ে'ছ, আর রূপোর চাকতী-গুলো কেটে কেটে যেন পেটের চামড়ার মধ্যে বসে গিয়েছে। কামরের ঘুমসীর সঙ্গে, একরাশ রূপোর চাকতী বুনিয়ে রাখবে। সখ্যাতীর্ষী ভাবে এতে বড্ডো বাগার হয়। কতদিন বলে'ছ যে এটা জেলখানা, এখানে হাজার রকম স্বভাবের লোক থাকে, রূপোর লোভে কে কোনদিন ছেনেটাকে কি ক'রে ট'রে বসবে,

তখন আর কেঁদে কুল পাবে না। তা কি সখাবতীও শুনবে। এই বুনীর মধ্যে ওর কি ভুক্‌ভুক্‌ আছে কে জানে।...

বিনু যখন ছোট ছিল ওর কপালের উপরে চুলগুলোকে ছোট্টো একটা বিহুনি বেঁধে দিতাম। বোগা ছিল কিনা—খেলই পেটটা গণেশ ঠাকুরের মতো উচু হয়ে উঠতো। ওকে ভুলোয়ার জন্ম খাওয়াব পঃ বলতাম “বাস এইবার হয়ে গেল—এইবার উঠতে হবে—বা-বা-রে!” অমনি নিজের পেটটাকে দেখিয়ে বলবে “বাগানী বাতানী ক’রে দাঃ”; কবে একদিন ওর পেটে হাত বুলিয়ে দিয়ে বসে ছলাম “বাতানী ভয়নাশ! বাতানী ভয়নাশ! সব হজম হয়ে যাবে—বিনু গরুর আর অস্থখ ক’রবে না।” সেই কথা মনে ক’বে রেখেছে। ভাত খাবার পর সেইকালে ওকে প্রত্যহ পেটে হাত বুলিয়ে ‘বাতানী’ ক’রে দিত হতো। তারপর পিঁড়ী থেকে উঠবার সময় হাঁটুর উপর ভর দিয়ে বলবে “বাবারে!” একসময়ে বুড়ো মানুষের মতো ভাব—দেন ওর উঠতে সাহায্যই কষ্ট হচ্ছে।...

কতদিনের কত ছোট ছোট ঘটনা, একের পর এক মনের মাঝে আসছে। বিনু, এত কষ্ট ক’রে তোকে মানুষ ক’বে তুলেছিলাম—এমনি ক’বে ফাঁকি দিয়ে চলে যাবি আমার ছাগল ক’থা মনে ক’বে, তুই শেষ সময়টায় ছাগল পাসনা বেন। এমনিই তো তোর কষ্টের গোলা, আমি কিছুই হাল্কা করতে পারিনি না। এখন তোর মনের উপর দিয়ে ক’বাচ্ছ তা কি আমি বুঝিনা। তার উপর আমার কথা মনে ক’বে, তোর যদি বুকের গোলা বাড়ে, তাহলে আর আমার ছাগলের শেষ খাবেন না। তুই এখন মনে কর যে তোর মা তোকে একটুও ভালবাসতো না।

বৈশাখের বহু রিষাজীর সঙ্গে গল্প করছে—স্বরটা একটু গরম গরম—“তাহলে বাপু ভগবানকে এর মধ্যে টানা বেন? সাজা দিল সরকার আর উনি দোষ দিচ্ছন ভগবানের। সেই গল্প আছে না—এক বাবুনের এক বোড়া ছিল। বাবুনের প্রতিবেশী ছিল এক ধোপা। বাবুনেরশাই যেই পূজা করতে বসতেন অমনি ধোপার গাথাটা বিকট চীৎকার আরম্ভ করতো। বাবুনঠাকুর তাই চ’টে

ম'টে ভগবানের কাছে প্রার্থনা করলেন 'হে ভগবান, ঠাখো, এই গাথাটা কিছুতেই তোমার পূজা করতে দেবেনা। তোমাকে ডাকতে গেলেই ওটা বাধা দেয়। ওকে তুমি মেরে ফ্যালো।' দিন কয়েক পরে বামুনঠাকুরের ঘোড়াটা অসুখ ক'রে ম'রে গেল। তখন বামুনঠাকুর ভগবানকে বললেন ভগবান এতদিন ধ'রে ভগবানগিরি করলে, কিন্তু এখনও কোনটা ঘোড়া কোনটা গাধা চেনো না। —এ হয়েছে তাই। ভগবানের এর সঙ্গে কি সম্বন্ধ?"

নাক না টিপেও নিশ্বাস নেওয়া বন্ধ করা যায়, কিন্তু কানে আঙ্গুল না দিয়ে শোনা বন্ধ করা যায় না কেন? এখন কানে আঙ্গুল দেওয়াও ভাল দেখায় না। সবাই দেখছে।ও বিষমুখীকে আমি চিনি না ও বহু রিমাজীর সঙ্গে গল্প করছে না আরও কত। খানিক আগে ওর সঙ্গে একটু ক্রুখে কথা বলেছিলাম কি না, তারই বিষ এখন ঝাড়া হলো। তখনই আমি জানি, ওকি ছেড়ে কথা বলবার মেয়ে। একটা রাতেরও সবুর সইল না। আজকে রাতটার জন্তেও আমাকে মারফ করতে পারলে না। তুমিও তো ছেলের মা। যে-না পদের গল্প; না আছে মাথা, না আছে মূণ্ড। কোথাকার শোনা গল্প; মনে করলো যে খুব পণ্ডিতী ফলালাম। এ কি, নৈনাদেবী এরই মধ্যে চুপ ক'রে গেল যে। বোধহয় বহুরিমাজীর কাছে আমল পেল না।...

বিলু নিলুর কেবল ছোটবেলার কথাই মনে পড়ে কেন? বোধহয় ওরা আমার কাছে সেই ছোটটাই থেকে গিয়েছে।...

...ছ'জনে বিছানায় শুয়ে রয়েছে। আমি কাজকর্ম সেরে ঘরে ঢুকে বললাম, "কেয়া বচকন আওর ছটকন, ঘুমতে হো?" বিলু বচকন আর নিলু ছটকন। অমনি ছ'জনে হো হো ক'রে হেসে উঠবে। আর নিলু বলবে—কতদিন মা'কে বলে দিয়েছি যে হিন্দীতে 'ঘুমতে হো' মানে ঘুমুচ্ছে, হয় না, ওর মানে হচ্ছে ঘুরছো, তাও মা'র মনে থাকবে না। বিলু বলবে বোকা কোথা'কার। ওতো মা'র মনে শুনে ইচ্ছে ক'রে বলছেন আমাদের হাসানোর জন্তে।...এত টুকু টুকু

ছেলে; হু'জনে কি গম্ভীর হয়ে পণ্ডিতের মতো আলোচনা করে। সেট সময়ই যদি ওরা এই গান্ধীজীর রাস্তার না আসতো!.....আসি না আসার ভার কি ওদের উপর? সে তো কর্তার ইচ্ছায় কর্ম। এখন যদি একবার বিনুর বাবাকে কাছে পাই তাহলে আচ্ছা ক'রে শুনিবে দিই, যে ছাগো, বাপ হয়ে ছেলেদের কি পথে এনেছ? সারাটা জীবন আমার একই রকম গেল। নিজে একদিন শান্তি পেলাম না। ছেলেদের একদিন হাসি খুসী ফুটিতে থাকতে দিতে পারলাম না। সারাজীবন ধরে যে উদয়াস্ত হাড়ভাঙ্গা খাটুনী খেটে এসেছি, সে কি এরই জন্তে? ছেলেরা যখন ছোট ছিল, তখন ইচ্ছে হয়েছে যে এদের টেনে বড় ক'রে দি। বড় হ'লে ওরা নিজের রাস্তা বেছে নেবে, — ব্যাটা ছেলেদের আবার ভাবনা কি? তারপর ওরা বর সংসার করবে। সে কথা ভাবলেও শান্তি। কিন্তু হলো কি? বড় ছেলেটাকে তো পড়ালে না। আব খেটা পড়নো সেটাও এই দিকেই মন। এবার জেল থেকে বেরতে দাও—আর আমি নিজেকে এই রাস্তার থাকতে দি! ছোট ভাইএর কাছে লাথি-বাঁটা খেতে হয় দেও স্বীকার, তবু নিজেকে সেই খানে পাঠিয়ে দেব। একটা কিছু হুজুগারের ব্যবস্থা সে নিশ্চয়ই ক'রে দেবে। আমাকে বিয়ে ক'রে নিয়ে এসেছিলে, — আমি তোমার আশ্রমের হোটেল দাসীবাঁদিরও অধম হয়ে চালিয়ে বাব চিরকাল—তাই বলে আমার ছেলেকে আর আমি এর মধ্যে রাখি! অনেক মুখ বুঁজে সহ্য করেছি, কিন্তু আর নয়। আমার সহ্য করার দাম কড়ায় ক্রান্তিতে চুকিয়ে দিয়েছ। তোমার হুজুগ, তোমার মুখ গান্ধীজীর সেবা করা; আমার কথা, ছেলেদের কথা একবার ভেবেছ? এক একদিন এক এক হুজুগ তোমার। দিনকতক ছোলা খেয়েই থাকলে! দিনকতক রোজ 'বেথুয়ার' শাক চাই। দিন কতক খালি বিলিতি বেগুনের সরবৎ! কাঁচা পটল খেয়ে সেবার কি অসুখ। একবার হুকুম হলো বিলিতি বেগুন খাওয়ার সময় আস্ত দেবে; কামড়ে কামড়ে খাওয়াই নাকি গান্ধীজী বলেছেন ভাল। কাটতে গেলে মিছিমিছি সময় নষ্ট। গান্ধীজীর আশ্রমে নাকি ঐ নিয়ম জারী করা হয়েছে। চললো আমাদের আশ্রমেও সেই নিয়ম। ওমা, কিছুর মধ্যে কিছু নেই,

একদিন হুকুম হলো যে ও নিয়ম আর চলবে না। সেগাম আশ্রমের বিলিভী-বেগুন খাওয়ার নিয়ম বদলে গিয়েছে। মহাশয় দেশাই কাগজে লিখেছেন যে গান্ধী শীর্ষক মতেগেটা বিলিভী বেগুন কামড়ে খাওয়া ঠিক না, যেই কামড় দেওয়া যায়, আর অন্য কামড়ে চোপড়ে ছিটকে বিলিভী বেগুনের রস পড়ে।—আর কি কথা আছে। সঙ্গে সঙ্গে আমাদেরও তাই করতে হবে। এতদিন কি কামড় দেওয়ার সময় চোখ বুঁজে থাকতে নাকি? আদিখ্যেতা ন? দিনের মধ্যে ভাত ছাড়া আর পাঁচটি জিনিস খাব, গোনা পাঁচটা। ছ'টা খেলেই মহাভারত অশুদ্ধ হয়ে যাবে। সাগা জীবন কি এত গুণে গুণে হিসাব ক'রে চলা যায়? গাওয়া ঘি না হ'লে খাবনা:—এবেশ কি গাওয়া বি পাওয়া যায়? পদে পদে জানাতন। আর সে কি কেবল এই গান্ধীজীর রাস্তায় এসেই নাকি? তার আগেই বা কি? চাবিটা থাকবে নিজের কাছে—ইস্কুলে যাওয়ার সময় একটা টাকা আমাকে দেওয়া হলো বাজার খরচের। আমার কাছে চাবি রাখলে, কি আমি সব টাকাকড়ি নিজের পেটে পুরতাম নাকি? না তোমার ভাঙা উজাড় ক'রে আমার বাপের বাড়ী পাঠাতাম? কি ভাবতে কে জানে। সেকথা কোনো দিন জিজ্ঞাসাও করিনি, তা জানবার প্রবৃত্তিও ছিল না।...ছোটলোকদের সম্মুখে একদিন কি অপমানই না হ'তে হয়েছিল।—তেলী বৌ সকালে স্কুলের কোয়ার্টারে তেল নিয়ে এসেছে। দোকানের তেল ভাল না। তাই তেলীবৌকে উঠানে ডাকিয়ে তার কাছ থেকে এক টাকার তেল নিলাম, আর ব'লে দিলাম যে বাইরের ঘরে বাবুর কাছ থেকে টাকা নিরে নে। ওমা খানিক পরে তেলীবৌ এসে আমার উপর কি তর্ক গর্হ—দাও এখনি তেল ফেং দিয়ে। মিছামিছি আমার সময় নষ্ট করলে। বাবু বললো যে তেল কে নিতে বলেছে?—অপমানে আমার মাথা কাটা গেল। সে সব কথা একটা একটা ক'রে মনে রাখা আছে।

.....তুমি দেশের স্বাধীনতার জন্তে সব ছেড়েছো সত্যি—কিন্তু আমাকে তো একটুকুও স্বাধীনতা দাওনি। কতদিন ভেবেছি যে ছেলেরা বড় হ'লে একথা একদিন ছেলেদের বলবো। কিন্তু বলি বলি ক'রে বলা হয়নি। ছেলেদের কাছে কি এ

কথা নলা যায়? তোমার কথার উপর কোনো দিন এগটি টু শঙ্গ কিনি। কেবল ছেলের মূগ চেয়েই রয়েছি এতদিন। আমার নিজের বা হয়েছে তা হয়েছে। তার জন্ত একটুও ভাবিনা। কিন্তু তোমার জন্ত আমার ছেলের এই হলো। আমার সংসার ছাড়বার হয়ে গেল। তোমার জন্ত আমার নিজের পেটের ভাট, ঘর বাড়িতে থেকে কত বাইরের ছেলেরা পড়ে, সে তার ভাগ্যের খোজ নেয় না। বীরেনের মা যে বীরেনের মা, সে শুধু এসে একদিন কত কথা শুনিয়ে গেল; কত মুখ বা মূটা দিয়ে গেল। বাঙ্গালী বলে তার ছেলের ডিষ্ট্রিকবোর্ডে চাকরীটা নাকি কংগ্রেস থেকেছে। আমরাই মুখের উপর বলে গেল - মাস্তির মশাই না ছাই; এম-এ, পাখা; মোড়া করার জন্ত কংগ্রেসে আছে, বাঙ্গালীদের মুখে চুনকানি দিয়ে। এখন আমার এমন হয়েছে, যেনিকৈ তাকাই—অক্ষকার।...

গাঙ্গৌজী, তুমি আমার একি করলে। তুমি আমাদের একেবারে পথের ভিখারী করে ছেড়েছ; সত্যিকারের ভিখারী। তুমি মাসের শেষে হাতে তুলে কিছু দেবে তবে আমরা চারটা খেতে পাবো। নিজের ঠাকুর দেও তা ছেড়ে তোমার পূজো করেছি; তোমার জন্ত আত্মোৎসর্গ বন্ধ থাকার সব ছেড়েছি; তামতে ভুলেছি। তার প্রতিদান তুমি খুব দিলে। তোমার দেখানো বাস্তব, আমা-দীর মধ্যে মনের মিল হয় না, বাপ-ছেলেতে ভালবাসার সম্পর্ক থাকে না, ভাট ভাইয়ের শত্রু হয়ে দাঁড়ায়, গৃহবিচ্ছেদে সংসার ছাড়বার হয়ে যায়। নিজের উষ্ট্রনয় ছেড়ে দিয়ে সকাল সন্ধ্যায় তোমার নাম জপ করেছি, কত বছর আগে আনাদের আশ্রমে যে জয়গাটায় তুমি বসেছিলে সেই গানটায় প্রত্যাহ সন্ধ্যাবেলায় প্রদীপ জালিয়েছি, একদিনের জন্ত চরখা কাটা ছাড়িনি, সে কি এরই জন্ত। মেথরকে হারিজন বলেছি, তার লাংটা ছেলেকে নিলু-বিলু'র সঙ্গে রাগাবরের বারান্দায় বসিয়ে পড়িয়েছি; —পাড়ার লোকে হেসেছে। কিন্তু তার ফল কি হলো? দুর্গার মা'রা গো ঠিকই বলেছিল। তারা বলেছিল স্বদেশীর কাজ করতে চাও করো, কিন্তু এমন কোনো —ঠাকুর দেবতাদের ঘাঁটাতে যাওয়া ভাল না। তখন তোমারই মুখের দিকে তাকিয়ে তাদের কথা কানে তুলি নি। আজ মর্মে মর্মে বুঝেছি। আজ দুর্গার মা, খেঁদার মা.

কি জিতেনের মা—দিদি থাকলে, তাদের গলা জড়িয়ে ধরে কেঁদেও, একটু মনটা হালকা করতে পারতাম। মহাত্মাজী না ছাই। ঐকি সন্ন্যাসীর মতো চেহারা নাকি ?
উঃ কি করেছি এতদিন ! পৃথিবীশুক লোক মিলে আমার কি করেছে ! গায়ের জ্বালায় নিজের মাংস ছিঁড়ে খেতে ইচ্ছে করে, মাথা খুঁড়ে মরতে ইচ্ছা করে। আর না—দেবো চরখাটাকে এখনি টান ধরে ফেলে,—আছাড় নেবো টুকরো টুকরো ক’রে ফেলবো ওটাকে। টেবিলের উপর রেখেছিলাম না।...

চরখাটা নেওয়ার জন্ত জোর ক’রে উঠে বসি। উঠতে কি পারি ? মাথার বাঁ দিকটায় যেন একমন লোহা ভরা। মাথাটাকে কে যেন বালিদের উপর ঠেলে ফেলে দিচ্ছে। বহুরিয়াজী, কমলাদেবী, এরা সবাই হাঁ হাঁ ক’রে উঠেছে।

“উঠলে কেন বাঙ্গালী মাই ? কি খুঁজছো ? চারিদিকে অমন ক’রে তাকাচ্ছে কেন ? শুয়ে পড়ো, শুয়ে পড়ো। মাথায় একটু জল দিয়ে দেবো ?”

সকলে মিলে জোর করে আমাকে বিছানায় শুইয়ে দেয়। কোন কিনিয়টা খুঁজছিলাম, সেটা আর ওদের কাছে বলা হচ্ছেনা। ওরা তা’হলে মনে করেনে, আমার মাথা খারাপ হয়ে গিয়াছে। এখনই কি মনে ক’রছে কে জানে ? মাথায় অডিকোলন দিচ্ছে। ঘরশুক লোক এক এক করে এনে জুটলো দেখছি আমার বিছানার ধারে। গলকটিটা হাপড়ের মতো গলায়, লুসী জনদাংনাটো ডেকে কি সব বলছে। বোধহয় আনারই কথা। সেটা আবার এখন চ্যাচাচেনি করে হাসপাতালে খবর দিয়ে অনর্থ না করে। সখাবতীজি আশু আশু আমার পাশ থেকে ঘুমন্ত লাডুলীকে তুলে নিল। ও কি ভাবল ওর ছেনেটাকে আমি কিছু ক’রে-টরে ফেলবো নাকি ? নে বাপু নে, বা ভাল বুঝিস কর। তুই হনি ওর না। ওর ভাল তুই যত বুঝবি, তত কি আর আমি বুঝবো ? সকলে চূপ করে আনার চারিদিকে ঘিরে বসেছে—এখন স্মৃতি পড়লে পর্যন্ত তার শব্দ শোনা যায়। খালি হাতপাখাটা থেকে একটা একটানা শব্দ হ’চ্ছে।.....একটা গুণবে পোকা উড়চে। শব্দ হচ্ছে ভেঁ-ও-ও..... ঠক করে মাটিতে পড়ে গেল। আবার উড়ছে। আবার কিসে যেন ঠোকর খেয়ে পড়লো। এখনও ওড়েনি—এখনও না—এখনও না।

এইবার যেই উড়বে অমনি এক দুই তিন ক'রে দশ গুণত হবে। দশ গোনার আগেই যদি প'ড়ে যায়, তাহ'লে বিলু বিচ্ছুতেই বাঁচবে না। আর যদি পোকাটা পড়বার আগে দশ গুনে ফেলতে পারি, তাহ'লে ভগবান বেমন ক'রে হোক বিলুকে বাঁচাবেনই বাঁচাবেন। খুব ভাড়াভাড়ি গুণতে হবে ; যত ভাড়াভাড়ি পারি। ঐ উড়লো—এক দুই তিন চার পাঁচ ছয় সাত—ঐ যাঃ ! পোকাটা প'ড়ে গেল। এ কি করলে ভগবান! যা-ও একটু আশা ছিল তাতেও তুমি বাদ সাধলে ? যাঃ এসব মনগড়া ধেমালির কিছু নাথাকুণ্ড আছে ? নিজেই ভাঙ্গ, নিজেই গড়ি। পোকাটার সম্বন্ধে আমি যা ভেবেছিলাম তা কখনই ঠিক নয় ? সবই ভগবানের হাত ; সেই ভগবানকে আমি এতদিন কি হেনস্তাই করেছি ! মা পূর্ণেশ্বরী, আমার সব দোষ ক্রটি ক্ষমা করো। তোমারই দয়াতে তো বিলুকে কোলে পেয়েছিলাম। তোমার নামেই তো বিলুর নাম রেখেছিলাম পূর্ণ। বাড়ীশুক সবাই তোমার মন্দিরের মহাপ্রসাদ খাওয়া ছেড়ে দিয়েছে ব'লেই কি তুমি আমার উপর বিরূপ ! বিলুর অস্থির সময় যে মানত করেছিলাম, সে পূজা পূর্ণেশ্বরীর ওখানে দিয়েছিলাম তো ? মনে তো পড়ছে না। ভুলে গিয়েছিলাম নাকি ? দেখেছো ? ছাপোঁ দেখি একটা সামান্য ভুল থেকে কি কাণ্ড হলো। মা পূর্ণেশ্বরী, কেন তুমি একথা আগে আমার মনে পড়িয়ে দাওনি। না, নিশ্চয়ই দেওয়া হয়েছিল। তবে কেন এমন হলো ? মা, তুমি তো জাগ্রতা দেবী, বিলু তো একরকম তোমারই ছেলে, ওকে এবার বাঁচিয়ে দাও। আর আমি তোমার কাছে কোনো দোষ করবো না ; আর আমি গান্ধীজীকে তোমার চাইতে বড় মনে করবো না।.....

বহরমথানে বিলু হওয়ার সময় যে ইটটা বেঁধেছিলাম, তা খোলা হয়েছিল তো। হাঁ, সেই যে আমি আর জিতেনের মা—দিদি গিয়েছিলাম। সেই বেবার আমার পায়ে বুড়ো আঙ্গুলটা খেঁতলে গিয়েছিল, ঘটা প'ড়ে। সেই সময়ই ভুল করেছি। কোন ইটটা খুলতে কোন ইটটা খুলেছি—ঠিক ঠিক—অত ইটের মধ্যে চিনবার কি জো আছে ?

সেই সরস্বতীদের বাড়ীর কাছেই, অশখতলায় মাটির উপর সিঁদুর মাখানো, তিনি হচ্ছেন 'ডিহু ওয়ার'—দহিভাত গ্রামের গ্রাম্য দেবতা। তিনি 'ডিহু' (গ্রামের-

সীমানা) পাহারা দেন। সেখানে সকলে মাটির ঘোড়া পুঞ্জো দেয়। সরস্বতীর মা আমাকে বলেছিল যে, যখন মায়ের দয়া, কলেরা কি অনাবৃষ্টি হয়, তখন ঘোড়ায় চ'ড়ে ষাঠ হাত লম্বা ডিহুওয়ার ঠাকুর, গ্রাম পাহারা দেন। গ্রামের চৌকোদার রাতহুপরে কতদিন দেখেছে। সরস্বতীর মা'র মুখের উপর কিছু বলিনি, কিন্তু মনে মনে হেসেছিলাম। ষাঠ হাত লম্বা ঠাকুর বিশ্বাস করিনি। ষাঠ হাত লম্বা ঠাকুরের এক বিষৎ উঁচু ঘোড়া। তা কি হয়? ডিহুওয়ার ঠাকুর নিশ্চয়ই আমার সেই সময়ের মনের কথা বুঝেছিলেন। তাই তিনি রাগ ক'রে আমার এই কপাল করলেন। কিম্বা হয়তো তাঁর গ্রামের মেয়ে সরস্বতীর সঙ্গে বিনুর বিয়ে দিইনি ব'লে, তিনি আমার এই দশা করেছেন। ডিহুওয়ার ঠাকুর, আজ আমার বিনুকে বাঁচিয়ে দাও। তার পর যাতে তুমি খুশী হও তাই করবো?.....তোমরা বিরক্ত হ'লে, আমার মতো সামান্ত মানুষের দিন কি ক'রে কাটে বলাে।.....

ঐ! ঐ! মোটরের হর্নের শব্দ হলো—ঐ, তাহ'লে আমার বিনু!.....
সেই সবুজ ঝাঁঝওয়ালা শিশিটা ধরেছে বুঝি নাকে।.....

জেল গেট
(নিলু)

জেল গেট

জেলগেটের সম্মুখে গাড়ীবারান্দার নীচে, ওয়ার্ডার নেহাল সিংএর সচিব আসিয়া দাঁড়াইলাম। গেটের বাহিরে সশস্ত্র প্রহরী। গেটের ভিতরটা উজ্জ্বল আলোকে আলোকিত। ভিতরে আলোর নীচে, সুবাদার সাহেব ডেকের পাশে একটি উঁচু টুলের উপর বসিয়া রহিয়াছেন। নেহাল সিংএর কথামতো গাড়ীবারান্দা সম্মুখে অনুচ্চ প্রাচীরের উপর বসি।

“বাবু কখন-উখন মাথ নহী লায়োঁ না ?” (৪৫)

বলিলাম, ‘না’।

সে নিজেই গেটের ভিতরের সুবাদারের নিকট হইতে, গরাদের ভিতর দিয়া তিন চারখানি কঞ্চল জোগাড় করিয়া আনি। সেগুলি ঐ প্রাচীরের উপর পুর করিয়া পাতিয়া, দায়সারা ভাবে একবার তাহার ধূলা ঝাড়িবার চেষ্টা করিল।

আমাকে বলিল “বাবু, বৈঠল ঘায়”। (৪৬)

তাহার পর গেটের সন্ত্রী ও সুবাদার সাহেবকে অনুচ্চস্বরে সংক্ষেপে বুঝাইয়া দিল যে ভোররাত্রে তাহার ফাঁসী হইবে, ইনি তাঁহারই ছোট ভাই। এইখানেই সারারাত্রি বসিয়া থাকিবেন বলিতেছেন। ইহাকে যেন জ্বালাতন না করা হয়। সুবেদার দেখিলাম কথাগুলি ভালভাবে লইল না। জেলের ভিতরের নালিক হেডওয়ার্ডার, আর গেটের বাহিরের দণ্ডমুণ্ডের কর্তা সুবাদার সাহেব। আসলে তাহার পদের নাম গেটওয়ার্ডার। যুক ফেরৎ বলিয়া তাঁহার নাম সুবাদার সাহেব হইয়াছে। জেলের ভিতর কে আসিতেছে, জেল হইতে কে গেল,—ইহাদের টাকাকড়ি, জিনিষপত্র, মাচ’,—বাজারের সওদা, ঠিকেদার, এ সকল জিনিষের সর্বময় কর্তা সুবাদার সাহাব। এই মহামাত্র সুবেদার সাহেবের নিকট একজন

সামান্য ওয়ার্ডার কেন এই যুক্তিহীন প্রার্থনা করিতেছে? নিশ্চয়ই ইহার মধ্যে কিছু তথ্য আছে।

কাজেই সুবেদার জিজ্ঞাসা করে, “তোমাকে কত দিয়াছে?” নেহাল সিং কিছু দিন ধাবৎ আমার টাকা ধাইতেছিল। প্রত্যহই আমার কাছে আসিয়া ফর্দ দেয়—“আজ এই জিনিষ আপনার ভাইস্বামীকে খাবার জন্ত দিয়াছি। বাজার থেকে কিনে নিয়ে গিয়েছিলাম। জেলের ভিতর লুকিয়ে খাবার নিয়ে যাওয়া কি সোজা ব্যাপার? সুবেদারটা যেন একটা বাঘ। প্রত্যেকটা জিনিষ নিয়ে যেতে ওকে একটা ক’রে টাকা দিতে হয়। সে বাহার টাকা মাইনে পায়, কিন্তু তার চারপাশ সে উপরি রোজগার করে। একেবারে মিলিটারী মেজাজ—যুদ্ধে গিয়েছিল কিনা।” এইরূপ নানা প্রকার অবাস্তব কথা বলিবার পর, অল্প অল্প হাসে আর বলে “ভজুরাই তো মা বাপ। আপনাদের ভরসাতেই তো ‘বালবাচ্চা’ ছেড়ে এই দূরদেশে পেটের ‘ধাক্কায়’ এসেছি।” এমনি করিয়াই সে আমার নিকট হইতে টাকা লয়।

সুবেদার ও নেহাল সিং দুইজনেরই ইচ্ছা ছিল, যাহাতে আমি বুঝি যে এখানে থাকিতে হইলে, সামান্য কিছু খরচ করা দরকার। তাহা না হইলে তাহারা এত জোরে জোরে কথা বলিবে কেন? তাহারা ইচ্ছা করিয়াই আমাকে শুনাইয়া শুনাইয়া কথা বলিতেছে।

সুবেদারের কথায় নেহাল সিং উত্তর দেয় “দেবে আবার কি? এখনও ধরম আছে;—‘বেটা কিড়িয়া’ বলছি কিছু দেয় নি। সাহেব ঐকে লাস নিয়ে বাবার হুকুম দিবেছেন।”

“লাস নেবার হুকুম দিবেছে তো দিবেছে। এখানে থাকবার হুকুম তো দেয়নি। এখানে বাইরের লোককে থাকতে দেওয়ার দায়িত্ব আমি নিতে পারি না।”

সুবেদার গড়গড় করিয়া আরও অনেক কিছু বলিয়া যাইতেছিল। আমি নেহাল সিংকে ডাকিয়া তাহার হাতে একটা টাকা দিনাম; সুবেদার সাহেব দেখিল আর এ সম্বন্ধে কোনো উচ্চবাচ্য হইল না; ভাগ-বাটোয়ারা পরে হইবে।

সুবেদার সত্ৰীকে বলিয়া দিল—“এই বাবুকে কেউ যেন বিরক্ত না ক’রো দফা বদলীর (৪৭) সময় প্রত্যেক ‘দফা’ যেন পরের দফাকে এই কথা বলে দেয়।”

নেহাল সিং ঘাইবার সময় নমস্কার করিয়া বলিয়া গেল “পরগাম” এদেশে নমস্কার কথাটির চলন নাই। তাহার পরিবর্তে পাত্রাপাত্র নির্বিচারে, ব্যবহৃত হয় ‘প্রগাম’ কথাটি; আমাদেরও এদেশে থাকিতে থাকিতে এই কথাটি এবং এইরূপ কত কথা বলাই অভ্যাস হইয়া যাইতেছে।.....

.....শিশিরের সেই চিঠিখানির ভাষা এখনও মনে আছে। শিশির জেল হইতে আমাদের পূর্বেই ছাড়া পায়। আমরা জেলের মধ্যে সব সময়ই বলাবলি করিতাম যে, যে জেল হইতে বাহির হয়, সে আর জেলের ভিতরের লোকের কোনো খবরাখবর নেয় না। বাস্তবিক প্রায় সকলক্ষেত্রে তাহাই দেখা যাইত।...যাহাদের জীবন মাসের পর মাস, বৎসরের পর বৎসর জেলের ভিতর ভাপসাইয়া পাটয়া উঠে, যাহাদের উদ্দাম জীবনশক্তিকে নিয়মের বন্ধনে অসার করিয়া দেওয়া হয়, টীনা রমণীর পায়ের মতো যাহাদের জীবন স্বচ্ছন্দ বিকাশের অবকাশ পায় না, তাহাদের বাহিরে খবরাখবর পাঠাইবার কত দরকার নিরমিত জন্ম হয়। একরূপ ধরনের প্রয়োজন সরকারী নিয়মের মধ্য দিয়া মিটাইবার সুবিধা নাই। তাহ, অন্ধকার যক্ষপুরীতে ক্ষীণ আলোক আসিবার গবাঙ্ক, নূতন রাজবন্দীর জেলে আসা; আর বাহিরের যে কর্মবহুল সংসারের শত মধুর সম্বন্ধ হইতে বিচ্ছিন্ন করিয়া বন্দীকে লইয়া আসা হইয়াছে, তাহার সহিত সাময়িক সম্বন্ধ স্থাপনের বিফল চেষ্টা করা হয়, যে বন্দী মুক্তিলাভ করিতেছে তাহাকে দিয়া। জেলঘরের মেফটা ভালুভ্ সপ্তোমুক্ত রাজবন্দী। সে জেলের ভিতরের শত ব্যর্থতার, অপায় নিফল আক্রোশের অপরিমিত তর্কবেদনা ও দুর্নিবার আকাজক্ষার সাময়িক নির্গম পথ।... জেল হইতে বাহির হইবার সময় কত চিঠি লিখিবার কথা, কত ইনটারভিউ

করিবার কথা, কত কাজ করিয়া দিবার প্রতিজ্ঞা, এক প্রকার ঘাচিয়া গছিয়া লওয়া কত প্রকারের ফরমায়েস্,—ঘাওয়ার দিনের ফুলের মানা, বিদায়ের ঘটা, প্রণাম, নমস্কার, আদাব আলিঙ্গন, অঘাচিত আলাপের ছড়াছড়ি, দরজা পর্যন্ত প্রায় মিছিলের মতো ঘটা করিয়া পৌছাইয়া দেওয়া,—ইহার প্রত্যেকটি কাজ জেলের গতানুগতিকতার অঙ্গ হইলেও, কাহারও আন্তরিকতার অভাব নাই। কিন্তু তাহার পর? তাহার পর কি হইবে তাহাও চোখ বুজিয়া বলিয়া দেওয়া যায়। ডাকবিভাগের কর্তৃপক্ষ বলিয়া দিতে পারেন, দেশের কত লোক আন্দাজ, আগামী বৎসর ঠিকানা না লিখিয়াই ডাকবাক্সে চিঠি ফেলিবে। আর রাজবন্দীরাও বলিয়া দিতে পারে যে মুক্ত বন্দী, গেটের বাহিরে যাইবার পরই জেলের ভিতরের লোকদের কথা ভুলিয়া যাইবে।.....আমাদের গণনা ভুল প্রমাণ করিবার জন্য শিশির জেলের বাহির হইতে দাদাকে চিঠি লিখি যাচ্ছে। দাদা চিঠিখানির কয়েকটা লাইন আণ্ডার-সাইন করিয়া দিল—এখনও মনে আছে। “বেশীর ভাগ লোক যেমন হচ্ছে আমাদের ঠিক তাদের পর্যায় ফেলোনা। জেল থেকে ছুটবার সাতদিনের মধ্যে চিঠি দিচ্ছি। অমুক অমুক অমুককে আমার প্রণাম জানাবে।.....”

.....হরদার ছবেজীর স্ত্রী বৃড়ী, সেও আমাকে প্রণাম করে। অথচ দাদাকে বলে ‘ধরনবেটা’। গরীবমানুষ; কিন্তু সেদিন যখন দেখা হইল ‘বেটার’ মোকদ্দমার তদ্বিরের জন্য আঁচলের খুঁট হইতে তিনটি টাকা বাহির করিয়া দিল, তাহার ডই চোখে জল আসিয়া গিয়াছে। মনে হইল ছবেজীকে লুকাইয়া টাকা দিতেছে। কেন জানিনা.....

ছবেজী নিজেই মোকদ্দমা চলিবার সময় ভয় ও কুণ্ঠার সহিত আমাকে জিজ্ঞাসা করিয়াছিল যে, টাকাকড়ির যদি দরকার হয়, তাহা হইলে সে কিছু ঝোগাড় করিয়া দিতে পারে। ছবেজী বলিয়াছিল “ভগবান ‘নারাজ’ ব’লেই তো আমাকে আর আমার স্ত্রীকে পুলিসে ধরেনি। না হ’লে আমি তো জুলুসে শরীক (৪৮) হয়েছিলাম। আমারই হাতে সব চাইতে বড় ‘তিরঙ্গা’টা (৪৯) ছিল। যখন জেলের বাইরে আমাকে রাখাই ভগবানের ইচ্ছে, তখন ‘কংগ্রেসীকে নাতে’ (৫০)

বিলুবাবুর মোকদ্দমার তদ্বির ক'রে আমার নিজের 'ফর্জ অদা' (৫১) করা উচিত"—তখন আমি টাকা লইতে অস্বীকার করি। ছবেজী আমার ব্যবহারের অর্থ করিল যে আমি দাদার মোকদ্দমা ডিফেন্ড করাইতে চাই না। অথচ আমি অস্বীকার করিয়াছিলাম, কারণ জ্যাঠাইমা কোথা হইতে জানি না মোকদ্দমার খরচের জন্ত আমাকে শ' তিনেক টাকা দিয়াছিলেন। জ্যাঠাইমা খালি বলিয়াছিলেন "হরেনবাবু উকীলকে দিয়ে দিস"—টাকা দিবার সময় জ্যাঠাইমার মুখের ভাব, ঠিক ছবেজীর স্ত্রীর মতো। তাহার পর হইতে ছবেজী নিজেই উকীলের বাড়ী যাতায়াত করিত।.....

.....ঘোড়ার পিঠে ছবেজী। লাল ঘোড়াটি একটু খোঁড়াইয়া খোঁড়াইয়া চলিতেছে। ঘোড়া হইতে নামিয়া ছবেজী ঘোড়ার পিঠে একটি চাপড় মারিল। পিঠের চটগুলি সরাইয়া ঘোড়াটিকে হরেনবাবুর গেটের ধারের ইউকালিপটাস্ গাছটার বাঁধিতেছে।.....ছবেজী বোধহয় অনেক টাকাও খরচ করিয়াছিল। আমি অবশ্য জ্যাঠাইমার দেওয়া টাকাও হরেনবাবুকে দিয়াছিলাম। তিনি বাবার বন্ধু ; কিন্তু জ্যাঠাইমার টাকা পাওয়া সত্ত্বেও, আবার ছবেজীর দেওয়া টাকা লইতে ইতস্ততঃ করেন নাই

তাহার পর ছবেজীর স্ত্রী নিজের কথা বলিয়াই ফেলিল। "আমার স্বামী তো 'বেটার' মোকদ্দমায় যথেষ্ট 'পৈরবী' (৫২) করেছে। খোলামকুটির মতো পরসা খরচ হয়েছে। কিন্তু ফল কি হলো ? আসলে পুলিশ বার দিকে মোকদ্দমায় তারই জিৎ। তোমার কথাতো পুলিশ শোনে। কলেজের সাহেব শুনি তোমাদের সঙ্গে 'সলাহ্' (৫৩) না ক'রে কিছু করেন না। তোমাদেরই দলের নোখেলাল ঝাখো না, হরদা বাজারের সব দোকানদারদের জালাতন ক'রে মারছে। কিন্তু দারোগাবাবু তার হাতের মুঠোর। সরকার শুনি তোমাদের দলের লোককে মাইনে দেয়।" তখন আমি ছবেজীকে লুকাইয়া টাকা দিবার অর্থ বুঝিলাম। বিলুবাবু তাহার 'ধরমবেটা'। তাহার জ্ঞান, সে নিজের সরল বুদ্ধিতে যাহা করা দরকার মনে করিয়াছে, তাহা করিতে ইতস্ততঃ করে নাই। আমাকে উদ্বার

পুলিশের লোক মনে করে। উহাদের দোষই বা কি? দেশশুদ্ধ লোক তো তাহাই ভাবিতেছে। সরলমনা ছবেইন তো কেবল পূর্বপরিচয়ের দাবীতে, আমার মুখের উপর কথাটা পরিষ্কার বলিয়া ফেলিল। ইচ্ছা হইল টাকা তিনটা ছুড়িয়া তাহার মুখে মারি; কিন্তু মুখে বলিলাম, মোকদ্দমার রায় তো হইয়া গিয়াছে। আর টাকা কি হইবে?—দেখিলাম সে বিশ্বাস করিতেছে না যে, এখন আর কলেক্টর বা লাটসাহেব কিছু করিতে পারেন না। তাহার পর তাহার হতাশা-ব্যঞ্জক মুখের দিকে তাকাইয়া মনে হইল যে, টাকাটা আমার লওয়া উচিত। বলিলাম, “আচ্ছা দাও টাকাটা”। এক সম্মানহীনা রমণীর পরসম্মান বাৎসল্যের আবেগের কাছে আমার যুক্তি ও সিদ্ধান্ত মাথা নত করিল। কিন্তু মোকদ্দমায় সাক্ষী দিবার সময়, নিজের রাজনৈতিক principle একটু নমনীয় করিয়া লইলে কি লোকমান হইত? তখন যেন আমি সাধারণ মানুষ ছিলাম না। তখন বে অনমত্তের বিরুদ্ধে, পরিচিত অপরিচিত সকলের বিরুদ্ধে, আমার একাকী মাথা উঁচু করিয়া দাঁড়াইবার কথা। নিন্দুক ও বিরোধীদের আমার principleএর দৃঢ়তা দেখানোর কথা।...রাজনৈতিক মতবাদের কথা ছাড়িয়া দিলেও বোধহয় সেখানে আমার ব্যক্তিগত জ্বিদের প্রশ্ন আসিয়া পড়িয়াছিল। আমার উপর চাপ দিয়া আমার মত বদলাইয়া লইবে, এত নমনীয় রাজনৈতিক মত আমি রাখি না। লোকে কি আমার মনের গভীরে যে কথা ছিল সেকথা বুঝিয়াছে? ছবেজীর স্ত্রী আমার সম্বন্ধে বাহা বুঝিয়াছে, সাধারণ লোকে হয়তো তাহা অপেক্ষাও খারাপ ধারণা পোষণ করে। হয়তো কেন নিশ্চয়ই করে। ইহার প্রত্যক্ষ প্রমাণ তো নিত্যই দেখিতেছি। সেদিন ফুটবল মাঠের ধারে বসিয়া যে ছাত্রের দল সিগারেট খাইতেছিল, আমি পাশ দিয়া সাইকেল করিয়া চলিয়া যাইবার সময় তাহাদের স্ফুটন্ত গলা খাঁখারীর শব্দ শুনিয়াছি। পাড়ায় ছেলেমেয়েদের বিস্মিত ও অনু-সন্ধিৎসু চক্ষে আমার দিকে তাকাইতে দেখিয়াছি। বাল্যবন্ধু সৌরীন পাশ কাটাইয়া চলিয়া যাইতে কুণ্ঠিত হয় নাই। মারিবার ভয় দেখানো বেনামা চিঠি পাইয়াছি। কি যুক্তিহীন চিঠি! প্রথমেই কিরূপ উচ্চমনা পিতার পুত্র তাহা মনে করাইয়া

দিয়া, শেষের লাইনে আমার পিতৃস্ব সম্বন্ধেই সন্দেহ প্রকাশ করিয়াছে। জ্যাঠাইমা ও ন'দি পর্য্যন্ত নেহাৎ কাজের কথা ব্যতীত অন্য কথা বলেন না। একজন ডিষ্ট্রিক্ট-বোর্ডের মেম্বরকে, অপর একজন মেম্বরের নিকট বলিতে শুনিয়াছি যে, দুই ভাইই সহদেওএর বোনের সহিত প্রেমে পড়িয়াছিল। সেইজন্য হিংসার আমি নাকি দাদার বিরুদ্ধে সাক্ষী দিয়াছি, না হইলে কেহ কি ফাঁসীর মোকদ্দমার নিজের ভায়ের বিরুদ্ধে সাক্ষী দিতে পারে? সরস্বতীর সম্বন্ধে এইরূপ ধরণে আমি কখন ভাবিই নাই। আর দাদার দিক হইতেও কখন এমন কিছু দেখি নাই যাহাতে বুঝা যায় যে দাদা তাহাকে ভালবাসে; কিন্তু লোকের মুখ কে বন্ধ করিবে?.....

.....জেলে দাদার মোকদ্দমা চলিবার সময়, আমার সাক্ষ্যের দিনে, জেলের বাহিরে কি ভাঁড়! জেলের ভিতর মোকদ্দমা চলিতেছে। ঐরূপ মারাত্মক আসামীকে কি করিয়া খোলা এজলাসে বিচার করা বাইতে পারে? করজন চৌকিদার, দফাদার, বনেষ্টবল ও দারোগা সাক্ষীর সহিত জেল গেটে পুলিশের ভ্যান হইতে নামিলাম।—জনতার দিকে তাকাইতে পারিতেছি না কিন্তু তাহাদের অনুরোধ ও ভৎসনাপূর্ণ দৃষ্টি অনুভব করিতেছি। আমি জনতার ক্ষোভকে তাচ্ছিল্য করি, এই ভাব দেখাইবার জন্য একবার জোর করিয়া ঐ দিকে মাথা উঁচু করিয়া তাকাইলাম। বোধহয় মানসিক চাকল্যের জন্য, কোনো নির্দিষ্ট ব্যক্তির মুখের দিকে মনোবিশ্লেষণের দৃষ্টিতে দেখিবার ক্ষমতা আমার ছিল না। 'জু'তে বক্তৃতা শুধুকে যে দৃষ্টিতে দেখে, সেদিন জেল ওয়ার্ডাররা সেই দৃষ্টিতে আমার দিকে তাকাইয়াছে; জজসাহেব প্রশংসার দৃষ্টিতে আমাকে দেখিয়াছেন; আর সরকারী উকীল ও পুলিশে সন্দেহ ও উদ্বেগের দৃষ্টিতে দেখিয়াছে। জেলের পুরাতন কয়েদীদের চক্ষেই এতমাত্র দেখিয়াছি উদাসীনতার ভাব; আর কাহারও চক্ষে সেরূপ নাই। জেলের রাজবন্দীদের সহিত সে সময় সাক্ষাৎ হয় নাই। সাক্ষাৎ হইলে তাহাদের দৃষ্টিভঙ্গী কিরূপ হিংস্র হইত তাহা অনুভব করিতে পারি। ঐ মোকদ্দমার দাদার সহিত আর দুইজন আসামী ছিল,—সুরজদেও আর হরিশচন্দর। আমি এজাহার দিতে উঠিলে হরিশচন্দর চীৎকার করিয়া আসামীর কাঠগড়া হইতে

বলিয়া উঠিয়াছিল—“ছি! ছি! ছি! ছি!” তাহাতে আমি ফিরিয়া সেই দিকে তাকাইয়াছিলাম। তাহার চোখ দিয়া ঘৃণা ফুটিয়া বাহির হইতেছে। তাহার তীক্ষ্ণস্বরের মধ্যে যতটা তীব্র ব্যঙ্গ ছিল, নিশ্চল আক্রোশ ছিল তাহা অপেক্ষাও বেশী।... একবার আশ্রমে একটা হেলে সাপ চিমটা দিয়া ধরিয়া দাদার কাছে লইয়া গিয়াছিলাম। দাদা বাগানে কাজ করিতেছিল। সাপের সাদা পেটের দিকটা হঠাৎ দেখিয়া দাদার চোখে মুখে যে ভাব ফুটিয়া উঠিয়াছিল—সেই ভাব দেখিলাম সুরজদেওএর মুখে। তীব্র ঘৃণায় সে বেন আমার দিক হইতে দৃষ্টি ফিরাইয়া লইতে চায়। আর দাদা—কাঠগড়ার মধ্যে একখানি কঞ্চলের উপর বসিয়া; একখানি লালচে মলাটের বইএর উপর দৃষ্টি নিবদ্ধ; মুখমণ্ডল সম্পূর্ণ ব্যস্তনাহীন! আমার মনে হইল যে উহা সত্যকারের অভিনিবেশ নয়, ইচ্ছাকৃত দৃষ্টি সংযোগ মাত্র। কেননা তাহা হইলে দাদা হরিশ্চন্দকে নিশ্চয়ই কোনো কথা বলিতে বারণ করিত। তাহার পর সরকারী উকিলের জজসাহেবের নিকট হরিশ্চন্দরের সম্বন্ধে নালিশ—হাকিমের উদ্দায় ও হরেনবাবুর দিকে তাকাইয়া বিরক্তি প্রকাশ—হরেনবাবুর উদ্বেগ ও একবার কাশিয়া উদ্বেগ দমন করিবার প্রয়াস—অ্যাসিস্টেন্ট জেলর অন ডিউটী ও দারোগার চাঞ্চল্য; কোর্টরুম না হইলে তাহারা এখনই আসামীকে মজা টের পাওয়াইয়া দিত—তুইজনের মধ্যে এইরূপ অর্থহীন দৃষ্টি বিনিময়—সব ছবিই চোখের সম্মুখে ফুটিয়া উঠিতেছে। হরিশ্চন্দর মরিয়া হইয়া উঠিয়াছে—বলিতেছে “কেয়া করোগে। ফাসী সে ভী বেশী কুছ দেওগে কেয়া!” ওয়ার্ডার ও পুলিশে আসামীর কাঠগড়া ধরিয়া ফেলিয়াছে। হরিশ্চন্দর তাহার মধ্য হইতেই আমাকে তীব্র স্বরে বলিল “কুত্তা কাঁহাকা”। জজসাহেব চশমা মুছিতেছেন। পেস্কার দৌড়াইয়া হরিশ্চন্দরকে কি বলিতে গেল। দাদার সহিত হরিশ্চন্দরের চোখাচোখি হইয়া গেল। দাদার মিনতিভরা দৃষ্টি—বলিতে চায়, হরিশ্চন্দর এবার থাম, একটা scene হইয়া গেল যে। হরিশ্চন্দর থামিয়া যায়। আবার এজলাসের কাজ আরম্ভ হয়।...

কাঁকরভরা রাস্তায় একসঙ্গে অনেকগুলি জুতার শব্দ আসিতেছে। অন্ধকারে রাস্তার দিকের কিছুই দেখা যায় না। কেবল দূরে দেখা যাইতেছে ওয়ার্ডারদের লম্বা ব্যারাকের বারান্দায় কালো শেড দেওয়া আলো। ব্যারাকে ওয়ার্ডারদের ঢোলক, খঞ্জনী সম্বলিত কীৰ্ত্তন চলিতেছে, তাহার উগ্রস্বর কানে আসিতেছে,— ভাসিয়া আসিতেছে বলা চলে না, কর্ণপটেহে দস্তুর নতো আঘাত করিতেছে। কিন্তু সে শব্দকেও ছাড়াইয়া উঠিয়া ক্রমবিকটায়মান জুতার শব্দ জেলগেটের নিকটে পৌঁছিল। দেখিলাম একদল ওয়ার্ডার আসিয়াছে। অধিকাংশের পায়ে হনদের রংএর কাবুলী স্কাণ্ডাল। ছইহনের পায়ে অতি পুরাতন বুট। যুদ্ধের জন্ম বুট জুতা পাওয়া যায় না বোধহয়।

জেলগেটের দোতালায় একজন ওয়ার্ডার এগারটা বাজিবার ঘণ্টা দিল : একসঙ্গে ঢং ঢং করিয়া, ছইটী ছইটী করিয়া, পাঁচবার তাহার পর আর একবার : এরই মধ্যে ছই ঘণ্টা হইয়া গেল। দশটা কখন বাজিল জানিতেও পারি নাই : গেটের সম্মুখের ওয়ার্ডারের দল অনুসন্ধিস্থ চক্ষে আমাকে দেখিতেছে—এ-আবার কে-আসিয়া-জুটিল এই ভঙ্গীতে। একজন আমার কাছে দেশলাই আছে কিনা জিজ্ঞাসা করিল। আমি বলিলাম ‘নাই’। ইতিমধ্যে ভিতরের ওয়ার্ডার গেটের তাল খুলিয়াছে। ওয়ার্ডাররা কোলাহল করিতে করিতে ভিতরে ঢুকিল। খাতাছ নাম লেখা হইল।

গেটওয়ার্ডার হাসিতে হাসিতে জিজ্ঞাসা করে, “কিছু ‘নাজায়জ’ (৫৪) ভিতরে নিয়ে যাচ্ছে না তো ?”

একজন বলিল “হুজুর সারিচ কিয়া যায়।”

সুবেদার উত্তর দেয় “তারপর আমার বাড়ী গিয়ে স্নান করতে হোক আর কি। তোমাদের তো আমার জানা আছে। তোমরা তো আর উর্দীর পকেটে জ্বিনিষ রাখ না।”

রেজিষ্টারে নাম লেখা হইল। জেলের ভিতরের লৌহদ্বার খুলিল। অবশ্য সম্পূর্ণ নয় ; দ্বারের একদিককার কপাটের মধ্যস্থ ছোট দরজাটা খুলিল। জেলের

ভিতরে জমাট অন্ধকার। এক এক করিয়া, একটি ব্যতীত অপর সকল নূতন ওয়ার্ডার প্যাসেজের উজ্জ্বল আলোক হইতে, জেলের ভিতরের অন্ধকারে মিশাইয়া গেল। গেটের জমাদার কপাট বন্ধ করিয়া তালা লাগাইল—প্রকাণ্ড একটি রিংএ শতাধিক বড় বড় চাবী। তালা বন্ধ করিবার পর একবার অন্তমনস্কভাবে তালাতে হাঁচকা টান মারিয়া দেখিল, ঠিক বন্ধ হইয়াছে তো। টান মারাটা যেন reflex action এর মতো বোধ হইল। তাহার পর আমার দিকের ফটকের সম্মুখে আসিয়া দাঁড়াইল। গেটের বাহিরে বন্দুকধারী সন্ত্রী বদল হইল। আগেরটি ছিল গম্ভীর প্রকৃতির, এটি অন্তরূপ। ভিতরের জমাদার বাহিরের সন্ত্রীর নিকট খয়নি চাহিল, ও গুজ্ গুজ্ করিয়া গল্প করিতে লাগিল। বোধহয় আমারই কথা। গেটের ভিতর নূতন দলের যে ওয়ার্ডারটি রহিয়া গিয়াছে সে সুবেদার সাহেবের সঙ্গে গল্প করিতেছে। সুবেদার উঁচু টুলের উপর বসিয়া, একখানি খাতা নাড়িয়া হাওয়া খাইতেছে। বোধহয় লেন-দেনের ব্যাপার কিছু হইবে, কিম্বা কোনো জিনিষ হয়তো জেল গুদাম হইতে চুরী করিয়া বাহিরে লইয়া যাইতে হইবে। কোনো জিনিষ চুরী করিয়া বাহিরে লইয়া যাওয়া একজনের দ্বারা সম্ভব নয়। জেলের আত্যন্তরীণ শাসনযন্ত্র এমন যে যতক্ষণ শৃঙ্খলের সকল বলয়গুলি সংযুক্ত না হইতেছে, ততক্ষণ চুরীর যোজনা সফল হইতে পারে না। খাও, কিন্তু মিলিয়া মিশিয়া খাও। ছোটকেও তাচ্ছিল্য করিবার উপায় নাই।...

ঢং ঢং করিয়া কলেক্টরীর টাওয়ার ক্রকে এগারটা বাজিল। সকলস্থানের জেলের ঘড়ীই দেখি মিনিট পনের ফাট্ট থাকে।—জেলের সম্মুখে রাস্তা। তাহার ধারে ধারে জেলকর্মচারীদের কোয়ার্টার। পর্দা দেওয়া জানলাগুলির ভিতর দিয়া কোথাও কোথাও অস্পষ্ট আলোক দেখা যাইতেছে। উহাদের মধ্যে একস্থানে অন্ধকারের ভিতর চতুষ্কোণ আলোকের ঝলক হঠাৎ দেখা যায়,—একটি কোয়ার্টারের দরজা খুলিয়াছে। আলোর রশ্মি বাহিরে আসিয়া পড়িয়াছে, সরল রেখায়; একটি আলোকময় ট্র্যাপিজিয়ম, চৌকাঠের দিকের বাহুটা ছোট। রেল লাইনের

সমাস্তুরাল রেখা দুইটা দিগন্তের দিকে বেরুপ নিকটে আসিবার চেষ্টা করে সেইরূপ। একটা মূর্তি দরজা দিয়া বাহিরে আসিল। আর একটা 'সিন্ধুট' দরজা পর্যন্ত আসিয়া কিছুক্ষণ দাঁড়াইল। দ্বিতীয় মূর্তিটা দরজা বন্ধ করিল।...তাহাদের গৃহস্থানীর আলোক কেন জেল এলাকার নিবিড় অন্ধকার দূর করিবার চেষ্টা করিবে? দরজা, যেন জোর করিয়া, সেই আলোককে নিজের সীমাবদ্ধ ক্ষেত্রে বন্ধ রাখিবার যত্নমাত্র।...লুঙ্গী পরিহিত ডাক্তারবাবু গেটের উপর পৌঁছিলেন। তাঁহার গায়ে গঞ্জি। পান চিবাইতেছেন।...গালে পান রাখিলে সত্যই কি ক্যানসার হয়? কাঁধের উপর শার্ট, খাঁকীর হাফপ্যান্ট, আরও বোধহয় দুই একটা জামা। চলিবার সময় পা দুইটা ছুঁড়িয়া ছুঁড়িয়া সশ্মুখের দিকে ফেলেন। সস্ত্রী খট করিয়া জুতার শব্দ করিয়া, এটেনশন হইয়া দাঁড়াইল।...ইহাদের কাবুলী শ্লিপার কয়দিনই বা টিকিবে...। সস্ত্রী সেলাম করিল। ভিতরের ওয়ার্ডার আদান করিয়া গেটের তাল খুলিল। ডাক্তারবাবু, সেলাম প্রত্যাশনের ইঙ্গিতে মাথা নাড়িয়া, ভিতরে ঢুকিলেন। গেটের তাল আবার বন্ধ হইল। সুবেদার সাহেব টুলের উপর বসিয়াই ডাক্তার-বাবুকে জিজ্ঞাসা করিল “কাঁধের উপরের ও পোষাকগুলো কিসের জন্তে!”

ডাক্তারবাবু বলিলেন, “ডিউটি তো হাসপাতালে। কিন্তু কি জানি ভোর রাতে ডাক্তার সাহেব, হাকিম, সকলে আসবে, তখন যদি কোনো দরকার পড়ে যায়। তখন তো আর লুঙ্গি প’রে সাহেবের সশ্মুখে যেতে পারবো না। অবিশিষ্ট ফাঁসীর সময়ে ডিউটি বড়ডাক্তারবাবুর, আমার নয়। কিন্তু কি জানি দরকারের কথা বলা তো যায় না।—আর যা গরম পড়েছে।”

ডাক্তারবাবুর কথাবার্তায় একটু আবদারের দুলাল-দুলাল ভাব। দেখিলাম ডাক্তারবাবু সুবেদারের সহিত বেশ সমীহ করিয়া কথা বলেন। তাহার কারণ সুবেদার নারাজ হইলে, জেলের খাঁকী গরুর দুধ না পাইয়া ছেলেপিলেরা রোগা হইয়া ঘাইবে, হাসপাতালের বরাদ্দ মাংসের সামান্য অংশও ডাক্তারবাবুর বাড়ীতে পৌঁছাবে না, কেয়োসিন তেল হয়তো গাঁটের পয়সা খরচ করিয়া বাজার হইতে কিনিতে হইবে। ইহা ছাড়া আরও কত রকমের জিনিষ যোগ্যনিকে তাঁহারা

বেতনের অঙ্গ বলিয়া মনে করেন, হয়তো কাল হইতেই বন্ধ হইয়া যাইবে। হাসপাতালের নেটের মশারী, বিছানার চাদর, শিমুল তুলা, চিনি, পুরাতন চাউল প্রভৃতি কত জিনিষ, ইহাদের দরকার। ভোরবেলায় যে গ্যাং বাহিরের কম্যাণ্ডে কাজ করে, তাহাদেরই মধ্যে একজন হয়তো, প্রত্যহ গেট হইতে বাহির হইবার সময় ফুলের সাজিতে করিয়া ডাক্তার গৃহিণীর জন্ত পূজার ফুল লইয়া যায়। ফুলের সহিত থাকে একটা করিয়া কাঁচা বেল ও কয়েকটা কাগজী লেবু—ছেলেপিলেরা প্রত্যহ বেল পোড়া খায় কিনা।... আর ডাক্তারবাবু তিনি তো বোধহয় জেলে চাকরি করিতে করিতে চিকিৎসা শাস্ত্র ভুলিয়া গিয়াছেন। প্রত্যহ সেই গতানুগতিক কাজ—হিসাব, নাম, ফাইল, দপ্তর, ওজন নেওয়া, রিটার্ন পাঠানো, সাহেবের সহিত ফাইলে ঘোরা, হাসপাতালের মেট হইতে আরম্ভ করিয়া সকলের মন জুগাইয়া চলা—ইহার মধ্যে ডাক্তারী করিবার অবকাশ কোথায়?... সেবার জেলের ডাক্তারবাবু আমাকে দিয়া একটা রিটার্ন নিখাইয়াছিলেন। ডাক্তারবাবুর নাম ছিল বুকি নরেনবাবু। রিটার্নের অনেক বিষয়ের ভিতর ছিল splenic index। উহা কি করিয়া হিসাব করিতে হয় আমি জানিতাম না! ডাক্তারবাবুকে জিজ্ঞাসা করিলাম। তিনিও দেখিলাম জানেন না,—বলিলেন এখন থাক, আমি গত বৎসরের রিটার্ন দেখিয়া আন্দাজে বসাইয়া দিব।...

জেলগেটের ভিতর ঢুকিয়াই, ডানদিকের দেওয়ালে দেখা যায় একটা ব্লাকবোর্ড—ষ্টেশনে বেক্রপ চতুষ্কোণ ফলকগুলির উপর টাইম টেবুল আঁটা থাকে, সেইগুলির মতো। তাহার উপর লেখা আছে,—এই জেলে কত কয়েদীর স্থান হইতে পারে, আজ কত কয়েদী আছে, তাহার মধ্যে আগার ট্রায়াল কত। সর্কাপেক্ষা নীচে লেখা থাকে, যে ডাক্তার এখন ডিউটিতে আছেন তাহার নাম।

ডাক্তারবাবু চুনাখড়ির টুকরাটা লইয়া বোর্ডের উপর নিজের নাম লিখিলেন। আর পাশেই লিখিলেন যে, রাত্রি নষটা হইতে ডিউটি করিতেছেন। তাহার পর ডাক্তার সাহের অঙ্গ হাসিতে হাসিতে বলিলেন “অফিস ঘরে ফ্যান আছে, সাহেবের ঘরে ফ্যান আছে, আর আপনাদের এখানে ফ্যান নাই?”

সুবেদার সাহেব বলিলেন “তকদির”। বলিয়া নিজের কপালটী দেখাইয়া দিলেন। কপালের মধ্য দিয়া বেশ একটা উঁচু শিরা; এতদূর হইতেও দেখা যায়।……

……জ্বিতেনদার পৈতার সময় জ্যাঠাইমার বিছানায় শুইয়া এক গরীব তাঁতির গল্প শুনিয়াছিলাম। তাঁতির কপালে ছিল রাজটীকার সুলক্ষণ। তাহার পর কিছুদিন যাহাকে দেখি, তাহারই কপালটী ভাল করিয়া লক্ষ্য করি। আমি আর দাদা একদিন আঙ্গুল দিয়া ঘষিয়া ঘষিয়া কপালের চামড়া প্রায় তুলিয়া ফেলিয়াছিলাম। কপালে ঠিক তিলককাটার মতো দাগ হইয়া গিয়াছিল। মা’র বকুনি আর পাড়ার লোকের ঠাট্টায় কয়েক দিন আমরা বাড়ীর বাহির হইতে পারি নাই।……

দরজা খুলিল। ডাক্তার সাহেব ভিতরে প্রবেশ করিলেন। ভিতরের খোলা দরজা দিয়া অনেকগুলি জুতার শব্দ শোনা যায়। জেলের ভিতর হইতে অনেকে বোধহয় মার্চ করিয়া গেটের দিকে আসিতেছে। আবার দরজা বন্ধ হইল। কিন্তু কয়েক মুহূর্তের মধ্যেই দরজার মধ্যের ছন্ন ইঞ্চি পরিমাণ গবাক্ষ খুলিয়া গেল, ও একজন ভিতর হইতে ভোজপুরী ভাষায় দরজা খুলিতে বলিল। আবার দরজার তাল খুলিল। ওয়ার্ডারদের তাল খুলিবার ও বন্ধ করিবার বিরাম নাই। ইহাতে উহারা ক্লান্তও হয় না। এইতো ডাক্তারবাবু ভিতরে যাইবার সময় দরজা-খুলিয়াছিল। সেই সময় তো পদশব্দে বুঝিয়াছিল কাহারো আসিতেছে। সেই সময় কয়েক মুহূর্ত দরজা খুলিয়া রাখিলেই তো হইত। তাহা হইলেই আর ছইবার করিয়া পরিশ্রম করিতে হইত না। ইহারা যে বস্ত্রচালিতের মতো কাজ করে তাহা কি জেলের নিয়মের জন্ত, না নিজেদের অভ্যাস বলিয়া। দরজা খুলিবার নিয়ম গুলিতো অদ্ভুত। জেলগেটের মাঝে দুইটা ফটক। একটা আমি যেখানে বসিয়া আছি তাহারই সম্মুখে, আর একটা এই গেট হইতে দশ পনের হাত ভিতরে। দুইটা ফটকের মধ্যের প্যাসেজটী একটা বড় হলঘরের মতো। জেলের ভিতরের কর্মকেন্দ্র ‘গুমটী’ আর জেলের বাহিরের কর্মকেন্দ্র এই প্যাসেজটী। হয়তো চারখানি গরুর

গাড়ী জেলের ভিতরে ইট লইয়া যাইবে। ওয়ার্ডার সম্মুখের দরজাটি খুলিয়া প্রথমে দুইখানি গাড়ী ঐ হল ঘরে যাইতে দিবে। তাহার পর দরজাটি বন্ধ করিবে। ইহার পর ভিতরের দরজা খুলিবে, গাড়ী দুইখানিকে যাইতে দিবে, ভিতরের দরজা বন্ধ করিবে, আবার আসিবে সম্মুখের দরজা খুলিয়া বাকী গাড়ী দুইখানি বাইতে দিতে। একসঙ্গে দুইটি ফটক খুলিয়া চারিখানি গরুরগাড়ীকে যাইতে দিলে যেন মহাভারত অশুদ্ধ হইয়া যাইত।.....

ভিতরের ওয়ার্ডারের দল কোলাহল করিতেছে।.....একজন ওয়ার্ডারকে জিজ্ঞাসা করিব নাকি, ফাঁসী সেলে কাহার ডিউটি ছিল। তাহার নিকট হইতে জানা যাইতে পারে দাদা এখন কি করিতেছে। না থাক, আবার কি মনে করিবে। হয়তো টিটকারী দিয়া কথা বলিবে। হয়তো সে আমার সাক্ষী দিবার কথা জানে।

.....সকলেই ব্যারাকে ফিরিবার জন্ত ব্যস্ত ; অনেক রাত হইয়াছে। একটি রেজিষ্টারে নাম লেখা হইল। একজন ওয়ার্ডার উঁচু ডেস্কের নীচ দিয়া হাত চালাইয়া, সুবেদারকে কি যেন দিল,—ইচ্ছা অপর কেহ যেন দেখিতে না পায়। এক এক করিয়া সকলে বাহিরে আসিতেছে। উহাদের মধ্যে ফর্সা গোছের অল্প-বয়স্ক একজন ওয়ার্ডারকে সুবেদার নিকটে ডাকিয়া, তাহার পাগড়ীটি খুলিতে বলিল। সুবেদার উহার কোমর হাকপ্যাণ্ট প্রভৃতি সার্চ করিতেছে, সার্চ করিয়া কিছু পাওয়া গেল না। ওয়ার্ডারটি বাহির হইবার সময় রাগে গজ্ গজ্ করিতেছে—
“আমারই উপর যত আক্রোশ। সুবেদারের বিশ্বাস আমি হেডওয়ার্ডারের দলের লোক। নিজেদের মধ্যে ‘মোচকা লড়াই’ আমাদের লইয়া টানাটানি। থামো, জেলের সাহেবকে ব’লে, এর বিহিত যদি আমি না করি...। তা’তে আমার চাকরি যায় আর থাকে, তার পরোয়া আমি করি না।” তাহার পর একটি অশ্লীল গালাগালি দিয়া বলিল—“নোকরীর নিয়ে না কিছু বলেছে।”.....

.....কীর্তনের গানের একটানা চীৎকার শোনা যাইতেছে। একটা কথাও বুঝা যাইতেছে না। কেবল মধ্যে মধ্যে “রামা হো রামা।”সেই ছোটবেলায়

একটা কবিতা পড়িয়াছিলাম তাহার মধ্যে একটা লাইন ছিল, “গাডোয়ান—
রামা হৈ।” কবিতাটা মনে পড়িতেছে না—তাহার প্রথম লাইনে ছিল ভোর হলো,
খুকুমণি জাগো’—এই রকম ধরণের কিছু।

জিতেনদা,—জ্যাঠাইমার বড় ছেলে—জ্যাঠাইমার বাক্স হইতে টাকা চুরি
করিয়া, অনেকগুলি গল্পের বই আনাইয়াছিল। কলিকাতা হইতে পাসেল আসিলে
পর বাড়ীতে জানাজানি হইয়া যায়। জিতেনদা বাড়ী হইতে পলাইয়া গিয়া আনাদের
আশ্রমে দুই দিন ছিল। জ্যাঠামশাই বলিয়াছিলেন, আর উহাকে বাড়ীতে ঢুকিতে
দিবেন না। সেই পাসেল হইতে দুইখানি বই জ্যাঠাইমা আমাদের দুই ভাইকে
দিয়াছিলেন, তাহারই মধ্যে একখানিতে ঐ কবিতাটি ছিল।...জিতেনদা কতবার পদ্মা
চুরি করিয়া এইরূপ পাসেল আনাইয়াছে, তাহার ইয়ত্তা নাই। ব্যাডমিণ্টন
সেট, ক্যারামবোর্ড, ফুটবলের পাম্প কত পাসেল যে উনি আনাইতেন তাহার কি
হিসাব আছে? এক এক খেলায় উৎসাহ কিছুদিন থাকিত। কোনো খেলাই
চলনসই ধরণেরও খেলিতে পারিতেন না।...সেই জিতেনদাই আজ কি গপ্তীর
প্রকৃতির লোক। ঠিকদারীতে কত অর্থ উপার্জন করেন। আমাদের অর্থাৎ
যে .সসল গরীব কন্মী রাজনীতি ক্ষেত্রে আছে তাহাদের বেশ কৃপা ও ভাচ্ছল্যের
দৃষ্টিতে দেখেন! কে উহাকে বুঝাইয়া দিবে যে আমরা চেষ্টা করিলেও হয়তো
তাহার অপেক্ষা অধিক অর্থোপার্জন করিতে পারিতাম। ...Nothing
succeeds like success...

ভিতরের দরজার ছোট গবাক্ষের কবাটটি সরিয়া গেল। কেহ যেন ওয়ার্ডারকে
কিছু বলিল; অন্ধকারে লোকটির মুখ কিছুই দেখা গেল না।...আলিবাবার
গুহা...চিচিং ফাঁক!...আলিবাবার গুহা রাশি রাশি ধনরত্ন ব্যতীত আর কি দিতে
পারিত? কিন্তু এই ফটক খুলিলে কত জীবনু ত লোক আবার সত্য সত্যই বাচিয়া
উঠিতে পারে।...

জেলের সবটাই প্রাচীর নয় ভিতরেও প্রচুর খালি জায়গা আছে,
যেখানে খোলা হাওয়া বাতাস পাওয়া যাইতে পারে। অন্ততঃ সাধারণ গৃহস্থবাড়ীর

আদিনা অপেক্ষা জেলের আদিনা অনেক বড়। কিন্তু তাহা হইলে কি হইবে? জেলের ভিতর ফুলের বাগান, নিমের এভিনিউ, ছায়াযুক্ত বেগ, অশথ ও বট বৃক্ষ থাকিলে কি হইবে? সারা বাতাবরণ বিষাদে ভরা, প্রানহীন কঠোর ও ক্লেশময়। আবহাওয়া কেমন যেন ভারী ভারী। অনিভার লজ, লেড বেটার কোনান ডয়েল ইহারা কি Psychological Phenomena সম্বন্ধে ঠিকই বলিয়াছেন? গভীর চিন্তন ও মানসিক আগোড়নের সময় আমরা কি চিন্তামূর্তি সকল ঐ স্থানে ছাড়িয়া দিই? আমাদের চিন্তা সমষ্টি কি একটি পেয়াজের মতো যে উহা হইতে এক একটি খোলা ও কোয়া আমরা ছাড়াইয়া ফেলিতে পারি,—কোনটি মোটা কোনটি মিহি। সত্যই কি-কোন পুরানো বাড়ীর ভিতরে ঘাইতে এই জগতই আমাদের গা ছম্ ছম্ করে।...

যিনি ভিতর হইতে আসিলেন, তিনি হাসপাতালের কম্পাউণ্ডার। ভদ্রলোকটি বেশ সৌখীন। হাতে একটি হারিকেন লঠন।—সাপের ভয় নাকি?—আসলে তিনি জেলে প্রবেশ করিবার সময় লঠনটি খালি অবস্থায় লইয়া আসেন; বাড়ী ফিরিবার সময় এটিতে কেবল তেল ভরিয়া লইয়া যান। ইহা সকলেই জানে, সকলেই বোঝে, কিন্তু কেহ কিছু বলে না। একরূপ ধরণের ছোট ছোট প্রাপ্য-গুলিকে উহার উপরি পাওনা বলিয়া মনে করে না,—ইহা যে তাহাদের চাকরির বেতনের অঙ্গীভূত। হয়তো বেতন পঁচিশ টাকা। কিন্তু কাপড় চোপড় জুতা জামায় কি করিয়া এত পরমা খরচ করে।—ডাক্তারের সঙ্গে নিশ্চয়ই পাওনার ভাগভাগি আছে।...

“কি? কম্পাউণ্ডার সাহেবের আজ বড় দেবী হয়ে গেল দেখছি”—সুবেদার সহানুভূতির স্বরে বলে।

“ই্যা, সুবেদার সাহেব, এই জেলে চাকরি নিয়ে কি গুখোরী কাজই না করেছি। এক মিনিট ছুটি নেই। সেই ভোরে এসেছি এখন রাত বারটা হলো। ছপুয়ে কেবল বাড়ী গিয়ে খেয়ে এসেছি। সিন্‌হেসরবাবুর ন-টার সময় হাসপাতালের ডিউটিতে আসবার কথা; এলেন এই এখন। রাত বারটায়,—খেয়ে দেয়ে, বিবির সঙ্গে গল্পগুজব করে, পান চিবুতে চিবুতে।”

তাহার পর একটি অশ্লীল গালি দিল। নিজের ভাগ্যকে, সিংহেশ্বর বাবুকে না জামার মধ্যে যে পোকটি ঢুকিয়াছে তাহাকে, কাহাকে গালি দিল ঠিক বোঝা গেল না। এইটুকু কেবল বুঝিলাম যে, খানিক আগে যে ডাক্তার বাবুটি জেলের ভিতর গেলেন, তাহার নাম সিংহেশ্বর বাবু।...জামার ভিতর হইতে পোকটি বাহির করিতেছে। এখনকার মুখভঙ্গী দেখিলে হাসি পায়।

কম্পাউণ্ডার সাহেব নিজের সুখ দুঃখের কথা বলিয়া চলিয়াছে। “মিস্ত্রির সাহেবের নাইট ডিউটি থাকলে, তবুও একরকম ভাল। তিনি যে দিন আসেন ন-টার সময়ই আসেন, না হ’লে একেবারেই আসেন না।”

হুজনেই চোখে চোখে কি যেন ইঙ্গিত করিয়া হাসিয়া উঠে। আবার গল্প চলে।

“ওসব জেলের সাহেবও জানে। কতদিন জেলের সাহেব রাত্রে রাউণ্ড নেবার সময়, হাসপাতালে গিয়ে দেখেছে যে ডাক্তারের ঘর খালি। আর নিজে চোখে না দেখলেও, জেলে কোন খবর পেতে তো বাকি থাকে না। আগেকার সাহেব থাকতে, একদিন ধরা প’ড়ে জবাব দিয়েছিল—কি করা যার; হাসপাতাল ওয়ার্ডে’ যে ঘরে ডিউটির ডাক্তার শোয়, তার দরজা নেই। রাত্রে কেউ যদি এসে মারপিট করে সেই ভয়ে ওখানে শুই না। সে সাহেবও ছিল ঘুঘু। সে বলেছিল যে, রাত্রে তো কয়েদারা বন্ধ থাকে। মারপিট কে করবে? ডাক্তার জবাব দিয়েছিল যে, যেসব মেটদের রাত্রে ওয়ার্ডারের ডিউটি দেওয়া হয়, তারা তো আর বন্ধ হয় না। এই ব্যাপারের ঠিক আগেই জেল মিউটিনী হয়ে গিয়েছে। কাজেই সাহেব আর বেশী কিছু বলতে পারেন নি।—কিন্তু এখন? মুঙ্গুরপুর জেলের জনকয়েক পলিটিকাল প্রিজনার পালিয়ে যাওয়ার পর থেকে তো মেটদের রাতের ডিউটি বন্ধ ক’রে দেওয়া হয়েছে। শুনি যে মেটরাই নাকি তাদের পালাতে সাহায্য করে।...এখন তো আর আগের অজুহাত চলবেনা। এখন আবার বোধহয় নতুন কোনো ছতো দেখাবে। আচ্ছা ‘ইয়ার’, এখন একটা সিগারেট খাওয়াও তো দেখি। একেবারে ‘থকে’ গিয়েছি। হাড়গোড় যেন ভেঙ্গে যাচ্ছে।”

সুবেদার সাহেব সিগারেট বাহির করিল; কম্পাউণ্ডার সাহেব ধরাইলেন।

তাঁহার পর অপেক্ষাকৃত অল্পেই সবে কি সব কথাবার্তা হইল। কম্পাউণ্ডার সাহেব লণ্ঠনের পলিতাটা একটু উদ্ধাইয়া, লণ্ঠনটা তুলিয়া ধরেন। আধখাওয়া সিগারেটটিতে একটি জোরে টান মারিয়া, সুবেদারের হাতে দেন। গেট হইতে বাহির হইবার সময় বলেন। “সেজন্তে ভেবো না। আমিই দিয়ে দেব।”...কিসের কথা হইতেছিল এতক্ষণ? কি দিয়া দিবেন? ইনজেকশন না তো?—সুবেদার সাহেব ও কম্পাউণ্ডারবাবু দুইজনে বেশ অন্তরঙ্গতা আছে দেখিতেছি...গেটের বাহিরে আসিয়া কম্পাউণ্ডারবাবু সুবেদারকে জিজ্ঞাসা করেন—

“তুমি তো আজ এখানেই শোবে?”

“হ্যাঁ, অফিস ঘরে বিছানা পেতে রেখেছি। এইবার শুতে যাব।” কম্পাউণ্ডার সাহেবের মাথার পিছনের চুলগুলি কি বড় বড়! অধিকাংশই সাদা হইয়া গিয়াছে। তিনি কত কয়েদীর ফাঁসী দেখিয়াছেন। ভোর রাত্তির ফাঁসীর সম্বন্ধে কোনো কথাই তাঁহার মনেও আসে না। যত কম্পাউণ্ডার সকলেই কি পিছনের চুল বড় রাখে?...

...সেই হরিশ কম্পাউণ্ডার। মাথায় আধবাবড়ী চুল। সে মাধববাবুর বাড়ীর জন্ত ওষুধ তৈয়ারী করিতেছে। সন্দেহবাতিক ছিটগ্রস্ত মাধববাবু ঠিক পিছনে দাঁড়াইয়া আছেন—মাপ ঠিক হইতেছে কিনা দেখিবার জন্ত। কিছুক্ষণ পরে বিরক্ত ও অর্ধৈর্ষ্য হইয়া হরিশের মাথার চুলগুলি খপ্ করিয়া মুঠার মধ্যে ধরিয়া মাথাটা নাড়াইয়া দিলেন। বলিলেন “চুল ছোট করে কাটতে পারো না। পিছন থেকে তোমার ওষুধ তৈয়ারীর কিছুই দেখা যায় না?”...আমি গিয়া দাদা আর মা’র কাছে এই গল্প করিয়াছিলাম। সকলে মিলিয়া কি হাসি।...মা হাসি চাপিবার ব্যর্থ চেষ্টা করিয়া বলিতেছেন “মা গো মা; সবই কি ভোর চোখেই পড়ে?”...মা হাসিলেই তাঁহার চোখে জল আসিয়া যায়। আর দাদা যখন হাসে কোনো শব্দ হয় না;—বাঁ গালে একটা টোল খাইয়া যায়! আশ্চর্য্য! দুই গালে নয়, একই গালে গর্ত্তটা দেখা যায়। হাসিবার সময় গোখ দুইটা অর্ধ-নিম্নীলিত হইয়া পড়ে।...দাদার হাসিমুখ চোখের সম্মুখে ভাসিতেছে।

আলোক শিখাটা ক্রমেই দূরে চলিয়া যাইতেছে। এদিক এদিক ছলিতেছে। কম্পাণ্ডার বাবুর লঠন। কম্পাউণ্ডার বাবু কি এত হেলিয়া ছলিয়া চলেন। গরিলারা এমনি করিয়াই চলে। নিকটে থাকিবার সময় এতটা লক্ষ্য করি নাই। অন্তদূরে যাইতেছেন কেন? বোধহয় সরকারী কোয়ার্টার পান নাই। দূর হইতে হারিকেন লঠনের শিখায় ও প্রদীপের শিখায় কোনো ভফাৎ বোকা যায় না।

.....রানীপাতায় একটা কিষণ-কেস তদারক করিয়া ফিরিবার সময়, আমি দাদা আর সহদেও খুব ক্লান্ত হইয়া পড়িয়াছি। অন্ধকার রাতে মিট মিট আলো দেখিয়া, রাত্রি কাটাইবার জন্য সেইখানেই বাওয়া স্থির করিলাম। জোনাকীর শ্রায় মূহ আলোক—ক্রমে কাছে গিয়া দেখিলাম একটা ডিঙ্গ লঠনের শিখা। লঠনটা পুরানো মরিচা ধরা।...

...মহাত্মাদের জন্য খাটিয়া কম্বল বালিস আসিল। “বলন্টিবর” (৫৫) সহদেওর জন্য একখানি মাদুর দাওয়ায় বিছানো হইল। খাটিয়া দেওয়া হইল বাড়ীর বাহিরের একটা দোচালা ঘরে। দেওয়াল বা বেড়া নাই? এদেশে উহাকে ‘হাওয়াটুঙ্গি বলে। কম্বলের উপর ময়লা চাদর ও তৈলাক্ত বালিশ দেখিয়া আমার গা ঘিন্ ঘিন্ করিতেছিল—হয়তো কত রোগের বীজানু উহাতে আছে। আমি আমার খাটিয়া হইতে সেগুলি সরাইয়া খালি কম্বলে বসিলাম,—কম্বলের উপরের ময়লা চোখে দেখা যায় না বলিয়া একটু মনে তৃপ্তি। যে লোকটা ছিঁড়ে দই পরিবেশন করিল তাহার চোখ উঠিয়াছে দাদা ছিঁড়ে দই খাইয়া দিব্যি নিশ্চিন্ত হইয়া ঐ বালিশে বিছানায় শুইয়া ঘুমাইল। ভাগ্যবাদিতার আমেজ, দাদার মধ্যে চিরকাল লক্ষ্য করিয়াছি। পারিপার্শ্বিকের সহিত নিজেকে খাপ খাওয়াইয়া চলিবার ক্ষমতা তাহার অদ্ভুত। এ বিষয়ে কথা তুলিলেই বলিবে যে যদি কোনো মূল সিদ্ধান্তে আঘাত না লাগে তাহা হইলে নিজের সৌজন্যকে বলি দিবার প্রয়োজন কি? উহার আত্মকেন্দ্রিক মন চিন্তার মধ্যেই নিজেকে ডুবাইয়া রাখিতে চায়। সব প্রশ্ন সে নিজের ধরণে ভাবে সব জিনিষের মনে মনে

চুল-চেরা বিশ্লেষণ করে, যে কোন সূক্ষ্ম বিষয় আমার অপেক্ষা ভাল বোঝে— কিন্তু ব্যবহারিক ক্ষেত্রে, ব্যক্তিগত জীবনে তাহার আচরণ যুক্তির সহিত সামঞ্জস্য রাখে না। যে কথা শুনিয়া রাগে আমার সর্বশরীর জলিয়া যাইতেছে, হয়তো মৃদু হাসির সহিত ছোট্টো একটি উত্তর দিয়া, উহা সহ করিয়া গেল। একেবারে নীলকণ্ঠ। সাহসের অভাব তাহার নাই; ভয় পাইয়া কোনো উচিতকাজ ছাড়িয়া দিতে আজ পর্যন্ত তাহাকে দেখি নাই। কিন্তু তাহার রক্ত যেন গরমই হয় না। বুদ্ধিশক্তির তীক্ষ্ণতা ও অনুভূতির তীব্রতা থাকা সত্ত্বেও, আবেগের উগ্রতা ও প্রাণশক্তির প্রচণ্ডতা উহার মধ্যে নাই। প্রতি পদক্ষেপ তাহার মাপা। যেন পিছল পথের উপর দিয়া, অতি সাবধানতার সহিত পা টিপিয়া টিপিয়া চলে।...

থিলেগেড রেসের সময় দাদা কি আড়ষ্টভাবে পা ফেলে।.....সেই একবার কুমার সাহেবের মেলায় ছেলেদের স্পোর্টসএ আমি আর দাদা থিলেগেড রেস দিয়াছিলাম। আমরা অনেক পিছনে পড়িয়া গিয়াছিলাম, সফল হইতে পারি নাই। ঐ 'আইটেম' শেষ হইয়া গেলে রাগে ছুখে দাদাকে বলিয়াছিলাম, তোমাকে সঙ্গে নিয়ে দৌড়ানো, আর গলায় একটা বিরাট ঢাক বেঁধে দৌড়ানো একই কথা। দাদা বলিয়াছিল 'আমি তো আগেই বলেছিলাম। তুই তো স্পোর্টসে সব তাতেই ফাষ্ট হ'স। আমাকে নিয়ে মিছিমিছি টানাটানি করলি। পারার সঙ্গে জুড়ী বাঁধলেই পারতিস।' এত লজ্জিত, এত অপ্রভিত হইতে দাদাকে কোনো দিন দেখি নাই। ১৯৪৩ আর ১৯২২—একুশ বৎসর আগেকার ঘটনা।... দাদার স্বদেশিক, শ্রমক্লান্ত মুখখানি।...ইতস্ততঃ বিস্তৃত চুলগুলি ধূলায় ভরিয়া গিয়াছে। হাঁপাইতে হাঁপাইতে কোঁচার খুঁট দিয়া পায়ের ধূলা ঝাড়িতে লাগিল। ...আমার মন খারাপ হইয়া গেল। অন্যান্য প্রতিযোগিতায় পাওয়া প্রাইজগুলি মাকে দেখাইয়া আনন্দ পাইলাম না। দাদা নিজেই দেখি সেগুলি মাকে দেখাইল। পরের দিন আবার সেগুলি বন্ধুবান্ধবদের দেখাইল। মাকে বলিল— "শোনো নিলুর কাছে, রোজারিও সাহেবের কাণ্ড—আমি তো ভাল বলতে পারব

না।” বুঝিলাম দাদা আমার মনের ভাব বুঝিতে পারিয়াছে। তাহার তীক্ষ্ণ অথচ দরদী দৃষ্টি মনের অন্তস্থল পর্য্যন্ত বুঝিয়া লয়। দাদা আমার মন হালকা করিবার চেষ্টা করিতেছে। আমার দিক হইতেই নিজের রুচতার প্রায়শ্চিত্ত হওয়া উচিত ছিল।...মাকে রোজারিও সাহেবের কাণ্ডের কথা বলিতে হইল। রোজারিও সাহেব কুমার সাহেবের ম্যানেজার। খেলার স্পোর্টস্ তাঁহারই তত্ত্বাবধানে হয়।একশত গজ দৌড়ে খোকনদার সহিত কেহ পারে না। তাহার ভাল নাম ক্রীষ্ণারীজন দত্ত। সে হইয়াছিল ফাষ্ট, আমি সেকেন্ড। ছেলেদের স্পোর্টস্‌এ জামায় নম্বর দেওয়া হয় না—গম্ভ্যস্থানে পৌঁছিবার পর রোজারিও সাহেব সকলকে জিজ্ঞাসা করিয়া একটা কাগজে নাম লেখে। খোকনদাকে নাম জিজ্ঞাসা করিল।—চারিদিকে ভিড়, কোলাহল—প্রত্যেক প্রতিযোগিতা শেষ হইলেই এইরূপ হয়। খোকনদা নাম বলিল। সাহেব ছই তিনবার জিজ্ঞাসা করিয়াও, বোধ হয় তাহার নামটী বুঝিতে পারিল না। তাহার পর আমার নাম লিখিল আমার পরের ছই জনের নাম লিখিল। প্রাইজ দিবার সময় দেখি আমাকেই ফাষ্ট প্রাইজ দিল। খোকনদার চোখ ছল ছল করিতেছে তাহার নাম নাই। জিতেনদা তাহাকে ঠাট্টা করিয়া বলে “ক্রীষ্ণারীজন দত্ত কি সাহেব লিখতে পারে। বাপ-মায়ের দেওয়া নামের জন্ম তোর প্রাইজটা নষ্ট হ’ল। এখন কাল সকালে কুমার সাহেবের কাছে যা”। ভাবিয়াছিলাম মা গল্প শুনিয়া খুব হাসিবেন—কিন্তু ফল হইল উন্ট। আমার প্রাইজের টিপটী পরের দিন খোকনদাকে দিয়া আসিতে হইল। আমার প্রাইজটি কিন্তু মাঠে মারা গেল! রোজারিও সাহেবকে দেখিলে এখনও আমার এই দুঃখের কথা মনে পড়ে।.....

দাদা কিন্তু আর কোনো দিন, আমার পার্টনার হইয়া খেলিতে রাজী হয় নাই, কোন না কোন ছুতায় Avoid করিবার চেষ্টা করিয়াছে। দাদার খেলাধুলায় বিশেষ সখ কোনো দিনই ছিল না। এক ব্যাডমিণ্টন ছাড়া কোনো খেলাই ভাল খেলিতে পারিত না; ইহাতেও সে কোন ম্যাচে আমার পার্টনার হইয়া খেলে নাই। প্রীতি, সৌজন্য ও নমনীয়তার মধ্যেও তাহার দৃঢ়তা অসীম। একজায়গায় গিয়া

তাহার আর নাগাল পাওয়া যায় না, নিকট তথাপি যেন একটু বিচ্ছিন্ন, স্বতন্ত্র। তাহার সেই অভিমান আমি একুশ বৎসরের মধ্যে শত চেষ্টাতেও ভাঙাইতে পারি নাই।.....

ব্যারাকের কীর্তন এখনও চলিতেছে। কোলাহলে মনে হইতেছে যে বেশ জমিয়া উঠিয়াছে। এখন আর 'সীয়ারামা'র নাম কীর্তন হইতেছে না, এখন একটা মাত্র একটানা সুর শোনা যাইতেছে "নারায়ণা নারায়ণা না—আ—রা—আ য়গআ...." এইরূপ নাম কীর্তনের পরই সাধারণত ইহাদের কীর্তন শেষ হয়।.....সাহেব সুপারিন্টেণ্ডেন্ট তাহার কোয়ার্টারের নিকট এই বিকট চীৎকার কি করিয়া সহ করে? বোধহয় ওয়ার্ডারদের চটাইতে চায় না। তাহাদের আন্তরিক সহযোগিতা ব্যতীত জেলের শাসন যে একদণ্ডও চলিতে পারে না।.....

কতদিনের কথা হইল! রোগা খিটখিটে, জজ স্পিলার সাহেব ছিলেন আধ-পাগলা গোছের লোক। প্রত্যহ ব্যায়ামের জন্ত কুড়ুল দিয়া কাঠ চিরিতেন..... জার্মান সম্রাট কাইজারেরও এই বাতিক ছিল।.....ফজলেমিয়া নাজির জজসাহেবের কাঠের গুঁড়ি যোগাইতে যোগাইতে অস্থির। বজরঙ্গ প্রসাদ উকীলের মেয়ের বিয়ের সময় কি কাণ্ডই স্পিলার সাহেব করিয়াছিলেন। রাতে বিয়ের বাজনা, যখন বেশ জমিয়া উঠিয়াছে, তখন হঠাৎ তাহার মনে হইল যে উহাতে তাহার শাস্তির ব্যাধাত হইতেছে। সঙ্গে সঙ্গেই একখানি লাঠি ও একটা বুল্‌স্‌ আই লঠন লইয়া বজরঙ্গবাবুর বাড়ীতে গিয়া হাজির। সেখানে আর কোন কথা না বলিয়া লাঠি-খানি দিয়া ঢোলের চামড়ায় ছিদ্র করিয়া দেন। পরের দিন বজরঙ্গবাবু জজসাহেবের নামে মোকদ্দমা দায়ের করেন। কিছুদিন পরে মোকদ্দমা আপোবে নিষ্পত্তি হইয়া যায়। মাথা একটু ঠাণ্ডা হইলে উকিলসাহেব বুদ্ধিতে পারেন যে, ওকালতী করিয়াই যখন খাইতে হইবে, তখন আর জজসাহেবের সঙ্গে বাগড়া করিয়া লাভ কি? আত্মীয় কুটুম্বদের সম্মুখে অপমান যাহা হইবার তাহা তো হইয়াই গিয়াছে। কথা যত বাড়াইবে তত বাড়ে।.....

আমাদের দেশের লোকের কি দোষ দিব। সব দেশের লোকই সমান।

সাহেবরাও আমাদের মত time server। এই কংগ্রেস মিনিষ্ট্রীর সময়, জেলা ম্যাজিস্ট্রেট ভার্ণন সাহেব যাচিয়া আসিয়া আমাদের আশ্রমে ভাত ডাল খাইয়া গিয়াছে।...মিসেজ ভার্ণন, হাতদিয়া ভাত খাইবার সময়, ভাতের দলাটিকে ঠিক মুখে পৌছাইতে পারিতেছিলেন না। হাতের উপর ভাত রাখিতেছিলেন, ঠিক যেমন করিয়া চামচে ভাত লয় সেইরূপ করিয়া; আর ঠিক চামচের মতো করিয়াই হাতটা মুখে ঢুকাইতেছিলেন। সমস্ত মুখে ভাত ডাল লাগিয়া গিয়াছিল।...ছুতায় নাতায় ভার্ণন সাহেব যখন তখন দেখা করিতে আসিত। খদ্দর ও গাকীর টুপীর সে কি খাতির। সাহেবের মেয়ে একটি বেজী পুষিয়াছিল। বাড়ীতে বেজীটা বড় জ্বালাতন করিতেছে, ভোমরা যদি আশ্রমে রাখো তাহা হইলে দিই; এই বলিয়া দাদাকে বেজীটা দিয়াছিল। পরে এই বেজীটিকে দেখিবার ছুতা করিয়া স্ত্রী কন্যা লইয়া কালেক্টর সাহেব, সময় নাই অসময় নাই, যখন তখন আসিয়া হাজির; তাহার মেয়ে নাকি রিকিকে দেখিতে চায়। তাহার পর 'রিকিকে' লইয়া ছেলে মানুষের মতো কত আদর কত চ্যাচামেচি.....

চিন্তাসূত্র ছিন্ন করিয়া, অন্ধকার ও নিস্তরুতা বিদীর্ণ করিয়া, বাতাবরণ কম্পিত করিয়া, বারোটোর ঘণ্টা পড়িল। ডাক্তারের কোয়ার্টারে একটি কুকুর ষেউ ষেউ করিয়া ডাকিয়া উঠিল—তাহার সুখতন্দ্রা বোধহয় ভাঙ্গিয়া গিয়াছে। “হো-ও-হে!” এই বিকট চীৎকারের সহিত, খঞ্জনী ঝাঁঝ, ঢোলক সম্বলিত ওয়ার্ডারদের কীর্তন বন্ধ হইয়া গেল। ইহারা কি ঘড়ী ধরিয়া বারোটো পর্যন্ত কীর্তন করে নাকি? কি করিয়া পূর্ব হইতে সময়ের ঠিক পায়।.....খাঁকীর আধহাতার নীচের একজোড়া হাত এক আধহাত ব্যাসের ঝাঁঝ বাজাইয়া চলিয়াছে। বাঁ হাতের মনিবন্ধে একটি সস্তা রিষ্টওয়াচ ও তাহার উপরের অংশে নীল লাল উকীতে অঙ্কিত একটি নারীর মূর্তি।.....

বাবার কীর্তন কিন্তু ঠিক আটটার শেষ হইত। “রঘুপতি রাঘব রাজারাম, পতিতপাবন সীতারাম”—মহাত্মাজীর প্রিয় ভজনটা সব চাইতে শেষে গাওয়া হইত। ...আশ্রমে যে কোন কংগ্রেসকর্মী থাকে, সকলেই কীর্তনে যোগদান করে। সকলে

মনে করে ইহাতে বাবা খুশী হইবেন। সত্যই বাবার কীর্তনের বাতিকেব কথা জেলাস্তক লোক জানে। মিটিংঘরেই কীর্তন বসে। সিমেন্টের মেঝে, মাটির দেওয়াল, খড়ের চাল, দেওয়াল মা'র নিজহাতে ঝক্ ঝকে নিকানো,—মধ্যে মধ্যে ছোট জানালা, উহাতে কপাট নাই। দেওয়াল ভরিয়া মধ্যে মধ্যে রাজনৈতিক নেতাদের ছবি। এক দিকে দুইটা কংগ্রেসের পতাকা ক্রমের আকারে দেওয়ালে আঁটা। তাহার উপর দিকে, লাল শালুর উপর সাদাতুলনা দিয়া নাগরী লিপিতে লেখা “স্বাগতং”। নিচে গান্ধীজীর একখানি বড় ছবি। ঘরের পূর্ব-উত্তর কোণ কেবল একটু অপরিষ্কার। কস্টিক সোডা, লোহার কড়া, আর কাপড়কাটা সাবান তৈয়ারীর অগ্ন্যস্ত্র সরঞ্জাম ভরা কাঠের চাকাওয়াল একটি প্রকাণ্ড সিন্দুক থাকে ঐ দিকে। সিন্দুকটা ফুল-বাহার নন্দলাল তেওয়ারী কংগ্রেস কমিটীকে দিয়াছিল। কোণে দাঁড় করাইয়া রাখা থাকে একটি ধুনকী; আর আড়কাঠ হইতে ঝুলানো থাকে একটি ধনুক। দিনের বেলায় পাঁজ তৈয়ার করিবার তুলা ধুনিবার সময়, ইহার সহিত ধুনকীটা বাঁধিয়া লওয়া হয়।...আশ্রমের কীর্তন আরম্ভ হইল। “দেশের ছেলে গান্ধীজীকে চিনলিনা রে জানলি না”.....বাবার নিজের লেখা গান।...মা ধূপদানি লইয়া মিটিংঘরে ঢুকিলেন। গান্ধীজীর ছবির সম্মুখে একটি ফুলের মালা দিয়া, উহার সম্মুখে ধূপদানিটা রাখিলেন ও তাহার পর এক কোণে, আলাদা হাত জোড় করিয়া বসিলেন। বাবা লণ্ঠনটা কম করিয়া দিয়া, সুর ধরিলেন। সহদেও প্রভৃতি সকলেই বিকৃত উচ্চারণে ঐ বাংলা কীর্তন করিতেছে। প্রথম গান শেষ হইল। মা গড় হইয়া প্রণাম করিয়া উঠিলেন। এতগুলি লোকের খাওয়া দাওয়ার ব্যবস্থা তাঁহাকেই করিতে হইবে—কীর্তনে বসিয়া থাকিলে বাঁধিতে কে? আমি আর দাদা দুজনেই ছোটবেলায় কীর্তনে বসিতাম। পৈতা হইবার পরও, কম বৎসর বসিয়াছিলাম। দাদা কীর্তন বন্ধ করিবার দিন-কয়েক পর হইতেই আমিও কীর্তনে যাওয়া বন্ধ করি। তাহা লইয়া মা'র কি কান্না! “তোরা না এলে উনি দুঃখিত হ'ন। তোর মন না চায়, তবু ঠাঁর কথা ভেবে বোসনা কেন?” দাদা কোন উত্তরই দেয় না।.....দাদা বাড়ীতে কীর্তন করিত না, কিন্তু কংগ্রেসের কার্যসূত্রে যখন গ্রামে যাইতাম

তখন বড় বড় গ্রামে গ্রামবাসীরা আমাদের মনোবিনোদের জন্য কীর্তনের বন্দোবস্ত করিত। বাবার জন্য তাহারা এইরূপ করিতে অভ্যস্ত, সেইজন্য মাষ্টার সাহেবের ছেলের জন্যও তাহারা এই 'খাতির দারি' করে। এ কীর্তনে কিন্তু দাদা কখনও বিরক্তি প্রকাশ করে নাই। আমি অস্বস্তি প্রকাশ করিলে ইঙ্গিতে ধৈর্য ধরিতে বলিয়াছে।.....

বাইসী থানার খাগ্‌হা হাটে মিটিং হইবে। একজনও লোক আসে নাই। সহদেও কংগ্রেস পতাকাটা মাটিতে পুঁতিয়া 'ইন্কিলাব জিন্দাবাদ' 'গান্ধীজীকাজ' কতবার বলিয়াছে। টাঁড়া পিটানো, ঘণ্টা বাজানো প্রভৃতি গ্রামের হাটে লোক জড় করিবার যত কৌশল আছে, সবই করা হইয়া গিয়াছে। কিন্তু লোক আর হয় না। তখন স্থানীয় কংগ্রেসকর্মী রামদত্ত মণ্ডল, গয়লাদের কীর্তনের দল ডাকিয়া আনিল। সঙ্গে একটি সিঙ্গল্‌ রিডের হারমোনিয়ম। দশ মিনিটের মধ্যে হাট-শুদ্ধ লোক ঐ স্থানে ভাঙ্গিয়া পড়িল। তাহার পর আমরা তাড়াতাড়ি বক্তৃতা সারিয়া লইলাম। লোকে হাটের কাছে ব্যস্ত। দাদের ঔষধের ক্যানভাসারের বক্তৃতায়, আর মহাত্মাজীর চেলার বক্তৃতায় তাহারা কোনো তুফাৎ বুঝিতে পারে না। হাটে আসিয়াছে, সবরকম তামাসার মধ্যে মহাত্মাজীর তামাসাও তাহারা দুই মিনিট দেখিয়া লইবে। তাহাদের মধ্যে কেহ কেহ তো মহাত্মাজীর 'দর্শন' "নিমক সত্যাগ্রা"র পূর্বে করিয়াছে,—তাহারা আবার এই অর্ধাটীন 'চেলার মুখ হইতে নূতন কথা কি শুনিবে? কি সব বলে, পনের আনা কথা তো বুঝাই যায় না। আমাদের "মবেশীর চরীর" (৫৩) ব্যবস্থা করুক, খাজনা কমান্বিয়া দিক, তহশীলদার পঞ্চের মহিষ যে সকলের ক্ষেত 'উজার' (৫৪) করিতেছে—তাহা বন্ধ করুক, তবে তো বুঝি। তা নয়, কেবল মেসুরী, চাঁদা লওয়ার ফন্দী। 'মিনিট্রী গান্ধীপর' খাজনা বাকীর আইন করিয়াছে—হাটে ভাষণ দিয়া গেল, কাহারও চার আনার বেশী দরখাস্তে খরচ পড়িবেনা। খরচ পড়িল তাহার বিশগুণ। অর্ধেক লোকের দরখাস্ত তো খারিজই হইয়া গেল। মহাত্মাজীর চেলা পুণ্যদেওজীর কাছে দরখাস্তগুলি দিয়াছিলাম, তদ্বির

করিবার জন্ত। তিনিও দরখাস্ত পিছু আট আনা 'মহেন তানা' লইয়াছিলেন। এক মাষ্টার সাহেব আছেন বলিয়া এ জেলায় মহাআজীর কাজ কিছু হয়। না হইলে ইহাদের অর্ধেক লোক তো 'ঠগ'।.....সত্যই তো কংগ্রেস সংগঠন, সম্পূর্ণ ধনী কিশাণদের হাতে। জমিদারের শোষণ হইতে তাহারা মুক্ত হইতে চায়; কিন্তু নিজেরা তাহাদের সীমিত ক্ষেত্রে, অধিদার, বাটাইদার বা নিঃস্বল ক্ষেত মজুরদের উপর শোষণ বন্ধ করিতে চায় না। কংগ্রেস মিনিস্ট্রীর সময় নিঃস্ব রায়ত-দের জন্ত যতগুলি আইন তৈয়ারী হইয়াছিল সবগুলিই ইহারা কূটকৌশলে ব্যর্থ করিয়া দিয়াছে। সহদেওএর মতো কংগ্রেস কর্মীও অধিদারের কায়েমী স্বত্ত্ব বন্ধ করিবার জন্ত 'বন্দোবস্তীর' মিথ্যা দলিল তৈয়ারী করিয়াছে।...দহিতাত গ্রামের সেই প্রৌঢ়া স্ত্রীলোকটি, যে কংগ্রেস অফিসে প্রায়ই আসিত, গলায় প্রকাণ্ড গনগণ্ড,—আসিয়াই কাঁদিতে বসিত, দাদাকে বলিত “তুমি ছাড়া এর বিহিত আর কেউ করতে পারবে না। আকাশে চন্দ্র সূর্য থাকতে আমার উপর এই জুলুম। সহদেওর দাদা কপিলদেও আমার সব জমিজমা নিতে চায়। জমি প্রায় পঞ্চাশ বিঘা। তার বাড়ীর কাছে জমি কিনা; ‘মাকাতা’ (৫৫) তামাকের ক্ষেত চমৎকার হবে। তাই এই জমির উপর নজর। ‘পুরুথ’ (৫৬) ছিল তেলী। জোয়ান ছেলে, ‘পুরুথ’ থাকিতেই ম’রে যায়। পুতহ’র তখন ছেলে পেটে। এক বছরের মধ্যে আমার পুরুথ মরিল; তাহার পর গেল ‘পুতহ’ (৫৭)। বছর না ঘুরতেই একরত্তি নাতিটিও ‘বাই’ উথর গিয়া’ (৫৮)। সে চব্বিশ ঘণ্টা দাদীর কোলেই থাকতো। কত ওষুধ, বিষুধ, কত চিকিৎসা হলো। ব্যাথা লাগবে ব’লে বাছাকে ‘সুই’ (৫৯) দিতে দিই নি। দিলে হয়তো বাঁচতো। তাকে আর ধরে রাখতে পারলাম না। তার কিছুদিন পরে পাড়ার গোরে গোপের ছেলে মারা যায়। তখন কপিলদেও পঞ্চায়তী ক’রে আমার উপর ‘ইলজাম’ (৬০) লাগালো যে আমি ডাইনী; আগে নিজের বাড়ী শেষ করেছে, এখন গোরেলালের ছেলেকে ‘বাণ’ মেরে তাকে শেষ করলো। আরে বেকুফ’ এটুকু বুঝলি না, আমি যে স্বামী, পুতুর নাতিপুতি সব খেয়ে ব’সে আছি, আমার

পেটে আর জায়গা কোথায়? তারপর আমাকে গ্রামছাড়া করবার জন্যে সেদিন রাত্রে রাধো, শনিচরা, ছেদী এরা সব কপিলদেওর কথাতে, আমার বাড়ী পুড়িয়ে ছাই ক'রে দিয়েছে। একমুঠো ধান পর্যন্ত বাঁচাতে পারি নি। আমি কিন্তু আমার ভিটে ছাড়ছি না। শুনছি নাকি আবার কপিলদেও আমার উপর সদরে ডিকরী করিয়েছে, জমিটা নেওয়ার জন্য। আমি কি কচি খুকী যে এই কথা বিশ্বাস করবো? জমি থাকলো দহিভাত গ্রামে, আর ডিকরী করাবে পূর্ণিয়ার। তা কি কখন হয়?" এইরূপ কত কথা বলিয়া চলে; মধ্যে মধ্যে ঠক ঠক করিয়া মাথা কুটে, এবং ডুকরাইয়া কাঁদিতে থাকে। সে বলে যে মাষ্টার সাহেবের সময় কোথায়? তাহা না হইলে তাঁহাকেই দহিভাতে একবার লইয়া যাইতাম। কাজেই বিনুবাবু ছাড়া তাহার আর নাকি গতি নাই। দাদা আর আমি কত চেষ্টা করিয়াছি, কিন্তু কপিলদেওএর এই অত্যাচার বিহিত করিতে পারি নাই। আমরা দহিভাতে গেলে কপিলদেও পুরী তরকারি খাওয়াইয়া দেয় : কিন্তু কাজের কথায় আমল দেয় না। ঘুরাইয়া ফিরাইয়া বলে যে' তাহারাতো মহাত্মাজীর ভক্ত, সেও তো জেলা কংগ্রেস কমিটির মেম্বর, আশ্রমের চোল. ছাইবার খড় তো সেই প্রতি বৎসর দেয়, এক ভাইকে তো সে কংগ্রেসে দান করিয়াছে। আসল কথা, বড় একান্নভুক্ত পরিবারের সকল লোকের কাজ, জমিজমা দেখিতে দরকার হয় না। বাড়ীর অন্তর্ভবন করিয়া গ্রামে জটলা করা অপেক্ষা একআধজনকে কংগ্রেসে যোগদান করা ভাল। ইহাই বড় কৃষাণদের মনস্তত্ত্ব। কংগ্রেস সংগঠন হইতে যতটুকু সুবিধা পাওয়া সম্ভব, তাহা এই 'দানের' দ্বারা নিশ্চিত হইয়া যায়। চাই কি, ভাই যদি কংগ্রেস কর্তৃপক্ষের মন জুগাইয়া চলে তাহা হইলে ডিষ্ট্রিক্টবোর্ডের মেম্বরও হইয়া যাইতে পারে। আর নেহাৎ যদি কংগ্রেস কোনো বিষয়ে ধনী কৃষাণের উপর চাপ দিতে আরম্ভ করে, তখন তাহা গায়ে না মাখিলেই হইল। শেষ পর্যন্ত নৈতিক প্রভাব ব্যতীত আর কোনো শক্তিই তো কংগ্রেসের নাই।...

পরে একদিন ঐ তেলী বো দাদাকে রাগে ছুঁখে বলিয়াছিল, "দারোগা

সাহেবকে কপিলদেও কিনে নিয়েছে জানি। তোমাকেও কি কিনে নিয়েছে ?” তাহার পর আও কতকি বলিতে যাইতেছিল। হঠাৎ সহদেও আসিয়া পড়ায় ধামিয়া যায়। যত শক্ততাই থাকুক, সহদেও ভুঁইয়ার ব্রাহ্মণ—উঁচু জাত, গ্রামের গণ্যমান্ত ব্যক্তি। উহার সম্মুখে সামান্ত তেলী বৌ জোরে কথা বলিতে পারে না। আর সহদেওকে এ সম্বন্ধে আমরা কিছু বলিলে বলে, কপিলদেও ভাইয়া মালিক’ আমি ইহার কি জানি ?

আমার ইচ্ছা করিতেছিল সহদেওকে ঘাড় ধরিয়া কংগ্রেস আশ্রম হইতে বাহির করিয়া দিই। ইহার পর অনেকদিন উহার সহিত কথা বলি নাই। দাদা কেবল আমাকে বলিয়াছিল, ওর উপর রাগ করে কি হবে—গলদ যে সংগঠনের গোড়ায়।

১৯৩০ এবং ১৯৩২ সালের আন্দোলনে ক্যাম্পজেলে থাকিবার সময় আমাদের রাজনৈতিক দৃষ্টিভঙ্গীর ব্যর্থতার কথা আমরা অনুভব করি। জেলে এসম্বন্ধে আলোচনা, বাদানুবাদ, মনোমালিন্য হইয়া গিয়াছে। যাহারা এই ব্যর্থতার কথা প্রকাশে না বলিত, তাহাদের মুখেও হতাশার ছাপ সুস্পষ্ট ছিল। সেই-বীজ এতদিনে অফুরিত হইল। দাদা ও আমি কংগ্রেস সোশ্যালিষ্ট পার্টিতে যোগদান করিলাম। তেলী বোয়ের ঘটনা, ঐ সুপ্ত বীজকে আবশ্যিক মত তাপ ও জল সিঞ্চন করে। ঐ স্ত্রীলোকটি এখনও তাহার স্বামীর ভিটা আঁকড়াইয়া পড়িয়া আছে কিনা জানি না; কিন্তু তাহারই চোখের জল আমাদের হৃদয়ের সকল দ্বিধা সন্দেহ ভাসাইয়া লইয়া গিয়াছিল। হৃদয় কন্দরের অর্ধজাগরিত আকাজ্জা, গবাক্ষপথে উষার আলোক পাইল।... তাহার পর আমি আর দাদা একই পার্টির মধ্যে থাকিয়া কি উৎসাহের সহিত কাজ করিয়াছি। ও যে কেবল সহকর্মী নয়, কেবল কমরেড নয়—ও যে আমার দাদা। কত সুখদুঃখের স্মৃতি বিজড়িত একসূত্রে গাঁথা আমাদের জীবন। কিসে আমার ভাল হইবে, কিসে আমার একটু আনন্দ হইবে, এই চিন্তা সর্বদা যাহার মনে... নিজে কলেজে পড়ে নাই তাহার অন্ত দাদার মনের দুঃখও কম ছিল না। আর্থকোয়েক রিলিফের কাজের এনাওএন্স এর টাকা দাদা আমার কলেজের পড়ার খরচ

করিয়াছে। তাহার মনের সাধ আমারই উপর দিয়া মিটাইয়াছে। ব্রিগিফের কাজ শেষ হইবার পর, জিনিষপত্র যখন নীলাম হয়, তখন দাদা একখানি মাইকেল কিনিয়া আমাকে দেয়। এসব তো তুচ্ছ জিনিষ। দাদার ভালবাসার প্রসঙ্গে এইসব জিনিষের কথা উঠানো, দাদার ভালবাসাকে ছোট করিয়া দেওয়া মাত্র। আমার মাথা ধরিলে দাদা ব্যস্ত হইয়া পড়ে। জেলের মধ্যে 'এতোয়ার' করিয়া যে গুড় পাইত, লক্ষ্য করিতাম যে সে নিজে তাহা খায় না, কেননা দাদা জানে যে, আমার ভাত খাওয়ার পর একটু মিষ্টি না খাইলে মনে হয়, খাওয়া অসম্পূর্ণ রহিয়া গেল। জেলে নিয়মিত আমার জামা ও জাঙ্গিয়া কাটিয়া দিয়াছে, বাধা দিলে বলিয়াছে "থাক, তোর অভ্যাস নেই"। আমিও আর জোর করি নাই। মনে হইয়াছে, দাদা আমার জন্য এসব করিয়া দিবে ইহা তো আমার জন্য দাবী—ইহাতে অস্বাভাবিক কিছু নাই।

কিন্তু—কিন্তু দাদার কি আমার উপর কিছুই দাবী নাই? থাকিতে পাবে কেন, আছে। তাহার স্থান রাজনীতিক্ষেত্রের বাহিরে। রাজনীতিক্ষেত্রে, আমি নিলু আর সে দাদা নয়। এখানে বে ব্যক্তিগত প্রশ্ন ছাড়িয়া, যুক্তির কঠিন পাপরে প্রত্যেক কার্যপদ্ধতি যাচাই করিতে হইবে,—আমার পার্টির দৃষ্টিকোণ দিয়া সকল কর্ম বিচার করিতে হইবে।...

...পৃথিবী আমার সম্মুখে যাহা ইচ্ছা ভাবুক, দাদা আমার মনোভাব ঠিক বুঝিবে; সেখানে সংকীর্ণতার লেশমাত্র নাই।...

.....১৯৪০ সালে আমি আর দাদা যখন গ্রেফতার হই তখনও আমরা দুইজনেই সি-এস-পির মেম্বর। কিন্তু জেলের ভিতর কয়েক মাসের মধ্যে কি যে পরিবর্তন হইয়া গেল। সেই ওয়ার্ডের কাঁঠাল গাছের তলায়, চন্দ্রদেওএর সহিত প্রথম আলাপ—তাহার নিকট হইতে বই লওয়া—তাহার লেকচার ক্লাসে যাওয়া—কাঁঠাল গাছের নীচে কখন বিহানো লেকচার ক্লাস—নব জোখের সম্মুখে ভাসিতেছে।...তাহার অকাট্য যুক্তির নিকট মাথা নত করিতে হইল। মনে হইল ধীরে ধীরে দৃষ্টির সম্মুখের অঁধার ববনিকা সরিয়া বাইতেছে,—দাদার পক্ষপৃটে

থাকিয়া যে দৃষ্টিভঙ্গীতে রাজনীতিক্ষেত্র দেখিতাম, তাহা রুগ্ন, jaundiced, ভ্রান্ত—উহা স্বেবিধাবাদী নিম্ন মধ্যবিত্তশ্রেণীর ভাবপ্রবণ উচ্ছ্বাস মাত্র ;—যথার্থ সর্বস্বকারার সাবলীল উদ্ধামতার স্থান সেখানে নাই ;—জাতীয়তার বাহিরে দেখিবার ক্ষমতা তাহাদের নাই। চন্দ্রদেওদের দলে প্রবেশ করিবার পূর্বে মনে করিয়াছিলাম, দাদার সহিত আলোচনা করিব! বলি বলি করিয়াও কিন্তু তাহা হইয়া উঠে নাই,—মুখ্যতঃ সঙ্কোচের জন্ম, আর গৌণতঃ ভয় ছিল যে তাহার যুক্তির উত্তর দিতে পারিব না। অথচ আমি মনে মনে অনুভব করিয়াছিলাম, দাদার যুক্তি ভুল। প্রতি যুক্তির উত্তর যদি চন্দ্রদেওএর নিকট হইতে শুনিয়া, পুনরায় দাদার কাছে বলিতে পারিতাম, তাহা হইলে হইত। শেষ পর্য্যন্ত দাদাকে না বলিয়াই নূতন দলে যোগদান করিয়াছিলাম। আর জিজ্ঞাসাই-বা করিব কেন? রাজনীতিক্ষেত্রে নাবালকত্ব কি চিরকালই থাকিয়া যাইবে? সেই সময় হইতে আমাদের দুই জনের মধ্যে যে হুলস্থাপন ব্যবধান গড়িয়া উঠিল, তাহা আজ পর্য্যন্ত রহিয়া গিয়াছে। রাজনৈতিক কর্মীর জীবন তাহার পাটির ভিতরে—পাটির বাহিরের অস্তিত্ব তাহার একেবারে লুপ্ত করিয়া দিতে হইবে। ইহার পর হইতে আমি দাদাকে এড়াইয়া চলিবার চেষ্টা করিয়াছি। নেহাৎ ব্যক্তিগত কাজের কথা ন্যতীত আর অন্য কোনো কথা হয় নাই। আমার সর্বদা ভয় যে, আমার পাটির লোকেরা আবার কি মনে করিবে। দাদা-বে একটি প্রতিদ্বন্দ্বীদলের নামজাদা কর্মী। উহার সহিত অন্তরঙ্গতা আমার পাটির লোকেরা নিশ্চয়ই পছন্দ করিবে না; কিন্তু তাহারা নিজেদের মধ্যে এ সম্বন্ধে নিশ্চয়ই আলোচনা করিবে। এই দুই দল ছাড়াও আরও কয়েকটি রাজনৈতিক উপদলের কর্মীরাও সেখানে ছিল। প্রত্যেক দলের বিশ্বাস যে তাহাদের দলের মধ্যে অপর দলের চর আছে। আর সত্যই; বতই গুপ্ত রাখিতে চেষ্টা করো, এক দলের কথা অপর দলের লোকেরা নিশ্চয়ই জানিতে পারিবে। জেলে দেওয়ালেও শুনিতে পার।

দাদাও আমার সঙ্কোচ দেখিয়া, আমাকে এড়াইয়া চলে। পাটি ক্লাস হইতে আসিয়া নিয়মিত দেখি আমার বিছানা ঝাড়া হইয়াছে; ঐ পরিচ্ছন্ন বিছানা

দাদার দরদীহাতের স্পর্শ অনুভব করি। যেদিন মা কিম্বা বাবার চিঠি আসে, সেইদিন কেবল দাদার সহিত কথা বলিবার সুযোগ পাই। মা'র পোষ্টকাডে আসিয়াছে—আমি পড়িয়া দাদার বিছানার উপর রাখিলাম। “কার চিঠি ; মা'র নাকি ?” বলিলাম “হ্যাঁ।” দাদা চিঠি পড়িতেছে—“সকালে খালি পেটে চা খেয়েনা। মধ্যে মধ্যে ত্রিফলা আর ইসবগুল খাবে। বেলপোড়ার বন্দোবস্ত করতে পারলে সব চাইতে ভাল। আমার বড় ভয়—জেনে তোমাদের প্রত্যেক-বারেই আশা হয়। সিকিউরীটী বন্দীদের তো এসব জিনিষ জোগাড় করা শক্ত নয়। যদি টাকার দরকার হয়, লিখতে লজ্জা কোরোনা। যেমন ক'রে হোক, পাঠিয়ে দেবো”।—“মা'র কাণ্ড”—বলিয়া দাদা অল্প অল্প হাসিতেছে। বাঁ গালে টোল পড়িয়াছে।.....কত কথা প্রাণ খুলিয়া বলিতে ইচ্ছা করে। আগে হইলে মা'র সহক্রে কত গল্প হইত। এখন খালি বলিলাম “হ্যাঁ”। বুকভরা কত কথা কিম্বা সংস্কারের শৈত্যে জমিয়া চাপ বাধিয়া গিয়াছে।...ছোট বেলায় একখানি লেপের মধ্যে আমি আর দাদা শুইয়া আছি। রাত্রি চারিটা হইতেই গল্প আরম্ভ হইয়াছে—গল্পের আর শেষ নাই।...এখন ছোট একটা “হ্যাঁ” বলিবার পর মনে হইল যে আর কথা জুগাইতেছে না। কথা ফুরাইয়া বাইবার অস্বস্তি চোখে মুখে ফুটিয়া উঠে। তাহা ঢাকিবার জন্য একটা কাজের অছিলা লইয়া, ঐ স্থান হইতে চলিয়া বাইতে হয়।...

.....তাহার পর সেই দেউলীতে ট্রান্সফারের দিন...। আমাদের কয়েকজনকে মাত্র দেউলীতে পাঠানো হইতেছিল। দাদা ঐ দলের মধ্যে ছিল না। বাইবার দিন দাদা আমার বাক্স গুছাইয়া দিন। বাক্সের নীচে একখানি তালপাতার পাখা রাখিয়া দিন।...পাখা খানিতে মা'র হাতের ঝালর দেওয়া। তাহার এক জায়গায় লেখা, ‘নিন্সু বিন্সু পিল্পিন্সু’। কোন অসম্বৃত্ত মুহূর্তে মা'র কি মনে হইয়াছিল ; কি ভাবিয়া ‘পিল্পিন্সু’ লিখিয়াছিলেন জানি না।...তাহার ফাউন্টেনপেনটা দাদা আমার পকেটে গুঁজিয়া দিল। এখনও আমার পকেটে সেই কলমটা রহিয়াছে।.....

“বাবু সাহেব সো গয়ে কেয়া ?” (যুমিয়ে পড়েছেন না কি ?) দেখিলাম সুবেদার সাহেব পাশে আসিয়া দাঁড়াইয়াছে ।

“না, কেন ?

……সে ডিউটী ছাড়িয়া গেটের বাহিরে আসিল কেন ?

“আপনার ডিউটী শেষ হইল বুঝি ?”

‘ হাঁ,—না—আমার তো রাত্রে ডিউটী থাকে না । ভোরবাত্রে অফিসার টফিসারের আস্বার কথা । সেই জন্ত ভাবলাম, আজ এখানেই শুই, এর আগের ফাঁসীর দিন সাহেব রাউণ্ডে এসেছিল । ফাঁসীমঞ্চের চারিদিকে বড়বড় আলো দিয়ে, সেই জায়গাটা দিনের মতো ক’রে রাখা হয়, আর চারজন ওয়ার্ডার সেইখানে পাহারা দেয় । শালা জেলখানার ব্যাপার, কত রকম কয়েদী, কত রকম ওয়ার্ডার আছে । কেউ পয়সা টয়সা খেয়ে যদি ফাঁসীর মঞ্চে কিছু গোলমাল ক’রে দেয় তাহ’লে হয়তো কাজের সময়ের আগে “গড়বড়ী” (৬১) ধরা পড়বে না, তাই এত সাবধান হওয়া । একটা ফাঁসীতে গোলমাল হ’লে, সাহেব থেকে আরম্ভ ক’রে ওয়ার্ডার পর্যন্ত সকলের চাকরীতে ‘লুক্‌স্’ (৬২) প’ড়ে যাবে । আর এসব বিষয়ের সম্পূর্ণ দায়িত্ব হওয়া উচিত, ভিতরের হেড জমাদারের উপর । কিন্তু সে নবাবের পুত্রের সাহেবকে কি বুঝিয়ে দিবেছিল জানি না, সাহেব দেখি আমার উপর ভীষণ খাপ্লা । সাহেব নতুন এই “ডিপাট মে” (৬৩) এসেছে । জেলের নিয়ম কাহুনের না কিছু জানে, না কিছু বোঝে । অমন কত সাহেব লড়ায়ের সময় দেখেছি । কত মেমসাহেবদের হাতের দেওয়া ‘সন্তুরা’ (৬৪) খেয়েছি । এখন কিনা পেটের দায়ে বিনা দোষে গালমন্দ সহ করতে হয় ।”……দেখিলাম সুবেদার সাহেব আমাকে কিছু বলিবে, তাহারই ভূমিকা বাধিতেছে । জিজ্ঞাসা করিলাম “তা হ’লে এখন আপনি যাচ্ছেন কোথায় ?”

“ধা মশা, শোবার কি জো আছে ? বিছানাও অফিস ঘরে পেতে রেখেছি । কিন্তু বড় গরম । আপনারও তো নিশ্চয়ই মশা লাগছে । তাই ভাবলাম বাড়ী গিয়ে চা খেয়ে আসি । যুদ্ধে গিয়ে এই বদভ্যাসটা হয়েছে । তা’ আপনিও চলুন

না কেন? এই মশার কামড়ে সারারাত প'ড়ে থাকার কি দরকার? নোখে সিং পরিবার নিয়ে থাকে না। তার কোয়ার্টারে রাতটা কাটিয়ে দেবোখন। আপনার মানসিক কষ্টতো আমরা কমাতে পারি না, কিন্তু তাই ব'লে যতটুকু আপনাদের সেবা করতে পারি, তা কেন? করবোনা আমাদেরও বালবাচ্চা আছে। আমরাও বিনায়েৎ এর মানুষ না।”

আমি বলি—“থাক থাক—বেশ তো আছি। মশা বেশী নেই তো। আবার এখন এই রাতে কোথায় দৌড়াদৌড়ি করবো?”

তাহার ভদ্র ব্যবহার আমাকে অভিভূত করে। আমার মূহু আপত্তি অগ্রাহ্য করিয়া, একরকম জোর করিয়া আমাকে টানিয়া উঠাইল। আমি কঞ্চলগুলি তুলিতেছিলাম। সুবেদার বলিল “থাক থাক—আমাকেও কিছু বিছানা দিন। হুজনে মিলে ভাগাভাগি ক'রে নিয়ে যাওয়া যাক।”

আমি বলি—“কি আর ভারী”!

চারখানি কঞ্চলের মধ্যে তিনখানি সে নিজেই লয়, আর আমি একখানি।

সে বলে—“এই তো কাছেই কোয়ার্টার।” রাস্তা পার হইরা, ডাক্তারদের কোয়ার্টারগুলি ছাড়াইয়া গিয়া ওয়ার্ডারদের কোয়ার্টারগুলির সম্মুখে দাঁড়াই। কোয়ার্টার বেশী নাই। কেবল সিনিয়র ওয়ার্ডাররা বাড়ী পায়। বাকি সকলে বড় ব্যারাকে থাকে। একটা দরজার সম্মুখে গিয়া, দরজা ধাক্কা দিয়া, সুবেদার-সাহেব বলে,—“আরে, এয়ে দেখি তালা বন্ধ।”

“বাবু, আমি একবারে ভুলে গিয়েছিলাম। নোখেলাল এখন ডিউটীতে, আপনাকে মিছেমিছি কষ্ট দিলাম।”

আমি বলি “তাতে কি হয়েছে। আমি আবার ফিরে যাচ্ছি। কতটুকুই বা দূর?”

“দাঁড়ান, আলো নিয়ে আসি।”

“না না, থাক থাক। আর আলোর দরকার নেই”। নৈশ স্তব্ধতা ভেদ করিয়া একটা ভাঙ্গা ভাঙ্গা কর্কশ স্বর উঠিল “লেফট টার্ন”।...দূরত্ব কর্কশতাকে কিছু

কমাইয়া স্বরটিকে কিছু মধুর করিবার প্রয়াস পাইয়াছে। আওয়াজ জেলের ভিতরের। বোধহয় ওয়ার্ডারদের দল বদল হইতেছে। ঠিক গেটের সম্মুখে বসিয়া, দুই ঘণ্টা পূর্বের “দফাবদলের” সময়, ইহা শুনিতে পাই নাই। এখন গেট হইতে কিছু দূরে রহিয়াছি বলিয়া এই শব্দ শুনিতে পাইলাম। গেটটা কি sound proof ?

পুনরায় জেলগেটে ফিরিয়া আসিয়া পূর্বের জাগরণ কখন পাতি, একখানি মাত্র কখন। বাকি তিনখানি সুবেদার সাহেবের কাছে রহিয়া গিয়াছে। এই জন্তই কি সুবেদার সাহেবের এত সহৃদয়তা ? এইজন্তই কি রাত্রি দ্বিপ্রহরে তাহার বাড়ী ঘাইবার কথা মনে হইয়াছে ? একখানি কখন যদি কেহ জেল হইতে বাহিরে ‘চালান’ করিতে চায়, তাহা হইলে তাহাকে আরও তিনখানি কখন, অপর তিনজন সহকর্মীকে দিতে হইবে। ইহাই জেলের জিনিষ বাহিরে চালান দিবার প্রচলিত নিয়ম। তাহা না হইলে ধরা পড়িয়া ঘাইবার সম্ভাবনা। এরূপ অনায়াসে তিনখানি কখন বাড়ী লইয়া ঘাইবার লোভ সম্বরণ করা, সুবেদার সাহেবের পক্ষে অসম্ভব। তাহার উপর আবার এখন যুদ্ধের বাজার।.....

আবার পূর্বের স্থানে আসিয়া বসি। রাষ্ট্রের বিরাট পেশণ বস্ত্রগুলির মধ্যে জেলের স্থান নগণ্য নয়। চক্রের মধ্যে চক্র,—ইহারই একটীর সম্মুখে বসিয়া আছি। জেল গেট—বড়ই কঠোর ও প্রাণহীন ; সবই নিয়মিত রুটীনে হইয়া চলিয়াছে ঘড়ীর কাঁটার মতো। আর ঘড়ীর বস্ত্রে প্রধান প্রধান স্থানে বেক্রপ জুয়েল বসানো থাকে, সেইরূপ এই পেশণ চক্রের দুইটা হীরকখণ্ড—গেটের সুবাদার ও ভিতরের সেন্ট্রাল টাওয়ারের হেড ওয়ার্ডার।...

এই চারি পাঁচ ঘণ্টার মধ্যেই জেল গেটের একঘেয়েমি অসহ্য লাগিতেছে। অন্ধকারে ওয়ার্ডারদের কোয়ার্টার পর্য্যন্ত ঘুরিয়া আসাতে যেন এই একঘেয়েমি হইতে একটু বাঁচিলাম।...আবার সেই ওয়ার্ডারের দল ;—ঘড়ীর কাঁটা ধরিয়া দরজা খোলা ও বন্ধ করা।...গেটে ওয়ার্ডার না রাখিয়া, বস্ত্রে এইমকল কাজ করিলে কি হয় ? একই কাজের পুনরাবৃত্তি যেখানে, সেখানে বস্ত্রের সাহায্য লওয়া নিশ্চয়ই সম্ভব ও সমীচীন।...

গেটের উপরতলাহইতে একটি ওয়ার্ডার সিঁড়ী দিয়া নামিয়া আসিতেছে ; গেটের দোতালার জেলর সাহেবের কোয়ার্টার, তাহারই সম্মুখের খোলা বারান্দায় বন্দুক-ধারী ওয়ার্ডার, ঘণ্টা বাজায়—শীত-গ্রীষ্ম- বর্ষায়, রৌদ্রে-হিমে দিনে-রাত্রে। প্রতিঘণ্টায় ঘণ্টা বাজানো তো আছেই ; তাহা ছাড়া সাহেব ঢুকিলে দেয় একটা ঘণ্টা ; গণ্যমান্ত অধিতি জেলে ঢুকিবার সময় দেয় দুইটা ঘণ্টা। ইহা বোধহয় ভিতরের সকলকে সচেতন করিয়া দিবার জ্ঞ, ও গলদ ঢাকিবার পর্যাপ্ত সময় দিবার জ্ঞ। ইহার উপর আছে মধ্যে মধ্যে ‘পাগলী’র ঘণ্টা। সে সময় তো ঘণ্টা বাজিবার বিরাম থাকে না। সে সময় দূর হইতে ঠিক রবিবারের গির্জার বণ্টাধনির স্মার শোনা যায়।...গির্জা নিজের দল সামলাইতে ব্যস্ত এবং ‘পাগলী’ও একটা শ্রেণীর স্বার্থ রক্ষা করিতে নিয়োজিত।...

ঘণ্টা বাজাইবার ওয়ার্ডার দুই ঘণ্টা এত বড় দায়িত্বের কাজ করিয়া, মগর্ষে গেটের সম্মুখ দিয়া চলিয়া যায়। গেটের বাহিরে স্ত্রী জিজ্ঞাসা করে, “তোমার ভাই এত দেবী কেন ? নূতন দফার ওয়ার্ডার তো অনেকক্ষণ উপরে গিয়াছে।”

“আর ‘ইয়ার’ বলো কেন ? ডিউটী আদম্ভ করবার সময় আগেকার ওয়ার্ডার ব’লে যায়, একটার সময় জেলর সাহেবকে ডেকে দিতে। ভাবলাম জেলর সাহেব বুঝি রাউণ্ডে বেরবেন। এখন দোর গোড়ায় ডাকাডাকি করতে গিয়ে দেখি, একেবারে খাপ্পা। এখন বলে কিনা,—কেন চীৎকার করছো ? বড় অফিসার,—বা করো শোভা পায়। প্রথমে গরম হয়ে উঠে, পরে আবার হুকুম দিলেন যে, নূতন ওয়ার্ডারকে ব’লে দিতে তাঁকে যেন তিনটার সময় ডেকে দেয়। এ ওয়ার্ডারটা যদি না ডাকে তো বেশ হর। সাহেব নিজেই এসে ডাকনো তাহ’লে মজা বেরায়।” ...

গেটের স্ত্রী বলে “দাড়াও, যাও কোথায় ? একটু খয়নি-টয়নি থেয়ে যাও।”

“না ভাই, এবার গিয়ে শোয়া যাক। এই রাতে আবার খয়নি থেয়ে কি হবে ?”

একথা বলা সত্ত্বেও সে খয়নির প্রতিক্রিয়া দাঁড়াইয়া থাকে। সে মাথার পাগড়ীটা খুলিয়া ফেলে—বোধহয় গরমে। মাথায় বেশ ঢাক।

গেটের স্ত্রী বলে, “একটু ঠাণ্ডা তেল লাগাবে মাথায়। মাথাটা ঠাণ্ডা হবে। জমাদার সাহেব তেলটা ফেলে গিয়েছে। বোধহয় বি-ডিভিসন কয়েদীদের হবে। নিশ্চয়ই ঠিকদার সাহেবের ‘নজরানা’। টাকের উপর লাগিয়ে নাও। চুল গজালে আর টাকের উপর মশা কামড়াতে পারবে না।”

ইহার মাথায় টাক্ বেন আশাই করি নাই।.....মেরী ষ্ট্র্যাটের কুঞ্চিত কেশ-দামের খ্যাতি ছিল দেশবিদেশে। বধ্যভূমিতে লইয়া যাইবার পর লোকে জানিতে পারে ঐ কেশদাম তাঁহার নিজের নয়। তিনি পরচুলা ব্যবহার করিতেন।..... পুলিশ কনেষ্টবলের মাথায় টাক্ কখন দেখিয়াছি বলিয়া মনে পড়ে না। উহাদের মাথায় থাকিবে পাগড়ী ; সন্ন্যাসীর মাথায় থাকিবে জটা।.....

—আমি আর দাদা সেই জমিদার অখোরী সিংএর বৈঠকখানায় গিয়াছি। তাঁহার ম্যানেজার চিঠি দিয়াছিলেন দেখা করিবার জন্ত।...ধূর্ত সাঁওতাল ‘মাঝি’ নিজের জমি জমিদারের হাত হইতে বাঁচাইবার জন্ত উহা মহাত্মাজীকে দান করিয়াছিল। জমিটা জমিদারের মেলার কাছে পড়ে। মেলায় নারীদেহের রূপলাবণ্য যে সকল তাঁবুর পণ্য—সেই তাঁবুগুলি, এই ভূখণ্ডের নিকটেই খাড়া করা হয়—সারির পর সারি। এই বন্ধিষু মেলার এই দিকটাতেও স্থান সঙ্কুলান হইতেছিল না। তাই জমিদারের দৃষ্টি পড়িয়াছিল ইহার উপর। মাঝি ভাবিয়াছিল—মহাত্মাজীর নোকেরা জমিদারের সহিত লড়ক, তাহার পর তাহাদেরও জমির দখল না দিলেই হইবে। প্রথমে আশঙ্কা তাহার এই অভিসন্ধি বৃদ্ধিতে গারি নাই। বাবাও বলিয়াছিলেন—কি দরকার ওখানে জমি নিয়ে। আমি চিঠি লিখিয়াছিলাম ম্যানেজারের নামে। তাহার উত্তরেই এই ডাক পড়িয়াছে। বৈঠকখানার ভিতরে চুকিয়া অখোরী সিংকে চিনিতেই পারি না। তাহার মাথায় টুপী নাই—মাথাভরা চক্চকে টাক। কেবল পিছন দিকের টিকির নিকট একগুচ্ছ কেশ—লম্বা করিয়া রাখা। উহাই Spiral এর মতো ঘুরাইয়া ঘুরাইয়া, ত্রিলানটাইন দিয়া মাথার সম্মুখের দিকে বসানো।.....টেকোদের কি সত্যই অনেক টাকা হয়?...মাথানেটিক্ টিচার রমেশ্বর বাবু জ্যামিতি পড়াইতেছেন। ঠিক মাথার মধ্যখানে একটা টাক, ব্রাক-

বোডে' লিখিলেন, 'টেক্ ও দি মিড্‌ল পয়েন্ট' । ক্রাসশুদ্ধ সকলে হাসিতেছে ।
 ……এই জন্মই কি আগেকার কালে পরচুনা ব্যবহার করিবার প্রথা ছিল ?
 অখোরী সিং ম্যানেজারকে ইংরাজীতে কি বেন বলিলেন । ম্যানেজার সাহেব
 জিজ্ঞাসা করিলেন—আপনারা কি মাষ্টার সাহেবের ছেলে ? কংগ্রেস ভলাটিয়াররা
 মাঝির ঐ জমির উপর চালা তুলেছে । শুনছি বে ঐ দিককার তাঁবুগুলো বয়কটের
 জন্তে পিড়েটিং করবে । কাল রাতে জানেন তো ছ'জন ভলাটিয়ারকে পুলিশে
 ধরেছে, ঐ তাঁবু থেকে অর্ধেক রাতে বেরুবার জন্তে । বোধ হয় মেলার পুলিশের
 নিয়ম জানেন । রাত বারোটোর পর আর কেউ ও পাড়ার তাঁবু থেকে বেরুতে
 পারে না । বারোটোর আগে ও'লে এনো, না হ'লে ভোর বেলায় বেরোও ।
 কাদের পাল্লার পড়েছেন আপনারা ? তার উপর কার দিক নিয়ে লড়ছেন ? এই
 মাঝিকে তুসার বিঘে জমি অল্প জারগায় দিলেইতো ও আমাদের দিকে হুয়ে বাবে ।
 কংগ্রেসের জন্তে মোটা টাকা টানা চান, দিতে পারি, কিন্তু স্বেচ্ছায় যদি এসব
 গোলমাল মাথায় নেন তাহ'লে, ……” ।

“আদাব বাবু সাহেব”

• ষণ্টার সিপাহী হঠাৎ বাইবার সময় আবার আমাকে আদাব করে
 কেন ?

সে বলে, “পরশু ছপুয়ে ফাঁসীসেনে আমার ডিউটী ছিল—দেখলাম, বাবু
 খবরের কাগজ পড়ছেন । লোকটী নিজে হইতেই দানার খবর দিতে আসিয়াছে ।
 অনেকক্ষণ হইতেই ইচ্ছা করিতেছিল যে এই সব ওয়ার্ডারদের দানার কথা জিজ্ঞাসা
 করি । প্রতিদল ওয়ার্ডার বখনই ডিউটী শেষ করিয়া বাহির হইতেছিল, তখনই
 ইচ্ছা করিতেছিল যে তাহাদের জিজ্ঞাসা করি, তাহাদের মধ্যে কাহার ফাঁসীসেনে
 ডিউটী ছিল । কেমন বাধ বাধ লাগায়—জিজ্ঞাসা করিতে পারি নাই । ইহারা
 সকলেই হয়তো আমার সাক্ষী দিবার কথা জানে :—জ্বলেইতো বিচার হইয়াছিল ।
 কিজানি ইহারা আমার সম্বন্ধে কি মনে করিতেছে । ……”

দাদার সম্বন্ধে খবরের এই অপ্রত্যাশিত সুবিধায় খুব আনন্দ হইল। ওয়ার্ডারকে কত কথা খুঁটিয়া জিজ্ঞাসা করিলাম। নেহাল সিংএর মারফৎ বে সমস্ত খবর, পাইয়াছিলাম, সেগুলি একে একে মিলাইয়া দেখিতে লাগিলাম। খাওয়ার কিছু আলাদা ব্যবস্থা হইয়াছে কিনা বুঝা গেল না। নেহাল সিং কি ভাঙ্গা হইলে টাকাগুলি সবই নিজেই খাইয়াছে? দাদার অন্য কি কিছুরই বন্দোবস্ত করে নাই? দাদাকে পেন্সিল, কলম, কিছুই কি কিনিয়া দেয় নাই। বাবুজী কতক্ষণ সেলের মধ্যে পায়চারী করে, কখন ওঠে, কখন স্নান করে, কখন ঘুমায়, সব কথার উত্তর ওয়ার্ডারটী দিল। অধিকাংশ মনে হইল আন্দাজে বলিতেছে। আসলে সে নিজে বিশেষ কিছু লক্ষ্য করে নাই। একদিন নাকি সে দেখিয়াছিল যে বাবুজী বিড়ালকে দই খাওয়াইতেছেন। হইতেও পারে। সত্যমিথ্যা মিলানো, তাহার গল্প শুনিতে বেশ ভাল লাগে। অন্ততঃ এটুকু সত্য যে, সে দাদাকে দেখিয়াছে।...ওয়ার্ডারটী চলিয়া গেল। পায়ে পড়ি বা মোজা নাই—বা গরম। খাঁকীর হাফপ্যান্টের নীচে পা দুইটী ধনুকের স্থায় বঁকা মনে হয়।

.....তীনেম্যানের পা।.....দৈত্যের ছায়া যেখানে শেষ হইয়াছে সেখানে দুইখানি চলমান পা—অন্ধকার—গেটের এক ঝলক আলোকে আলোকিত পিচের রাস্তার একটুকরা—আঁধার ভরা দেওয়াল—গেটের গরাদ—আবার গেটের ভিতর নৃষ্টি নিবন্ধ হয়। ঘুরিয়া ফিরিয়া এই আলোকিত অংশই দৃষ্টি আকর্ষণ করে। ইহার বাহিরে ইহা অপেক্ষা কতগুণ বিস্তৃত অন্ধকার ও যোজনব্যাপী তারকাখচিত আকাশ রহিয়াছে। তাহা আমার মন ও দৃষ্টিকে আকর্ষিত করিয়া রাখিতে পারে না।... গেটের ভিতর প্রবেশ করিতে মধ্যে হল ঘর, দক্ষিণে জেল অফিস, বামে জেলর ও সুপারিন্টেন্ডেন্ট দুই জনের বসিবার ঘর। অফিসঘরের বাহিরের দিকের গরাদ-গুলির উপর লোহার জাল দেওয়া। কয়েদীদের আত্মীয়স্বজন আসিলে, এই জাল ঘেরা গরাদের বাহিরে দাঁড়াইয়া থাকে। আশ্চর্য্য এ জেলের ব্যবস্থা! সাক্ষাৎকারীদের রৌদ্র ও জল হইতে বাঁচাইবার জন্ত ইহার উপর একটা আচ্ছাদন পর্য্যন্ত নাই— জাল দেওয়া, পাছে কোনো জিনিষ আদানপ্রদানের চেষ্টা করা হয়। অনভিজ্ঞ

সাক্ষাৎকারী একে তো বিস্তর খরচ ও পরিশ্রম স্বীকার করিয়া জেলগেটে আসিয়া পৌঁছায় ; তাহার পর দরখাস্ত করার হাদামায় ও দরখাস্ত মঞ্জুরীর অর্থবায়ে প্রায় দিশাহারা হইয়া পড়ে। এই সকল দুস্তর সমুদ্র পার হইয়া, ঘণ্টার পর ঘণ্টা অপেক্ষা করিয়া, যখন কয়েক মিনিটের জন্ত গরাদের ব্যবধানে কয়েদীর পোষাক পরিহিত একটি রক্ষকেশ শীর্ণমূর্তি দেখিতে পায়, তখন ইহা যে তাহার অতি পরিচিত প্রিয়জনের মূর্তি এই কথাটা ভাবিয়া লইতেও সময় লাগে।...সাধারণ মেট ও ওয়ার্ডারদের অপমান-সূচক কথাবার্তা ইহাদের উপর অকাতরে বর্ষিত হইতেছে। কয়েদীর পোষাক, খাঁকোর উর্দী ও পাগড়ী, গরাদ, তালী, সি-আই-ডি, সব মিলিয়া আবহাওয়া এমন করিয়া তুলে যে, এখানে দিশাহারা না হইয়া পড়াই আশ্চর্য। অবাস্তুর দুই চারটি কথার পর শোনা যায় যে সময় হইয়া গিয়াছে। সাক্ষাৎকারীর চোখের সম্মুখে কিছুক্ষণ পরে ভাসিয়া উঠে, প্রিয় পরিজনের দুইটি মূর্তি ; একটি যখন গরাদের সম্মুখে আসে তখনকার,—উদগ্রীব, সলজ্জ, অপ্রতিভ মুখখানি ; আর একটি চলিয়া যাইবার সময়ের—করুণ, অসহায়, আশাহীন। তখনকার, জোর করিয়া মুখে হাসি আনিবার ব্যর্থ প্রয়াস, বুকফাটা ক্রন্দন অপেক্ষাও মর্মস্বদ মনে হয়।...

• ...১৯৩৩এ বাবার সহিত দেখা করিতে হাজারীবাগ জেলে গিয়াছি। জ্যাঠাইমা সঙ্গে এক টিফিন-ক্যারিয়ার ভাঙি করিয়া, বাবার জন্ত খাবার তৈয়ারী করিয়া দিয়াছেন। গিয়া শুনিলাম সেদিন আপার ডিভিসন কয়েদীদের সাক্ষাতের দিন নয়, সি-ক্লাস কয়েদীদের সাক্ষাতের দিন। কয়েকজন সাক্ষাৎকারী ষ্টেশনে টিকিট ঘরের সম্মুখে যেমন হয়, ঠিক সেইরূপ ঠেলাঠেলি করিতেছে। গরাদের ভিতরেও অনেকগুলি কয়েদী—জানালায় গরাদের নিকটে আসিবার জন্ত ধাক্কাধাক্কি করিতেছে। হট্টগোলের ভিতর কে কি বলিতেছে, কাহাকে বলিতেছে বুঝিয়া উঠা অসম্ভব। একজন প্রোটা স্ত্রীলোক হাউহাউ করিয়া কাঁদিতেছে, ও কান্নার সহিত গ্রাম্য ভাষায় কি সব বলিয়া যাইতেছে, তাহার একবর্ণও তাহার ছেলে বুঝিতে পারিতেছে কিনা। সন্দেহ। একটা বৃদ্ধ মুণ্ডা কয়েকটি পেয়ারা ও এক

ঠোঙ্গা ফুলুরী লইয়া আসিয়াছে। সে তাহার ছেলেকে উহা খাইতে দিবার জন্ত ওয়ার্ডারের খোসামোদ করিতেছে। ওয়ার্ডার দর বাড়াইতেছে—“ডাক্তার সাহেব মঞ্জুর না করলে কি ক’রে দেবো? সি-ক্লাসীদের বাইরের জিনিষ নেবার হুকুম নেই। সি-ক্লাস কয়েদীকে খাবার দিবার জন্ত আমাদের এক টাকা দিতে হবে। ডাক্তার সাহেবের মঞ্জুরীর জন্যে আর এক টাকা। আমার চাকরীর গোলমাল হ’তে পারে—এসব কাজ আমি বিনা পয়সার করবো কেন?” অনেক কাকুতি মিনতির পর এক টাকায় রফা হয়। ইহা বোধহয় দরিদ্র যুগাটীর এক বৎসরের সঞ্চয়। টাকাটা সিপাহীজী পাগড়ীর ভিতর গুঁজিয়া রাখিল। এই ফুলুরীর ঠোঙ্গা কিন্তু যথাস্থানে পৌঁছিল কিনা কে জানে!...

গেটের বাঁদিকের দেওয়ালে একটা কাচের ফ্রেমের মধ্যে নোটিশ বোর্ড। উহার ভিতরে কালো রংএর পটভূমিতে অনেকগুলি সাদা কাগজ আঁটা রহিয়াছে। কিসের নোটিস জানি না। অল্প জেলে তো দেখি, কেবল জেল কনিটার মেম্বরদের নাম লেখা থাকে। এতসব নোটিশ! বোধহয় আই-জি শীঘ্রই জেল ভিজিটে আসিবেন। নোটিশ বোর্ডের নীচে টেলিফোন রিসিভার। ইহার পশ্চিম দিক ঘেঁসিয়া একটা ওজন করিবার বন্দ—রেল ষ্টেশনে যেমন থাকে। আর ঠিক গেটের মধ্য দিয়া গিয়াছে একটি রেল লাইন—(আরো গেজের লাইনের সমান চওড়া)। ডি-এইচ-আর এর কিষণগঞ্জ লাইনে সেই একবার ছোট এন্জিনটির সহিত একটা গরুর ধাক্কা লাগে। চুঙ্গীপাড়ার কাছে গাড়ী ডিরেল্ড হইয়া গিয়াছিল। জেল ফ্যাক্টরীর জিনিষপত্র বোঝাইকরা ট্রলী, এই গেটের লাইনের উপর দিয়া চলে। লোহার লাইনের পাশে স্থানে স্থানে গোবর পড়িয়া রহিয়াছে বোধহয় গরুর গাড়ী গিয়াছে। সাহেব ও হাকিম আসিবে বলিয়া দেখিতেছি সকলেই সন্দেহ কিন্তু গোবরটা পরিষ্কার করার কথা কাহারও মনে নাই। হয়তো মনে আছে; কিন্তু সকালে কয়েদীরা না আসা পর্যন্ত পরিষ্কার করিবে কে? মহানাগ ওয়ার্ডার সাহেবেরা এই হের কাজ করিতে যাইবে কেন? রেল লাইন, নোটিশ বোর্ড, ওজনের বন্দ, টেলিফোন, পাথরের বাঁধানো মেঝে, সব মিলাইয়া

স্থানটিতে একটি রেল স্টেশনের ভাব আনিয়া দিয়াছে। মনে হইতেছে গাড়ীর প্রতিফায় প্লাটফর্মের উপর কঙ্কন পাতিয়া বসিয়া আছি।...

সৌরীনকে বলিয়াছি রামকৃষ্ণ মিশনের সংকার কমিটীকে খবর দিতে —সকলে যেন খড়িয়াবাগ ঘাটে উপস্থিত হয়। ছোট সহর; অধিকাংশ লোকই কোন না কোন রকমে গভর্ণমেন্টের সহিত সংশ্লিষ্ট—উকীল, মোক্তার, কেরণী। তাহাদের সকলকেই গভর্ণমেন্টের বর্তমান মনোভাবের হিসাব রাখিয়া চলিতে হয়। যদি তাহারা না আসে? পুলিশের ভরে নাও আসিতে পারে। তাহা হইলে? তাহা হইলে জেলের লোকেই দাচ করিবে। ইগরা পাঁচটি টাকা ও মোটর-লরী তো সকলকেই দেয়। সৌরীনের আবার মতলব দেখিলাম প্রোসেশন করিবার। বৃহস্পতিবারে কালেক্টর সাহেবের সহিত দেখা করিতে গিয়াছিলাম। কালেক্টর সাহেব এই মর্মে মৃতদেহ আমাকে দিতে স্বীকার করিয়াছেন যে, কোন প্রোসেশন দেন না হয়। লোকে বোধহয় শুনিবে না শ্মশান ঘাটে গিয়া যদি সকলে জড় হয়,—সে বড় বড় ভিড়ই হউক না কেন, তাহাতে কিছু আসে যায় না। তাহা হইলে আমার কথা থাকে। কিন্তু বারণ করিব কাহাকে? পাটকল ইউনিয়ানের সেক্রেটারী দাদা, একাচালকদের ইউনিয়ানের প্রেসিডেন্ট দাদা—ঐ সকল ইউনিয়ানের সদস্যদের বাধা দিবে কে? আর কালেক্টর সাহেবের কাছে কি কথা দিয়াছি না দিয়াছি তাহাই বড় হইল? না। হউক প্রোসেশন। দাদার মৃতদেহ, বিলুবাবুর মৃতদেহ, শহীদের মৃতদেহ, 'মাষ্টার সাহেবের বেটার' মৃতদেহ, ইহাতেও লোকে প্রোসেশন করিবে না তো কিসে করিবে?গাড়ী, মোটর, বিপুল জনতা—কুলের মালা—দেবদারু পাতা—বাড়ী বাড়ী হইতে গঙ্গাজল বর্ষিত হইতেছে—দোতারা হইতে কয়েকখানি তাল পাতার পাখা পড়িল, তাহা লইয়া কাড়াকাড়ি—ভিড়—ঠেলাঠেলি, হুড়োহুড়ি—তাহার পর অন্তহীন নর প্রবাহের সর্পিলা গতি।...নীরব—'গান্ধীজীকা জয়' নাই—'বিলুবাবুকা জয়' নাই—শোকের 'মর্গিয়া' গীত নাই—বিশৃঙ্খল জনসমুদ্রের উদ্দামতা নাই। আছে মুহম্মান শোকের নিষ্ক্রিয়তা—আছে একটি "রাষ্ট্রের পরিবর্তনের" এক-

জন ছাড়া অপর সকলের প্রতি অপরিণীম সহানুভূতি—আছে সুপ্র দেশাত্মবোধের
 ধিকার—আছে ভ্রমের দৃশ্যমান শীতলতার মধ্যে ব্যর্থ আক্রোশের জাগরক বহি ।
 এক ইসারায় এই অসহায় শান্ত জনতা হিংস্র ও উন্মাদ হইয়া আমাকে ছিঁড়িয়া
 টুকরা টুকরা করিয়া ফেলিতে পারে ।.....সম্পূর্ণ হরতাল ।.....জ্যাঠাইমাদের বাড়ীর
 সম্মুখে প্রোমেশন এক মুহূর্তের জন্য দাঁড়াইয়াছে । জ্যাঠাইমা কি একবার ঐ মৃত-
 দেহের মুখের উপরের ফুলগুলি সরাইয়া, উহার দিকে তাকাইতে পারিবেন ? কেবল
 মুখটা খোলা হইবে । গলা আমি কাপড় দিয়া ঢাকিয়া দিব ।...ফুলচন্দনে মুখের
 বীভৎসতা ঢাকা পড়িয়াছে । মুখের কোণ হইতে কখন আসিয়া পড়িয়াছে কয়েক
 বিন্দু লোহিতাভ লাল—এখন শুকাইয়া রক্ত-চন্দনের ছাপের মতো দেখাইতেছে ।
না, জ্যাঠাইমার বাড়ীর সম্মুখ দিরা কিছুতেই মিছিল যাইতে দেওয়া হইবে না ।
 ...শ্মশানঘাটে বিস্তীর্ণ জনসমুদ্র—লাল পাগড়ীতে চারিদিক ছাইয়া ফেলিয়াছে
 —বন্দুকধারী দেহরক্ষীর সহিত ম্যাজিষ্ট্রেট ও পুলিশ সাহেব মোটরকার হইতে
 নামিলেন । দাহকার্যে বিশেষজ্ঞ মনতীদা' চিতা সাজাইতেছে । সে সকল প্রকার
 উচ্ছ্বাস ও ভীষণপ্রবণতার বাহিরে । জিজ্ঞাসা করিল—“ম্যুনিসিপ্যালিটির কাঠ বুঝি ?
 মরা পোড়ানোর জন্তে যবে থেকে কাঠ ষ্টক করা আরম্ভ করেছে, তবে থেকে এই
 কাঠগুলোই দেখাছি । একবারে যুগ ধরে গিয়েছে । হবে না ? খাডক্লাশ
 ম্যুনিসিপ্যালিটি—কাঠের খরচ কোথায় এদের ?”—মরা পোড়াইবার দিন মনতীদা-
 কে এক বোতল করিয়া দেশী মদ দিতে হয় । সকলেই একথা জানে । আজও
 কি মনতীদা আমার নিকট হইতে মদ চাহিবে নাকি ?.....ছাই লইয়া কি কাড়া-
 কাড়ি ! মহিলারা অঞ্চল বাঁধিয়া লইতেছেন—কেহ কেহ ছেনেদের কপালে লাগাইয়া
 দিতেছেন । ..এই সময় কি কোন মা ছেলেকে প্রাণে ধরিয়া মনে মনে বলিতে
 পারিয়াছে, ‘বিনুবাবু মতো হও’ ।...কখনই পারে না ।.....সেবার পানবসন্ত
 হইয়া আমি আর দাদা একসঙ্গে গরুর গাড়ীতে আশ্রমে ঢুকিলাম । মা’র হাতে
 পাখা—দুই বিহানায় দুইজন শুইয়া আছি । মনের উৎকর্ষা ও গভীর বেদনা
 চাপিবার চেষ্টা করিয়া মা শুধু বলিলেন ‘তোরা আমায় পাগল করবি ?’ মা ঠিকই

বলিয়াছিলেন ।... মুহূর্তের মধ্যে জনতার সংঘের বাঁধ ভাঙ্গিয়া গিয়াছে—‘জয় গান্ধীজীকা জয়’ !—‘জয় বিন্ বাবুকা জয় !’ ‘নৌকরসাহি নাশ হো !’ জয়ধ্বনির নির্ঘোষে আকাশ বাতাস পরিব্যাপ্ত । মিলের সেই কুলিটা ঠিক যথাসময়ে ‘নারা লাগাইবার’ নেতৃত্ব লইয়াছে । শীর্ণকায় লোকের এত দরাজ গলা কি করিয়া সম্ভব হয় ? সে বলিতেছে ‘বন্দে’ জনতা বলিতেছে ‘মাতরং’ ; সে বলিতেছে ‘বিন্ বাবুকা’ জনতা বলিতেছে ‘জয়’ । প্রতিবার বলিবার সময় সে ডানহাতখানি উর্দ্ধে উঠাইতেছে—মনে হইতেছে তর্জনী দিয়া আকাশের কোন অজ্ঞাত লোকের দিগা দেখাইতেছে । ...পুলিশ ভিড় সরাইয়া দিন । যুদ্ধ লাঠি চার্জের প্রয়োজন হইল না । কুলীদের নেতাটির গলা ভাঙ্গিয়া গিয়াছে । হাত উঁচু করিয়া মধ্যে মধ্যে জয়ধ্বনি দিবার চেষ্টা করিতেছে ; তাহাতে হাওয়াভরা রবারটায়ার হঠাৎ ছিঁদ্র হইয়া গেলে নেক্রপ শব্দ হয়, সেইরূপ একটা আওয়াজ বাহির হইতেছে ।...

যে দিকে জেল সুপারিন্টেন্ডেন্টের ঘর, জেল গেটের সেই কোণে, দেওয়াল ভরিয়া নানা প্রকার শাস্তি দিবার যন্ত্রাদি টাঙ্গানো—নানা রকমের হাতকড়ী, বেড়ী, “ডাঙাবেড়ী” “শিকলী বেড়ী” । কেহ জেলের ভিতর ওয়ার্ডারের সহিত রুপিয়া কথা বলিতেছে, কেহ হয়তো জেলর সাহেবকে দেখাইয়া দিয়াছে যে “কৈল” এ (পরিবেশন করিবার হাতা) সাড়ে পাঁচ ছটাক চাউলের স্থানে মাত্র সাড়ে তিন ছটাক চাউল আঁটে, কেহ হয়তো বগড়া করিয়াছে যে তিন মাস হইতে কুমড়ার তরকারী ব্যতীত আর অন্য কোন তরকারী কেন তাহাদের দেওয়া হয় না, কেহ হয়তো একটা বেল পাড়িয়াছে—এইরূপ অসংখ্য মারাত্মক ‘জেল অফেন্স’ এর সাজা দিবার জন্য এইসকল সাজ সরঞ্জাম । কয়েকটা বড় বড় পিপের মধ্যে দাঁড় করানো রহিয়াছে, শতাধিক পাকা বাঁশের লাঠি । তাহার পাশে একটা স্ট্যাণ্ডএর ছিদ্রের মধ্যে বসানো অনেকগুলি মোটা বেতের লাঠি । হাতে ঝুলাইয়া লইবার জন্য লাঠিগুলির উপরের দিকটিতে একটা করিয়া নেয়ারের বেড় আছে । উপরের দিকে দেওয়ালে টাঙ্গানো আছে অনেকগুলি পুলিশের বেটন আর ডান দিকের কোণে

দেওয়ালে হকের সহিত টাঙ্গানো কয়েকটা লাল বালতী—তাহার উপর লেখা আছে FIRE। একদিকে গাদা করা আছে, বাঁশের ডগায় ঝাকড়া জড়ানো করে ক ডজন মশাল। স্বাত্রে “গিন্তী মিলান” বিছুতেই যখন আর হয় না, তখন এই মশাল-গুলি কেরোসিন তেলে ভিজাইয়া, ওয়ার্ডাররা কয়েদী খুঁ জিব্বার প্রয়াস পায়। লঠন কিম্বা টর্চ তাহাদের হাতে দিয়া দিলেই তো হয়, তা নয় বত সব.....

সেই একবার কয়েদী পালানোর রিহাসাল হইতেছে। পাগলা ঘণ্টা বাজিতেছে, সাহেব সেন্ট্রাল টাওয়ারের উপর দাঁড়াইয়া আছেন। ওয়ার্ডাররা সাহেবকে নিজের নিজের কর্মকুশলতা দেখাইবার জন্ত মশাল লইয়া এদিক ওদিক দৌড়াইতেছে—গাছতলা ও পায়খানাগুলির উপরই তাহাদের দৃষ্টি বেশী। বোগীলাল ওয়ার্ডের মধ্য হইতে সুপারিন্টেণ্ডেন্টকে চীৎকার করিয়া ডাকিয়া জিজ্ঞাসা করিল “সুপারিন্টেণ্ডেন্ট সাহাব, হৈ সুপারিন্টেণ্ডেন্ট সাহাব, কয়েদী মচ ভাগা ছায়, ন পেরক্টীন পগনী ছায় ?” গোঁজা শেষ হইলে সুপারিন্টেণ্ডেন্ট আমাদের ওয়ার্ডএ আসিলেন। আমরা সকলে তখন লক্ষী ছেলের মতো নিজের নিজের বিছানায়। ব্যাপার আর বেশী দূর গড়াইল না।...

ঢং ঢং করিয়া দুইটা বাজিল।

আর মাত্র তিন ঘণ্টা। আজকাল নূতন টাইমে সাড়ে পাঁচটার পূর্বে সূর্যোদয় বোধ হয় হয় না। তাহার পর ১০০ সূর্যোদয়ের পূর্বেই ইহাদের সব কাজ শেষ হইয়া যাওয়া চাই। কেননা সূর্যোদয়ের সঙ্গে সঙ্গেই জেলের প্রাত্যহিক জীবন আরম্ভ হইয়া বাইবে। সাতটার পূর্বেই প্রাতঃকালীন ‘লপ্‌সী’ পর্ব শেষ করিয়া দিতে হইবে, কারণ সাতটা হইতে ক্যান্টিনী খুলিবে। সাড়ে পাঁচটার সময় উনানে আগুন না দিলে, সাতটার পূর্বে প্রাতরাশ শেষ হইবে কিরূপে? যে সকল কয়েদী ‘ভাঠ্ঠহা’ (রান্নাঘর) কম্যাণ্ডে কাজ করে, তাহাদের প্রাতঃকৃত্যাদির জন্তও তো সময় দিতে হইবে। না, পাঁচটার মধ্যেই বোধ হয় কাজ শেষ হইবে।...

...দাদা এখন কি করিতেছে? হয়তো গরাদ ধরিয়া, অন্ধকার নক্ষত্রখচিত আকাশের দিকে তাকাইয়া আকাশ পাতাল ভাবিয়া চলিয়াছে। আমার কথাও

কি একবার ভাবিবে ? দাদা কখনই আমাকে ভুল বুঝিতে পারে না। এদিকে দাদার দহিত যদি পরিষ্কার কথাবার্তা বলিতে পারিতাম ! বুঝি বে, দাদার কাছে আমার আচরণ পরিষ্কার করিয়া বুঝাইবার দরকার হইবে না ; কিন্তু বোধহয় ইহাতে নবনভার কিছু লাভন হইত। তাহার পাটির প্রোগ্রাম কার্যকরী করার অর্গই পরোক্ষে ক্যামিস্ত্র শক্তিকে দৃঢ় করা—ইহা কি দাদা বুঝে নাই ? কিন্তু সকল যুক্তিকে পরাস্ত করিয়া অন্তরের ভিতর কোথায় যেন খচ্ খচ্ করিয়া কি একটা দাঁধিতেছে। বোধহয় যুক্তিহীন ভাবপ্রবণতার অহেতুক অনুভূতি। আমার নিজের পাটির স্থানীয় শাখার মেম্বারদেরও মত যে, দাদার বিরুদ্ধে সাক্ষী দেওয়া আমার ঠিক হইত না ; দাদার বিরুদ্ধে বলিয়া নয় ;—তাহাদের মত যে, আমাদের কর্তব্য দেশের লোককে তাহাদের ভ্রম চোখে আঙ্গুল দিয়া দেখাইয়া দেওয়া, তাহাদের বুঝানো। তাহাদের পুর্নিশে ধরাইয়া দেওয়া নাকি আমাদের কর্তব্যের মধ্যে নয়। পৃথিবীর আর সকলে যে বাহা ইচ্ছা মনে করুক ; কিন্তু আমার পাটির লোকের আমার কাণ্ড সম্বন্ধে এই মত—ইহাই unkindest cut of all. মার্জবাদের স্বল্প বিশ্লেষণ হয়তো আমি ঠিক বুঝি না। বহুদিন দাদাদের দলে ছিলাম, দাদারই ভ্রুকুম তামিল করিয়া আসিয়াছি। উহার কথাই বেদ বাক্য বলিয়া মনে করিয়াছি। ১৯৩২এর ফেব্রুয়ারীতে দাদা হাজারীবাগ জেল হইতে ছাড়া পায়। দিকিউরিটা বন্দীদের কেন-এর scrutiny হইতেছিল। একজন হাইকোর্ট জজের উপর ছিল এই কার্যের ভার। কি যেন নাম—মারহাডি—জুটিস্ ভাটে। দাদা ছাড়া পাইবার পর এপ্রিলে আমাদের দেউলী হইতে হাজারীবাগ জেলে লইয়া আসে। শুনিলাম সকলকে নিজের নিজের প্রদেশে লইয়া যাওয়া হইবে। তাহার পর আমাকে ছাড়িয়া দেয় ১৮ই জুন। ক্যামিস্ত্র বিরোধী দলের আর জেলে রাখিবার প্রয়োজন নাই, ইহাই তখন ছিল সরকারের মনোভাব।...জেল হইতে বাহির হইবার সময় অত আনন্দ আর কোনোবার হয় নাই। সর্কাহারার আতশক্র ক্যামিস্ত্রের বিরুদ্ধে নিজেকে নিয়োজিত করিতে পারিব, প্রয়োজন হইলে ইহার জন্ত হাসিতে হাসিতে প্রাণ বিসর্জন দিতে পারিব—এই সুযোগ দানের জন্ত সরকারের প্রতি কৃতজ্ঞতায়

মন ভরিয়া উঠিয়াছিল। স্পেনের কর্মীদের কাহিনী, লালচীনের মরণ বিজয়ী বীরদের কাহিনী, মাওসেটুংএর শৌর্য ও একনিষ্ঠতা, চন্দ্রদেওএর ক্লাসের প্রতিদিনের ভাষণ, শরীরের সকল স্নায়ুতে উৎসাহের আগুন লাগাইয়া দিরাছে। আমার জেলার কত কাজ আমারই জন্ত অপেক্ষা করিয়া রহিয়াছে;—সেখানে লোকে যে মহাত্মাজী আর মাষ্টার সাহেব ছাড়া আর কাহাকেও জানে না। অন্ধ বিশ্বাসের এই অকর্ষিত ভূমিতে আমাকে যে যুক্তির ফসল ফলাইতে হইবে। আশ্রমে ফিরিয়া একবার মা'র সহিত সাক্ষাৎ না করিলেও নয়—আমার অপারেশনের জন্ত মা নিশ্চয়ই খুব চিন্তিতা ছিলেন। একবার সেখানে সকলের সহিত দেখাশুনা করিয়া লইয়া তাহার পর কাজ আরম্ভ করা যাইবে। মোটরবাস কোডার্মা স্টেশন,—গয়া, ওয়েটিংরুমএ কি মশা!—কি টল—সাহেবগঞ্জ, মনিহারীঘাট, কাটিহার—পথের আর শেষ নাই।...

...সেই ব্যাকুলতা আজ আমাকে বর্তমান স্থিতিতে আনিয়াছে।...দাদা...মা... জনমত...আর সর্বাপেক্ষা দুঃসহ, আমার পার্টির স্থানীয় কর্মরেডদের মত। ভুল! পৃথিবীশুদ্ধ লোকের ভুল হইতে পারে, আমার ভুল হয় নাই। সেই ১৯৪২এর আগষ্টের ঘটনাসমূহের পরিবেশে আমার কার্যের বিচার করিতে হইবে।...এক বৈজ্ঞানিক শক্তি সহসা দেশশুদ্ধ লোককে উদ্ভ্রান্ত ও দিশাহারা করিয়া দিরাছে। যেখানে যাও, মনে হইতেছে যেন পাগলা গারদের ফাটক খুলিয়া দেওয়া হইয়াছে। বিক্ষুব্ধ অথচ নেণাগ্রস্ত জনতা, কি করিবে ভাবিয়া উঠিতে পারিতেছে না। মাইলের পর মাইল রেল লাইন তুলিয়া ফেলিয়াছে—লোহার রেল লাইন, ভারী ভারী রেলওয়ে শিপার, আরও কত কি জিনিষ, দুবের নদীতে গিয়া ফেলিয়া আসিতেছে। টেলিগ্রাফের তার কাটা, পোষ্ট অফিস ও মদের দোকান জ্বালানোর ভার গ্রামের বালকদের উপর। বয়স্ লোকে ঐ তুচ্ছ কাজ করিয়া নিজেদের হাতে গন্ধ করিতে চায় না। তার কাটা এত সহজ, টেলিগ্রাফের তার এত ভঙ্গ-প্রবণ তাহা জানা ছিল না। প্লায়াস, বহুপাতি, কাঁচি, কাটারী, কোনো জিনিষের দরকার নাই। দড়ি বুলাইয়া ছেলেরা বুনিয়া পড়িতেছে, কোথাও বা মুচড়াইয়া ভাঙ্গিয়া দিতেছে। বড়রা চায় নূতন কার্যক্রম। আর কি করিতে হইবে ভাবিয়া পাওয়া

ষায় না। রেল স্টেশন, খাসমহল কাছারী, সবরেজেস্ট্রি অফিস ও থানার পর্ল শেখ হইয়া গিয়াছে। হাতে কিছুই কাজ নাই। যেখানেই তাহারা দল বাঁধিয়া যাইতেছে সেখানেই তাহাদের সম্মুখে শক্তির স্তম্ভগুলি ভূমিসাৎ হইয়া যাইতেছে ও অত্যাচারের প্রতীকগুলি মাথা নত করিয়া লইতেছে। সরকারী কর্মচারীরা জনতার খোসামোদ করে; মাড়োয়ারী অকাতরে চাঁদা দেয়, জমিদার-কাছারীর নামেব তাহাদের একবছর খাজনা মাক করিয়া দিবার আশ্বাস দেয়, খাসমহল-কাছারীর ম্যানেজার তাহাদের ভোজের আয়োজন করিয়া দেন; দারোগা সাহেব গান্ধীটুপী নাথায় দিয়া, ত্রিবর্গ পতাকা হাতে লইয়া তাহাদের মনোরঞ্জনের চেষ্টা করেন, চৌকীদার তাহার উর্দা আলাইয়া কাজে ইস্তফা দেয়। গরীব কিশাণের আনন্দ, আর তাহাকে জমিদারের খাজনা দিতে হইবে না, চৌকীদারী ট্যাক্স দিতে হইবে না।...নূতনকিছু করিবার সুযোগ পাওয়া যাইতেছে না।...ফরবিশগঞ্জ লাইনের যে অংশের জাইন ঠিক ছিল, সেই অংশের উপর এন্জিন ড্রাইভার ও গার্ড জনতার লুকুম মতো গাড়ী চালাইতেছে। প্রতি স্টেশনে টিকিট ঘরের সম্মুখে লিখিয়া দেওয়া হইয়াছে, টিকিট করিয়া ভ্রমণ নিবন্ধ। গড়বনেলী স্কুলের কয়েকটি ছাত্র অনবরত চীৎকার করিতেছে “গাড়ী! কসকী? — হনারী”। “স্টেশন কিসকী? — হনারী?” “এ’জন কিসকী? — হনারী”। আর একদল লোক ট্রেনে টিকিট চেকারের কাজ করিতেছে—বাহার কাছে টিকিট থাকিবে, তাহাকে গাড়ী হইতে নামাইয়া দেওয়া হইবে। একজন যাত্রীর নিকট হইতে উইক-এণ্ড রিটার্নের অর্ধেক টিকিট বাহির হইল; “উত্তর যাও, আভি উত্তরো। তুম স্বরাজ নহী চাহতে হো।” সে কংকুতী মিনতি করে। বলে, এটা পুরানো টিকিট। কে তাহার কথা শোনে। চেন টানিয়া গাড়ী থামাইয়া তাহাকে নামানো হইল। খানিকদূর গিয়া মাঝ রাস্তায় আবার ট্রেন থামে। তেওয়ারীজী ঐ দিকে নিচিং করিতে কোথায় যেন গিয়াছিলেন। ঘণ্টা দুই ঐ স্থানে অপেক্ষা করিবার পর, দূরে কংগ্রেস পতাকা সম্বলিত তেওয়ারীজীর গরুর গাড়ী দেখা গেল। তেওয়ারীজী আসিয়া গাড়ীতে চড়িলেন। “ইনকিলাব জিন্দাবাদ” ধ্বনিত গগন বিদীর্ণ হইল। গাড়ী ছাড়িল।—স্টেশনে স্টেশনে চেয়ার, টেবিল, ঘড়ী, station

master's office লেখা সাইনবোর্ড, বড় বড় খাতা বই, একত্র জড় করিয়া জ্বালানো হইতেছে। রেল কর্মচারীগণেরও ইহাদের সহিত সহানুভূতি লক্ষ্য করিতেছি। কোথাও বাধা দিবার চেষ্টা নাই, অনেক স্থানে স্বেচ্ছায় সাহায্য করিতেছে। একজন ছাত্র প্ল্যাটফর্মেব একটি আলো লইয়া, রায়বংশে নৃত্যের ভঙ্গীতে সকলের মনোরঞ্জন করিতেছে। কনবা স্টেশনে স্কুল কলেজের ছাত্ররা টিকিট চেকার বচ্চীসিংকে টাকা করিয়া প্রহার দিয়া বহুদিনের সঞ্চিত আক্রোশ মিটাইয়াছে।...

...চুকরী থানায় “মহাআজীকা ইজলাস” বসিয়াছে। আর কেহ সরকারী এজলাসে যাইবে না। দারোগাবাবুকে গ্রেফতার করা হইয়াছে। তাঁহাকে “কোমী (জাতীয়) জেল”-এ লইয়া যাওয়া হইবে। দারোগাবাবুকে ‘দ্বিতীয় ডিভিসন’ কয়েদী করা হইল। “পুরী খিলানা রোজ, আওর দেখনা, উনকী গ্নী যাঁহা যানে চাহেঁ হেঁহা পঁহচা দেনা। বহুৎ হিফাজৎমে”। জেল খুলিয়া কয়েদী পলাইতেছে। জেলখানার উপর কংগ্রেস পতাকা। সরকারী ট্রেজারীর নোটগুলি জ্বালানো হইতেছে। পশ্চিমে গোরখপুর জেলা হইতে আরম্ভ করিয়া পূর্বে পূর্ণিয়া পর্যন্ত সর্বত্রই দেশের এই অবস্থা। সম্পূর্ণ অরাজকতা—ফ্যাসিষ্টদের রাজত্ব—জাতীয় শক্তির বিরাট অপচয়—অসংহত, বিশৃঙ্খল, অদূরদর্শী—মথচ ছলভ নিঃস্বার্থ ত্যাগের মহিমা মহীয়ান। লাল পাগড়ী কালো মুখ, হেলমেট পরা লাল মুখ, বন্দুক, টমিগান, কিছুই জনতাকে বিচলিত করিতে পারিতেছে না।...দূরে বীরগাঁও স্টেশনের হাটে টমিগানের শব্দ হইতেছে—এদিকে ভুটার ক্ষেতে তাহার নকল করিয়া ছেলেরা স্টেশনের ফগ-সিগনালগুলি ফুটাইতেছে। কেন করিতেছে তাহারা জানে না। হোলীর দিন গ্রামশুদ্ধ লোক নেশা করিয়া বেরূপ হইয়া যায় ইহারাও ঠিক সেইরূপ। এই অধীর উত্তেজনাকেই দাদার দল বলে বিপ্লবের ড্রেস রিহাসাল, —ইহাই নাকি ‘ক্রান্তির প্রচেষ্টা’। বীরগাঁওয়ের ক্রান্তি-প্রচেষ্টার নেতা কে? বিনায়ক মিসির। সে সর্ব্বঘটে আছে। আশপাশের গ্রামে “সত্যদেবকে কথা” শোনায়, ‘ছট পরবের’ পৌরহিত্য করে, হিন্দু মিশনের লেখচার দেয়, খৃষ্টান সাঁওতালদের

‘শুক্লি’ করে, কংগ্রেস মিনিষ্ট্রীর সময় মন্ত্রী টুরএ মোটরে তাঁহার গা ঘেসিয়া বসে ; সে হাত গুণিয়া, বিবাহের দিন দেখিয়া, ঠিকুজী তৈয়ার করিয়া, হোমিওপ্যাথী আয়ুর্বেদী ও টোটকা ঔষধ দিয়া বেশ পয়সা রোজগার করে। একখানি নোটা হিন্দী বই তাঁহার পুঁজি। ইহাতে ধাঁধার উত্তর হইতে টোটকা ঔষধ পর্যন্ত সব আছে। ধান্ধড় বস্তীতে কালীপূজার নম্র পড়িবার সময়, এই পুস্তক হইতে হিন্দীতে রামায়ণের গল্প পড়িয়া দেয়। এইরূপ ধরণের নেতৃত্বে, এইরূপ সংগঠনে, এইরূপ সময়ে, হইবে ‘ক্রান্তি’ ? কে একথা দাদাদের বুঝাইত ? আমি কিছুতেই অস্বীকার করি নাই। আমার কর্তব্য করিয়াছি মাত্র। আর আমি সাক্ষ্য না দিলেও অন্য লোকে দিত। গভর্নমেন্টের লোকের অভাব নাই। তৎকালের মধ্যে, আমি দিয়াছি নিজের রাজনৈতিক সিদ্ধান্তের জন্ত ও কর্তব্যের খাতিরে ; আর অন্য লোকে দিত, লোভে পড়িয়া।... দাদার সহিত বর্দি এদিকেরে প্রাণখোলা আলোচনা করিতে পারিলাম ! না, উহা নিরর্থক হইত। আমি কত কিছু বলিয়া যাউতাম ; আর দাদা নীরবে বৈধের সহিত তাহা শুনিয়া মধ্যে মধ্যে অল্প হাসিত। হয়তো বা এক-আধটা এমন কথা বলিত, যাহাতে আমার যুক্তিস্রোত ধোনাটে হইত বাইত ; ঐ কথ হাঙ্গিতে বা গালে টোল পড়িলে, আমি বুঝিতে পারি যে আমার আপাতঃ তীক্ষ্ণ যুক্তি, উহার দৃঢ় বিচারশক্তির উপর সামান্য দাগও কাটিতে পারে নাই। হাসিটী আমাকে পরাস্ত করিবার জন্ত নয় ; উহা কেবল আমাকে নিরস্ত করিবার জন্ত। হুই একটা সংক্ষিপ্ত পক্ষে আমার যুক্তির মৌল ধূলিসাৎ হইয়া যায়।...

গত সপ্তাহে যখন দাদার সহিত দেখা করিতে আমি তখন এ প্রশ্ন দাদাকে করি নাই ;—যুক্তিতে পরাজিত হইবার ভয়ে নয়, সঙ্কোচে ! উহা কি অপরাধের মনের সঙ্কোচ ? না, আমি কোনো অপরাধই করি নাই। তবে অপরাধজনিত সঙ্কোচ আমার মনে আসিবে কেমন করিয়া ? ঐ সকল কথা উত্থাপন করা সুশোভন হইত না—ও-সঙ্কোচ তাহারই জন্ত। অন্তিম মুহূর্তের প্রতীক্ষায় যাহাকে আঙ্গিনার তুলসী তলায় লইয়া আসা হইয়াছে, তাহার কাছে কি জিজ্ঞাসা করা যায় যে

উইলখানি কোথায় রাখিয়া গিয়াছেন। না দাদাকে বুঝাইবার দরকার নাই। সে আমার স্থিতি ঠিকই বুঝিয়াছে।...

একজন খাঁকীর হাফপ্যান্ট পরিহিত অল্পবয়সী অফিসার গেটের ভিতর ঢুকিলেন। বোধহয় এসিষ্টেন্ট জেলর রাত্রে রাউণ্ডে যাইতেছেন।

গত সপ্তাহে দাদার সহিত দেখা করিতে হইয়াছিল তাহার সেলে—সঙ্গে সি-আই-ডি ভদ্রলোক। একজন ওয়ার্ডার পূর্ব হইতেই সেখানে দাঁড়াইয়াছিল। ইহাদের সম্মুখে আর কি বেশী কথা হইবে? আমার হাতে রুমালে বাঁধা কিছু ফল ছিল। ভিতরে যাইবার সময় সি-আই-ডি ঠাট্টা করিয়া বলে “দেখবেন মশাই, গুর মধ্যে কোনো গোলমালে জিনিষ নেই গো। শেষে মশাই চাকরীটা খাবেন না নেন। এদেশে বাঙ্গালীর চাকরী, আজকাল কি ব্যাপার জানেনই তো? সাথে কি এ ডিপার্টমেন্টে এসেছি।” তাগকে রুমালটা খুলিয়া দেখাইতে গেলে বলে “থাক থাক ও আমি এমনই বললাম। আপনিও যেমন। আমরা লোক চিনি মশাই।” সি-আই-ডিও আমাকে বিশ্বাস করে। এতবড় সার্টিফিকেট একজন রাজনৈতিক কর্মীর আর কি হইতে পারে! এতটার জন্ত তৈয়ারী ছিলাম না। দাদার বিরুদ্ধে সাক্ষ্য দিবার পর হইতে ইহাদের আমার উপর সন্দেহ চলিয়া গিয়াছে।...দাদা সেলে গরাদের পিছনে দাঁড়াইয়া আছে। রুম্ব কেশ;—বেশ রোগা হইয়া গিয়াছে; নাকটা খাঁড়ার মতো উঁচু হইয়া আছে; গায়ের রং যেন পূর্বাপেক্ষা ফর্সা লাগিতেছে, হাতে পায়ে খোস পাঁচড়ার দাগ। তাহার হাসি হাসি মুখ, উৎসুক্য ভরা কোমল দৃষ্টি, আমাকে কুঠা করিবার অবকাশ দেয় না। প্রথমে নিজেই বলে “রুমালে কিরে?” প্রথম আরম্ভ করার সঙ্কোচ কাটিয়া যাব— “জ্যাঠাইমা পাঠিয়ে দিয়েছেন।” “তাই নাকি? জ্যাঠাইমারা কেমন আছেন? কিছু বলে দিয়েছে নাকি?” প্রথমে ভাবিলাম সত্য কথা বলি বে জ্যাঠাইমা তো নাওয়া খাওয়া ছেড়ে দিয়েছেন; না, আবার এখন কেন দাদার স্নেহাতুর মনকে অযথা ভারাক্রান্ত করিয়া তুলি। বলিলাম “আছেন এক রকম; তোমার কথা প্রায়ই বলেন।” মুখ দেখিয়া মনে হয় দাদা আমার সত্য চাপা দিবার

চেপ্টা ধরিয়া ফেলিয়াছে। সি-মাই-ডি বলে “দরজা খুলে দিক। ভিতরে গিয়ে বসুন না কেন ?” বলি “থাক্ থাক্”। কিন্তু ওয়ার্ডার দরজা খুলিয়া দেয়। ভিতরে গিয়া দাদার কথনের উপর বসিলাম। ১০০০দিন কোনো প্রশ্ন নিজে করতে পারি নাই। কেমন যেন কথা হারাইয়া যাইতেছিল। দাদা গোপন আমার মনের অবস্থা বুঝিয়াছিল। সে নিজেই বত কথা আমাকে ছিজ্রায়া করিয়া চলিল; আমি উত্তর দিয়া গেলাম। আসিবার সময় দাদা বলিয়াছিল “মা’র সঙ্গে দেখা করিস।” আমার সহিত দাদার ইহাই শেষ কথা। তাহার এই শেষ কথা। তাহার এই শেষ অনুরোধও আমি রাখিতে পারি নাই। না কাঁদিত কাঁদিত আমাকে কি বলিবেন, একথা ভাবিয়াই শিহরিয়া উঠিয়াছি। দাদা আমার মনের কথা এত বোঝে, আর এটা বুঝিতে পারিল না যে এখন মা’র সহিত দেখা করা কি করিয়া আমার পক্ষে সম্ভব। সে জানে আমার কি ভাল লাগে, না লাগে। দাদাকে আমি একবার একটী মনের মতো কবিতা লিখিয়া দিতে বলিয়াছিলাম। “আমি বড় বড় কবির উচ্ছ্বাসের কাঁজনী সুর বুঝিতে পারি না।” তাই দাদা আমার বুঝবার মতো কবিতা লিখিয়া দিয়াছিল।

চাই আমি সকলের পূর্ণ অধিকার,
 তাহার অল্পেতে ভুট্টে কখন হ’ব না,
 পরপুষ্ট শ্রমিকের উপেক্ষা স’ব না;
 শ্রমিকের পেষণের কবে প্রতিকার
 হবে, আছি সেট দিন পানে চাই।
 আছে মোর নিশ্চয় বিশ্বাস,
 নত্নপিষ্ট শ্রমিকের হতাশ নিশ্বাস
 আনিবে প্রলয়। আর অস্ত পথ নাহি।
 উদিকে নূতন সূর্য্য। ক্ষুধাক্লিষ্ট মুখে দেখা দিবে
 হাসিরেখা। না-থাকুক বিত্ত কারও অতুল অগাধ
 সান্যরাজ্যে কর্ম চিন্তা স্বাধীন অগাধ।

আর মনে পড়িতেছে না। সমগ্র কবিতাটাই আমার মুখস্থ ছিল। দুই বৎসরের মধ্যে আমার কত পরিবর্তন হইয়া গিয়াছে। আমি দাদার প্রভাব হইতে মুক্তি পাইবার প্রাণপণ চেষ্টা করিয়াছি। সেইজন্য আমার অচেতন মনও বোধহয় আমার স্মৃতিপট হইতে এই কবিতাটী মুছিয়া ফেলিতে সাহায্য করিয়াছে। কবিতাটী আশ্রমে মা'র ঘরের বারান্দায় টাঙ্গাইয়া রাখিয়াছিলাম। এখনও আছে কিনা কে জানে। এতদিন সে কথা একবারও মনে পড়ে নাই। একবার গিয়া নিশ্চয়ই খুঁজিয়া দেখিব।...

“জগে হুয়ে হাঁয় কেয়া, বাবুজি ?”

দেখি, স্নবেদার সাহেব কোয়ার্টার হইতে ফিরিতেছে। মুখ চোখ দেখিয়া মনে হয় বিচুপণ ঘুমাইয়া গইয়াছে। ধড়মড় করিয়া উঠিয়া বসি।

“বৈঠিরে বৈঠিরে, আরাম কিজিয়ে, বাবুজি”। কাহারও সহিত কথা বলিতে টক্কর করিতেছিল না। স্নবেদার সাহেব গেটের ভিতর ঢুকিল। অফিসঘরের দিকে যাইতেছে। বোধহয় সন্ধ্যার সময়ের পাতা দিছানাটী উঠাইতেছে।.....দাদা এখন কি করিতেছে? বোধহয় চিঠি লিখিতেছে। দাদা নিশ্চয়ই খান কয়েক চিঠি লিখিয়া যাইবে। নেহাল সিংকে পাতা পেন্সিলের জন্ত যে পরমা দিয়াছিলাম, তাহা দিয়া সে দাদাকে ঐ সকল জিনিষ কিনিয়া দিয়াছিল কিনা কে জানে। দিলেও ওগুলি সেলের মধ্যে রাখা শক্ত—নিশ্চয়ই প্রত্যহ সার্চ হয়। লিখিবার সুবিধা থাকিলেও, দাদা আর সকলের হুয় হয়তো চিঠি লিখিয়া যাইবে না। আশ্চর্য উত্তর মন। ও যে কোন কাজকে অশোভন ও দৃষ্টিকটু মনে করে, আমি তাহার ধারণাও করিতে পারি না।.....মেরী আন্টয়েনেটের শুনিবাছি, মৃত্যুদণ্ডের পূর্বরাত্রে সব চুল পাকিয়া গিয়াছিল। দাদার পাকা চুল বদনাও করিতে পারি না। সে হয়তো দিবা নিশ্চিন্ত হইয়া ঘুমাইতেছে। সার ওয়ার্টার র্যাগে বৃপকাঠে মাথা নত করিবার পূর্বে জল্লাদকে ঠাট্টা করিয়া বলিয়াছিলেন “দেখো ভাই, আমার বড় মথের দাড়ীটিকে কেটে ফেলোনা যেন”। পূর্বে ইহাকে অতিরঞ্জন মনে হইত। দাদার সম্বন্ধে বসিতে গিয়া, ইহাকে আর অত্যাক্তি বলিয়া মনে হয় না। কত রাজবন্দীর

ফাঁসীর মধ্যে আরোহণ করিবার পূর্বের কতরকম আচরণের কথা শুনিয়াছি। কেহ অজ্ঞান হইয়া পড়িয়াছে, কেহ সুপারিন্টেন্ডেন্টকে গালি দিয়াছে, কেহ ভগবানকে দোষী সাব্যস্ত করিয়াছে, কেহ ভগবানের নাম লইয়াছে, কেহ ভাষণ দিবার নিফল চেষ্টা করিয়াছে, কেহ-বা “শির ফরোশী কা তন্ন” (মস্তকদানের আবেদন) গান গাহিতে গাহিতে নির্দিকারভাবে সিঁড়ী উঠিয়া কাঠ পাটাতনটির উপর দাঁড়াইয়াছে। কিন্তু দাদা নিশ্চয়ই বলিলে যে এসবগুলিই অল্পদিস্তুর নাটকীয়। দাদা এমন কিছু করিবে না। উহার তৃত্বকোণে লাগিয়া থাকিলে অবজ্ঞাভরা হাসি। সে তাছিল্যের সম্মুখে সুপারিন্টেন্ডেন্টের চক্ষু নত হইয়া বাটবে, ম্যাজিষ্ট্রেট অন্য দিকে দৃষ্টি ফিরাইয়া দিবেন, জেলরসাহেব অকারণে টর্চ জালিয়া মণিবন্ধের বড়োটা দেখিবেন, যে নির্দিকার করেদী কিছু রেনিসন ও পাঁচটি টাকার জন্ম বাতকের রণ্য কাজ করিতেছে, তাহারও হৃৎস্পন্দন কিছু দ্রুত হইয়া বাটবে। দাদার অন্তরূপ আচরণই আমার নিকট অপ্রত্যাশিত।.....

খট্ খট্ খট্! গেটের দোতলা হইতে কে সিঁড়ী দিয়া নীচে নামিতেছে।—বলদৃশ্য গর্জান্ন ব্যক্তির পৌরুষবাক্যক পদধ্বনি—বরণী ভূমি বুঝিয়া লও, এই স্থানটুকুই মধ্য আর কাহারও ক্ষমতা বা আদেশ চলিবে না—এখানে আনিই সর্বসম্বন্ধ—এই ভাব।.....বহুক্ষণ হইতে এই ধরনিটিরই অপেক্ষা করিতেছিলাম। থাকীর জেল পোষাক পরিহিত একজন নগ্নিত ভদ্রলোক নামিয়া আসিলেন। গেটের সম্মুখে মেঝেতে জুতা ঝুঁকিয়া শ্যানুট করিল, তাহার পর সোজা হইয়া আড়ষ্টভাবে দাঁড়াইল। ভিতরের ওয়ার্ডার সেলান করিয়া গেটের দরজা খুলিল। সুবেদার সাহেব গেটের সম্মুখে দাঁড়াইয়া আছে। কালভে-সানাতে মেনানো সম্মুখে দাঁত গুলি বাহির হইয়া পড়িয়াছে। ভাসিতে, জাতসারে পোসানোদেব বজ্রন পরিষ্কৃত করিবার প্রয়াস বেশ বুঝা যাইতেছে, সুবেদার সেলান করিলে জেলর সাহেব জিজ্ঞাসা করেন “সব ঠিক তো?”

সুবেদার সাহেব বলে “হাঁ, হুজুর”—যেন সারারাত্রি এই সকল জিনিষের ব্যবস্থা করিতে করিতে সে হিনশিম খাইয়া গিয়াছে।

জেলর সাহেবের দৃষ্টি পড়ে ট্রলি লাইনের পাশের ইতস্ততঃ বিক্ষিপ্ত গোবরের উপর। পা ঘুরাইয়া নিজের জুতার তলা দেখেন—মুখে বিরক্তির চিহ্ন সুস্পষ্ট। সুবেদারও ভয়মিশ্রিত চক্ষে ঐ জুতার দিকেই দেখিতেছে।...যাক, জুতার তলায় গোবর লাগে নাই,—সে স্বস্তির নিঃশ্বাস ফেলিয়া বাঁচে।

জেলরসাহেব জিজ্ঞাসা করেন “এ গোবর পরিষ্কার করান নি কেন?”

“হুজুর, কোনো কয়েদী পাওয়া গেল না।”

“কেন, গরু তো লক-আপে-এর পর গেট দিয়ে পাস করেনি।”

আর বেশী কিছু বলিতে হয় না। ভিতরের ওয়ার্ডার নিজেই এই কাজে লাগিয়া যায়। সুবেদার সাহেবের দিন আজ ভাল যাইবে না,—ভোর না হইতেই এই কাণ্ড। জেলর সাহেব ভিতরের দরজা খুলাইয়া জেলের ভিতর প্রবেশ করেন।

বলিয়া গেলেন—“দেখি, আবার ভিতরের ব্যবস্থা কেমন। আপনাদের উপর কোনো দায়িত্ব দিয়ে তো নিশ্চিন্দ হওয়ার উপায় নেই। সাহেবের ঘর আর আফিস-অফিসঘর ঠিক থাকে যেন।”

“হাঁ হুজুর, সে আর বলতে হবে না। সব ঠিক ক’রে রেখেছি।”

সুবেদার সাহেব ওয়ার্ডারকে বলে “পেঁচার মতো মুখ ক’রে কি দেখছো? যাও, দেখ সাহেবের কামরা পরিষ্কার করা হয়েছে কিনা। এই সব নতুন নতুন ‘বাহালী’দের নিয়ে কাজ চালানো শক্ত। কংগ্রেস আন্দোলনের জন্তে যত সব গাড়োয়ান আর “হরবাহা চরবাহা” সব ভর্তি হয়েছে। না বোঝে একটা কথা, না বোঝে নিজের কাজ। একেবারে দিকদারী ধ’রে গেল।”

ছোট হইতে বড় পর্য্যন্ত সকলেই অধস্তন কর্মচারীর সহিত একই রূপ ব্যবহার করে।...

চারটার ঘণ্টা পড়ে। আবার ওয়ার্ডারদের নূতন দল আসে। এক দলে থাকে বাইল জন। একই দৃশ্যের পুনরাভিনয়—সব যেন এক রাত্রের মধ্যে মুখস্থ হইয়া গিয়াছে। যেন রেলস্টেশনের প্ল্যাটফর্ম—কতকলোক গাড়ী হইতে নামিল—কিছু লোক উঠিল—কোলাহল, বিশৃঙ্খলা—আবার যেমন কে তেমন।...দাদা কি সেলের

গরাদ ধরিয়া দাঁড়াইয়া চরমক্ষণে প্রতীক্ষা করিতেছে ? এখন যে চারিটার ঘণ্টা পড়িল তাহা কি দাদা শুনিতে পাইয়াছে ? গেটের উপরের শব্দতরঙ্গ বায়ুমণ্ডলের ভিতর কম্পন সৃষ্টি করিয়া কনডেম্‌ড সেন্স্‌এ পৌঁছিতেছে, আমার চিন্তাতরঙ্গ কি পৌঁছিতে পারে না ? দাদা শেষ মুহূর্তে কাহার কথা ভাবিবে—মা'র, জ্যাঠাইমার না আমার ? আমার কথা ভাবিবে কেন ? নিশ্চয় ভাবিবে। চিন্তা ভরা থাকিবে প্রানিতে বিবাদে, আমার উপর অভিমানে। উহা যুক্তিতর্কের বহু উপরের জিনিষ।... ইহার পর আমার আর পূর্ণিয়ার থাকা অসম্ভব। জ্যাঠাইমাকে মুখ দেখাইব কি করিয়া ? পাড়ার লোকদের সম্মুখে বাইব কি করিয়া ? সাক্ষ্য দিবার পর হইতে এতদিনে এ অবস্থা কতকটা গরিয়া গিয়াছে। কিন্তু মা'র সম্মুখে বাওয়া—সে তো অসম্ভব। দাদার অন্তিম দিনের এই ছবি অপ্রগ্যাণিত ও আকস্মিক নয়। গত কয়মাস হইতেই এই দিনের জন্ম মনকে প্রস্তুত করিয়াছি। মনরে অসময়ে এই চিত্র মনকে ভারাক্রান্ত করিয়া তুলিয়াছে!...“পাকুর মর্ডার কেসে”এর খবর প্রতাহ কাগজে পড়িয়া আমি আর দাদা মাকে বুঝাইয়া দিয়াছি। মা বলেন “মাগো, ভা'য়ে ভা'য়ে এমন হয় নাকি ?”—আর আজ ! এত দিন জনমতকে উপেক্ষা করিয়াছি। কিন্তু এখন মন ভাবিয়া পড়িতেছে কেন ? জনমতকে তাচ্ছিল্য করা চলে, কিন্তু মা'র অব্যক্ত বেদনাভরা দৃষ্টিকে, জ্যাঠাইমার নীরব ভৎসনাকে, উপেক্ষা করা চলে না।...কেন চলিবে না ? Sentimental nonsense...! আমার সম্মুখে বেদনা-জর্জর সমাজের অগণিত কাজ পড়িয়া রহিয়াছে। সমাজের যুগযুগ সংকীর্ণ অশ্রু মুছানোর ভার যাহার উপর হস্ত, তাহার কি সংকীর্ণ গৃহকোণের ছটার বিন্দু তপ্ত অশ্রুর কথা মনে করিলে চলে। খদ্দেরের শাড়ীর অঞ্চল দিয়াই ও কয়েক ফোটা অশ্রু মুছিয়া যাইবে। জীর্ণ কস্থা ও মলিন উপাধান ঐ সানাত্ত কয়েকবিন্দু অশ্রুকে ওপ্তবালুর স্থায় শুষ্কিয়া লইবে। আমার কি ইহার জন্ম পড়িয়া থাকিলে চলে ? এখনও আমি আমার নিজের ভবিষ্যৎ লইয়াই চিন্তিত। আমার কি হইবে, তাহারই মাহাত্ম্য আমার কাছে বেশী, দাদার কি হইতেছে তাহার নয়।...

...কানাইলালের মৃতদেহের ফটোর মুখটা মনে পড়িতেছে। দাদাকেও কি ঐরূপ লোহার ছেঁচারে শোয়াইয়া দিবে? চোখ দুইটা অন্ধনির্মীলিত—অস্তিম শ্বাসগ্রহণের প্রাণপণ চেষ্টার মুখটা বীভৎস হইয়া উঠে নাই—অক্ষিগোলক দুইটা কোটর হইতে ঠেলিয়া বাহিরে আসিয়া পড়ে নাই—শান্ত নিদ্রার ভাব—কেবল গলাটা ফোলা—রক্ত জমিয়া নীল দাগ হইয়া গিয়াছে।...

জেলডাক্তার অঘোরবাবু জেলগেটে প্রবেশ করিলেন। ভদ্রলোক দ্রুত আসিবার চেষ্টায় পরিশ্রান্ত হইয়া গিয়াছেন। কোনো দিকে তাকাইবার অবকাশ তাঁহার নাই। জেলে বোধহয় পাঁচ ছয়জন ডাক্তার আছেন—কিন্তু জেলের বড় ডাক্তার থাকেন সহরে। তাঁহার এখানে কোয়ার্টার নাই, কেননা যুদ্ধের পূর্বে “ডাক্তারবাই জেলসুপারিন্টেণ্ডেণ্ট হইত। অঘোরবাবু আবার কেন আসিলেন? সুবেদার জিজ্ঞাসা করে, ডাক্তারসাহেব, আপনি আবার কেন?

“এই এমনিই এলাঘ।”

সুবেদার সাহেব নিজের ব্যাপারটা বোঝে। আজ সকলেরই ইচ্ছা সাহেবের কাছে নিজের কর্তব্যপরায়ণতা দেখানো। অঘোরবাবুর সহিত আমার পরিচয় আছে। ভাগ্যে আমার দিকে তাঁহার নজর পড়ে নাই—আবার কিনা কি জিজ্ঞাসা করিয়া বসিতেন।...তিনি অফিস ঘরে ঢুকিলেন। জেলর সাহেব ফিবিয়া আসিয়াছেন। তাঁহার ঘরের আলো জ্বলিল—ফ্যান ঘুরিতেছে।...হাফপ্যান্ট ও শাদা হাফশার্ট পরিহিত সুপারিন্টেণ্ডেণ্ট সাহেব আসিয়া পৌঁছিলেন,—সঙ্গে সাদা ও খয়েরী রং মিশ্রিত একটি বুলটেরিয়র। ওয়ার্ডারের মুখে সম্ভ্রান্তভাব...স্মাল্ট...এটেনশন্... কুকুরটা ভিতরে প্রবেশ করিবার পূর্বে একবার কি মনে করিয়া আমার কাছে ঘুরিয়া গেল। ভিতরের ওয়ার্ডার কুকুরের জন্য দরজাটা অর্দ্ধোন্মুক্ত করিয়া রাখিয়াছে। সাহেবের অপেক্ষা তাঁহার কুকুরের উপর জেলকর্মচারীদের আনুগত্য কম নয়—ইহা দেখাইতে সকলেই সচেষ্ট। জেলর সাহেব ঘর হইতে বাহির হইয়া আসিলেন, সাহেবকে অভ্যর্থনা করিবার জন্য। অঘোরবাবুও সেখানে আসিয়া দাঁড়াইয়াছেন। সুবেদার জেলরসাহেবের সম্মান রক্ষার জন্য একেবারে উহার গা ঘেঁষিয়া না দাঁড়াইয়া,

একটু দূরে দাঁড়াইয়াছে। সাহেব হাসিয়া হাসিয়া কি যেন গল্প করিতেছেন, আর অনমনস্ক ভাবে হাতের টর্চটি একবার জ্বলাইতেছেন একবার নিভাইতেছেন। কুকুরটি একবার অফিসঘরে, একবার প্যাসেজে আসা যাওয়া করিতেছে—মশালগুলি স্তব্ধ করিতেছে—সাহেবের কাছে আসিয়া বেন একটা কি খবর জ্ঞাপন করিয়া চিনিয়া গেল।...নৈশ নিশ্চলতা বিদীর্ণ করিয়া মোটর লরীর শব্দ হঠাৎ—নিকটে আসিতেছে—ভেঁা ভেঁা...এত জোরেও মোটর হর্ণের শব্দ হয়—দাদা, মা, বাবা, সকলেই কাণে হয়তো এই শব্দ পৌঁছিল। একখানি মোটর ভ্যান গেটের কিছু দূরে আসিয়া দাঁড়াইল। এই বৃষ্টি উহার দরজা খুলিয়া লাফাইয়া পড়ে, একের পর এক অর্ডা পুলিশ—এবাউট টার্ন—রাইটহুইল। না, কেহ তো নামিল না। সকলে বোধহয় গাড়ীর মধ্যে থাকিয়া গেল। ড্রাইভার গাড়ীর আলো নিভাইল—রাস্তা ও কোর্টারগুলি আবার অন্ধকারে ডুবিয়া গেল। সাহেবের কুকুরটি ডাকিতেছে... কুকুরটি গেটের গরাদের ভিতর দিয়া বাহিরে আসিল—দেখিতেছে তাহার রাজ্যের শান্তিভঙ্গ ঘটাইল কিম্বে। আলোর ঝলক হঠাৎ ফুটলই বা কেন আবার নিভিয়াই বা গেল কেন, তাহারই অনুসন্ধান সে বাহির হইয়াছে।...

রাষ্ট্রের সঞ্চালনচক্র চলিয়াছে, মন্ত্র কিম্ব নিশ্চিত গতিতে—রাত্রিদিন। কবে, কতদিন পূর্বে কোন হতভাগ্য মূর্খ ইহার সম্মুখে মাথা উঁচু করিয়া দাঁড়াইবার ব্যর্থ ভ্রমাসাহস করিয়াছিল। বাহাতে তাহার পুনরাবৃত্তি না হয়, সেই উদ্দেশ্যে নিয়োজিত হইয়াছে দেশব্যাপী ছোট বড় অসংখ্য চক্র। এই ঘটনাকে ও উহার নাযককে নিশ্চল করিয়াই রাষ্ট্রের শান্তি বা স্বস্তি নাই। যে স্বপ্নবিলাস কতকগুলি অর্কাচীন হৃদয়কে উদ্বেলিত করিয়াছিল, ভবিষ্যতে যেন তাহা ভয়ে আড়ষ্ট ও পঙ্গু হইয়া যায়—ইহাই তাহার কাণ্ড।...কোরহা থানা, বেকটেশ্বর দারোগা, ফৌজদারী, মেসনস কোর্ট, সরকারী উকীল, জঙ্গসাহেব, সরকারী সাক্ষী নিলু, জেলকর্মচারীগণ,—মালায় একের পর এক নানা রঙের পুঁথি গাঁথা হইয়া চলিয়াছে, এক স্থির উদ্দেশ্য লইয়া। যে উদ্দেশ্যে ইহারা নিয়োজিত সেই চরন মুহূর্তের আর কতটুকুই বা দেবী?... কেবল ঘটককে দায়ী করিলে চলবে কেন? এই বর্ষরত্নার নৈতিক দায়িত্ব জঙ্গ

হইতে আরম্ভ করিয়া ওয়ার্ডার পর্যন্ত সকলেরই সমান।...এই বিশেষজ্ঞের যুগে, কেহই নিজের সীমিত ক্ষেত্রের বাহিরে তাকায় না। সে নিজে যন্ত্রের যে অংশের জ্ঞান দায়ী, তাহা ভালয় ভালয় চলিয়া গেলেই হইল। বিরাট সঞ্চালন শক্তির উৎস কোথায় তাহাতে তাহার প্রয়োজন কি? এন্জিন হইতে বেল্টিং দিয়া এই শক্তি-অংশতঃ তাহার কাছে পৌঁছিলেই হইল। তাহার পর সে তাহার অর্ধপ্রস্তুত কাঁচামাল, তাহার পরের স্থানে পৌঁছাইয়া দিবে। এতদূর পর্যন্ত যত হাত যুরিয়া ব্যাপারটি আসিয়াছে, উহার সর্বত্রই রাষ্ট্রদানবের নগ্নতা ও বর্করতা চাকিবাবর একটি প্রয়াস ছিল। কিন্তু এখন এমন স্থানে পৌঁছিয়াছে, যেখানে আর চক্ষুজ্জ্বার অবকাশ নাই! Crush or be crushed :—জগন্নাথের রথ নিজ গতিব গর্ভে চলিতেই থাকিবে। চাকার নীচে নিশির ডাকে আবিষ্ট কোনো হতভাগ্য চূর্ণ বিচূর্ণ হইয়া গেল কিনা তাহা জানিবার জ্ঞান উহার বিন্দুমাত্র আগ্রহ নাই। শ্রেণীস্বার্থের ষ্টীমরোলার পথের উপর দিয়া অনবরত চলাইতে হইবে। বিরাম দিলেই আগাছা মাথা চাড়া দিয়া উঠিবে।...আশ্রমে চুকিবাবর রাস্তাটা দাদার নিজের হাতে তৈয়ারী করা। দুই পাশে রজনীগন্ধার কেয়ারী। সময় পাইলেই নিড়ানী লইয়া দাদা রাস্তার উপরের ঘাস ও আগাছা তুলিতে বসিয়া যায়।—...একটি সাদা খদরের গেঞ্জি।...

আর একখানি মোটরকার আসিয়া দাঁড়াইল। উর্দী পরা চাপরাঙ্গী দরজা খুলিয়া দেয়। ছাটকোট পরিহিত ভদ্রলোক—মুখে চুরুট—সিভিল সার্জন। সুপারিন্টেন্ডেন্ট সাহেবের দল তাঁহাকে অভ্যর্থনা করে...

সিভিলসার্জন বলেন “আমার দেয়ী হয়ে গেল নাকি? আমার জ্ঞান অপেক্ষা করছেন না তো?”

“না না এখনও ম্যাজিস্ট্রেট এসে পৌঁছান নি।” সুপারিন্টেন্ডেন্ট রিষ্টওয়াচ দেখে। মুখে বিরক্তির ভাব। “আমুন ঘরে বসা থাক।” চেয়ার টানিয়া লইবার শব্দ হইল। ঘরের ভিতর হইতে গল্পের মূহ গুঞ্জন ভাসিয়া আসিতেছে। আবার মোটরহর্নের শব্দ হইল একখানি গাড়ী আসিয়া দাঁড়ায়। হাফপ্যান্ট

পরিহিত একজন অল্পবয়স্ক ভদ্রলোক, গাড়ী হইতে লাফাইয়া নামিলেন। তিনি দৌড়িয়ে জেলগেটে প্রবেশ করিতেছেন। জেলর সাহেব তাঁহাকে অভ্যর্থনা করিতেছেন।

“না না, আপনার দেবী হয়নি। আমরাই—আমরাই তাড়াতাড়ি এসেছি। ডাক্তার ও সুপারিন্টেন্ডেন্টও ঘরে আপনার জন্ত অপেক্ষা করছেন। চলুন ঘরে বসবেন।”

ঘরে আর বাইতে হইল না। সুপারিন্টেন্ডেন্ট, সিভিলসার্জন সকলেই জেলের ভিতরে প্রবেশ করিবার জন্ত প্রস্তুত হইয়া ঘরের বাহিরে আসেন। একে একে সকলে ভিতরে প্রবেশ করে। দরজাটি অচুচ...সকলকেই মাথা নত করিতে হইতেছে।... দিল্লী দরবারে এইরূপ একটা গেটের কথা শুনিয়াছিলাম। কোথাকার রাজা যেন ইহাকে অপমান মনে করিয়া আসেন নাই।...যশপুরির অধিকার একে একে সুপারিন্টেন্ডেন্টের দলের সকলকে গ্রাস করে।...এখন এখান হইতে পলাইয়া গেলে কেমন হয়।...শব্দেহের দিকে আমি তাকাইতে পারিব না। এখান হইতে পলাইয়া গেলে কেহ লক্ষ্যও করিবে না।...ন্যাভিগেটের ছকুমটী জেলের লোকদের দেখাইতে হইবে। তাহা না হইলে তাগারা আনাকে শব্দেহ দিবে কেন?...কোথায় গেল কাগজখানি? কোনো পকেটে তো নাই দেখিতেছি। কি হইল? বাড়ীতে ফেলিয়া আসিলাম নাকি? তাহা হইলে তো এখনই বাইতে হয়। বাক ভালই হইল। না পাইলেই ভাল হয়।...পরের ট্রেনে পাটনার কিয়া বোম্বাইয়ে চলিয়া গেলে কেমন হয়? আমার দলের intellectual কমরেডদের সহিত সাক্ষাৎ করা বড়ই প্রয়োজন।...না এইতো কাগজখানি পকেটে আছে...কাল নিজে হাতে এই পকেটে রাখিয়াছি। বাইবে কোথায়? অথচ এখনই সব পকেট খুঁজিয়া দেখিয়াছিলাম...কোথাও পাই নাই।

সুবেদার সাহেবের মুখের দিকে দৃষ্টি বার। সেও আমার দিকে তাকাইয়াছিল। সে চোখ ফিরাইয়া লয়। আর সে আমার দিকে তাকাইতে পারিতেছে না।

দূরে মনে হইতেছে দুই একজন করিয়া লোক জড় হইতেছে। আর্মড পুলিশের

ভয়ে বোধহয় বেশী লোক আসে নাই। না হইলে তো এইস্থান এতক্ষণে লোকে-লোকারণ্য হইয়া যাওয়া উচিত ছিল। একটি কোয়ার্টারে দরজা খুলিল। সকলেই বোধহয় শব্দেহ দেখিতে উৎসুক।.....নানার গলায় একটি কালো তিল আছে।.....শীতকালে যে গেরুয়াধারী, পাঞ্জাবী জ্যোতিবীর দল প্রতিবৎসর পূর্ণিমা আসে তাহাদেরই একজন সেবার আমাদের আশ্রম আসিয়াছিল।...আসিয়া বিকৃত উচ্চারণে ঈষৎ হাস্যের সহিত বলিল—আমি ‘ফারচুন টাইলর’। সে দাদার আপত্তি সম্বন্ধে তাহার হাত দেখিয়া বলিয়াছিল যে আশী বছর দাদার পরমায়ু।...সব ভণ্ড মিথ্যাবাদীর দল।...দাদা তাহার কথা শুনিয়া হাসিতেছে, আর বলিতেছে “এটা কংগ্রেস অফিস। আমরা কিন্তু তোমার এই কষ্টস্বীকার করার জন্ত পয়সা দিতে পারবো না।”

আচ্ছা, দাদা যদি ভয়ে অজ্ঞান হইয়া যায়। তাহা হইলেও কি ইহারা সেই অবস্থাতেই ফাঁসীকাঠে বুলাইবে নাকি? তা কি হয়?.....ফাঁসীর রজ্জু লইয়া ‘মেট্’ ও ‘পাহারা’ কাড়াকাড়ি করিতেছে। সেবারের জেলের কথা মনে পড়িতেছে.....দড়িটাকে উহার খণ্ড খণ্ড করিয়া কাটিবার চেষ্টা করিতেছে। মস্তক চর্বিমাখানো দড়ির উপর ভোঁতা লোহার পাতটি পিছলাইয়া বাইতেছে।...ভাগ্যবানেরা এক এক টুকরা পাইল।...উহা দিয়া নাকি আশুফলপ্রদ বশীকরণ করা হয়।.....

এইবার ভিতরের ফটক খুলিল! সুপারিন্টেণ্ডেন্ট, ম্যাজিষ্ট্রেট, সিভিলসার্জন—জেলর—অঘোরবাবু, এসিষ্টেন্ট জেলর,—ওয়ার্ডার, ওয়ার্ডার, ওয়ার্ডার কুকুর, ওয়ার্ডার, ওয়ার্ডার—

সকলেই যেন জোর করিয়া মুখে হাসির ভাব আনিতে সচেষ্ট। দেখাইতে চায় যে এই সামান্য ঘটনার সে কিছু মাত্র বিচলিত হয় নাই। ইহাতে তাহাদের চা খাইবার সন্ন দেয়ী হইয়া গেল মাত্র। সুপারিন্টেণ্ডেন্ট, সিভিলসার্জন আর ম্যাজিষ্ট্রেটকে নিজের বাংলোর চা খাইতে অমরোধ করেন। গেট খোলা হয়।

রুটী আগে আগে পথ দেখাইয়া চলে। মোটরকার দুইখানি তাঁহাদের পিছনে
গানে বাংলোর ধারে গিয়া দাঁড়াইল। লরীর ড্রাইভার তৈয়ারী হইয়া ষ্টিয়ারিং
ধরিয়া বসে। গুয়ার্ডার ভিতরের দরজা এখনও একটু ফাঁক করিয়া ধরিয়া
থমাছে।...এই বৃষ্টি আসিয়া পড়ে— এই মুহূর্তে...

“আরে, বিন্ বাবু যে, নমস্কার! এত ভোরে এদিকে কোথায়?
টার্ভিউ-এর তদ্বারে বৃষ্টি? সি-আই-ডি তো আটটার আগে আসে না।
মুন আমার বাড়ীতে। ততক্ষণ চা-টা একটু খেয়ে নেওয়া যাক, কি
ন?”

অধোরবাবু আমাকে উত্তর দিবার সুযোগ দেন না। অতি কষ্টে কোনোরকমে
“না, ইনটারভিউ-এ আসিনি।—এসেছিলাম—আজ দাদাব—ইয়ে...” আর
বাহির হয় না। ঠোট কাঁপিতেছে কিন্তু কথা বাহির হইতেছে না। কে
দুট হস্ত গলাগী চাপিয়া ধরিয়াছে। আমার চোখেও জল আসিয়া গেল।
দিকে তাকাইয়া কোন রকমে ম্যাজিষ্ট্রেট সান্তেবের চিঠিখানি তাঁহাকে দিই।
বাবাবু চিঠি পড়িতেছেন। চোখের জল মুছিয়া ফেলি।

“আরে, তাই বলুন! কেন, আপনারা শোনেন নি?” তিনি আমার গলা
ধরিয়া ধরিয়াছেন।

“গভর্ণমেন্টের চিঠি এসেছে যে, ফাঁসীর অর্ডার তো এখন মুনতুগী থাকবে।”
এ—কি বলে! অধোরবাবু পাগল হইয়া গিয়াছেন নাকি! তাঁহার হাত
গী চাপিয়া ধরি। তিনি বলিয়া চলিয়াছেন—

‘মিলিটারী এলাকা ছাড়া ভারতবর্ষে আর সর্বত্রই আগষ্ট আন্দোলনের
স্বাবটেজের অন্ত বাদের উপর ফাঁসীর হুকুম হয়েছে, তাদের ফাঁসী অনিশ্চিত
না। জন্ত স্থগিত হয়ে গিয়েছে। মাঝে কয়েকটা ফাঁসী এই অর্ডারের আগেই
জায়গায় হয়ে গিয়েছে। বাদের উপর গার্ডার চার্জ ছিল তারা স্বাধীনতা
য়ের মধ্যে পড়ে না।...আজ ফাঁসী ছিল একজন সাধারণ কয়েদী। সে
তা তিন নম্বর মেলে। পঞ্চ এসেছে। আপনার দাদাকে আর এক নম্বর

জেল গেট

সেল থেকে সরানো হয়নি। কি দরকার, মিছে হাঙ্গামা বাড়িয়ে। সেইট misunderstanding হয়েছে। আর ফাঁসীর তারিখ তো আগে থেকে কয়েদীদের বলার নিয়ম না। আন্দাজেই জেলের লোকে যেটুকু ঠিক ক'রে পারে। সেইজন্যই আপনারা ভুল খবর পেয়েছেন।”.....

আমার কথা বলিবার ক্ষমতা লুপ্ত হইয়াছে।...ভাব শাস্ত। ধমনীতে প্রবাহও বোধহয় বন্ধ হইয়া গিয়াছে। গাছের পাতার স্পন্দনটা পর্যন্ত গ্রহণশীল গতি ভুলিয়া স্থির হইয়া দাড়াইয়াছে।...বীরভোগ্যা বসুন্ধরার মূর্তি।—নিশ্বাস লইতে ভয় হয়—উমার তপশা বুঝিবা ভাঙিয়া যায়।.....

...ধমনীর স্পন্দন আবার আরম্ভ হয়। গাছে পাখীর কাকলী—পাতায় প্রভাত সমীরের দোলা—লাগ্নময়ী পৃথিবী আবার নানা ছন্দে লীলায়িত উঠিয়াছে।.....পাথরের জেলগেটের উপরতলায় হঠাৎ উষার আরম্ভিম ব মধুর ঝলক লাগে।

সমাপ্ত

